

朝鮮群書大系續々第八輯

東文選一

朝鮮古書刊行會

大正三年七月一日印刷
大正三年七月五日發行

會員豫約費一冊金參圓
會員 外一冊賣價四圓

朝鮮京城旭町二丁目六十八番地

朝鮮古書刊行會代表者
編輯兼發行者

釋尾春 栝

朝鮮京城明治町一丁目日韓印刷株式會社

印刷者 金崎金平

朝鮮京城旭町二丁目朝鮮雜誌社

發行所 朝鮮古書刊行會

電話一千二百五十番
振替口座京城一三一番

朝鮮京城明治町一丁目

印刷所 日韓印刷株式會社

朝鮮京城本町二丁目

豫約並發賣取次店 日韓書房

東京市神田表神保町

豫約並發賣取次店 同文館

東文選第一輯目錄

卷第一

辭

賦

卷第二

賦

卷第三

賦

卷第四

五言古詩

卷第五

五言古詩

卷第六

七言古詩

卷第七

七言古詩

卷第八

七言古詩

卷第九

五言律詩

卷第十

五言律詩

卷第十一

五言排律

卷第十二

七言律詩

卷第十三

七言律詩

卷第十四

七言律詩

卷第十五

東文選第一目錄

七言律詩

卷第二十三

卷第十六

詔勅

七言律詩

教書

卷第十七

卷第二十四

七言律詩

教書

卷第十八

卷第二十五

七言排律

制誥

卷第十九

已上

五言絕句

七言絕句

卷第二十

七言絕句

卷第二十一

七言絕句

卷第二十二

七言絕句

六言

東文選第一輯

東文選卷之一

辭

和歸去來辭

李仁老

歸去來兮。陶潛昔歸。吾亦歸。得隍鹿而何喜。失塞馬而奚悲。蛾赴燭而不悟。駒過隙而莫追。纔握手而相誓。未轉頭而皆非。摘殘菊以爲飡。緝破荷而爲衣。旣得反於何有。誰復動於立微。蝸舍雖窄。蟻陣爭奔。蛛絲網扇。雀羅設門。臧穀俱亡。荆凡孰存。以神爲馬。破瓠爲樽。身將老於菟裘。樂不減於商顏。遊於物而無忤。在所寓以皆安。鱗固潛於尺澤。翅豈折於天關。肯逐情而外獲。方收視以內觀。途皆觸而無礙。興苟盡則方還。鵬萬里而奚適。鷦一枝而尙寬。信解牛之悟。惠知斲輪之對桓。歸去來兮。問老聃之所遊。用必期於無用。求不過於無求。化蝶翅而猶悅。續鳧足則可憂。閱虛白於幽室。種靈丹於良疇。幻知捕影。癡謝刻舟。保不材於櫟社。安深穴於神丘。功名須待命。遲嘆宜歸休。任浮雲之無迹。若枯槎之泛流。已矣乎。天地盈虛。自有時。行身甘作賈胡留。遑遑接浙欲安之。風斤思郢質。流水憶鍾期。尿死灰兮奚暖。播焦穀兮何耔。第寬心於飲酒。聊遣興

於作詩望紅塵而縮頭。人心對面真九疑。

山中辭

李 稽

山之幽兮深深，鬱蕭森兮潭潭。黃鵠尙不得過其顛兮，截然屹立乎巖巖。蓬莫莫，覩兮山之陰，曖霜露兮濡霑。文豹玄猿兮迭出以暉，飛禽回翔兮毛羽之毳。毳殷其雷奔于無底之竇兮，振蕩林莽翼之以飛廉。石出角以鈎衣兮，橫枝截路以相攙。立寂漠以無隣兮，悅祁招之愔愔。豈不可討兮山之中，東西冥迷兮氣奄奄。淙飛泉以瀉于崖兮，清肺腑而味甘。掬之手中兮冰寒，照衰顏以是監。爰流憇以聽其聲兮，鏘玉佩之相參。將敲火而煎茶兮，鄙陸羽之口饑。羨盤谷之可沿兮，矧其文爲我之指南。續道緒於千載兮，乃命其溪曰濂。惟山中之無偶兮，尙摳衣於丈函。聞一言以悟道兮，洗利欲之貪婪。開心源之整淨兮，惟太極之泳涵。若有遇於介然之頃兮，諒天地其可三。胡唐虞之遺墟，蔓草寒烟兮。吾道被于南，炎胡泓渟之而不霈兮，朔雪越嶺之交粘。信餘緒可以理天下兮，魯齋獨騁其征驂。然波及者靡不周兮，夫何恨於商參。惟後生之可畏兮，青乃出乎其藍。幸其道之揭日月兮，吾依光兮心焉甘。將忘勢而內樂兮，日嘯倚於南欄。苦相招而不止兮，忽軒眉而載瞻。款初心之弗竟兮，終歲月以聊淹。

閔志辭

閔予志之溫蠖兮，非厥初之有常。慨因物以興懷兮，惟是非之失當。滃雲霧以

晝晦兮將宴息以在床。月皎皎而天淨兮。將顛倒其衣裳。夫晨夜之截然有限兮。折柳樊圃而瞿瞿之狂。胡老入于幽谷兮。赧一揖於陳良。爾雅蟲魚之消耗兮。匪有損其何傷。胡詩書之膏腴兮。亦憔悴而無光。悲參商兮孔孟想髣髴兮。虞唐若可續兮。卒莫可續。頽乎將戢而復揚。竟不聞兮警欬。杳不見兮羹墻。爰舒徐以視履兮。罔其旋於考祥。好色惡臭紛乎其不決兮。宜鬼域之彷徨。惟人天之大道顯而不隱兮。胡求之於渺茫。歲月荏苒以相代兮。衰老侵尋而欲僵。甘草木之同腐兮。忽驚嘆而內傷。貽好音兮春禽送悲聲兮。寒蟄諒須臾之聞耳兮。付一晒於亡羊。哀吾辭之匪足博兮。聊澆之以羽觴。忘形骸以放浪兮。泝馮翼之玄黃。天何言兮物之形。文在茲兮聖道以彰。我辭蕪兮翳天庭。誓刪繁兮立良。

永慨辭

興言蹙口以出聲兮。人謂我其宣驕。辯之好以明道兮。人謂我其謔。追明良之歌以矢厥躬兮。人謂我其長謠。思鳳凰之飛于千仞兮。人謂我其難要。惟鷗鴉之壞我室兮。人謂我其相嘲。鄙塵寰之局促兮。人謂我其飄搖。隘名教之準繩兮。人謂我其逍遙。入我室以宴息兮。婦姑婢僕以膠膠。對聖賢於黃卷兮。若蠨螋於沈寥。杳莫尋其聲影兮。覩面目之奚邀。矧微辭之及於耳兮。味絕響於媿姚。欲出戶庭以長騁兮。先駮駮與騾騾。悵荆棘之翳脩道兮。回予轡以無聊。

人謂我其無用兮。斯其學之殺也。人謂我其無體兮。斯其行之澆也。人謂我其素淪兮。我實甘其招也。惟立言之最末兮。兀流涕而頤交。夫脩功必因人兮。非厥幸之可徼。夫何德之不知修兮。人謂我其難料。彼昏不知兮。舍是正直。宜其冥趨而陷于淫。悞也。爾既悔兮。猶豫之如斯。宜乎人謂我其難料。千載而有人兮。想永慨於中宵。

流水辭

水之趨兮。惟下。日百折兮。不舍。不入于海兮。何科之停。盈必進兮。誰稅其駕。彼行潦之靡不源兮。尙逞威於大雨之炎夏也。勢暫似兮。旋踵猶足。夸於鄙者也。吾寧不食於井之潔兮。大虛日星之倒寫也。矧雜穢之不并兮。夫何滌而何瀉也。毋航斷港兮。恐其窒也。毋踵弱水兮。恐其溺也。迺從而亂之曰。性一兮。淑慝之胡形。才一兮。取舍之是嬰。澗泉之幽幽。江海之冥冥。我歌其中兮。鬢毛之星。千載有人兮。有耳其聆。

東方辭

送鄭達可奉使日本國

瞻東方之有君兮。肇大始以自尊也。其人佩義而服仁兮。厥氣勁而詞溫也。越世道之升降兮。尙剛烈而專門也。其輕生而敢死兮。何北宮黜之足言也。傲周季之戰國兮。凜凜乎使人毛豎而驚魂也。嗟來不食兮。睚眦必報。上忘父兄兮。下忘後昆也。矧妻孥與輿臺兮。視之不啻犬豚也。蓋此身兮。漸盡。羌名譽兮。求

存也。士可殺不可辱兮，辱衣冠痛在國也。劓于民而陶俗兮，亦其宜而何責也。極而固有不變兮，揖讓或在於旦夕也。中華衣冠之幾更制兮，我迺猶夫古昔也。舟車所至之必通兮，我迺足不踰闕也。日出處之天子兮，奄宅扶桑之域也。惟萬物之生育兮，迺谷風之習習也。惟下土之照臨兮，迺陽鳥之赫赫也。二者之所出兮，信天下之無敵也。胡群兇之竊發兮，至于今其猖獗也。播惡名於天下而既稔兮，志士仁人莫不爲東方惜也。是將動天下之兵端兮，不疑又何卜也。輔車相依兮，虞虢是監。楚國亡猿兮，禍林木也。既交聘兮，或不以情。上有神明兮，司正直也。今其權兮，有所在。子其慎兮，飲食也。少思慮兮，興居。保厥躬兮，供厥職也。零予詞兮，筆力衰。言有盡兮，意無極也。

白訟辭

汝之軀矮而陋兮，人視之若將仆也。視既短而聽又瑩兮，中人聲而左右顧也。驚麕駭鹿之入于市兮，孰肯從而相友。雖幸聚而乍成，懼兮。倏背焉而旋詬，出肺腑肉以求可兮。藐異馳而莫之遇，柔爾顏兮。甘爾言，瀉真情之繼吐。猶北轅而適楚兮，夫誰鏃而誰羽。舒憂娛悲之何所兮，豁茫茫其天宇。惟情親之乖離兮，杳暮雲而春樹。觀吾身於霄壤兮，吹毛一於牛九。疇其置齒牙間兮，抑難知其所否。豈予德之回譎兮，予則懷其純一也。豈予行之奇邪兮，予則視其正直也。豈予言之訐詐兮，予則師其悃愾也。豈予學之鹵莽兮，予則底于其極也。豈

予政之多疵兮，予則蹈夫繩墨也。惟吾之顛頓狼狽兮，莫知主善之克一也。夫惟一之罔知協兮，禽獸之歸而何擇。宜仁人之不齒兮，罔之生也是敵。胡反觀之不蚤兮，上帝臨之而赫赫也。其循循而蹈禮兮，則不違於咫尺也。引罪辜以謝過兮，孰既往之追責。貸予褒兮，何欣。附予毀兮，何怵。雍容袍笏之班兮，不識不知而順帝之則也。

哀秋夕辭

李崇仁

哀秋夕之慘悽兮，風雨颯其晦冥。懷沉憂以假寐兮，魂耿耿其上征。指虛無以恍忽兮，若有路乎紆縈。忽焉升彼蒼兮，儼玉皇之高居。門四闢以招徠兮，孰云却步而越趨。入余跪而陳辭兮，皇爲之色敷腴。曰下土之微臣兮，心苑結猶未得信。曩余僅免襁褓兮，動必師乎古之人。惟仲尼之垂訓兮，殺身以成仁。志士不忘在溝壑兮，子輿昧夫斯言。寧力不足而或斃兮，羌佩服以拳拳。忠君與愛國兮，志專專其靡佗。何時俗之險巇兮，學曲而心阿。視余猶机上鬻兮，旣鼓吻又磨牙。彼讒諛之得志兮，自借徇人國也。雖萬死余無悔兮，恐此志之不自也。時陟高以瞰遠兮，余舍此而安適。惟皇德之孔仁兮，拯余乎陸之沉。涕洟交以雨滂兮，審心噎而欽欽。皇愍余之深衷兮，徠爾聽我辭。所貴學之道兮，能變通而推移。日中則昃兮，月盈而虧。天道亦不可久常兮，在人事其何疑。世旣惡夫方兮，爾何惜乎爲圓。世旣尙夫白兮，爾胡獨守此玄。我哀爾之遭罹兮，亦惟爾

之故也。欲去危以就安兮，盍反爾之道也。余默退而靜思兮，皇恩之罔極也。竊不敢改余之初服兮，固長終乎窮阨。前余生之千古兮，其在後者無窮。矢余志之不迴兮，仰前脩而飭躬。世賢賢莫我知兮，庶憑辭以自通。

思美人辭

寄浙東
鄭士安

鄭夢周

思美人兮如玉，隔蒼海兮共明月。顧茫茫兮九州，豺狼當道兮龍野戰。緹余馬兮扶桑，悵何時兮與遊。講進以禮兮退以義，搢紳笏兮戴華簪。願一見兮道余意，君何爲兮江之南。

江之水辭

鄭道傳

江之水兮悠悠，泛蘭舟兮橫中流。高管激噪兮歌聲發，賓宴譽兮獻酬。或躍兮錦鯉，飛來兮白鷗。煙沉沉兮極浦，草萋萋兮芳洲。覽時物以自娛兮，塞忘歸兮夷猶。景忽忽乎西馳兮，水泔泔兮逝不留。曾歡樂之未幾兮，隱予心兮懷憂。嗟哉盛年不再至兮，老將及兮夫焉求。軒冕兮儻來，富貴兮雲浮。惟君子所重者義兮，名萬古與千秋。舉一杯以相屬兮，庶有企兮前修。

賦

仲尼鳳賦

金富軾

仲尼乃人倫之傑，鳳鳥則羽族之王。何其名之稍異，含厥德以相將。慎行藏於

用捨之間。如知出處。正禮樂於陵遲之後。似有文章。夫子志在春秋。道屈季孟。如非仁智之物。孰肖中和之性。相彼鳳矣。有一時瑞世之稱。此良人何。作百世爲師之聖。于以其文炳也。吾道貫之。揚德毛而出類。掀禮翼而聘時。金相玉振之嘉聲。八音逸響。河目龜文之偉表。五彩雄姿。斯乃祖述憲章。東西南北。踰踰乎仁義之藪。翻翻乎詩書之域。過宋伐樹。應嫌栖息之危。在齊聞韶。若表來儀之德。則知非形之似。惟智所宜。游於藝而不遊於霧。至於邦而不至於歧。受饒瓦甌。乃是不貪之食。興儒縫掖。那云何德之衰。蓋進退闇如。屈舒鳩彼。昇公傾蓋。兮諒以不似。伯鯉趨庭。兮堪云有子。樂稱堯舜。歸好生惡殺之時。無道桓文。遠毀卵覆巢之里。於戲巖巖德義。皓皓威儀。高尼山之岐嶷。非丹穴之棲遲。衰周之七十諸侯。鴟臬竟笑。闕里之三千子弟。烏雀相隨。小儒青氈。早傳。鏤管未夢。少年攻章句之彫篆。壯齒好典謨而吟諷。鑽仰遺風。教教。深期於附鳳。

啞鷄賦

歲崢嶸而向暎。苦晝短而夜長。豈無燈以讀書。病不能以自強。但展轉以不寐。百慮縈于寸腸。想鷄峙之在邇。早晚鼓翼以一鳴。擁寢衣而幽坐。見牕隙之微明。遽出戶以迎望。黍昂澹其西傾。呼童子而令起。乃問雞之死生。既不羞於俎豆。恐見害於狸猩。何低頭而瞑目。竟緘口而無聲。國風思其君子。嘆風雨而不已。今可鳴而反默。豈不違其天理。與夫狗知盜而不吠。貓見鼠而不追。校不才

之一揆。雖屠之而亦宜。惟聖人之教誠。以不殺而爲仁。倘有心而知感。可悔過而自新。

畏賦

李奎報

有獨觀處士。杜門端居。常若有畏。顧形而畏。顧影而畏。舉手動足。無一不畏。冲默先生。造焉問其所以。處士曰。堪輿之內。物孰無畏。戴角插牙。翼被足趨。蠕蠕蠢蠢。厥種繁熾。慳生嗇命。各善非類。鳥畏鷹於天。魚畏獺於水。兔畏獾。狼畏兕。鹿脅于獮。蛇懼于豕。猛莫猛兮。虎豹。遇狡獬而奔避。何茲類之孔多兮。羌難覩縷而備記。物固然矣。人亦有焉。莫尊者君。猶畏上天。祇栗齊肅。夙夜以虔。惟君惟臣。若堂陛然。由陛及地。窟崇亦懸。卑者畏高。後者畏先。揆尺計寸。莫不畏旃。胡世路之嶮巖兮。紛理緒之倒顛。冠苴履兮。在底。甗先鼎兮。居前。跛驢蹠踣兮。將白蟻共軋。攀糜瞠眙兮。與子都同筵。下慢而凌上。佞近而疎賢。鑽皮之謗。口熾。射影之毒。遐羗。矧予瑣屑之微質兮。跡有衆之攸寔。彼巧我拙。我一彼千。踏地生梗。皆成畏途。苟縱驅而不懼兮。殆十步而九擠。慄乎懼乎。能不畏乎。吾將介立高蹈。背耦離徒。遊乎壙垠之墟。子以爲何如。冲默先生。傲然憑几而笑曰。僕則異於是。上天之威。吾不畏矣。萬乘之貴。吾不畏矣。暴客攘臂。吾不畏矣。猛虎切齒。吾不畏矣。言未既。處士愕然起曰。過矣。子之不自揆也。何談之容易哉。於皇上帝。降監善惡。設或震怒。雷霆暴作。烈風聞之。飛沙走石。盲海聳山。激薄

忽霍電刃所掣。遺光儵爚。劃若天裂。剗似地拆。擊大丁以增威。雖周成猶褫魄。皆失匕以罔圖。孰倚柱而自若。是上天之威赫赫也。子言無畏何也。先生曰。守正不欺。則天不吾威。吾何畏于茲。處士曰。金床晃晃。幄坐密勿。嚴更巡于徼道。羽林列於雙闕。參旗井鉞。出警入蹕。左憲臺兮凜鐵冠。右執法兮秉丹筆。肅肅謠謠。百辟咸秩。於是振雪霜於威怒。馳風雷於咄叱。一有不恪。族赤禍溢。是天子之威栗栗也。子亦無畏耶。先生曰。夫君尊臣卑。勢若冠履。居下事上。趨蹌中矩。望則跽脚。拜則頓首。聞命益僂。當局善守。若此則君何威爲。臣何畏有。處士曰。若夫賁育之輩。怒而狼顧。一哂一哂。風激雲驚。白曰刺人。血流市路。餘威未滯。飛揚跋扈。目欲裂兮星迸。髮直衝兮棘豎。足踏虎兮截皮。手拉熊兮裂股。小項莊之劍舞。卑藺生之睨柱。此刺客之強暴也。子亦無畏耶。先生曰。唾面待乾。出勝俛就。虛心而行乎世。我不彼忤。彼何自怒哉。此亦無足畏也。處士曰。乳虎出穴。擇肉舐血。淬牙磨爪。其聲鎗爨。一嘯兮風生。一嚙兮電警。不翼而飛。萬里一輟。雖馮婦之善搏。亦神喪而氣奪。此猛虎之咆勃也。子其何如。先生曰。有挾有設。此不足愕也。處士曰。然則子之所畏果何物乎。有乎。無乎。先生曰。僕亦安得而無乎。僕之所畏。不在諸物。特關於己。俯頷戴鼻。中齟外哆。一闔一關。維門之似。物入由是。誠不可不有。而亦不可不畏之地也。銘可鑒兮金緘口。詩可觀兮垣屬耳。一語一默。榮辱所自。食其以之而烹。伍被以之而死。禍衡以之而敗。

身灌夫以之而棄市。是以聖人不畏於人，唯畏於口。苟慎於其口，於行世乎何有。今處士騁舌吐辭，鋒攢屑霏，談世路之險易，議人閒之是非，誠辨則辨矣，奇而又奇。然口能覆身，言出禍隨。子以此求免於時，亦猶擊鼓而求亡者也。何其益於迅馳哉。僕竊笑處士聲其畏而實無有也。惡其禍而祇自招之。處士聞之，避席逡巡，聳然作貌曰：小子不肖，今聞先生之教，曉然若披盲而見大曜也。

夢悲賦

有美王孫，蟬聯茂族，邈風流之可愛兮，顏又澤腴兮如玉。出擁高蓋，入處華屋。舞如意兮，碎珊瑚。會何蕪乎心曲。後房蛾眉，簪翠曳縠，爛盈盈兮更侍。擘然珠佩之相觸，目倦乎華靡。耳慣乎絲竹。冬而至於涼，不知其凝嚴。夏而至於溫，不知其暑溽。又安知人生有羈窮困，躓憂愁哀怨之屬哉。當春陽之既舒兮，感芳華之蕩意。召賓友於華堂兮，玉爲簪兮珠爲履。酌芳醕兮行金鍾，莫不濡首而霑醉。焚綠桂兮繼頽光，尙歡樂之未已。條春宵之易闌兮，落月窺窻兮嫵媚。忽體倦以神疲，遂頽然兮就寐。博山熏兮噴香炷，斗帳垂兮掩綺被。赤羽奮迅登扶桑兮，尙雷鳴而酣睡。於是恍然惚然，夢遊乎廣漠之墟，無人之地。四顧茫茫，不見阡里。深江自波，灌木叢倚。野草少色，危石如墮。日掩掩兮沉紅，煙冥冥兮疊翠。猿哀哭兮相弔，衆鳥啾啾兮不止。慘然思家欲亟還兮，迷不知兮路何自。念嬪御兮安在，掩翠衫而拭淚。登崇阿以延佇兮，鬱千峰之邈迤。披蒙茸兮尋

崎嶇慮鬢鬻之攸庇。僕奔還以降隴兮。墳壘壘兮錯峙。上有蹲狐與伏兔兮。紛侶集兮族戲。拂頽碑以俯窺兮。伊昔綺紈之公子。歌堂舞館屬何人兮。爲此一丘兮。山之趾富貴兮如浮。瓊華兮易悴。弔斯人以彷徨兮。益淒切以酸鼻。足累齒兮無攸歸。飢與渴兮交至。俄欠伸以忽寤兮。喜窓櫳之猶是。顧尙臥於一床。夫何爲此遐遊。以須臾之一夢。悟榮辱之相酬。王孫兮可以銘肌。永不忘貧賤。鬻離者之憂。

放蟬賦

彼黠者蛛。厥類繁滋。孰賦爾以機巧。養丸腹於網絲。有蟬見絀。其聲最悲。我不忍聞。放之使飛。傍有人兮。誰氏子。仍詰予以致辭。惟茲二物。等蟲之微。蛛於子何損。蟬於子何裨。惟蟬之活。乃蛛之飢。此雖德君。彼必寃之。孰謂子智。胡放此爲。予初矚額而不答。俄吐一言以釋疑。蛛之性貪。蟬之質清。規飽之意難盈。吸露之腸何營。以貪污而逼清。所不忍於吾情。何吐緒之至纖。雖離婁猶不容睛。矧茲蟲之不慧。豈覘視之能精。將飛過而忽睨。趨拍拍以愈嬰。彼營營之青蠅。紛逐臭而慕腥。蝶貪芳以輕狂。隨風上下以不停。雖見罹而何尤。原厥咎本乎有求。獨汝與物而無競。胡爲遭此拘囚。解爾之纏縛。囑汝以綢繆。邇喬林而好去。擇美蔭之清幽。移不可屢兮。有此網蟲之窺窬。居不可久兮。蟪蛄在後以爾謀。慎爾去就。然後無尤。

祖江賦 并序

貞祐七年四月。予自左補闕被劾。尋除桂陽守。將渡祖江。江水木迅激。適值暴風。因而後濟。爲賦以悲之。卒以自寬。

浩浩江流。濁如涇水。漆色而泓。澁難俯視。湍又激而迅兮。豈瞿塘之足譬。控百川之奔會兮。若鼎湯之驚沸。蛟鱉呀呀以流涎。又安測毒龍之潛伏。以伺沂灘。欲徑進兮。船如行而尙止。不夕而暝。不風而波。雪浪礪石以崩騰兮。若秦晉戰于彭衙。篙工狎翫靈胥兮。猶畏夫洄洑與盤渦。顧區區一瞥之所如。豈以其澎湃。滄鬱怒兮。成此邈遐。予旣被謫。遭此嶮流。孤舟兀以出沒兮。其將安適兮。悠悠望平臯兮。草暗。遡極浦兮。煙愁。鳥鳴。軋軋。猿哭。啾啾。落日兮。掩掩。黃雲兮。浮浮。雖五馬之足榮兮。亮非吾之攸期。嗟此遐征。古豈無之。孟三宿而出。晝兮。丘去魯兮。遲遲。賈誼洛陽之才子兮。謫長沙之濕卑。聖賢尙爾。予復何悲。較昔人之未遇兮。吾又專城兮。斗印纍纍。鶴山隱翳兮。漸遠。望長安兮。徒自疲。業已離於上都兮。欣桂陽之伊邇。于以泊舟。于彼碕涘。誰其來迎。賈賈殘吏。紛綵幕兮。葳蕤。爛紅旆兮。旖旎。弭節兮。山之椒。炬火照林兮。鳥驚以飛。聊逍遙以散髮兮。風攬攬兮。吹衣。江水駛而疾兮。予旣濟其何疑。行矣尙足樂兮。何必眷眷兮。懷歸。出處不自謀兮。樂天知命兮。先哲是希。

春望賦

欣麗日之方酣。聊登高以游目。穀雨始晴兮。濯濯樹容之新沐。遠水蕩漾。麴塵浮綠。鳩鳴拂羽。鶯集珍木。衆花敷兮。錦嶂張。雜以青林兮。一何斑駁。草芊眠兮。碧滋。牛布野兮。散牧。女執筐兮。採稚桑。援柔枝兮。手如玉。俚歌相和。何譜何曲。行者坐者。去者復者。感陽熙熙。其氣可掬。鬱予望之止茲。何區區而齷齪。有若丹禁日長。萬機多簡。感韶光之駘蕩。時登覽乎飛觀。羯鼓聲高。紅杏齊綻。望神州之麗景。宸歡洽兮。玉觴滿。此則春望之富貴也。彼王孫與公子。結豪友以尋芳。後乘載妓。茜袂紅裳。隨所駐兮。鋪筵吹瑤管兮。吸玉簧。望紅綠之如織。擡醉眼以偷佯。此則春望之奢華也。有美婦人兮。守空閨。別宕子兮。千里恨。音塵之超遞。情搖搖其若水。望漆鷲之雙飛。倚雕櫳而流淚。此則春望之哀怨也。故人遠遊兮。送將行。雨浥輕塵兮。柳色青。三疊歌闋。別馬嘶鳴。登崇丘兮。望行色。煙花掩苒兮。蕩情。此則春望之別恨也。至若征夫。邈寄乎關山。見邊草之再榮。逐客南遷乎湘水。望青楓之冥冥。莫不翹首延佇。抱恨怛怛。此則春望之羈離也。吾知夫夏之望兮。拘於蒸暑。秋專蕭瑟。冬苦凝閉。茲三者之偏兮。若昧變而一泥。唯此春望。隨物因勢。或望而和懌。或望而悲淚。或望而歌。或望而涕。各觸類以感人兮。紛萬端與千緒。若隴西子者。何爲哉。醉而望也。樂。醒而望也。哀。窮而望也。雲霧塞。達而望也。天日開。可以喜則喜。可以悲則悲。誠能遇境沿機。與物推移。而不可以一揆測知者乎。

陶甕賦并序

予蓄瓦甕。以酒不渝味。甚珍而愛之。且有所况。爲賦以興之。

我有小甕。非鍛非鑄。火與土以相熬。落埏埴而乃就。頸瘠腹臞。觜侷笙味。譬之甌。則無耳。有耳曰甌。謂之甄。則瓠口。瓦甕小曰甄。不磨而光。如漆之黝。何金皿之是珍。雖瓦器。其不陋。適重輕以得宜。合提挈於一手。價甚賤而易求。雖破碎其曷咎。盛酒幾何。未盈一斗。滿輒斯罄。虛則復受。由陶熟而且精。故不淪而不漏。由旁通而不咽。能出納乎醇酎。由能出故不傾。不覆。由能納。故貯酒斯續。顧一生之攸盛。美難算其幾斛。類君子之謙虛。秉恒德而不惑。嗟小人之徇財。昧斗筭之局促。以有涯之量。趁無窮之欲。積不知散。猶謂不足。小器易盈。顛沛是速。予置斯甕於座右。戒滿溢而自勗。庶揣分而循涯。儻全身而持祿。

東文選卷之一 終

東文選卷之二

賦

三都賦

崔滋

西都辨生與北京談叟來遊江都遇一正議大夫大夫曰蒙聞二國之名未覩其制幸今邂逅二客請據懷舊之情弘我以兩京辨生曰唯唯西都之創先也帝號東明降自九玄乃眷下土此維宅焉匪基匪築化城屹然乘五龍車上天下天導以百神從以列仙熊然遇女來往翩翩江心有石曰朝天臺恍兮盤陔忽焉崒嶷惟帝時升神馭徘徊靈祇所宅平壤其祠呼叱風伯指揮雨師怒則白日霰雷木石交飛又有木覓稼穡是司不耕而禾積如京坻蔭公庇私介以彪褫若是何如大夫曰神恠茫誕何以誇爲生曰壯麗之觀則有龍堰闕九梯宮膠葛廣敞高明窮崇翕闢宇宙冥迷西東天不能奪其撓鬼不得爭其功遊觀之所則多景跨蒼海清遠撐半空浮碧臨浩蕩永明架嶂嶠衆水所匯名爲大同晶滌晃漾抱鎬欲澄淨鋪素練皎若青銅兩岸垂楊終日舞風沙平野闊落鴈鳴鴻青山繞郭四面龍嵒細雨披蓑俯見於漁翁夕陽吹笛遠聞於牧童畫圖難髣賦詠未窮爾乃解錦纜浮蘭舟中流回首恍然如在鏡屏中也則吾都形勝誠天下之所獨大夫曰奇觀絕景喪人心曰生曰水而漁則長網一舉

不踐於古。冷生新語。別出於今。武夫猛士。則衣短後。纓縵胡。佩蛇劍。握龍刀。躡
踞攬搏。闕唬咆哮。熊拏虎攫。鶻掠猿超。瞋目語難。掉臂輕趨。騎射一發。聯的三
中。杖手一弄。飛毬百繞。是所謂國之寶歟。大夫曰。非也。彫蟲亂力。君子不取。况
弄毬之巧。叟曰。設官分職。內千外萬。激濁揚清。舉無慙溷。歲命春官。選登賢雋。
青紫滿朝。紳垂笏。搢出爲廉察。或典州郡。莫不以冰清玉潔爲己之任。不通水
火之利。况受苞苴之贈。斷帶爲燈。投錢以飲。門羅雀以寂寥。食無魚兮冷淡。人
服其名。自負無玷。謂欲威民。必用苛慘。細察纖微。曲照幽暗。吹刮而求。癢瑕莫
掩。於是乎振繲。繼揚繩。檢扑之則百杖不厭。絞之則重索猶慊。吏不完肢體。民
盡落肝膽。肅肅淩淩。慄慄懍懍。咄嗟而諸難卽辨。叱吒而群猾亦震。歲增賦而
不爲重。月進膳而不爲詔。急徵征稅。若督戶斂。漕轉陸輸。火疾電閃。用儲峙乎
國廩。則其勤公利國之功。言所不盡。大夫曰。詐清苛慘。民之蠹。爲害也甚。叟曰。
公卿列第。聯亘十里。豐樓傑閣。鳳舞螭起。涼軒燠室。鱗錯櫛比。輝映金碧。森列
朱翠。緹繡被木。彩毬鋪地。珍木異卉。名花佳礫。春榮夏實。綠稠紅蔭。敷香布蔭。
爭研竟媚。後房佳麗。雲衣霞帔。盡態極艷。列陪環侍。玳筵綺席。笙歌鼓吹。九醞
波漫。千疊屹峙。如易之需。若詩旣醉。駝峰熊掌。龍肝鳳髓。錦蔕瓊堆。厭飫唾棄。
至於士庶。桑門釋子。居必華屋。食必兼味。極耳目之娛。誇服飾之異。庸奴賤隸。
胥然僭擬。峩其冠戴。其幘。觥其帶。鋏其履。衣輕服。緻爭相耀侈。雖雍洛靡麗之

盛莫我敢齒。大夫曰噫。舊都之流離。蓋以此。於是西北二客奮髯作色。且怒且惡曰。走等終日言而大夫皆折之。願聞江都之說。大夫曰。二客豈亦曾聞江都之事乎。略舉一緒。揚擢而議。夫東海之大。凡九江八河。吞若一芥。蕩雲沃日。洶湧澎湃。中有花山。金鼉屹戴。涯凌葉擁。渚啤枝附。麗其枝葉而沙散。碁布者。江商海賈。漁翁鹽叟之編戶也。神岳藁開。靈丘葶捧。架其藁葶而暈飛。鳥聳者。皇居帝室。公卿士庶之列棟也。內據摩利穴口之重匝。外界童津白馬之四塞。出入之誰何。則岬華關其東。賓入之送迎。則楓浦館其北。兩華爲闕。二嶠爲樞。眞天地之奧區也。於是乎內繚以紫壘。外包以粉堞。水助縈回。山爭岌巖。俯臨慄乎淵深。仰觀愁於壁立。鳧鴈不能盡飛。豺虎不能窺闖。一夫呵噤。萬家高枕。是金湯萬世帝王之都也。二客曰。固國不以山河。在德不在險。大夫曰。城市卽浦門。外維舟。芻往樵歸。一葉載浮。程捷於陸。易採易輸。庖炊不匱。廩秣亦周。人閑用足。力小功優。商船貢舶。萬里連帆。蟻重而北。棹輕而南。檣頭相續。舳尾相銜。一風頃刻。六合交會。山宜海錯。靡物不載。擣玉舂珠。累萬石以硨磲。苞珍裹毛。聚八區而菴藹。爭來泊而纜碇。條街填而巷隘。顧轉移之孔易。何馱負之賽倩。爾乃手挈肩擔。往來跬步。堆積于公府。流溢於民戶。匪山而巍。如泉之溥。菽粟陳陳而相腐。孰與大漢之富饒。二客曰。至富非蓄積。宜鑑鉅橋。大夫曰。佛法流於海東尙矣。至於今日。尤爲信篤。像設而歸。依則鎔金塑土。琢石刻木。或線縷

以繡畫繪以貌。睟乎端嚴。儼若視矍。法寶之弘揚。則經律論章。禪書祖訣。板印墨寫。泥金刺血。黃卷赤軸。琅函綦帕。若開風藏。委積磊落。禪藍敎刹。公寺私堂。或社或庵。曰齋曰房。蠹不知乎幾千萬坊。香火之氣。連熏於萬里。鍾磬之聲。相聞於四方。於是乎厖眉椹袍。碧眼菊裳。南藜北林。竹葦成行。龍象爭蹴。金毛竟吼。千燈續焰於心。心。衆海翻瀾於口。口。朝焚祝聖之香。夕點鎮災之炷。猶以爲未足。特創精廬於輦下。遠邀方外之道伴。青山白雲。逃身而出。紫陌紅塵。來垂手段。槌拂而風雷動。捧喝而雨雹散。殺活自在。頭頭必斷。越前歲。因大難。君臣益復痛願。一集諸家。遞日作梵。念佛唱神之音。激切而山岳盡動。燃頭燒指之煙。紛布而日月無光。精勤苦倒如此其極。報應攝護。必不可量。二客曰。古今奉浮圖。莫若梁。何促危亡。大夫曰。方今主上躬儉而厚下。二客卽愕然失容。避席而跪曰。大夫毋多言。只此一言。足以知大平極理之美。凡政理清平。皆由儉始。儉則習俗歸厚。胡皇天不佑。胡基祚不長久哉。向者走等啁嚅哂哂。祇自彰國累耳。大夫曰。二子聽之。吾以古爲的。昔周家忠厚。享年八百。漢文衣綈履革。其臣多敦厚長者。垂祚罔極。唐文皇尙儉。欲營一殿。鑿秦而止。維時房魏。不以理安爲喜。故垂統三百餘祀。洪惟本朝。風化掩古。畏天之威。樂天之道。以小事大。于時保之物。不疵癘。元元皞皞。歎之不足。申其義而作歌曰。邈自陶唐兮。下至宋康。雖文質沿革之不同兮。靡不由奢儉而興亡。西柳兮以淫而顛覆。北松兮

由侈以流移。西都號煌煌江都。惟德之基。順天事大。風俗淳熙。於萬斯年。安不忘危。

相如避廉頗以先國家之急賦

相如所避。廉氏之奇。以我國家之急難之故。非予心畏懼之爲。顧彼大賢與私讎而不遇。殆非他故。念我邦之將危。昔者臣惠王者雖多。肩藺氏者未有。奉使於外。則得還和氏之璧。從上而遊。則俾擊秦王之笥。然則且論功考績。雖大山莫及其高。故越序超資。於中國卓居其右。時廉頗謂伊人身起於賤。何今日位居我先。吾不忍爲之下矣。若相逢必當辱焉。相如曰。俾吾國鼎峙而安。唯二人耳。儻異口角鬪而死。若兩虎然。於是君臣之會。則稱疾不朝。道路相逢。則迴車而避。如此者。何畏於彼。唯止乎爲國而已。讓其讎敵。居常隱匿而行。以我邦家。恐有危亡之事。何則。壯士一怒。則不死何俟。賢人俱亡。則治國者誰。故我公之避也。念此邦之殆。而笑宰嚭有隙於子胥。吳國見敗。美玄齡同音於如晦。唐室致綏。有以見一則戰攻。而日闢四方。一則智勇。而威伸列域。儻二子爭相爲死。彼一邦罔有定極。始同遷史。不與會而不與爭。終合軻書。利吾家而利吾國。夫然後負荆謝罪。而永無嫌隙。刎頸爲交。而罔不協和。旣當時合謀相輔。伊爾國不固。而何。昔反以我爲讎。無幾相見。今聊與子如一。亦孔之嘉。向若旣妬嫌。我亦振怒。以一朝睚眦之憤。有兩臣死亡之故。則安得以弱趙千乘之威。使諸侯而畏。

怖。

紅桃井賦

李仁老

栢堂東麓。有泉澄淥。冷然流出於石縫。若漱白雲之幽谷。旱而不渴。響如琴筑。縈迴六七許步。然後入於溝瀆。遂使傍泉而居者。皆快意於挹掬。隴西子茹蔬得飽。以手捫腹。岸掩苒之烏紗。杖鏗鈇之龍竹。踞一石。露雙脚。按碎冰霜。吞吐珠玉。豈唯火日之可逃。亦復塵纓之已濯。徐嘯歸來。溪風蔌蔌。展八尺之風漪。枕數寸之癭木。夢白鷗而同戲。任黃梁之未熟。飄飄乎如駕八龍。而到瑤池。聞金母之一曲。浩浩乎若泛枯槎。而渡天河。驚蜀都之賣卜。則何必錦障紆四十里。胡椒蓄八百斛。打就金蓮盆。然後濯吾足。

玉堂栢賦

歲在己酉。冬月向闌。隴西子入直於金鑾。銀蟾影倒。玉漏聲殘。及酒醒而夢覺。時矯首以憑欄。杳無所見。霜天漫漫。唯餘紫閣與朱樓。森然掩映於有無間。有一蒼髯君子。立中庭而不倚。瘦鶴將騫。老龍欲起。歛風雲於尺地。若有待於知己者。僕乃琅然擊檻而與之語。曰。鼇頂之署。號神仙府。夜還則蓮燭分輝。曉入則花輒承步。蛾眉呵筆。龍巾拭吐。珠川玉樹。以邀以遊。青鸞紫鳳。可驂可馭。固非烟火食者所到處也。今汝何由而客寓哉。君子於是揚眉吐氣。奮袂驥首而答曰。夫以玉川子之豪邁。猶親竹弟。白太傅之高逸。尙與松友。僕雖臃腫離奇。

不爲世人所購。然冰枯雪瘦。可以配先生之高趣。雨嘯風嘔。可以續先生之秀句。歷千載而愈茂。可以薦先生之遐壽。苟許忘年之契。則不與草木同腐矣。」

成王氣稟胎教德與年豐賦

姜彰瑞

彤雖假外。善必由中。故成王氣稟胎教。於周室德與年豐。畜情因腹。養之規。所習者正。啓理並天。齊之算。其永無窮。觀夫有爲之君。始稟其氣。或九廟儲齡。而授以符應。或二儀協和。而示其圖緯。况資胎教。協于內藏。于中宜及。君臨道之尊德之貴。故成王以嗣王之聖。在靈妃之胎。庶應昌期。而作也。紹興先業之艱哉。當哀哀在母之時。受眞於善。有顯顯宜人之美。隨歲而恢。何則。生乎善者。鮮不保年。蓋其異者。是謂成德。顧竄聰之備此。由將誕而有則。始當震索。稟帷幄之攸行。終啓離明。與春秋而罔極。議夫學於既壯者。祇自勞耳。得於未誕者。不亦善乎。故上聖自然胎受。卽洪休與其年俱。商王勃興。自應謀於墜卵。夏后誕作。由見孕於吞珠。此際文武之業。兮實復屬予。周召之誠。兮未能責朕。茲以聖繼聖之理。實與生俱生之稟。四方有大平之樂。穆穆迓衡。百姓騰旣醉之歌。皇皇奠枕。實可謂宜其百福。胡不萬年。聖烈光明于歷代。頌聲洋溢於普天。玄成贊云。制禮樂而興功業。元稹嘆曰。蘊道德而進聖賢。方今守位以仁。奉先思孝。穆然天表之盛德。發自蘭闈之內教。殿下所稟若茲。彼成王奚足與校。

道闕一和槐橘合爲兄弟賦

鄭義

一和之閱。大道所施。故教槐橘之異者。合爲兄弟以親之。大樸含鈞造之原。理同戡戡。殊根宛天生之戚。義協怡怡。原夫槐之生洛北。是鄉橘之產江南。其所花不待共時而發。品又難同日而語。以此爲兄也。弟也。理則伊何。因而推父兮母兮。道之所許。此蓋強名曰妙。叵測其爲。或磅礴乎萬化。或包含乎兩儀。以無方無體之靈原。包氣作氣。彼異品異形之植物。若枝連枝。何則。心如膠合。則胡越爲不約之親。情若豆分。則管蔡有流言之變。苟妙原所協者。和卽異種同爲之眷。先天先地。牢籠萬物於頭頭。宜夏宜秋。華萼一家之面面。議夫氣之所鍾。有同而異。理之所管。雖異必同。宜彼二般之合。歸于一化之融。物有萬殊。入牝室精神之內。幹雖兩立。在鶴原首尾之中。豈非友于弟者。兄之常。恭厥兄者。弟之義。何頑木如茲。共貫。蓋洪鈞所自變異。商山中白髮四皓。可稱曰昆。漢殿下黑頭三公。是謂之季。則知苟非道母。誰養物兒兮。大德旣云廣博。其立功不可思惟。陳生云。蘭菊異芬。徒拘淺見。莊叟曰。苴藜反味。誰謂大知。本朝皇矣聖人。赫茲至道。覆天爐而化物。扇法風而偃草。故林林萬種含靈。皆不出於元造。」

春雷作龍蛇不安於蟄戶賦

李堅

蚺甲之屬。龍蛇最奇。於蟄戶何不安也。蓋春雷作以殷其。淑景方融。俄報新聲之發。潛鱗欵起。各離舊穴之畢。原夫暑往寒來。陰消陽息。以天時或代。或謝。故物理有通有塞。適當冬慘。雖龍蛇豈得效靈。必待春迴。遇雷霆然後奮力。茲故

仁風蕩漾。和氣氤氳。寒威斂於北陸。暖律吹於東君。虺虺揚鼓物之音。訇天振地。一一奮蹠泥之迹。游霧升雲。何則。在幽之物。久屈乃伸。驚蟄之聲。無遠不聞。故彼蜿蜒之狀。起自殷訇之韻。振百里驚遠也。鼓動於時。雖二虫無知乎。騰躍而奮。議夫龍之爲德也。其神莫測。蛇之爲靈也。其變難知。然欲解穴居之蟄。必且須雷奮之時。萬里雲霄。知有騰驤之路。一聲雷雨。忽成變化之期。豈非出猶隋澤之中。殷彼周山之側。此驚雷所以作解。宜神物動而自得。幾年化劍。願逢雷煥之知。他日含珠。應報隋侯之德。旨哉外奮凌霄之勢。內懷澤物之思。願爾興潛者伏者。蓋本由鼓之動之。葛亮廬中。已被顧三之寵。子推山下。誰興棄一之悲。

王者之興必卜筮決天下賦

無名氏

卜惟定事。筮乃質疑。故王者之興也。稽天命以決之。肇立丕基。謀及蓍龜之策。靈承上帝。考其成敗之期。余嘗考天人相與之際。或眷佑而使受厥命。惟幽明交感之源。或勦絕而用殄厥世。然上下之懸隔。固無臭以無聲。欲吉凶之先知。盍謀龜而謀筮。因以是圖是究。載謀載惟。體卜稽於商史。遵占用於箕疇。惟明象數之微。以觀其度。顧諟蒼窮之意。永孚于休。是何災祥兆於幾微。禍福相爲倚伏。故應天而肇造。必卽命而穆卜。革孚虎變。將興不拔之基。吏決狐疑。膺受無疆之祿。議者曰。曆數歸于德也。何必稽謀於爻象。鬼神依于人也。何必探索

於陰陽。然不考於著蔡。烏得察其興亡。明用稽疑。美祗承之周后。非敢違卜。嘉恪謹之殷王。勿謂人民既衆而可創洪基。山溪既嶮而可關大邑。凡欲啓興而統者。莫若稽天而謀及。玩占觀象。始符易繫之辭。受祿于天。終合大明之什。且彼出獵小務也。天后占其利害。遷都常事也。成王考其廢興。况啓邦基之草創。盍稽帝業之奉承。王業等於山河。可長可久。國壽齊於箕翼。不騰不崩。此際大邦小邦。近者遠者。手之舞而足之蹈。安無傾而貧無寡。其所然者無他焉。蓋考卜而明於取舍。

義於人者和於神賦

無名氏

曰缺。聖主奄御昌辰。何使神和於當世。蓋以義行於兆人。闡無偏無黨之風。驅民于理。彼至寂至玄之鑒。惟德是親。大抵禍以惡隨。福因善至。此靈鑒所以相應。雖人君不可求媚。然則克明峻德。欲柔凡百有神。宜與衆人。未嘗行一不義。故王者躬臨紫極。業應黃河。一政教也。罔不適正。一神祇也。庶幾以和。至理無頗。廣被庶繁之類。幽靈交感。洽臻悅樂之多。何則。義爲君所杖焉。人乃神之主也。故王道一於遐邇。卽幽歡格於上下。民知正道。化已洽明。如穆如神。感皇風樂而無恫者。怨者議者。曰玉帛之重也。可以事鬼。黍稷之馨也。足以感神。然欲致其和悅。莫若理乎群倫。鬼莫不寧。自夏王之務德。神之式穀。由周后之宜民。故知道偏則政不明。民怨則神不喜。既元后無和而理也。彼衆神不樂而何以。

平明不異內外。旣符蜀主之化民。天人率得歡欣。動是漢家之啓理。向若德則薄矣。義不行於。使怨氣彰聞于上。而黎民不恆其居。則安得化浹洽。教彰明。祥無不至。鬼濛鴻。祇窳戕。樂且有餘。方今道尙公平。心無彼我。旣臻盛德之遐格。行見高虛之下墮。福祿如此其川增。非吾明主則奚可。

李勣應時掃雲布唐陽春賦

閔 漬

掃雲之後。回春者誰。在唐家而布德。惟李勣之應時。偉予間世之良臣。蕩除紛擾。宛彼蘇民之暖律。遍洽純熙。昔者開貞觀之太平。有文皇之盛德。洽臻海晏。於千載。奄統星分之列域。雖已致黎蒸之乂。恭以正南。不幸因胡虜之頑。患猶在北。英公於是喟然興歎。罔或不勤。盡忠誠之貫日。馳勇氣之如雲。以謂爲王爪牙。苟未能撥亂定國。在人耳目。其誰曰竭力事君。因以縱橫出奇。進退有律。威益重於遠振。德必期於廣布。劒頭雷擊。實多軍靄靄之氛。海內葵傾。則一代溫溫之煦。何則。頑俗之聚也。有甚乎霧。至德之行也。可比乎春。故我掃妖氛之積。于以廻淑景之新。育物如春。類孔明之匡蜀主。當旱爲雨。殊傅說之作殷臣。旨哉廓然遐域之永晴。實是我公之一掃。旣寰區咸歸於殊惠。肆邦家自此而能保。未聞甲士更瞻千里之黑雲。誰嘆胡兒輕犯五原之綠草。彼有李廣鎮邊而胡不入境。范遷當邑而狄不侵疆。此亦幾乎秉德。安可謂之布陽。乾清坤夷。風日塞邊之溫暖。家給人足。笙歌閭里之歡康。

志士口與心誓守死無二賦

無名氏

志士所貴。直道而行。乃爲誓於心口。固無二而死生。形於言發於中。切陳素願。糜其軀粉其骨。一乃丹誠。大抵忠誠。孰不願而貫霜。直節皆欲期於如矢。然及危亡之至也。能持操貞者鮮矣。故衆人未有一節。庶欲全生。唯志士誓無二心。獨不畏死。此蓋廓揚大度。特立當年。節若貞松之拂雪。心如長劍之倚天。鼓舌披肝。特發丁寧之語。捐身殞命。勿更操履之堅。何則。寧殞其生。不失其義。故我礪心而抗節。願無違害而就利。有如皎日。切陳旦旦之言。雖致黃泉。勿改堂堂之志。且彼季倫之妾也。誓效死於金谷。共伯之妻也。矢靡他於栢舟。彼二女尙守其志。况丈夫盍壯其猷。不懼兵刃。心益堅。思廣壯節。苟利社稷。死無悔。缺忠議者曰。身者親所遺也。慎勿毀傷。命者天所授也。必當順守。然節義有甚乎此。宜險難免之無苟。比夫士貴伐叛獠之日。終不顧身。雍門越齊境之時。亦能刎首。豈非斧鉞在前而視之如芥。鼎鑊在後而顧之若冰。既奮雄圖之若是。苟非壯士則誰能。執義曰無二心。堪嘉宋氏。虛死不如立節。且異季陵。夫然後成仁之美。雅合於魯論。遠害之情。莫推於毛什。詐士見義而斯懼。懦夫聞風而有立。彼何人。予何人。苟礪節何患乎不及。

嗜欲皆同惟賢者節之賦

嗜誇性水。欲蕩心淵。此皆同於有衆。其能節者曰賢。想彼庶人。孰無心於好利。

獨吾廉士。不過度以省愆。原夫性本中含。物由外觸。輕暖之好兮。誰不隱於身體。聲色之美兮。罔不悅於耳目。逞是欲也。實爲人之所罔。儉以節之。苟非賢者而孰茲。故已所行者。心焉念之。見利有不虧之義。臨財無苟得之思。繫中心所好之資。曾不異衆。以清節不移之故。慎勿踰涯。是何惟人之心也。萬有不同。其性之好也。一無所別。故衆心莫不徇利。而哲士獨能礪節。大欲在食。晏子無三豆之重。所寶惟金。楊震有四知之說。至哉和氏之璧。隋侯之珠。茲衆俗所以爲重。獨君子好之則無。要石與甌。豈求羸美矣。昌黎先覺。從心所欲。不踰矩。猗歟闕里眞儒。彼有王夷甫之口不言錢。崔良伯之手不執玉。惟本心豈無其欲。蓋廉節有異於俗。潔白之情同皎日。益礪操持。富貴於我如浮雲。勿求利欲。議夫辭粟而餓者。西山之義士。厭酒而反者。東郭之良人。宜取捨於二者。慎操履於一身。與赤松而並遊。美知足之張氏。愛綠珠而速戾。嗟好色之季倫。噫世及衰微。人無純厚。如李登之地癖兮。何厭之有。若蕭宏之錢愚兮。亦孔之醜。殊不知行節義於寡欲小私。流清名千載之後。

賈誼請獵猛獸不搏畜兔賦

文帝之佐。賈生其賢。所請者獵猛獸耳。不在乎搏畜兔焉。繫犯境洶洶之強胡。願言卽獲。若在囿爰爰之畜獸。奚足以畋。原夫昔高祖始創洪都。有孝文嗣開令緒。闢上林閑曠之地。爲萬乘幸臨之所。恃國家晏然無事。雖貪射獵以自娛。

蓋邊境隣於莫強。尙有頑兇之難禦。于時彼洛陽少年之傑。自長沙被召而歸。見凶奴暴難可制。嗟大漢忍不能威。且禽獸更翫於後時。曰所樂也未晚。若豺狼不制於今日。其爲患者幾希。於是曲察行爲。明詳制度。乃草諫於一朝。欲繩愆於萬務。克修虎備。但懷絕域之頑民。勿作禽荒。而捕禁苑之狡兔。何則。勞而無益者是。畋之樂。縱則不可者。曰敵之勅。故願當胡而試獵。毋將搏獸以恣情。人三千牧野之師。威高却敵。里七十文王之囿。德沛好生。議夫育國之獸。終亦焉歸。寇邊之人。久將難服。宜繫遠方之有敵。莫擒御園之所畜。諫獵獸於穀下。稍同獻賦之長卿。誓肉虜於孟中。僅類叫閹之杜牧。至如一劒之獲兮。皆是獸心人面。一鏃之殪兮。固非兔脚雉頭。既能盡敵而返。更無侵境之憂。鯁議一封。非魏絳和戎之請。龍沙千里。若干紅閼戰之蒐。此際下焉國耳。而切於忠言。上焉隣哉。而嘉乃丕績。顧一時之所美。雄千古以無敵。今本朝靜守而養兵。何更獵乎戎狄。

漢成帝勿易折檻以旌忠臣賦

所諫者直。敢忽其情。故成帝勿修折檻。爲漢臣留表以旌。偉我聖神。乃置彫欄之摧破。居常鑑戒。用彰烈士之忠誠。原夫昔炎室晏然大平。有朱雲忠而直犯。庶引君而當道。惡爲師者不範。且說安昌之罪。叫入帝闈。忽逢御史之威。攀折殿檻。時朝臣共看此輩。各獻其謀。謂匹夫不敬之故也。當萬乘斥言者可乎。帝

曰耿介孤忠。亘千古未之有。分明遺迹。雖一日不可無。又况聞其誹謗者。立木於其前。受其言責者。作銘乎其側。今我當折檻之諫。可不想迴天之力。何必改作。軒然著手之餘。曰篤不忘。露示匪躬之直。何則。克明之主。樂聞鯁議。好諫之臣。切犯龍顏。故欲旌其忠議。無易檻之折攀。肯將金璧之光輝。當理於後。但惜琅玕之議論。尙在其間。議夫軒之摧折也。徒損丹青。臣所敷諫者。無非藥石。寧未穩於依凭。可忽爲之改易。殊唐后納書粘壁。乃表直言。異周王集囊作帷。以旌群策。卽知思人之策。則必可爲戒。見檻之毀。則忠亦尙新。宜不易攀援之迹。以此知慷慨之臣。敝予又改爲兮。非吾所欲。見其參於前也。嘉乃克仁。

東文選卷之二終

東文選卷之三

賦

隋高祖非宴食不過一肉賦

尹宣佐

萬乘之主。一肉者誰。有高祖若非宴也。於隋家不過食其偉我。亶聰敦朴。素斥華之念。苟匪式謙。節肥甘。堆案之資。大抵己之所便。人誰不務。雖享安榮之已足。猶期奉養之有裕。然而凡有爲者。將窻欲之無厭。不亦宜乎。常好儉而尙素。故文帝乾坤並德。日月齊明。庶萬民之孔阜。當一己則惟輕。殫至誠於薄躬。無遑耽樂。減重味之悅口。勿使縱情。何則。未能節用。則其可有餘。若得制情。則是爲善養。故明王兮克念。省珍羞於丕享。龍顏日角。奄臨宇內之大平。熊掌猩唇。肯備食前之方丈。議夫心不期於侈美。業可保於終初。欲垂祚於罔極。非減膳也。何如。美吐哺之高皇。勃興帝業。嘉忘食之文后。永保民居。此際施注措。也不出乎仁。發號令而皆主於儉。旣爲君之若是。尙何理之有歎。雲霄九闔。所慎是朝饗夕殮。煙火四方。其輸絕家。抽戶歛。方今躬臨紫極。業應黃河。政無偏而允協。世不泰而伊何。秉心宣猷。漸以仁磨。以義勵精。爲理綏斯。來動斯和。

高祖開設學校。闡道義。惟新寶曆賦

晉家開學。高祖克神。闡道義而爲理。致寶曆之惟新。特闢賢關。廓著文明之化。

更延國祚。奄臨遐邇之民。大抵道惟適理之途。義乃爲國之寶。苟聖人未能並叙。彼神器尙何長保。然則凡居天位。享基緒之弘延。宜設黌堂。搜典墳而討論。故孝文化民。由學爲政。以文雖未除猾夏之類。每旁求博學之群。勅修儒雅之宮。優宣教化。益嚮靈長之業。蔚啓陶薰。何則。欲保皇圖。莫如文德。肆設校而施教。多歷年以享國。立庠立序。播休風而允釐。有社有民。傳景鍾於罔極。議夫據義而誌遠者。須憑經術。遵道而垂裕者。蓋借典謨。顧令景祚而可久。蓋以文德而誕敷。周世尤長。自辟雍而宣化。魯邦有永。由泮水之崇儒。此際廟堂之上。定於君臣。閨門之內。篤於親戚。以忠孝兼修。妙化宜祉。祚邈垂遐。曆復興儒於洙泗。世格休明。終定業於伊瀦。邦無離析。方今克明克類。載謀載惟。縱庶事之無闕。念厥位之惟危。樂育賢才。以啓成王之理。遠垂鴻祚。夙超漢帝之時。小臣性本愚蒙。心無欺誕。願爲傳說之霖。得救商家之旱。今赴文場。美我皇履道坦坦。」

太宗觀覽尙書庶幾唐虞賦

高功無敵。舜德可希。於尙書此皆布在。故太宗觀則庶幾。日百篇蘊奧之文。灑灑靈靈。心二代神明之主。蕩蕩巍巍。觀夫篇簡所存。帝王之制。法雖是農黃已前。盛莫逾唐虞之際。舉斯加彼。等論百世之百王。自古及今。未若兩朝之兩帝。故文皇命傳玉璽。位踐金輿。庶欲察前朝之事。居常觀上古之書。謂曰且先王特設群書。爲法於後。宜小子寵承遺訓。若帝之初。於是曰典曰謨。是崇是尙。非

特察無爲之理。抑亦觀允恭克讓。將有爲也。潛心璧簡之中。我所思兮。拱手岩廊之上。何則。雍熙之理。希之則是。記注之言。燦然可觀。故一人閱書而覽。慕二君御衆以寬。納于大麓之篇中。曾襟滌哲。警予洪水之卷上。耳目艱難。議夫彼時。此時世雖隔千。前聖後聖。規則不二。苟舉斯而嗜讀。卽與彼而何異。美紹先之吳祖。博覽九經。嘉稽古之晉宣。洽聞前史。且彼言必稱者。有如孟子。問可爲者。亦若曹公。猶臣子尙懷餘烈。况人君盍慕遺風。劉煦曰。理合成康。徒拘淺見。宋祈云。迹比湯武。誰謂博通。

雪梅軒賦

爲日本釋
息牧叟作

李 稽

扶桑翁發深省道根。固心灰冷。蕭灑出塵之標。幽閑絕俗之境。烟玉壺之冰出。森瑤臺之月暎。爾乃謝語奪胎。宋句換骨。二賦流傳。千載超忽。風人噤以不譁。騷客寂而彌鬱。韓山子霜鬢蕭蕭。麻衣飄飄。思偶然之談笑。嫌丁寧之喚招。叩剡溪之蘭槳。馳庾嶺之星軺。忽中道而坎止。乃息牧之相邀。開竹房。俯風櫺。展蒲團而加趺。烹露芽而解醒。吟載塗於周雅。想調羹於殷室。是惟無用之用。蓋有則於有物。予於是知西域之有教。或於斯而甲乙。雨露均是澤也。農桑焉重。桃李均是花也。富貴焉宜。夫孰知雪也梅也。吾師也。情境交徹。針芥相隨。罔或須臾之離也耶。若夫一枝璨璨。千山皚皚。飛鳥自絕。游蜂不借。消塵滓於氣化。浩大極於心齊。實有助於所學。宜其扁於高齋。今歲月之幾何。阻情境之俱佳。

異日沉痾。去塞步平。鳴藍輿於石徑。當一賞以忘情。

觀魚臺賦 并序

觀魚臺在寧海府。臨東海石崖下。游魚可數。故以名之。府吾外家也。爲作小賦。庶幾傳之中原耳。

丹陽東岸。日本西涯。洪濤淼淼。莫知其他。其動也如山之頽。其靜也如鏡之磨。風伯之所橐籥。海若之所室家。長鯨群戲而勢搖大空。鷺鳥孤飛而影接落霞。有臺俯焉。目中無地。上有一天。下有一水。茫茫其閒。千里萬里。惟臺之下。波伏不起。俯見群魚。有同有異。圍圍洋洋。各得其志。任公之餌夸矣。非吾之所敢擬。太公之釣直矣。非吾之所敢冀。嗟夫我人。萬物之靈。忘吾形以樂其樂。樂其樂以歿吾寧。物我一心。古今一理。孰口腹之營營。而甘君子之所棄。慨文王之既歿。想於物而難跂。使夫子而乘桴。亦必有樂于此。惟魚躍之斷章。迺中庸之大旨。庶沉潛以終身。幸摭衣於子思子。

礎賦

李達衷

有礎孔碩。惟楹之適。礎居下而謙謙。楹處高而赫赫。楹乃語礎曰。若之爲用。既卑且阨。性何堅頑。容何岑寂。安土而重遷。韜光而晦跡。厥德非常。厥名屢易。從矩從規。爲礪爲礪。身之潤也。必借德於陰機。質之硬也。幸連支於氣校。何不被鍊于補天之手。彰爾五色。獲登于舞獸之庭。應其拊擊。鬪或與乎和鈞。輝或騰

乎韞璧或碣若碑勒功銘德。又有硯而磨者。端溪之紫。歌其爛者。南山之白。彼叱於道士之術。支機於天女之織。噫。此類之定繁。名千古而歛。輿以若所爲之。卑污寧免。吾之峻責。於是礎乃頽伏。而復于楹曰。子之堂堂。所立卓爾。疇類。旣旣不偏不倚。孰爲之綱。孰爲之紀。孰爲之基。孰爲之址。匪吾則腐。匪吾則靡。阿房之失火也。吾獨存焉。藺氏之謀璧也。吾不比焉。視子之爲。何陋且鄙。上承棟梁。則以阿。外被丹雘。則以侈。而况子之朋類。無可儀刑。或封于秦。或夢于丁。或煤于墨。或燎于庭。何屑屑其不憚。賊其性而殘其形。子幸而爲大用。更何校於舉莛。宜功我而德我。扶帝宅於千齡。適有匠石。聞而議之曰。謙能受益。高必易危。彼楹之寄。惟礎是資。錄礎名於上面。且以楹而次之。乃贊曰。礎乎礎乎。磐然而安。磐然而安。安其如磐。王室之賴。帝王之完。礎乎礎乎。楹胡敢謾。

思亭賦

文慎之孫。貞烈之子。作亭于居第之東。將以擬陟。岵岵。乃扁曰思。而居而止。心則有所深取。且不言其所以。客有詰之者曰。斯亭之眺望也。如此其遐且廣也。盍用聚遠之意。以標以榜。豁我襟靈。散我鬱快。使心澄然。勿迷勿罔。何思之爲。以搖以蕩。宜取長而舍短。毋舉直以錯枉也。又有從而和之者。軒眉舉目。四顧盤桓。怡然樂唱。然嘆曰。快哉亭乎。都邑園林之內。軒楹几席之間。而有如此遐觀也。彼蒼然而翼衛者。非所謂扶蘇之屈盤乎。彼昂然而奔趨者。非所謂進

鳳之孱顏乎。天磨兮峭屹。逍遙兮噴岫。龍首兮突起。蜺山兮回環。隱隱若舫舟而進者。雲橋烈柱之端也。渺渺如鋪練而淨者。沙川晴瀾之灣也。又有城而若頭者。山而三角者。嶽而紺者。白者。崑而鼓者。戟者。鷺鷥然。累累然。類聚彙征。而爭拱揖于是亭也。且其四時變態。品物流形。茫茫堪輿。錯綜從衡。凡有形氣而感吾性情者。蓋不可遽數而指名也。區區之思之爲扁。雖說之巧而孰聽。於是主人整襟肅容。若將奉事尊長之爲者。而潛然曰。客之歎吾扁也。然則然矣。然吾之所以然者。蓋亦有所然爾。因舉手而噓噫曰。彼何山兮。大德之山。穹窿起復。如往而還。雲煙曖曖。松栢攢攢。吾考若妣。壽藏所安。吾之居是亭也。儼然如見其容止。肅然如承其指使。體不敢肆。言不敢易。飲不敢醉。食不敢旨。睦親姻不敢棄。敬賓客不敢戲。窮不敢屈己。達不敢肆志。吾之身。吾父母之所賜也。何嘗忽於造次。自吾之季。若昆。暨後之子若孫。思吾所以名亭之義。世守而不謾焉。則可謂無忝爾家門也。吾扁之意止此。幸予無以爲言。客憮然曰。美哉言乎。凡爲人子之職者。登是亭而無赧色。則吾國庶乎其國矣。因綴之辭。以自警飭。

梅川賦

鄭道傳

歲在庚申。時惟季冬。天氣凜冽。枯木號風。三峯子躡屐出門。四顧蒼茫。渺天地兮窮陰。忽鼻端兮清香。觸之而不見。尋之而無方。恍未知爲何物。悵予心兮若忘。于時夜雪新霽。素月流光。渡川流之清淺。散予策兮彷徨。粲然得之。于川之

傍欲誰何兮無言。卷意真兮色莊。縞裙兮練袂。羽衣兮霓裳。雪肌兮綽約。玉貌兮輕盈。飄飄然若泛銀河而歷廣寒。挹群仙於上清也。有一少年若嬉若矇。曰惟群物各以類從。仙凡易處。清濁不同。蓋物之至潔者雪也。氣之至清者月也。上下無閒。湛然一色。此造物者之所以厚予嗜。而予之所以自適也。顧人世兮安在。隔風日兮幾塵。人閒之熱。不足以爲吾病。世俗之累。不足以撓吾真也。子何自而來乎。三峯子不覺聳動。毛髮灑然。拭目而視之。乃與浩甫遊于梅川。

墨君賦

李詹

合浦靖遠樓成。朴公命山人豐公寫墨君於東西壁。仍命予賦。余重違公命。乃敢爲之賦。辭曰。

有一道士。飄然御風。不遠千里。來自天東。遶南海而聘望。登新樓以從容。於焉招雪堂。揖石室。起龍蛇於墨池。走風雲於筆錄。造化罔措。山川失色。晝冥而兒童藏。夜晦而鬼神哭。俄而啓明東隅。破暗西極。掃涓瀆之團欒。寫淇園之如簣。觀其湛露洒帷。蒼煙滋玉。月來婆娑。風至蕭瑟。帶苞萌兮絕澗。貫霜根兮頑石。亢貞姿兮勁節。亘四時兮朝夕。幻前身於泓穎。紛變化其瞬息。合浦營主。登樓躑躅。恍然若有所得。顧謂雙松子曰。此其夢耶。畫耶。所見惟竹。旣前境之忽非。盍天明之是質。子其爲我筮之。雙松子樸策而筮。遇震之旅。其繇曰。震爲蒼筤。東方其所。虛中爲離。應用如許。多節爲良。不變寒暑。雙松子韜著禮畢。謂公曰。

惟吾道士取譬甚邇。豈墨戲之徒然。決我公之謂耳。當戎務之叢身。坦曾府兮如水。任彼喜愠。義之與比。則取虛中之義矣。雖險難之在前。確乘直兮如矢。砥礪名行。終不枉己。尙多節之義爾。故公孫得聞夫子之歎。詩人托興武公之美。至若垂實值鳳。以勉養賢之道。擢筭成幹。以勸進德之士。在宗廟而爲篋席。展孝敬之不弛。在樂器而爲笙篳。致神人之格止。噫。吾道士寫真之意。其在此乎。公欣然就道士而問焉。曰。此語誠然乎哉。道士默然。向來所見。非夢也。盡也。乃公之心之所宣也。

大塊賦

李興悌

繫兩儀之肇判兮。二氣分而高下。彰爰清而且濁兮。曰玄而又黃。是謂大塊兮。蓋不知其中藏。與六子而並列兮。擁八方以爲丸。曾表裏之不可量兮。孰能形而倪端。合六合而爲一卵兮。孰能破而作兩。吞鳶魚之飛躍兮。亘古今之俯仰。既非矩之爲方兮。亦非規之爲圓。由其包之至大兮。是以施之無邊。觀其雲行雨施而不已兮。品物流形以洋洋。厚德載物而不洩兮。萬物資生而無疆。星辰粲粲而浮空兮。僅能覩其爲章于天。山川流峙而撲地兮。含弘廣大之自然。雖造化之有迹兮。固難測其神功。廓心腹兮。蕩蕩孕日月之幢籠。實形容之莫既兮。曰孰知其始終。偉聖人之盡性兮。叅三才以建極。配高明以贊化兮。能自強而不息。體悠久而成物兮。妙神化之莫測。余乃生乎箇裏兮。渺大倉之糲米。然

得二五之精妙兮，有浩然之奇氣。羗至大而至剛兮，遙善養而無害。諒彌滿乎天地兮，小無內而大無外也。將贊化而並立兮，夫何大塊之爲大也。歌曰：塊之大兮，不可名兮。吾之氣兮，大塊之盈兮。

新雪賦

成 俛

歲在壬申，惟仲之冬。玄雲承宇，萬竅呼風。異氣候之榛悒，瞻海岳之冥濛。余乃附冷火而撥死灰，披重裘而襲厚幪。視雲物而歎曰：異哉！此滕六之先驅也。小焉日車西匿，雪花飄零。繇繇密密，搖搖輕輕。始緣裳而便娟，終投戶而輕盈。映墀廡以獨耀，撲軒窓而有聲。歷松篁而欲挫，鋪池沼而漸平。形勢散漫，東西渺冥。獸迷群而狂顧，鳥失巢而忽驚。俄而雲陰解駁，月色微明。千山俱白，萬壑失青。銀河瑩瑩，不足以喻其淨。水國湛湛，不足以喻其清。爰策枯藜，爰陟阿丘。探景物之浩白，塞忘歸兮。夷猶顧謂客曰：雪之時義，其類孔多。載塗紀於周雅，黃竹申於漢歌。子猷發剡溪之興，惠連賦梁園之懷。謝安比喻，足見慧黠。歐公禁臆，謾誇其才。爾乃金屏日暖，玉樓夜遲。閒房寂謐，錦帳高垂。雲鬢歷亂，玉釵橫施。于時嚴寒啓候，密雪初下。玉林先春，銀界失夜。諒幽閑而儻曲，泛清瑟以自欣。陳桂酒而欲酌，嘆人生之長勤。至如日短寒窓，歲晏窮閭。幽士失意，終年耽書。捉衿肘見，納屨踵穿。家徒四壁，囊無一錢。見素雪之初飛，知節序之告闌。計無衣以卒歲，哀時命之艱難。若乃空明爽曠之境，繽紛淅淅之時。觸目興懷，有

喜有悲，雖勞搜而遠紀，固難得而備知也。客有詰余曰：子知雪之爲美，而未知雪之所由也。方今聖明在上，天地其德，敷和氣於兩閩，播仁風於四域，運七政於璿璣，調四時之玉燭，釀至和之氤氳，固塊垤而叵量，茲一尺之初盈，固亦豐年之祥者乎。不此之詳，願乃引物類之紛紜，迷聖德之無旁，於是相視而笑，昂之以歌曰：天地清寧，吾王之德，三白呈祥，吾民之福。又歌曰：歲寒將至，六花載布，子善體物，永保貞素。

次倪謙雪霽登樓賦

申叔舟

新天子卽位，覃恩內外。於是翰林先生奉詔至弊邦，景泰初元後正丙午也。越六日壬子，登賓館之後樓，屬春雪之乍晴，俯仰抒懷，迺援筆賦之。筆勢縱橫，氣象磅礴，出入乎三閩，凌轢乎兩都，眞罕世之傑作也。叔舟鉛槧末技，幸奉杖屨，得奔走於下風，挹清論之餘緒，而傳聞於未聞之口者，蓋亦多矣。不揆孤陋，敢踵二蘇和歸來之辭，掇拾荒蕪，強續高韻，非敢爲賦。聊表景仰不能自己之意云爾。賦曰：

翰林先生學究天人，智吞四荒。冰霜雅操，圭璋令望。郤紛華而味道，斥偏霸而談王。承新命於九重，歷薊遼以周章。至下國而駐節兮，拜後塵於趨走之行。曰或清而或濁兮，願將不遺於滄浪。接談笑之芬芳兮，審有脚之春陽。坐深井而觀天兮，敢求門而窺堂。日陪侍乎游衍兮，瞻盛儀之趨翼。發言而成章兮，剖美

玉於垂棘。登高樓以作賦兮。分餘光於東壁。方騁奇而湊怪兮。盲風颯其海立。及隱約以鈎微兮。羌冲澹之可挹。飄餘思於天外兮。搜幽腸而蕩滌。鑿混沌之元竅兮。忽雰翳之朗清。初緯繡其鬪角兮。卒同歸於玄精。維變化之叵測兮。實騷家之棟楹。方其嘯咏徙倚。俯臨朱甍。與大化以委蛇兮。發遐想於蓬瀛。值滕陸之效技兮。溘乘興兮攄情。揮瓊管以記勝兮。討玄機於落剝。媚巧態之婢媚兮。憑怒虬之呀攫。畜氣象於沆瀣兮。收大用於濩落。心與手其相應兮。運郢斤而盡聖。扈江籬以紉蘭兮。集芬芳以流輝。覃余懷之冥搜兮。俄再撫於九圍。學海汪洋而莫之涯兮。獵古今而交馳。託雅意於華作兮。名萬古兮昭垂。般景仰乎高山兮。微先生吾誰與歸。傾余蓋其若舊兮。絕中心之叮哇。飲醇醪不覺醉兮。遺耳目之所司。粵余慕金陵之識難兮。就子雲而問奇。固陋質之難化兮。效捧心於東施。顧微末之不自量兮。庶秦燕之芟夷。滌餘派而上之。求厥源之奚自。益見其所未見兮。亦夫子之所賜。安得紐弄闢闔。揣摩乾坤。存至道於日擊。通妙契於氤氳。辨魚魯而復正。開盲聵於吾民。使日出之域。東海之濱。同文一軌。而永囿我。聖天子之鴻恩也。亂曰。文章之富。博而精兮。擲地金聲。佩琚瓊兮。維山維斗。莫之京兮。駕楚馳漢。而大成兮。手抉天章。文昇平兮。燭火日出。難爲明兮。

八駿圖賦

并序

臣聞惟我朝肇基朔方。三聖相承，忠厚傳家，威德日盛。于時高麗之季，
衰亂已極。天眷東方，生我太祖康獻大王。克紹先業，心存康濟，奮不顧
身。乃於至正二十二年壬寅春，削平紅賊。是年秋，東走納氏。洪武三年庚
戌，北平元孽于東寧。十年丁巳夏，南捷倭寇于智異。是年秋，戰于東亭。十
三年庚申，戰于引月。十八年乙丑，戰于兔洞。二十一年戊辰，舉義於威化。
凡二十七年之間，前後數十百戰，出萬死犯艱危，卒夷寇亂，拯民塗炭。天
命人心，歸于真主。遂建大業，澤流後世。然其摧陷廓清之功，實於馬上得
之。馬之功，宜沒世亦當與之爲不可忘矣。其最駿而功者有八。今我殿
下，命圖著贊，以久厥傳。其追慕前烈，安不忘危，貽謨燕翼之義，可謂切矣。
聖子神孫，因是監前朝失之之易，思祖宗得之之難，以無忘八駿之功。
則寔我東方億萬世無疆之幸也。臣忝侍從，覩茲盛事，歌頌職也。謹拜手
稽首獻賦曰。

聖人在位，祇懼勵精。凡三十年，治教休明，四境無虞。朝野晏清，於是知守成之
不易。念燕安之鳩毒，追惟勗業之艱難，敷揚聖祖之義烈，乃至八駿之微，亦
在褒崇之列。夫駿之生也，神矣奇矣。房星委精，虬螭孕爨，扶輿磅礴，蜿蝮透蛇，
氣化淋漓，晦明雜遝。風雨恣其變化，陰陽從其闢闔。集衆美以妙合，成此天機
之卓犖。旣信旣閑，孔阜孔碩。耳曠批竹，蹄蹴散雹。方者中矩，圓者中規。姿格絢

練髮鬢，髻髻，駉駉祛祛，翼翼駢駢，電影回合，神光陸離，駢駢而涼颼吹，蹀跂而春雲起。一鳴兮胡沙浙瀝，再鳴兮冀北風靡。如是者顧千百而一二，將與麒麟鳳凰而並燬矣。若夫駿之用也，至矣大矣，生爲地用，千載際會，若恤若失，驕騰沛艾，駢駢獨步，蟠蟠卓立，馱駮飄颻，躑躅躑躅，塊歷恒華，杯飲河瀆，蠶刷行雲，尾捨流星，塵不識蹄，影不及形，輸勞行陣，服力銜勒，任重致遠，猶不稱力，與人一心，卒成奇蹟，馳聲策名，功歸丹青，垂永世而不朽，終萬古而揖餘聲。如是者曠百代而難遇，將與麟臺煙閣而同聲矣。歛駿之生也，奇矣神矣，不可陳矣。歛駿之用也，大矣至矣，不可紀矣。此天之所以產此神物，顯異於世一千百曠百代而爲我朝鮮受命之上瑞者也。想夫金雞滅丙，鹿失大運，去國脈絕，天網斷維，東土汨沒，奸回內蠱，寇賊四軼，朔風吹沙，黑水揚波，鏗鏗鞞鼓，銛銛鉦鐃，窺窺叩吻，鑿齒磨牙，殷血滲透，白骨嶮峩，居室化爲煨燼，邑井變爲戰場，邊徼丘墟，神州榛蕪，至是而世道之亂，生民之禍，極矣。不有聖人，孰濟墊溺。時維我祖，運值千一，神姿絕世，勇智天錫，愍萬姓之無辜，奮四世之遺業，順斗極而運天關，旋乾樞而轉坤軸，伸威奮武，叱風咤雷，天戈攸指，若朽斯摧，紅寇豕突，殘城破邑，憑陵咆咻，恣其燔炙，宗社焚蕩，乘輿播越，維我聖祖，賈勇振節，握螯弧而先登，歷親兵而餌敵，兇徒自蹈，十萬其級，手劍縱斷，躍馬踰城，追奔逐北，賊遂以平，納氏老猾，逞其猥獍，聯我邊奸，虐我邊氓，虔劉交刈，至于洪原，厥勢

孔熾志在曠吞維我。聖祖運智應機單騎挺進斬將奪旗射日射腋拉筋摘
髀累敗窮縮犇竄假息老猾褫魄終身心服漢彼東寧亡元之孽草黃薛竿與
天盤折鴨江澎湃限彼南北王命我。祖圖恢遠略元戎啓行威靈震疊漫空
紫氣占辭攸屬螳臂拒轍望旗釋甲頑酋執迷猶保兀刺維彼兀刺峻嶮天設
峭壁屹屹聖武赫赫孤城中潰降附四集雀繹紛泊宵蛾赴燭仁威遠暢克清
朔漠逖彼東溟烏夷之窟生長舟楫岸黠應疾視死如歸維利是逐鼠竊狗盜
投我邊隙帆竿蔽海舳艫如織王命我祖星馳往擊賊徒雲屯智異之側我武
惟揚一箭氣奪敗覆狼狽就險自固峻崖鱗崎劒槩交注白刃鞭馬紫電千日
駿騰一躍險失千尺迎刃崩墜填坑滿谷若山壓卵靡有遺子烏夷罔悛又寇
關西信文安鳳毒慘鯨鯢諸將奔潰鋒莫敢嬰。聖祖受命戰于東亭方事之
殷阻于泥淖龍駒蹀足一奮而逃應弦十七皆左其目賊駭而散爭相羈轡
聖祖下馬命酒張樂遺燼投險勢窮衝突矢集坐前愆氣自若徐命麾下遂殲
餘賊烏夷罔悛又寇南道嶮不暇守城不暇保攻陷若空芟薙如草屠燒州郡
至于雲峯。聖祖受命誓掃頑凶精誠貫日有白其虹千里索漠僵屍相積
聖祖惻然爲廢寢食乃督群帥戰于引月振威耀武身先士卒陷陣潰圍殲彼
驍將鋒摧刃折莫我敢抗舉國欣歡迎我凱唱烏夷罔悛又寇咸洪鯨奔獬突
諸軍望風不敢交綏若虎驅羊王命于襄。聖祖是將七箭卜勝軍中歡呼因

地設伏。按轡徐趨。螺聲警賊。破膽裂腑。魚游於鼎。東西相聚。聖祖示閑。從容解鞍。誘致其來。轉戰盤桓。四伏並起。若墮于羅。奔崩蹂躪。籍籍他他。我岡我陵。東海之阿。大命將革。天奪其衷。彼狡不量。大邦是攻。六月稱兵。指遼之東。群寮岌岌。萬姓洶洶。告之雖切。聽我若聾。屯兵孤島。霖潦瀕湧。進退維谷。大小悉恂。聖祖舉義。白羽彤弓。萬口相慶。不謀而同。爰至野人。千里影從。老幼相携。壺漿以迎。蕩滌邪穢。市肆不驚。拔亂反正。戢武韜兵。國以之定。民以之寧。凡是數者。寔皆我太祖豐功峻烈。卓卓有成者也。深恩厚澤。浹于生靈者也。積慶樹德。根深源遠。而爲後世子孫千萬億載之所憑者也。然此亦特其大略耳。如蕤川之勝。鐵關之捷。海豐之戰。遼陽之拔。大小百戰。所向輒克。此雖出於聖武神略。亦豈人力之所能及哉。于斯時也。材勇之士。智謀之彥。苟有一技一能。各爭售而競扇。攀鱗附翼。奔走後先。叢叢林林。紘紘紛紛。左右提挈。共贊大勳。蓋天之生聖人。以救時艱也。必生英雄豪傑。以爲之從。亦必生休祥神物。以濟其用。此八駿之生。乃天意也。而非所以佑我太祖之興者也。方其兩陣交綏。鼙鼓雷轟。殺氣干天。陣雲屏屏。出奇制變。爭機競角。壯士猛夫。熊挈虎攫。白刃霜磨。飛鏃雨落。紛紜沸渭。雲合霆發。濱駢駘。縱橫膠膈。成敗懸於俄頃。生死決於呼吸。桓桓聖祖。奮我鷹揚。馳堅突衆。所指無疆。霹歷列缺。吐火施鞭。萬人辟易。肆意周旋。條艸倩洌。霧散煙銷。飛巖霜而脫葉。舉烈火以燎毛。當之者何剛。

不折觸之者何堅不碎。破竹不足以論其勢。轉石不足以論其快。盖有不世之資者。當受非常之命。建不世之功者。當享非常之慶。我太祖值衰亂之季。以天縱之聖。勤勞既至。勳業無競。威挾震主。功戴不賞。惟天命之所歸。亦人心之所仰。遂應天而順人。終化家而爲國。演當世之餘澤。流萬葉而不竭。然跳躍所以習武。運甓所以肄勞。因閑圍獵。匪以遊遨。時聘廣漠。乃歷林臯。原隴起伏。丘陵牽聯。罷池陂陁。下屬于淵。石壁神截。脩崖天懸。激湍成澤。浩汗膠瀉。胥靡不能以遺死。御寇不能以展足。或臨大澤。蒹葭蒼鬱。淵冰初合。輕羅布薄。猛獸蔽伏。變生銜檠。或當冰坂。傾側險滑。或當峻嶺。崕峴巖嶭。飛走之所栖托。人迹之所不及。維我聖祖。縱轡往復。曰前而前。曰却而却。周旋合度。左右中節。星流歛至。圓轉電掣。矢不虛散。中必決背。走獸首丘。而歛羽。飛禽盤空。而洒血。王良造父之徒。賁育烏獲之屬。歛手喘息。邀飢受調。是雖聖人之神武。抑亦神駿之偉績。當其懸崖峻絕。泥淖束阨。危在頃刻。倉卒之際。縱有謀臣猛將。亦無所措其技矣。是則神駿之扶佑聖躬。或有非人之所可企者也。此我殿下之所以收八駿於繪事。錄神功於腐骨者也。茲蓋孝不遺於犬馬。謨乃恢於燕翼。媿嚴銘於几席。存切戒於朽索。觀夫新圖天關。遺光僚燭。風霜起練。造化生筆。起塵土之幽姿。聳當世之觀覲。形貌黻黻。氣象鬱勃。橫雲追風。發電凝霜。麟游龍騰。豹立獅黃。重霞累錦。沓壁連璋。同功異體。集瑞騰祥。威風懍懍。峻焰煌煌。百戰

癡者，尙帶遺鏃，捨攘之態，視之如昨。壯氣誓人，膽寒髮立，魂驚魄褫，彌日而定。此特八駿之糟粕，尙能動人之視聽，想當時之氣像，隔千齡而起敬。是神物之極致。在夫人而亦不易，又何必肉趨十影，然後始爲之異哉。嗚呼，物各有遇，遇各有時，生不得遇，則鹽車自足相困，遇不得時，則鼓車徒足見縻。雖或參於立仗，亦空飽於豆粟，苟欲一鳴，終不可得。今夫八駿，其生也當，聖祖之龍興，其死也托，聖主之追念，得時遇而得托，宜永世而無憾。賦已復爲之詞曰：若有龍兮驥之子，其之來兮天所俾，風雲澀兮雷雨走，若有駿兮龍之友，生有神兮死有名，若有駿兮龍之精，名萬古兮不渝，若有駿兮龍之徒。

東文選卷之三

終

東文選卷之四

五言古詩

織錦獻唐高宗

無名氏

大唐開洪業，巍巍皇猷昌。止戈戎衣定，修文繼百王。統天崇雨施，理物體含章。深仁誥日用，撫運邁時康。幡旗何赫赫，鉦鼓何鏗鏘。外夷違命者，剪覆被天殃。淳風凝幽顯，遐邇競呈祥。四時和玉燭，七曜巡萬方。維嶽降宰輔，維帝任忠良。五三成一德，昭我唐家皇。

寓興

崔致遠

願言扁利門，不使損遺體。爭奈探珠者，輕生入海底。身榮塵易染，心垢非難洗。澹泊與誰論，世路嗜甘醴。

蜀葵花

寂寞荒田側，繁花壓柔枝。香輕梅雨歇，影帶麥風欹。車馬誰見賞，蜂蝶徒相窺。自慚生地賤，堪恨人棄遺。

江南女

江南蕩風俗，養女嬌且憐。冶性恥針線，粧成調管絃。所學非雅音，多被春心牽。自謂芳華色，長占艷陽年。却笑隣舍女，終朝弄機杼。機杼縱勞身，羅衣不到汝。

古意

狐能化美女，狸亦作書生。誰知異類物，幻惑同人形。變化尚非艱，操心良獨難。欲辨真與僞，願磨心鏡看。

結綺宮

金富軾

堯階三尺卑，千載餘其德。秦城萬里長，二世失其國。古今青史中，可以爲觀式。隋皇何不思，土木竭人力。

書聊城驛

金君綏

去歲楓欲丹，乘輅赴南國。今年柳初黃，返旆朝北極。萬物化無常，四時行不息。溪流似我心，澄淨唯一色。

雜興九首

崔惟清

春草忽已綠，滿園胡蝶飛。東風欺人睡，吹起床上衣。覺來寂無事，林外射落暉。倚檻欲嘆息，靜然已忘機。

人生百歲間，忽忽如風燭。且問富貴心，誰肯死前足。仙夫不可期，世道多翻覆。聊傾北海尊，浩歌仰看屋。

蒼蒼山中桂，托根臨嶮巖。霰雪紛可畏，孤貞亮難移。夜月冷相照，春風綠漸滋。攀枝久佇立，空詠小山辭。

幽人夜不寐，待曉開窓扉。曙色天外至，空庭尙熹微。南枝動春意，歸鴈正北飛。

萬物各遂性，仰賀璇與機。
默默又默默，百年會有極。
頭上蓬已疎，眼邊花正黑。
春至苦無惊，夢歸竟何益。
舉頭看白日，長安在西北。
志士惜事業，宵人戀珠金。
經營兩不暇，義利走駸駸。
荒隴癯百草，賢愚同一沉。
何如且日飲，實腹而虛心。
嬌雲弄晴暉，庭草綠如染。
鳥酣嚙嚙嚙，蝶喜飛冉冉。
芳序忽如此，愁眉不須歛。
擬待桃李開，瓮頭方潑潑。
六載遊揚州，五賞揚州春。
楊州春似舊，老面但日皴。
壯志雖已鑠，風情與時新。
最憐街頭柳，嫋嫋欲惱人。
我未始知禪，因閑聊試貫。
道本無可修，心須早脫絆。
一源苟淵澄，萬象俱冰泮。
兀兀復騰騰，且作大憨漢。

留別金璿

林椿

苟同近循身，苟異近循名。
兩者未免累，不如俱忘情。
我性非好高，矯矯豈其誠。
只爲謀口腹，及辰欲歸耕。
鄉人來勸我，香稻富烏程。
閑乘一葉去，海上寄餘生。
軒軒金子美，肝膽何崢嶸。
與我年雖少，聞道卽已見。
臨別但相語，子去吾亦行。
滄浪知幾里，朝發暮江城。
慎勿負茲期，雞黍吾當烹。

竹醉日移竹

李仁老

古今一丘貉。天地眞蘧廬。此君獨酩酊。兀兀忘所如。江山雖有異。風景本無殊。不用更醒悟。操戈便逐儒。

司馬嘗客遊。夫子亦旅寓。新亭相對泣。數子眞兒女。此君恥匏繫。所適天不阻。何必登樓吟。信美非吾土。

贈四友

傲樂天

昔在文陣間。爭名勇先購。吾嘗避銳鋒。君亦飽毒手。如今厭矛楯。相逢但呼酒。宜停雙鳥鳴。須念兩虎鬪。

右詩友林耆之

陶朱雖相越。一舸泛溟渤。安石在晉朝。雅賞東山月。今我與夫子。豈是愛簪紱。散盡東海金。行採西山蕨。

右山水友趙亦樂

我飲止數杯。君飲須一石。及當醉陶陶。至樂相與敵。兩臉若春融。千愁盡冰釋。何須校少多。且得適其適。

右酒友李湛之

支遁從安石。鮑昭愛惠休。自古龍象流。時與麟鳳遊。詩法不相妨。古今同一丘。共在圓寂光。寧見別離愁。

右空門友宗聆

川東坡語寄貞之上人

歲律既云暮。淒風生戶牖。竹窻燈火青。一段有佳趣。與君分一半。慎勿輕受授。所與苟非人。火迫當還取。

早起梳頭効東坡

燈殘綴玉葩。海闊涵金鴉。默坐久閉息。丹田手自摩。衰鬢千絲亂。舊梳新月斜。遂手落霏霏。輕風掃雪華。如金鍊益精。百鍊未爲多。豈唯身得快。亦使壽無涯。老雞浴糞土。倦馬驅風沙。此亦能自養。聞之自東坡。

讀陶潛傳戲成呈崔太尉

酒中有何好。此語近真趣。可笑陶淵明。無錢尙嗜酒。我性淡無欲。於物不見固。不醉亦不醒。徑到無何有。

宿香村

金克己

雲行四五里。漸下蒼山根。鳥鳶忽驚起。始見桑柘村。村婦理蓬鬢。出開林下門。青苔滿古巷。綠稻侵頽垣。茅簷坐未久。落日低瓊盆。伐薪忽照夜。魚蠅腥盤飧。耕夫各入室。四壁農談諠。砉礮作魚貫。咿嚙紛鳥言。我時耿不寐。欹枕臨西軒。露冷螢火濕。寒蛩噪空園。悲吟臥待曙。碧海含朝暎。

憇炭軒村二老翁携酒見尋

幽尋荒草徑。下馬繫枯柳。何處白頭翁。並肩來買酒。山盤獻枯魚。野榼供濁酒。

笑傲虛落間，荒狂便濡首。雖慚禮數薄，尙倚恩情厚。倒載赴前程，村童齊拍手。」

龍灣雜興 五首

羈愁滅睡味，坐覺秋宵長。尋食出門去，南山穿翠岡。空潭正澄碧，老樹何鬱蒼。境僻車馬絕，無人管迎將。唯餘林下菊，粲笑送幽芳。前行石頭路，隔嶺來異香。定有仙聖域，煙嵐但深藏。興盡却回轡，捫心空歎傷。

舊聞定遠城，樓雉何雄奇。霸圖一墮地，遺址空逶迤。封人昔爭境，取捨無定姿。邇來自出塞，窮寇何須追。北臨杳空闊，鳧鴈號古陂。幾年犬豕窟，雲稼今離離。登眺自多感，况逢霜葉飛。可惜寒澗菊，凌霜吐芳蕤。微風送幽馥，向我如有期。大川噴蛇山，十里聲怒號。偶到淵渟處，停轡燭鬢毛。自笑衰陋質，魚龍亦驚逃。安知天上日，水底亦光昭。應憐半鏡雪，塞邑操牛刀。持用亦矜負，此行非不遭。平生鬱鬱情，俯仰成陶陶。

我憐鎮水僧，清淨無塵慮。抽身簿書間，半日陪杖屨。窻前巖溜飛，席上嶺雲度。嘯詠便忘返，天昏山向暮。俗士爭功名，沉碑劇杜預。豈知陶靖節，林下問征路。巖巖妙高峯，壁立千丈直。偶尋林下僧，空畔躡雲碧。因窺壁間詩，五字皆破的。始知方外客，先我已探歷。斯人定清曠，恨不同茗席。空令千載下，慷慨弔幽迹。」

有感

年光急流水，轉眄難挽留。人情自疲役，到此方始休。幸儉簿領隙，清景宜追求。

鴨江最奇處，羸馬時縱遊。霜鱗戲柳渚，雪羽蹠蘋洲。冬寒尙未嚴，野菊留清秋。織枝倩雨洗，細蘂憑風揉。幽蘭已枯瘁，歲晚誰與儔。寧隨道傍葦，踐履羊與牛。何殊不羈士，獨立遠俗流。

魯連泛碧海，支伯接蒼州。亭亭出塵想，萬古高英儔。我雖慕二子，行止非人謀。膏肓負泉石，纏索嬰笏脩。若非入醉鄉，拘迫何時休。官餘試攬枕，臥作雞林遊。行吟兔嶺月，坐漱蚊川流。不知千里外，從宦已三秋。一朝掛冠去，誰復馴白鷗。誰家紫髯將，昂息橫素霓。問胡早富貴，華族聯山西。齷齪業文士，寧知東走迷。身微似馬足，竟歲勞塵泥。天意元無私，物情自不齊。冥心念出處，漏盡城烏啼。憶與林下友，同棲白雲溪。風亭夏同假，月榭秋共躋。別來今幾歲，歸夢杳天倪。浮名損真性，掩涕倍慄悽。

田家四時

歲月風轉燭，田家苦知促。索綯如隔晨，春事起耕耨。負耒歸東阜，林間路詰曲。野鳥記農候，飛鳴催播穀。饁婦繞田頭，芒鞋才受足。稚子尋筍蕨，提筐向隴谷。遲日杏花紅，暖風菖葉綠。甘雨亦如期，夜來勻霖霖。莫辭東作勤，勞力在吾力。彤雲射晶光，赤日淹暑度。田居近南訛，榴榴無曉暮。農夫爭荷鋤，徧野已雲布。唯有看屋翁，頂絲白於鷺。客來方進饌，窮不待珍具。野果與園蔬，皆由親種樹。客去收殘尊，嬌兒帶老姥。器聲逐晚風，吹落西家去。隣翁念餘瀝，一徑穿夕霧。

鴻鴈已肅肅，蟋蟀仍啾啾。田夫知時節，銓艾始報秋。四隣動寒杵，通夕聲未休。晨興炊玉粒，溢甌氣浮浮。紫粟落紅樹，朱鱗鉤碧流。白瓶酌杜酒，邀客更相酬。外貌雖陋促，中情尚綢繆。酒闌起相送，顏色還百憂。官租急星火，聚室須預謀。苟可趁公費，私廬安肯留。何時得卓魯，却作差科頭。

竹徑趁溪開，茅廬依崦結。窮冬瑾北戶，意欲防風雪。尙能知傲寒，鷹犬出遊獵。馳騁狐兔場，短衣澆流血。還家四隣喜，促坐爭哺啜。茹毛何足恠，居處壯巢穴。品爨枯枿火，滿室互明滅。兩股亂蘋豆，襟裾從破裂。布衾擁衆兒，窮若將雛鴨。竟夜眼不得，農談逮明發。

追和歐梅感興

陳 溱

待物當以信，應天當以誠。爲善畏人知，陰德猶耳鳴。平時等愚陋，臨事見真情。君子故守分，恥有過實名。嗟予聞道淺，憫憫空此生。歲晚無所獲，如農初不耕。道左買時憎，志迂遭物責。居然見陸沉，有甚風波激。寸苗庇長材，衆彩猜太白。爭將脆似韋，却笑介如石。寧甘無辜失，可忍非義得。憂來不敢說，詩以代鵬臆。少年慕功名，爲善忘早晚。高懷月在天，逸氣驥走坂。胷中貯諫書，一一堪綴纂。安知蟻鼻缺，坐使純鉤損。遂令萬丈虹，縮作一寸短。心知儒冠誤，感歎時豈免。然當在大鈞，天聽終不遠。時去不可追，泰來非我勉。陋巷少閑燥，迺爲淫潦迫。游鞍稀拂拭，但見蛛絲織。嘗聞傲吏語，學道無鬼責。

問渠百年閒，憂患那得力。吾故把藜羹，無心慕肉食。

蓼花白鷺

李奎報

前灘富魚蝦，有意劈波入。見人忽驚起，蓼岸還飛集。翹頸待人歸，細雨毛衣濕。心猶在灘魚，人道忘機立。

釣名諷

釣魚利其肉，釣名何所利。名乃實之賓，有主賓自至。無實享虛名，適爲身所累。龍伯釣六鼈，此釣真壯矣。太公釣文王，其釣本無餌。釣名異於此，僥倖一時耳。有如無鹽女，塗飾豔容媚。粉落露其真，見者嘔而避。釣名作賢人，何代無顏子。釣名作循吏，何邑非龔遂。鄙哉公孫弘，爲相乃布被。小矣武昌守，投錢飲井水。清畏人之知，楊震真君子。吾作釣名篇，以諷好名士。

適意

獨坐自彈琴，獨吟頻舉酒。既不負吾耳，又不負吾口。何須待知音，亦莫須飲友。適意則爲歡，此言吾必取。

遊家君別業西郊草堂二首

春風扇淑氣，朝日清且美。駕言往西郊，塋壟錯如綺。土旣膏且腴，况復醞潭水。歲收畝千鍾，足可釀醇旨。何以度年華，日日花前醉。念此任胼手，意欲親耘耔。乘興自忘返，岸幘聊徒倚。遠岫烟蒼茫，曜靈迫濛汜。月明返田廬，醉歌動隣里。

快哉農家樂，歸田從此始。

日高醉未起，簷燕欺人飛。童僕方巾車，苦促南畝歸。起坐罷梳沐，長嘯出松扉。林深日未炤，草露猶未晞。徐行望清叻，決渠雨霏霏。田婦白葛裙，田夫綠麻衣。相携唱田墾，荷鋤如雲圍。勉哉趁蒿杏，耕穫且莫違。

擬古

李混

昨日花滿樹，今日花辭枝。東風有何忙，開花無停期。花開亦莫喜，花落亦莫悲。此花雖已落，還復有開時。不見青銅裏，朱顏日日衰。賢愚同歸盡，毀塚空纍纍。置之飲美酒，惻愴終何爲。

次韻皖上人山中作

釋天因

君從山中來，勝境閱多少。自言所歷多，象外極高妙。初經月南洞，千嶂洗秋雨。樓臺出其下，金碧照巖宇。行行轉清曠，襟抱豁披露。巉巖上絕頂，下瞰衆衆步。留詩謝禪翁，恨不相從早。清風響萬壑，千偈猶未了。

誓上人在龍穴寫經有詩見贈次韻奉答

海門千點山，點點遙可數。憑欄試一望，宵有烟霞趣。君居疊翠間，爽氣常吸漱。神清鶴骨癯，毛衲雲縷縷。自言素無能，餘事難入手。唯思寫蓮經，欲以滌瑕垢。清風掃一室，是中亦何有。明窓置淨几，一寫三稽首。妙哉精進幢，末季無出右。緒餘能爲詩，辭婉氣渾厚。拳拳意未已，如犢渴思乳。所恨兩差池，未共山中住。

幾迴清夜夢，飛到龍泓口。歸期在不遠，且待歲云暮。

遊四仙窟有作

仙遊邈已遠，嘉境轉幽寂。晴川碧如藍，石蘚暖於席。逍遙能幾時，俛仰忽陳迹。淹留非不佳，但恐日易夕。

文殊寺

釋坦然

一室何寥廓，萬緣俱寂寞。路穿石罅通，泉透雲根落。皓月掛簷楹，涼風動林壑。誰從彼上人，清坐學真樂。

次韻答鄭載物

子厚

崔溱

今人賤古人，兒子欺老翁。先儒去逾遠，誰復回淳風。託人以爲直，專美而擅公。悠悠百歲下，莫辨烏雌雄。我生生苦晚，好古思擊蒙。向人說肝膽，奚啻楚越同。所以與時迕，到處哭途窮。豈不欲媚寵，素志庶有終。王侯第宅閒，却掃一畝宮。去歲遇秋風，高興寄江東。晉陽也是公桑梓駕焉忽遠適，魂夢先飛鴻。賞遍好湖山，足寫心有忡。卽欲住佳處，便自任窮通。迺抱遊方念，歸來復怱怱。先生古君子，道在接物中。自有五經笥，不憂四壁空。

吳德仁生日

夫道在率性，不可離斯須。非道久猾夏，命世大賢無。吾邦古朝鮮，英俊時並驅。邇來道亦衰，寥寥歲月逾。天豈似秦政，忍使斯民愚。牛山鍾秀氣，降神生老吳。

天資自淳粹，道義與之俱。獨專明代望，早奮經濟圖。小吳字德仁，丹穴有鳳雛。襁褓襲箕裘，老吳德不孤。便便五經笥，汝爲君子儒。生日會佳友，筵秩開金壺。座客皆飲酒，肝膽向君輸。皆云享眉壽，終始保金軀。而我本狷直，客後煩相呼。願君奉老吳，事業同三蘇。

二十一除夜

二十一除夜，燈火一書帷。今夕是何夕，又作除夜詩。詩意一何苦，念昔勞我思。十歲心尙孩，喜慍安得知。我年方十一，問字始從師。自一至於五，學海迷津涯。十六充舉子，士版得相隨。十七戰春官，中策欣揚眉。自謂有怙恃，不樂愁何爲。是時少檢束，放浪日含卮。但倚富年華，豈慮名宦遲。世事苦多乖，天也非人私。何圖纔及冠，條忽悶母慈。茶每入中腸，痛哭何可追。況今老夫子，夏孟承疇咨。仍按東南轡，違顏一歲彌。有弟亦遠遊，空詠鶴鶴辭。子立默四顧，欲言聽者誰。所以傷我神，泣涕謾漣洏。秦相方乳臭，斗印纍纍垂。功名不在大，只在遭其時。二十寂無聞，誰稱丈夫兒。我今旣云過，一命未曾繫。二十一除夜，空作徂年悲。

三月二十三日雨

去歲乖雨暘，農家未插秧。萬民落饑坎，相視顏色涼。今年春又旱，拱手愁愆陽。青泥井水涸，赤血朝暎光。道路多餓殍，郊原阻農桑。我慵常晏起，清曉臥草堂。雨意作蕭蕭，聲語俄琅琅。推枕忽驚起，開窗喜欲狂。柳堤濕翠黛，花塢凝紅粧。

物色沃更生。一一吐芬芳。迺知上帝心。終不負民望。耒耜滿南畝。可計千斯倉。敢辭破屋傘。口腹吾已忘。

送尹樂正莘傑北上

人生一世間。有命懸在天。窮達各其分。惟道貴如絃。奈何枉尋者。悠悠動百千。先生中有恃。物莫外相牽。願言一終始。名節兩俱全。

上已益齋席上得盛字

憶在大德間。吾年方甚盛。亦自喜功名。愛澹不愛靜。奔馳竟無成。進退兩交病。年今過半百。敢謂能知命。晚契託高人。月不負觴詠。禊事講今辰。想像蘭亭令。縱恠非詩仙。且樂中酒聖。

送閔仲玉生員東觀西還

瑞

趙廉

隨君鶴嶺雲。照我燕山月。我曾還古鄉。見月戀金闕。君復赴皇都。望雲念親闕。雲月若無情。孰知臣子誠。臨歧不忍別。城西屢送行。願言從此去。登第揚芳名。

寄廣州牧使南巽亭

郭琬

黃花如有期。今日正滿籬。采采不盈掬。高歌空折枝。悠然起遐瞻。美人江之涯。相勉惜歲晚。秉燭毋遲遲。

思舊山

舊山烟蘿中。三椽有老屋。故人昨寄信。當歸盈一掬。微官不放歸。歸計徒自熟。

愁來鳴玉琴。霜風生古木。

贈朴中書中美

憶昔夢大槐。門多車馬賓。揮之竟不去。伺候何逡巡。自從賦歸來。東閣凝素塵。朴侯不遺舊。至今來頻頻。青青松柏秋。馥馥芝蘭春。美矣君子哉。清風驚俗倫。

送草亭員外歸京師

金倫

靈山辛夫子。一代稱有聞。芳年取高第。舉足騰青雲。遷移更右職。光彩動乾文。開筵辭故舊。鞍馬何糾紛。臨觴不能飲。離恨徒云云。此去調鼎館。竭力輸忠勤。餘波及鰈海。未老歸桑粉。

澗池

李齊賢

強秦若翼虎。懦趙真首鼠。特會非同盟。安危在此舉。蒲卿膽如斗。杖劍立左右。叱咤生風雷。萬乘自擊岳。桓桓百萬兵。一言有重輕。廉頗伏高義。犬子慕遺名。駕言池上遊。去我今幾秋。餘威起毛髮。萬木寒飈飈。

漢武帝望思臺

漢皇好奇士。江充來犬臺。舌端寄毒螫。肚裏藏禍胎。信信吠舊主。全趙飛驚灰。茂陵自英武。將相多賢才。胡爲不絜矩。利祿崇奸回。天倫化豺虎。戾園空草萊。

古風

公子遠行役。鞍馬光翕艷。憔悴玉樓女。忍淚不教滴。念之不可忘。奮飛無羽翼。

寒鍾鳴苦遲，何時東方白。
三冬天地閉，龍蛇蟄幽宮。
世道多反覆，君子有固窮。
虛窓列遠岫，白雲度晴空。
從噴不迎客，揮琴送飛鴻。
山中有故人，貽我尺素書。
學仙若有契，此世真蘧廬。
軒裳非所慕，木石難與居。
不如飲我酒，死生任自如。
清朝樂無事，十日九下帷。
偶然出官道，立馬看奔馳。
草草功名子，紛紛豪俠兒。
歸來對黃卷，一笑還自怡。

古風

釋禪坦

有琴掛寒壁，爛盡南山石。
唐堯與虞舜，九泉已零落。
秋燈一曲詞，坐待東方白。

蟻庵白號

尹澤

朝日東窻明，夕陽西窻白。
中臥一老人，晝靜門無客。
足以送餘生，何須鍊精魄。
但慮酒有無，誰寬復誰隘。

姜薄命用太白韻二首

李穀

妾本寒門子，荆釵居白屋。
美質天所生，兩臉如頰玉。
自倚傾國艷，乃與世人疎。
五陵多年少，過者皆停車。
一笑肯輕賣，千金且不收。
以此自憊期，歲月長江流。
西風昨夜至，莎雞鳴露草。
紅顏恐消歇，時過不再好。
生不識人面，長年在深屋。
一爲色所誤，反遭珉欺玉。
憎愛古無常，朝恩暮乃疎。

悒悒詠秋扇，望絕登君車。金牀爲誰拂，繡被久已收。闔空寒月落，但見螢火流。沉憂暫成夢，依稀鬪百草。世無相如才，誰令復舊好。

紀行一首贈清州叅軍

古人重畫一，今人好變更。法令牛毛細，黔蒼魚尾頰。嗟嗟遠遊子，爾心胡不平。平生多爲口，慣作東南行。逶迤過上黨，千里到韓城。道途多所見，感嘆由中生。十里五里間，馳傳紛可驚。下馬立道側，過眼如流星。吾疑將德音，布茲南畝氓。或云算閒口，抽錢及孤孽。或云籠山野，割地歸兼并。訟牒方組織，逃戶連欵傾。皇華豈謂是，聖人著之經。忽詠大東詩，兀如未解醒。先王勤且儉，四方始經營。山川各有界，租稅豈無程。孔氏罕言利，孟子惡交征。時當春雨後，布穀閒關鳴。不見田頭饑，誰從水際耕。我欲買山去，鑿翠開風櫺。園中養松竹，門外種稼穡。茂樹坐鬱鬱，清泉飲泠泠。日讀洗心經，無令世故嬰。尺地入金穴，何處安柴局。所以事奔走，終歲不得寧。念我掌書郎，青衫倦送迎。此亦眼所見，彼亦耳所聆。知君常對此，意氣何崢嶸。君心一寸丹，君鬢十分青。他年廟堂上，手調殷鼎羹。吾詩儻不棄，以爲座右銘。

送黃先生瑾

沈東老

海中明月珠，其價難比數。此豈老蚌生，是實驪龍吐。世俗得失閒，衆狙紛喜怒。反以魚目美，爭相充府庫。至寶終不棄，時來必遭遇。我曾被汲引，金坡忝攀附。

斥鷃徒區區，鸞鶴肯相顧。且作送行詩，繾綣倒情素。

送崔咸一直郎出按慶尙

高中址

金井山高，巖巒似天目。下有東萊城，煙霞棲古木。世稱神僊居，地清人不俗。白日雲氣蒸，湯泉涌山谷。行旅館其傍，方冬得漱沐。野橋壓平湖，小亭依斷麓。云昔蘇轍僊，來遊騎白鹿。客舍誰所營，壯觀天下獨。北軒名積翠，一面千竿玉。月夜梅梢寒，秋風橘柚熟。東望孤雲臺，抃海翠峯矗。暫時寄遊賞，平生心意足。我本箇中人，長江遠茅屋。謬學功名流，塵土空碌碌。至今清夢裏，遙想滄浪曲。再拜送皇華，爲我護松菊。

玄陵賜司藝金濤大書蘿蔔山人金濤長源八字

白文寶

金君早志學，讀書蘿蔔山。蘿蔔尙淡薄，菜根誠可餐。立心貴堅固，事無爲之艱。回也居陋巷，不過食一簞。夫子謂賢哉，學至鑽仰間。長源才混混，聖門必觀瀾。中朝高捷科，顯赫躡華班。所進有如此，誰不擊節嘆。吾君大書字，九重垂寵頒。銀鈎光星日，千載爲盛觀。臣拜頌至寶，子孫傳所慳。

送辛員外赴上國

金 玠

玉禁初筮仕，聲名已籍甚。我時趨下風，聯裾常懍懍。潤身德有隣，照人光可飲。事業望伊周，文章鄙曹沈。青雲起平地，富貴眞天稟。握蘭恩光溢，珥筆霜威凜。密勿代王言，獻替無內荏。經邦出教條，掌試精題品。功名絕後前，屈指才五稔。

皇朝亦召用。寵迫頒天廩。行見鹽梅手。調羹不失箴。故人貴言贈。一言要更審。風氣殊南北。願言調膳寢。京師雖信美。何如輝畫錦。歸來扶我王。使我民奠枕。

送辛草亭齋赴上朝

金師道

深山萬木稠。巨海百川赴。愷悌君子人。福祿之所聚。北闕受綸命。東省摠幾務。宿弊靡不除。明斷有餘裕。遂令大小吏。皞皞民安堵。朝廷聞其能。試之以府庫。財貴藏於民。要使邦本固。便應日九遷。廊廟展高步。豈不念吾君。付托同肺腑。豈不念慈親。倚閭恒戀慕。東人去益思。如嬰兒失乳。天高耳屬地。敢以此呼籲。若將重外論。還轅在朝暮。

辛草亭赴燕都賦上字爲別

張沈

憶昔星山君。耿介言忠讜。論交事以兄。趨舍同所尚。有日到雲齋。呼君出見沈。熟視心異之。端知好器量。玩味聖賢書。一舉登金榜。及至輔兩王。民喜得良相。宸極記姓名。除目標殊獎。拜餞冠蓋馳。舉酒西樓上。此去重邦家。臨歧何愴悵。

潘陽雜詩

鄭誦

秋氣日已嚴。衆草漸衰歇。遊子苦思歸。日月多如髮。世情未易測。公論難輕發。常喜斷經過。矧肯事干謁。閉門無所爲。焚香至日沒。此懷誰與論。浩歌對明月。明月流中天。晃朗無纖陰。幽人喜無寐。兀坐到夜深。夜深群動息。浩然萬里心。比隣有遠客。席月鳴瑤琴。初彈紫芝曲。漸變操南音。聞之三嘆息。和以梁父吟。

徘徊月漸側。悲風生遠林。將子且止之。毋使我沾襟。

結廬

結廬在澗曲。地僻心茫然。山光滿席上。澗水鳴窓前。高詠紫芝曲。靜撫朱絲絃。門無車馬至。此樂可終年。

詠菊

我愛黃金菊。凌霜有光輝。獨立晚更好。孰謂孤芳微。風霜雖凜冽。亦不畏其威。足以制頽齡。匪獨救我飢。

送人赴都

少日遊天京。結交皆豪英。虛名簸人口。壯志自可驚。見知韓太尉。竊比蘇穎濱。那知事大謬。東歸受艱辛。閉門無車馬。寒燈照疎屋。自聞君欲行。頻夢燕山綠。山城春事遲。二月猶冰雪。遙想黃金臺。正是花時節。此行喜有餘。浮面氣可掬。安得萬里風。先生騎鴻鵠。

誠齋詩上柳侍中濯

李仁復

誠者性之德。不妄故不息。所以大君子。於此必用極。我身繫安危。我居宜謹飭。窻扉敞虛明。欄檻去雕飾。逶迤退自公。燕座至移刻。新扁人具瞻。表正影斯直。望重專鈞衡。功崇在社稷。魁然房杜風。萬古永作則。

題蘭坡李御史壽父卷

居仁

猗蘭生有香。故與君子配。操入宣父琴。紉爲楚臣佩。高風縱云遠。賸馥今猶在。夫君亦有美。藝此勤灌溉。芳根幾許深。綠葉尤可愛。方期雨露濡。豈被蓬蒿碍。時於九畹間。潔己正相對。榮華發容顏。和順積肝肺。所居必移氣。明德應無晦。君乎勉旃哉。維以佐時又。

東文選卷之四

終

東文選卷之五

五言古詩

予在山中。竟日無相過。拖筇曳履。獨徜徉乎澗谷。寥寥然無與語。唯影也。造次不我違。爲可惜也。作詩以贈。

李達衷

我惡我之影。我走影亦馳。無我則無影。有我使無影。有術吾未知。人言若惡影。處陰庶可離。陰亦物之影。人言乃更癡。物我苟有矣。陰影復在茲。無我亦無物。陰影安所施。舉聲我問影。影也無一辭。有如回也愚。默識而深思。凡我所動作。一一皆效爲。唯我頗多言。影也不取斯。影也豈不云。言乃身之危。顧非影効我。我乃影爲師。

雜興五章寄思菴

雲松何蒼蒼。家在山之阿。於焉守幽獨。覽物悲年華。嚶嚶聽春鳥。又復見秋禾。豈我事高潔。人自無相過。嫣然草中花。灼灼紅曠綠。黃蜂來何方。歌詠慰幽獨。翩翩有珍禽。剝啄韻枯木。事無關我心。足以娛耳目。自我來山中。事事漸疎略。不見我所思。芻蕘相唯喏。田疇事方急。亦未共酬酢。去矣勿違時。吾當成獨酌。

種粟礪礪田。望望待其熟。黃雀不我貸。竟日費驅逐。既非汝所爲。公然實汝腹。噫汝縱得肥。恐爲鷓所肉。

孤雲本無心。汎汎遊宇宙。無心而白衣。無心而蒼狗。無心而東西。無心而去住。雲我俱無心。相與爲益友。

閨情

贈君同心結。貽我合歡扇。君心竟不同。好惡千萬變。我歡亦未成。憔悴日夜戀。棄捐不怨君。新人多婉變。婉變能幾時。光陰疾於箭。焉知如花人。亦有欺皺面。

次益齋詩韻三首

行歌滄浪水。恥憇惡木陰。舉世不知故。何人能刺今。時命難可常。功名亦何益。若爲安此心。困眠且飢喫。

無心作兔窟。觸事畏蠅焚。徒勞事鉛槧。未足興家門。歸來嘆無魚。禍福從失馬。安貧無所爲。退食便清坐。

可惜吾無翁。孤墳白楊風。亦喜吾有父。皤然益齋公。陸族同欣戚。與人無莫適。仁恩河海深。欲報愧涓滴。

樂吾堂感興詩

有物在重淵。凡鱗難並比。何嘗點其額。亦不頰厥尾。晦養安所安。無心就劉累。動也苟失時。鱣鯨困螻蟻。

周公坐待旦。文王不暇食。何嘗樂宴安。凜乎存戒飭。反復踐中行。孜孜盡心力。大業竟無愆。休光垂罔極。

神物登窮蒼。風雷相蕩薄。豈能安泥蟠。頭角隘寥廓。變化難窺覷。晦明而潤涸。疇能相攀援。德澤推廣博。

尺蠖緣孤叢。乃上上盡頭。欲下却不得。多見不自由。始焉苟知此。小止無悔尤。物微有所感。欲進還退休。

行莫近蠱窠。驚蟄卽有蝮。居莫近鳥巢。啄啐則有鸛。苟不慎其微。終然肆爾毒。斯言君勿輕。我乃黃金玉。

居卑急於進。所與亦匪人。若跳不視地。行險幾危身。河流當前急。欲度須問津。小安且勿躁。勇往恐淪湮。

將行有河海。將涉無舟航。要見我所思。欲往還彷徨。才非傳說楫。世運亦未昌。潛光且俟命。妄動遭禍殃。

吾知過不及。其失則爲同。不及猶可勉。過必隳其功。存心須慮善。開口或興戎。要當不遠復。何至哭途窮。

八月初九日夜坐

韓脩

皇天分四時。寒暑各有節。祝融何不廉。八月尙炎熱。今宵金氣應。揮扇始得輟。悠然坐南榮。仰視乾文列。月在析木津。不見西柄揭。

污吏同朴獻納用陳簡齋集中韻

晉祿

鄭樞

城中烏亂啼。城下污吏集。府牒暮夜下。豈辭行露濕。窮民相歌哭。子夜誅求急。舊時千丁縣。今朝十室邑。君闔虎豹守。此言無自入。白駒在空谷。何以得維繫。

擬成婦擣衣詞

楔遜

皎皎天上月。照此秋夜長。悲風西北來。蟋蟀鳴裁床。君子遠行役。賤妾守空房。空房不足恨。感子寒無裳。

皎皎天上月。休照玉門關。金戈相磨戛。中夜縮綵寒。良人昔告別。豈謂歸路難。徘徊一西望。令我摧心肝。

天上月皎皎。中宵入羅帷。白露裊清礎。音響有餘悲。敢辭今夕勞。游子何時歸。沈憂不能寐。焉得凌雲飛。

擣擣閨中練。裁縫如霜雪。緘題寄邊庭。中有淚成血。婦人得所歸。終始惟一節。云胡妾薄命。與君長相別。

嚶嚶雲間鴈。飛鳴亦何哀。豈無一書札。欲寄復徘徊。願言各努力。賤妾不足懷。君亮執精忠。妾當死中閨。

靖安君餞詩得知字

李茂芳

皇明大一統。乾坤清且夷。萬方共臣妾。星犇朝玉墀。朝鮮古三韓。遙隔蒼海湄。首被東漸化。千載此一時。矧今新主作。滔滔江漢思。朝覲遣親子。敬謹邁前規。

煌煌靖安邸，輓輓車載脂。君親恩義重，奉節登前歧。英姿與清節，殊方應共知。專對又何慮，三百其誦詩。天笑錫恩光，因之賦露斯。美哉此行役，將建大平基。老夫當刮目，錦還觀羽儀。

答胥有儀

李 穡

少年負奇志，悲歌舉唾壺。慨我少良友，躑躅燕山隅。焉知豪傑士，隱淪沾與屠。外雖被短褐，內或懷明珠。遠慕燕昭王，賢士來于于。徘徊金臺側，隆基如覆盂。奈何荆軻子，賈禍督亢圖。流俗豈知此，游俠競樛菹。最喜得吾子，知非山澤癯。當路莫予識，哦詩伴蜜殊。秋風起西陸，白露萎菰蘆。江南有寒梅，絕句傳林逋。桃李豈不好，與子慎趨途。

答竹礪禪師

山游登崐嶙，水涉經方壺。身行天下半，跡起東海隅。神心馬繫皂，歲月羊趨屠。誰謂臭皮袋，自藏如意珠。清談極要妙，戲語還於于。高標山千仞，淡慮水一盂。靜室香火冷，左右書與圖。時時出詩句，易易如樛菹。源深流不竭，道腴身甚癯。善幻是僧業，妙用隨時殊。久叅庭前栢，欲跨江上蘆。河孺今苦戰，軍令嚴稽逋。遲公飛錫去，感彼歸正途。

答東菴禪師

今夕是何夕，白酒傾金壺。蒲萄結層陰，清風生座隅。東菴三韓秀，巉巉玉蘇屠。

游戲於斯文。疊璧聯雙珠。愧我辱酬唱。芝蘭雜軒于。張羅獵佳句。儼開左右孟。疇昔先人在。契深三笑圖。春風與秋月。詩酒爲樛菑。超然名教外。肯復論肥瘠。鶴去雲獨留。傷心人世殊。豚犬亦何幸。藤蔓纏葫蘆。卮酒不敢辭。詩令不敢逋。醉吟視萬古。擾擾同一途。

答鐵船長老

梵雄在叔世。中流千金壺。道大無津涯。二氏不滿隅。鐵船窮其源。外緣俱剪屠。居山和鬼句。過海逢蛟珠。南游盡於越。北走窮單于。白雲逐筇杖。甘露盈鐵盂。日用豈云淺。奉福歸蘿圖。已將五欲樂。一掃空樛菑。綺語尙未免。強作哦詩癯。篇篇帶豪逸。迥與郊島殊。奇字問楊雄。祕書傳瓠蘆。狂生乏詩料。競病安敢逋。高談發佳興。往往忘歸途。

復作遣興

賣藥有異人。市上常懸壺。指我蓬萊山。迢迢天一隅。汝當戒有欲。神龍猶被屠。授之青玉訣。贈以明月珠。自茲斥繁麗。高歌于蓊于。晨登泰山頂。東海如杯盂。俯視昔人跡。流觀輿地圖。興亡一軌轍。勝負真樛菑。日月如車輪。蓋非儒者癯。歸來守玄牝。一源分萬殊。青青寒磻松。漠漠春汀蘆。天公囿萬物。達者或能逋。刀圭得仙藥。駕鶴青雲途。

寒風三首與葉孔昭同賦

寒風西北來，客子思故鄉。悄然共長夜，燈光搖我床。古道已云遠，但見浮雲翔。悲哉庭下松，歲晚逾蒼蒼。願言篤交誼，善保金玉相。

寒風西北來，日夜吹不休。雲飛碧空闊，樹木聲颼颼。早衙有公事，策馬披重裘。武夫喝官道，心中焦百憂。何如日三丈，徐起猶蓬頭。

寒風西北來，漸見層陰結。坐知風勢闌，又是天欲雪。須臾舞萬鶴，變化真一瞥。閉戶獨微吟，途中車軸折。時聞楚石琴，焚香更清絕。

有感

李斯出荀况，豈非儒雅士。相秦顯其君，道固在於此。竟起焚坑謀，高談之弊耳。其心非禽獸，異好豈本志。僦僦函丈間，搖唇勿容易。一字訓之非，流禍明在史。

擬古

古人貴從道，今人重趨時。庖羲畫大易，文王初系辭。周孔迭有術，君子當念茲。變動如流水，天理分毫釐。差之信千里，守經無自危。

古人學有法，今人學無師。自得信天挺，爲善當孜孜。自我志吾道，外患何曾移。朝夕惕以守，庶不磷而緇。霜露日惻惻，甚矣吾之衰。

古人重知命，順受天地心。天地我所出，父母恩愛深。禮以定制，度智以酌古今。隨時蹈大道，敞豁仍沉潛。今人反自小，鄙哉牛馬襟。

有感

天地帝洪爐。鼓鑄一何勞。理以爲之主。氣以分其曹。少或似鱗角。多奚趨牛毛。仁義是膏粱。禮法爲笏袍。粲然被天下。吾生安所逃。

古意

早行莫太早。太早令人迷。夜半便發輟。前途互高低。人家在何許。時聞林外雞。趨歧旣已迷。未辨山東西。天明始知悔。我行何栖栖。

自感

無悶是聖人。遣之賢者事。戚戚以終身。斯爲小人耳。我學本空疎。我行多乖異。有聲觸于耳。妄動寧復止。鶯語融吾神。虫鳴悽我志。我則踐我迹。歲月其逝矣。抑戒皎如日。尙期無自棄。

贈曹溪禪師云鑑

閔霽

道人抱夙志。物外遂長往。眞源靜無瀾。法喜日方丈。宴坐巖谷深。閉門松檜長。高蹤隔塵凡。企予徒想像。

分題得九曲溪送友

釋宏演

溪花處處發。溪水曲曲清。花發惜年華。水清宜濯纓。睠言詩書地。悠悠權歌聲。千年武夷詩。懷哉考亭名。高蹈繼前轍。寧負平生盟。歲晚此翱翔。梅竹冰雪明。

分題得種柳橋送友省親

送君楊柳橋。贈君楊柳枝。楊柳不足贈。所念在別離。君歸果何爲。悠悠白雲思。

綵衣固自樂。學道莫遲暮。采采泮中芹。流年莫虛度。

感興

李崇仁

昨日苦炎燠。今朝忽淒慄。霜露衆卉腓。歲月如駒隙。人生穹壤間。身世兩役役。况復非金石。行年不盈百。所以古時人。分陰當自惜。

吾聞王子晉。逍遙緱山巔。笙聲徹寥廓。白鶴飛翩旋。冥筮久已排。冷然無憂患。下視何茫茫。蠛蠓朝暮間。我生若拘束。果哉諒非難。寸心竟誰語。取琴而一彈。[

聲。亶天機運。肅肅秋氣悲。飄飄西風來。撼撼號枯枝。悠悠遠行客。一去無還期。妾身空閨。日夜長相思。相思不可見。惻愴終何爲。]

送僕符寶

斯守公文

玉衡指南陸。薰風吹我衣。徘徊登高原。悠悠勞我思。浮雲日夕征。問君將安歸。丈夫意有在。不作兒女悲。人生非參商。會合諒無疑。但願崇令德。功名惜芳時。]

送人游燕兼東仲賢

仲賢時在河南王幕

翩翩丹穴雛。翔集非凡樹。矯矯熒河孫。騰踏思大路。烏府固清班。世梗還失趣。拂袖將北征。草木秋風暮。燕山帝王都。縹渺隔烟霧。歸途良阻脩。行矣慎馳騖。吾聞天子聖。垂拱張理具。丞相匡復志。求士方吐哺。之子富才術。何患不遭遇。遙知一往謁。欣然蒙特顧。仲賢亦奇士。與予有親故。相從十餘載。才名推獨步。鞍馬不復來。使之長思慕。恨吾守幽獨。歲月事農圃。若爲生羽翰。萬里忝攀附。]

送河南郭九疇使還

錫名永

帝曰惟上帝保朕生豪英。丞相爾朕弼。忠義同阿衡。寇盜未衰息。民心厭羶腥。命爾體朕意。往哉幹不庭。明公受節鉞。奮烈將義兵。臣若不集事。胡顏復朝廷。臣實有膽略。視身如寸莛。桓桓百萬衆。勢甚高屋瓴。鋪敦耀天威。號令馳雷霆。聞我念前勳。敵愾贊皇靈。政欲共心力。萬里通丁寧。齊桓事業盛。聖人書諸經。美矣謀寧周。豈獨首止盟。兩君既相好。孽芽安足平。鄙夫亦不佞。景仰心獨傾。見子忽破顏。白眼還能青。怡然接高論。奇鋒新發硎。相逢恨已晚。况復廻飛輪。天長道途阻。歲暮霜雪零。請子慎行邁。慰我憂犛犛。

龍江舟中有懷北平周叅政

名倬字雲章

昔與周雲章。情親重骨肉。把酒賞幽芳。論文剪紅燭。相逢共恨晚。歸期何太促。一別各西東。三載飽荼毒。自我初銜命。謂言當刮日。人事喜蹉跎。宦途苦遼邈。持節燕山陲。繫舟龍江曲。懷哉不可見。日暮烟波綠。

大倉

鄭夢周

幽人夜不寐。秋氣颯以涼。曉來眄庭樹。枝葉半已黃。白雲從東來。悠然思故鄉。故鄉萬餘里。思歸不可得。手把古人書。憂來聊自讀。憂來縈中腸。廢書長嘆息。人生百歲內。光景如過隙。胡爲不自安。而作遠遊客。

己酉冬宿長守驛寄益陽太守李容

白雲在青山。遊子去鄉國。歲暮雪霜重。胡爲遠行役。驛亭中夜起。雞鳴聲喔喔。明發赴前程。悠悠懷抱惡。故人日已遠。回首淚盈掬。

次韻送騎牛道人

月自註李周道嘗遊關東每夜騎牛自號一可道人

權近

道人隱城市。卜築歧路邊。園中有嘉卉。屋下生冷泉。閉門自怡悅。甘受兒童喧。隣家問酒沽。午榻看雲眠。時乘舞雩興。赤足凌潺湲。回頭嘆人世。逝者如奔川。遙思騎牛地。明月滿海壖。浩然賦式微。出處斯萬全。奚囊拾秋景。驢背載芸篇。歸哉不可挽。曷月余亦還。

永慕亭詩

自註郭壯元麟使日本不返其孫大司成忠守作此亭

倜儻壯元郎。落落志節奇。拜命使絕域。國耳忘吾私。樓船去不返。杳杳終難追。孝子抱永慕。感感多苦思。晨興日東望。滄海何淪漪。海水亦云淺。此恨無有涯。海水有時竭。此恨無窮期。賢孫構新亭。欲寓心所悲。哀哀起攀呼。栢樹多枯枝。居諸照下土。出自東方來。音容不可接。涕淚常自垂。邈矣墳上草。西靡空離披。自註世言壯元墳在日由來忠孝門餘慶當不衰伯道未有子天道何無知應本其草皆西向而生

送詔書使國子學錄張溥使還

子牧隱作亭記

皇帝御宸極。四海通舟車。多士共躍鱗。濟濟聯華裾。先生斯文表。經術爲菑畬。家聲繼留侯。道學傳橫渠。崛起振英聞。玉佩鳴瓊琚。周旋奉帝訓。羽翼侍皇儲。

於樂辟雍地。巍冠講詩書。受命下天闕。叱馭經險阻。誕布寬大詔。協氣充州閭。駕言回征轡。旌旆何旖旎。風高秋日淡。霜重樹葉疎。雲鴻飛杳杳。矯首空踟躇。

遊子吟

卞仲良

遊子久未返。弊盡慈母衣。故山苦遼邈。何時賦言歸。人生不滿百。惜此西日暉。

次許濂太史韻

尹紹宗

堯舜去我遠。宣尼留末由。西胡教彌天。聖學於何求。蠹敗幾人國。覩然不少羞。我欲秉大阿。驅除出九幽。坐令四海民。刮目見虞周。難以語外人。幸有君同憂。

送仍上人葬其師頓菴于錦州還京

海寇極癸亥。千山萬山血。父子東西奔。生死不相恤。哀哀仍月江。聞亂忘飢渴。徒步二千里。收拾師尊骨。蠶踵冒寇鋒。至誠貫白日。吾聞浮屠氏。人倫一滅絕。事師如父母。觀者爲感悅。月江吾月江。執袂未忍別。

一月三十日寄野堂吁齋

一月三十日。一日又一宵。宵宵夢二公。既寤心搖搖。每於晝寐間。兩公欣相招。會未終一言。開眼還無聊。冬曦不可夕。夏夜不可朝。昏明百廿刻。刻刻精魂消。有蔚進禮山。崧山何迢迢。道里千有餘。相望天沈寥。一別踰三年。朱顏日以凋。南極鳳凰去。滿眼紛鴟梟。喪亂草間逃。邈矣彤弓弨。語之聽者誰。長策沉芻蕘。安得身生翰。挾彼天風飄。飄然往從公。駟虬躋紫霄。俯釀天之河。挹以北斗杓。

沃茲下土渴萬世無焦焦從公歌既醉左右擊咎繇卒歲以遨遊一洗離憂饒
會合非人爲望公空長謠

祭東門媪

外甥兵部公早歲奈遺腹孤兒韶齠時慈顏又就木同氣雖云多何曾哀念鞠
如無東門媪兒命誰復續自兒歸寒門生理尤荼毒病羸操井臼十七髮鶩禿
諸兄席先資奴婢曳紈縠兒寒三冬交弊布兩肘赤兄家馬厭穀兒飢常面黑
嗟哉六月間種粟粟未熟兒病咬菜根仰屋含悽惻剪髮換醕來敗惡不可食
媪來不忍看抱兒向天哭及媪臨絕時呼兒瞑不得媪意豈有他恐兒餓丘壑
兒今送薄酒媪也格不格

關山月

鄭道傳

一片關山月長天萬里來塞風吹不盡冷影故影徊蘇武何時返李陵亦未廻
蕭疎白旄節寂寞望鄉臺豈無南飛鴈音信何遼哉見月三歎息搔首有餘哀

登三峰憶京都故舊

端居興遠思陟彼三峰頭松山西北望峩峩玄雲浮故人在其下日夕相追遊
飛鳥入雲去我思終悠悠采芝不盈掬置彼道之周一往諒非難胡爲此淹留
城闕豈不樂亦愛巖壑幽浩歌攀桂枝卒歲以優遊

石灘爲李正言存吾作

石面立削鐵灘流奔長虹。灘頭橫漁艇。灘上寄茅宮。高人抱清疾。歸來臥其中。朝遊欣蕩磨。夕眺驚明滅。天炎挹孤爽。潦盡流皓月。春水碧於藍。何如飄朔雪。燕坐玩奇變。逝者無停時。獨有雙白鷗。飛來長在茲。嗟我不如鳥。未去空相思。

遠遊歌

時恭愍王爲魯國公主起影殿
土木大興公托周秦得失諷之

置酒賓滿堂。起舞歌遠遊。遠遊亦何方。九州復九州。朝樾洞庭波。暮泊易水流。四顧騁遐矚。想像雍熙秋。翼翼唐虞都。崇崇夏殷丘。歲月曾幾何。邈矣不可求。登車復行邁。翩翩逝宗周。峩峩靈臺高。靄靄祥雲浮。鳳凰鳴高岡。關雎在河洲。緜緜千載後。綽有無疆休。繼世何莫述。王風日以偷。祖龍呀其口。一舉吞諸侯。阿房與天齊。兀盡蜀山頭。禍在魚狐間。一朝輸項劉。孰非出民力。得失如薰蕕。徘徊感今昔。日晏旋我輶。滿堂賓未散。舉酒相獻酬。高歌未終曲。雙涕爲君流。

嗚呼島吊田橫

曉日出海赤。直照孤島中。夫子一片心。正與此日同。相去曠千載。嗚呼感予衷。毛髮豎如竹。凜凜吹英風。

感興

久客尙緜綌。北風淒以涼。團團寒露至。蘭枯謝幽芳。悠悠關山遠。行行道路長。何以卒歲晚。歲晚多繁霜。冽彼山中泉。在山清且澗。堤坊一朝決。就下何沛然。去山日以遠。衆流會其間。

無復向時清。逝者何當還。我來臨水上，不忍聽潺湲。
鳳凰何飄飄，高逝不可望。飢食青琅玕，渴飲天池潢。俯視塵世窄，嗷嗷雞鶩場。
所以久不下，徘徊千仞岡。

贈陽谷

道人結茅屋，在彼山之陽。白日照其上，草木妍其光。冲然寂無營，宴坐談羲經。
君看七日復，朋來無疾傷。萬物雖未形，天心正分明。縱橫變化殊，盡向一中生。
此理亮昭晰，自古非冥冥。吾當往問之，爲我一丁寧。

贈別遼東使桑麟

朴宜中

賢侯受明詔，出鎮遼海堦。佐幕皆英奇，秋水映紅蓮。桑公實其秀，奉使來朝鮮。
開口吐冰雪，揮筆傾雲烟。而予苦無似，何幸得攀緣。談笑洗塵抱，豁若沉痾痊。
既荷辱清顧，况復贈佳篇。相逢未云幾，胡爲遽言還。行止固有命，聚散皆由天。
但願誓金石，終始不變遷。西風吹祖帳，曉月隨歸鞭。道里阻且脩，山川浩無邊。
霜露淒以凜，行行慎節宣。莫惜報好音，慰我長懸懸。

有感

姜淮伯

蒼海無垠堦，瀰漫天地間。其大固無外，中有三神山。扶桑倚天東，可望不可攀。
蛟龍之窟穴，鼉鼉之所安。誰能掣巨鼇，使之安波瀾。難可限南北，九萬其鵬搏。
嗚呼皇王澤，比則寬莫寬。何如浴沂風，舞雩翱翔羽。儀朝天衢，導疏壅遏清人。

區。

無題

無名氏

重陽好時節。山水江南絕。萬里無纖雲。扁舟弄明月。行尋群玉峰。偶入蘆花雪。夜深欲歸歟。棹歌悲復咽。

題韓仲質文學竹所

柳思訥

愛物多成癖。幽人所其竹。居諸對此君。可使食無肉。與可付之墨。精神脫塵俗。子瞻詠於詩。珠璣光潤玉。七賢醉蘭亭。千載誰繼躅。二妃泣湘梧。萬竿血染觸。飛泉灑松頂。蒼筠蔭茆屋。撫琴坐中堂。彈成大古曲。有客抱琴來。溪橋自相矚。相對兩相忘。千秋一碁局。

端午日寄通判明府

李詹

自我謫河東。今經二端午。鄉愁角黍長。世味菖蒲苦。五馬出重城。一樽遊極浦。相望咫尺間。深室氣如縷。

感興

卞季良

春蠶復秋蛾。歲月無停期。人生非金石。少年能幾時。馳名日拘束。靜言心傷悲。既壯不努力。白首而無知。思之一長嘆。庶幾來可追。嶙峋有古栢。托根深山中。霜露日夜催。臥壑如蟄龍。豈是梁棟材。所嗟無良工。我來久吁怪。柯葉嘶悲風。棄捐勿復道。此恨今昔同。

賀李中樞貞幹年七十壽九十慈親

金自知

美哉李相公。盛事誰敢駢。慈親在高堂。九十猶康寧。養志固子職。色難著於經。怡愉奉晨夕。髮髮垂星星。時以具八珍。舉觴稱遐齡。七旬綵衣舞。風彩照羅屏。清詞間琴瑟。裊裊徹冥冥。群孫摠振振。迭獻仍醉醒。歡忻樂云多。和氣浮罍餅。一家自位育。增輝惟德馨。如公古亦少。終當紀汗青。

傲古

趙須

一生苦沉繇。二月患喉叟。三夜耿不眠。四大真是假。五旬尙如此。六袞安可過。七情日煎熬。八還終當藉。九經眞自鄙。十載徒悲吒。

怨詩

成侃

蓐食向東阡。暮返荒村哭。衣裂露兩肘。餅空無儲粟。稚子牽衣啼。安得餽與粥。里胥來索錢。老妻遭縛束。踰墻陟崢嶸。十日竄荆棘。潛身草間行。日落山谷黑。魑魅憑岸嘯。淒風振林木。凜然魂魄褫。一步三四息。嗟嗟黠吏徒。誅求一何速。公門非不仁。汝輩心甚毒。

題畫山水二首

姜希顏

仙山鬱岩嶢。雲氣連蓬瀛。茅亭隱巖下。綠竹繞簷楹。高人奏綠綺。細和松風清。彈成太古曲。超然悟長生。

峰巒高峯。飛泉瀉天渠。噴薄千萬丈。可望不可居。騎驢者誰子。咫尺行趙趨。

長嘯一回首。天地真籟際。

效八音體寄剛中

洪逸童

金多令人貴。無詩令人俗。石頑固不害。桂香終見伐。絲染不須悲。歧多何必泣。竹看君子操。松愛歲寒骨。匏飲信可樂。蝸室聊自適。土床冬暖足。華牖夏散髮。革帶任男頑。藍衣置妾惡。草木與同腐。一生何役役。

陽德途中偶吟

申叔舟

前年一齒落。今年一髮白。固知老不免。奈此便相迫。役役猶未休。萬里事劒戟。功業無足取。虛名亦已極。庶幾謝簪紱。歸來保迺拙。

哭具綾城

一氣有聚散。生死如晝夜。天道固如是。不必空嘆咤。此理素所講。念言不能舍。夫子我所師。德量逼造化。汪汪萬頃波。滙涘誰能訝。際遇贊明時。柱石在大廈。刺口論是非。於君無小罅。有德必有壽。施獲於旣稼。謂將享期頤。俄然禍所嫁。交情數十載。連袂常並駕。人事詎可恃。一夕忽彫謝。耿耿懷宿昔。哀哀雙淚瀉。滿城風雨惡。孤燈題楚些。分明更五過。獨坐不成臥。

東文選卷之五終

東文選卷之六

七言古詩

寄洪天院

東野居貧家具少。自笑借車無可載。杜陵身窮更遭亂。未免負薪常自採。我今無田食破硯。平生惟以筆爲耒。自古吾曹例困厄。天公此意真難會。五鼎一簞未足校。富死貧生何者快。作書乞飯維摩詰。不厭空門清淨債。先生有意能活我。千金何必河監貸。

續行路難

李仁老

登山莫編怒虎須。蹈海莫探眠龍珠。人閑寸步千里阻。太行孟門真坦途。蝸角戰甘鬪蠻觸。路歧多處泣楊朱。君不見嚴陵尙傲劉文叔。七里灘頭一竿竹。我欲飈車叩閭闔。請挽天河洗六合。狂謀謬算一不試。蹄涔幾歲藏鱗甲。峩洋未入子期聽。熊虎難逢周后獵。行路難歌正悲匣。中雙劍蛟龍泣。

顏悲枕眩食一簞。東陵晝膳脯人肝。世間萬事真悠悠。直道由來作人難。我欲伸曲鉤。斬曲几。要須平直如金矢。黃河正漲碧琉璃。不着一點秋毫累。

半月城

孤城微彎像半月。荆棘半掩猩狒穴。鵠嶺青松氣鬱葱。雞林黃葉秋蕭瑟。自從

大阿倒柄後。中原鹿死何人手。江女空傳玉樹花。春風幾拂金堤柳。

弘教院聽講

漢家離宮三十六。鐵鳳橫空螭鬪角。鑾輿隱隱幾時回。魚鑰沉沉春草綠。古壇掃盡拜星餘。黃金構出青鴛剎。蘭羞蕙饌倒天厨。歲月經多源不渴。金鐘曉動春雷鳴。禪衲于于鳧雁行。江湖倒瀉珊瑚舌。滿地花雨紅茫茫。問誰指畫不愆素。肉身大士吾季父。

贈接花者

鸞筋鳳喙不易得。煎膠續斷無痕迹。羨君手持造化鑪。玉尺金刀管春色。移紅轉紫在須臾。夢幻不知誰主客。君不見當時扁鵲稱神醫。換易心肝人不識。

竹醉日移竹

火雲燒空金石焦。此君風韻寒蕭蕭。窮冬凜冽膠欲折。此君顏色誠難凋。此君素節堅如鐵。此君空腹渾無物。吟風嘯月守長齊。玉瘦瓊寒冰自潔。天工用意真兒戲。欲試此君聊一醉。宛宛虹霓垂半天。倒捲酒天千斛水。朝來細雨滴空階。淨滑真是蒲萄醅。此君臨風成一嘯。窪尊不用黃金罍。腰支偃亞醉正熟。身世何殊浮海粟。扶路歸來數里餘。滿身尙帶苔痕綠。錦裯嬰兒忘客上。頭角森然犀玉露。惺然一罷醉鄉眠。谷變陵移真朝暮。君不見莊生立言非荒唐。得全於酒終無傷。

白樂天真呈崔太尉

唐文渾渾世莫及。三變終爲一。王法韓公逸氣吞。荀楊詭然虎鳳。謝羈擧。柳州柳子亦精敏。傲雅依騷多綴緝。二公於文俱有功。唯韓直節千仞立。是時元白亦齊驅。金春玉應工篇什。花坊酒肆競吟諷。馬走牛童盡收拾。雷轟雖負一時譽。正如韓柳不同級。瓜上青蠅何處來。慙顏奚啻十重甲。唯公逸氣獨軒軒。雪山一朶雲間插。草堂曾占香爐峰。穿雲欲把琴書入。白頭遍賞洛陽春。遇酒便作鯨鯢吸。海山兜率足安歸。宰樹煙昏唯馬鬣。玉皇特賜醉吟號。一片翠石蛟蛇蟄。問時何人拂袖歸。八折灘頭手一執。千年遺像若生年。瓊樹森然映眉睫。遠慕相如有長卿。欲比荀鶴聞杜鵬。我非昔日黃居難。只期方寸與公合。

碁局

玉石交飛紅日晚。遊人也宜樵柯爛。苒苒蛛絲籠碧虛。翩翩鴈影倒銀漢。鼠穴縱通趙將鬪。鶴唳已覺秦兵散。兀坐凝神百不聞。座中真得巢由隱。

寶石亭

石虎宮中荆棘生。銅駝陌上無人行。危亭寶石半零落。殘月依依照古城。當時絲管盡悽咽。泛泛金觴隨曲折。中流空惜魏山河。醉鄉不管陳日月。

讀韓信傳

王孫朝飢依漂母。國士無雙心自許。不將一劍輕少年。還把千金購降虜。當時

破齊足自王。可憐與噲終爲伍。從來烏盡弓必藏。不用追思蒯生語。

扈從放榜

半簾紅日黃金闕。多士三千鴈成列。忽從丹陛姓名傳。縱步青雲歧路闊。吐鳳成文價益高。畫蛇着足難藏拙。老手曾經百戰餘。今恠吳牛虛喘月。

崔太尉雙明亭

謂公巢許寓城郭。謂公夔龍愛林壑。千金買斷數畝陰。碧瓦朱欄開小閣。清風泠泠午枕涼。蒼雪陣陣空庭落。求閑得閑識閑味。舊遊不夢翻階藥。群花落盡一株松。白雲深處青田鶴。回首區區夢幻場。千里追奔兩蝸角。醉吟先生醉龍門。八節灘流手自鑿。六一居士居潁川。著書詫琴自書樂。豈如庭院得蓬瀛。不煩鸞鶴遊寥廓。雙明亭上望遙岑。寸碧依然如有約。

黃山江

金克己

起餐傳舍曉度江。江水渺漫天蒼茫。黑風四起立白浪。舟與黃山爭低昂。津人似我履平地。一棹漁歌聲短長。十生九死到前岸。槐柳陰中村徑荒。

權場

昨夜淩淩風裂地。今朝漠漠雪連天。戶外頑寒體生軫。填窓擬作終日眠。豈料使華先犯曉。鏜笳雷動鴨江邊。驚起衣裳自顛倒。急呼紫鷲連着鞭。奔波始及枕水館。屈體拜叩麾幢前。一隊刀鎗獨西渡。橫穿半里圭璧田。忽見氈廬臨野

市高旗獵獵。鼓闐闐。豪商貂裘。手可炙鼻息。直上成雲煙。奔競毫芒。收貨貝。載車折軸。擔楨肩。野人貌古。口啞甘。被欺謾。良可憐。買得燕珉。作荆璞。囊中散盡。三萬錢。滿眼賢愚。搃爭利。時予兀坐。猶塊然。俛面何如。縮頭鼈。回腸却似。鳴勝蟬。日午公厨。忽破寂。銀觥蘸甲。傾香泉。鬢須纒絡。頓消釋。暄暖解扶。衰朽年。胡兒咻咻。過帳外。未到數步。聞臊羶。也知溪谷。滿不得。觀我朶頤。流饒涎。

醉時歌

釣必連海上之六鼇。射必落日中之九鳥。六鼇動兮魚龍震蕩。九鳥出兮草木焦枯。男兒要自立。奇節弱羽。纖鱗安足誅。紫纓雲孫始墮地。自謂壯大陳雄圖。鍊石欲補東南缺。鑿石將通西北迂。嗟哉計大未易報。半世飄零爲腐儒。不隨馮異西登隴。不逐孔明南渡瀘。論詩說賦破屋下。却把短布抱妻孥。時時壯憤掩不得。拔劍斫地空長吁。何時乘風破巨浪。坐令四海如唐虞。君不見凌煙閣上圖形容。半是書生半武夫。

七夕雨

銀河杳杳碧天外。天上神仙今夕會。龍梭聲斷夜機空。烏鵲橋邊促飛蓋。相逢才說別離苦。還道明朝又難駐。雙行玉淚洒如泉。一陣金風吹作雨。廣寒仙女練睨涼。獨宿娑婆桂影傍。妬他靈匹一宵歡。深閉蟾宮不放光。赤龍下濕滑難騎。青鳥低霑凝不飛。天方向曉訖可霽。恐染天孫雲錦衣。

興王寺彭公房兄李眉叟內翰予年十二使之賦詩歎賞不已贈之
片雲紺髮覆額新。雙電光寒猛射人。彭公鑑識真天眼。撫頂云是天騏驎。一篇
新詩風雨快。萬丈雄氣江海溢。鳳子鸞雛有異毛。瑤泉玉水無凡派。何必王家
珠樹三。廼翁生兒青出藍。殷勤寄謝李眉叟。不如還與阿戎談。

金明殿石菖蒲

陳 溱

花瓷碎玉含微涓。溪毛翠嫩根龍纏。風婆癯瘦甚可愛。知是草中山澤仙。白將
露液侵寒碧。曉來葉葉垂清滴。已驚秋意滿房櫳。忽覺詩魂迷水石。蓮花清淨
出淤泥。白芷芳馨生海隅。誰識蒼然几案上。寸莖歲久還生鬚。禪窓日永香煙
裊。一枕隨風竹陰好。上人睡足眼波寒。宴坐相看不知老。

桃源歌

艸角森森東海之。蒼煙紫芝曄曄南山之。翠巔等是當時避秦處。桃源最號爲
神仙。溪流盡處山作口。土膏水軟多良田。紅厖吠雲白日晚。落花滿地春風顛。
鄉心斗斷種桃後。世事只說焚書前。坐看草樹知寒暑。笑領童孩忘後先。漁人
一見卽回棹。煙波萬古空蒼然。君不見江南村竹作戶花作藩。清流涓涓寒月
漫碧樹寂寂幽禽喧。所恨居民產業日零落。縣吏索米長敲門。但無外事來相
逼。山村處處皆桃源。此詩有味君莫棄。寫入郡譜傳兒孫。

宋廸八景圖

平沙落鴈

秋容漠漠湖波綠。雨後平沙展青玉。數行翩翩何處鴈。隔江啞扎鳴相逐。青山影冷釣磯空。浙瀝斜風響疎木。驚寒不作憂天飛。意在蘆花深處宿。

遠浦歸帆

萬頃湖波秋更闊。微風不動琉璃滑。江上高樓迥入雲。憑欄客眼清如潑。俄聞輕櫓亮鴈聲。頃刻孤帆天一末。飛禽沒處水吞空。獨帶清光橫一髮。

漁村落照

斷岸潮痕餘宿莽。鷺頭插翅閑爬癢。銅盤倒影波底明。水侵碧天迷俯仰。歸來蕩笠不驚鷗。一葉扁舟截紅浪。魚兒滿籃酒滿瓶。獨背晚風收綠網。

山市晴嵐

青山宛轉如佳人。雲作香鬢霞作唇。更教橫嵐學眉黛。春風故作西施頰。朝隨日脚卷還空。暮傍疎林色更新。遊人隔岸看不足。兩眼不博東華塵。

洞庭秋月

滿眼秋光濯炎熱。草頭露顆珠璣綴。江娥浴出水精寒。色戰銀河更清絕。波心冷影不可掬。天際斜暉那忍沒。飄飄清氣襲人肌。欲控青鸞訪銀闕。

瀟湘夜雨

江村入夜秋陰重。小店漁燈光欲凍。森森雨脚踏平湖。萬點波濤欲飛送。竹枝

蕭瑟碎明珠。荷葉翩翩走圓汞。孤舟徹曉掩篷窓。緊風吹斷天涯夢。

煙寺暮鍾

煙昏萬木栖昏鴉。遙岑不見金蓮花。數聲晚鍾知有寺。縹緲樓臺隔暮霞。清音裊裊江村外。水靜霜寒來更賒。行人一聽一回首。杳靄濛濛片月斜。

江天暮雪

江上濃雲翻水墨。隨風雪點嬌無力。憑欄不見昏鴉影。萬樹梨花春頃刻。漁翁蕩笠戴寒聲。賈客蘭橈滯行色。除却騎驢孟浩然。箇中詩思無人識。

扈駕奉元殿夜醮

香宮稽顙扣瓊宮。霓旌羽節排寒空。嬰香噴作篆文曲。紙錢窸窣呼天風。夜深月悄人語絕。時聞玉漏聲丁東。王母歸來獻天壽。千年老樹桃花紅。

書雲巖寺

昨夜山梅一枝發。山中老僧不知折。使君年少正多情。走傍寒叢問消息。恨無仙人雙玉簫。吹破人間遠離別。到山三日不登山。無奈東風却淒切。明朝上馬入紅塵。誰賞堂前一簾月。

使金通州九日

去年九日秋澄閣。楓酣晚霜湖色薄。鴉鬢捧酒壽佳賓。手揉秋香沉琥珀。畫欄細裊茱萸煙。醉眼生紅呼不覺。江東陳跡俯仰間。此日西遊天一角。漁陽南畔

不見山野店蚊雷屯豹脚。道傍強飲不成歡。短日紅煙添寂寞。唯有西風猶古態。蕭蕭吹着烏紗落。

蓴菜崔山人寄書請賦

吾聞晉日雲雷擾。英雄性命誰自料。腸斷蛾眉金谷春。夢寒鶴唳華亭曉。江東季鷹酷愛蓴。秋風歸帆疾如鳥。後來真味識者稀。豈獨知幾人白少。君不見五侯席上厭羶葷。玉椀冰絲時一耍。千里瓶罌費携擔。懸知咀嚼無風調。爭如江南無事人。一頂烏紗臨碧沼。手採柔條活欲動。石鼎微煎看徐攪。下鹽却笑羊酪麇。解酒欲鬪鱸魚妙。寄書乞詩意有在。諷我欲脫紅塵鬧。青衫薄宦有何好。夢魂已落滄洲渺。我行何必待秋風。明日休官理歸棹。

遊月宮

月駕長風轉碧虛。剛出瑠瓠作飛緜。廣寒宮殿千里圓。玉女乘鸞庭下列。天高仙樂咽笙簫。風動霓裳響環玦。白兔搗藥經幾秋。藥成不被姮娥竊。調和沆瀣供仙真。嚼下天喉若冰雪。仙居天上得長生。嚙向人閑除酷熱。妙手修宮八萬餘。玉斧森羅守扇鑄。逍遙各飽青冥遊。厭厭天飄白玉屑。羨他公遠緣銀橋。捫參陟過斗牛舌。星河下拍牛郎肩。滿掬瓊華親手掇。清都可望不可攀。夜夜轉頭心斷絕。

過清虜鎮

金希碑

將軍杖鉞未雪恥。將何面目朝天闕。一奮青蛇指馬山。胡軍勢欲皆顛蹶。虎賁騰拏涉五江。城郭爛爲煨燼末。臨杯已暢丈夫心。反面無由愧汗發。

和

宋國瞻

以仁爲脊義爲鋒。此是將軍新巨闕。一揮向海鯨鯢奔。再舉向陸犀象蹶。況彼馬山窮獠兒。制之可以隨鞭末。朝涉五江暮獻捷。喜氣萬斛春光發。

和

孫襲卿

塞垣無鼎又無鍾。欲記元功詩可闕。書之板上告後來。觀者爭前僵復蹶。孟明濟河雪秦恥。若比於公當處末。明年又可定天山。三箭元無一虛發。

致遠庵主以詩見示仍以請予紀山中故事次韻答之

釋天因

東南壯觀有水山。自古聖賢留軌躅。我來此山訪其老。晤語數宵猶未足。因言山來自大白。文華之勢天下獨。蒼崖萬仞路百曲。幽居誰肯此來卜。文昌崔侯始結廬。姚生學書仍接屋。上有金生古巖窟。貝書寫出千餘軸。根流墨每滴。硯。天帝降藥使明目。下着永郎捨身處。願出清泉灑炎滄。故留仙骨在金匱。幾教來者同熏浴。後有大乘坐頭陀。卓庵面勢依暘谷。三賢二聖共栖遁。千載風流競芬馥。至今遺跡宛猶在。勝事無人書帛竹。近聞東都紫微翁。早驚身世勞榮辱。試尋佳處立願刹。湧出樓臺照林麓。仍邀其老置庵中。衣掛煙霞形土木。繁華已厭浮海蜃。得失又忘蕉覆鹿。快哉此翁得此老。所尙何曾墮流俗。賤緘

幾道宛銀鉤。檀施長年供桂玉。龜藏巖竇沒頭尾。尚有人天爭係屬。平生長誦白蓮經。箇是靈山親受囑。又持圓覺與楞嚴。三部循環日相續。禪餘妙唱發天機。道韻何人賡一曲。再來請益我雖頑。所稟豈唯分句讀。虛往實歸斯可喜。易滿但慚如饜腹。

謝圓上人惠躑躅柱杖

支提山高幾千仞。上上不得尋其源。上人脚力老猶健。冥搜數日窮朝昏。行穿中林忽有得。一條躑躅生嵌根。裁爲柱杖尺度足。皮膚脫盡精堅存。鏗然紫玉露節目。尙有點點蒼苔痕。上人念我欲行脚。持用惠我何殷勤。登危陟險有餘力。信知造次承渠恩。報渠莫厭落吾手。我行欲遍湖南村。雲雷他日化爲龍。一舉尙可吞乾坤。那更長爲堂中物。悠悠南北狂馳奔。

海月樓看月

西風蕭蕭天氣涼。南樓獨坐心悠然。忽看海月上雕檻。四虛晃朗開陰煙。初疑坐我銀色界。又恐飛上玉壺天。冷冷沈澀清入骨。一洗百慮塵勞緣。此樓得月都幾時。四時月照何曾偏。皆言月色秋更好。風磨露洗添清妍。誰知桂魂元不死。照來照去無窮年。君看海月千古唯一色。清白本是吾家傳。

寄沃洲誓上人

山蒼蒼海漫漫。樓臺縹緲烟霞攢。中有高人卜嘉遁。想見雲袍冰雪顏。問渠此

間何所得。所得祇是居安閑。朝遊亂入鵝鷺行。暮坐直到漁樵還。朝來暮去隨所適。一條橡栗一蒲團。秋深石上掃落葉。煮茗燒栗圖清歡。歡餘道韻更清絕。海天月白松風寒。平生但貴樂天真。餘外紛紛非我關。功名已謝一墮甌。日月笑遣雙跳丸。何時歸去共棲隱。夜夜夢繞湖山間。

題權學士法華塔

如來昔在靈鷲山。蓮華妙法三周宣。是時寶塔從地湧。古佛讚歎何殷勤。何人幻入筆三昧。寫出塔相尤精研。金言六萬九千字。字字蠕蠕如蟻旋。鵝溪一幅高半丈。想見高出須彌巔。問渠何處得此本。流落南州今幾年。答言學士學西宋。三日專精誦七篇。玉皇前席試聽誦。一瀉流水聲冷然。意將多寶同證聽。寵賜此塔嘉其賢。一從學士上僊去。置在僧舍無人傳。嗟哉使君偶自致。此事荒恠誰詮詮。樹下探環認羊子。甕中覓畫知水禪。那知今人是昔人。宿願未滿猶在纏。故於此法彌篤信。願創蓮社功垂圓。天龍亦發歡喜心。靈貺仍將舊物還。由來外物非我有。自有真宰專其權。得之何樂失何感。過眼變化如雲煙。君看此塔別有屬。地轉天迴曾不遷。

病中雲住叔大老見示松檜圖

病夫平生無所求。過眼外物如雲浮。自居南國地荒僻。苦厭荆棘叢林稠。唯思千巖萬壑間。長松老檜粧蒼煙。殘年巾錫寄其下。便欲絕世遺塵緣。嗟哉老叔

會吾意爲吾索得金華牋。興來不覺老將至。弄筆窓光呈墨戲。須臾雙幹出碕岸。稍頭已有微風起。迴柯交錯鐵輪困。冰枯雪老恒無春。乃知造物別有意。假手于我傳其神。此老胷襟叵涯眡。萬像森羅如海印。禪餘妙思軼象外。寫出此圖爲遠信。開緘滿座動顏色。盡道神奇尤絕品。病中對玩固已幸。况是從來戀清境。朝朝爽氣洒然來。洗我百念俱灰冷。

上恩門琴大尉謝宴詩

崔滋

功名德業與仕宦。終始如公今古罕。四提衡鏡分月桂。桃李門前春色滿。早嫌衣上紅塵澆。笑解金章遊綠野。青山弄影墮晴窓。夕月朝嵐來侍座。畫堂分掛千佛名。先後同年爲弟兄。不才隨列上華蓮。瓴甌翻慙照玉英。酸寒不識綺羅叢。悅驚雙眼搖春紅。呼出諸郎命四座。金蘭玉樹爭清雄。興酣更教琴瑟間。山水聲聲耳曾慣。吾聞仁裕上吹臺。日與門弟相遊宴。又聞楊公之父子。詩酒同歡兩勝士。二老遺芳誰復繼。風流相國駕仙鯉。乘酣一唾聯七言。箇箇明珠萬口喧。吾將漁目編作十四貫。却把纍纍傳子孫。

義城客舍北樓

金之岱

聞韶公館後園深。中有危樓百餘尺。香風十里捲珠簾。明月一聲飛玉笛。煙輕柳影細相連。雨霽山光濃欲滴。龍荒折臂甲枝郎。仍按凭欄尤可怕。

庚子歲朝蒙古過西京

金坵

扁舟橫截碧江水。晚抵荒涼長慶寺。悲詞輒欲吊江山。恐有坤靈潛下淚。憶曾負笈遠追師。正見西都全盛時。月明萬戶不知閉。塵靜九衢無拾遺。如今往事盡如掃。可憐城闕空青草。鋤犁半入英雄居。麻麥遍生朝市道。採桑何處舊裙兒。哀唱一聲愁欲老。

過鐵州

當年怒寇闌塞門。四十餘城如燎原。依山孤堞當虜蹊。萬軍鼓吻期一吞。白面書生守此城。許國身比鴻毛輕。早推仁信結人心。壯士嚙呼天地傾。相持半月折骸炊。晝戰夜守龍虎疲。勢窮力屈猶示閑。樓上管絃聲更悲。官倉一夕紅焰發。甘與妻孥就灰滅。忠魂壯魄向何之。千古州名空記鐵。

惜花吟

釋圓鑑

臘月念六初入郭。轉頭春已七十有三口。去年今年同逝川。昨日今日甚奔駟。昨日看花花始開。今日看花花欲落。花開花落不容惜。春至春歸誰把捉。世人但見花開落。不知身與花相若。君不見朝臨明鏡誇紅顏。暮向北邙催縛髮。須信花開花落時。分明說箇無常法。

三月二十四日抵宿天護山開泰寺

一年三過天護山。天護山中白雲白。白雲白負山中閑。應笑山前遠行客。寄語白雲毋笑我。我行無可無不可。安知不卜好林壑。歸來與子相酬酢。

花巖寺雲梯

白文節

亂山罅口驚湍馳，偶尋數里漸幽奇。松檜叅天藤蘿垂，百疊蘚磴滑難依。捨馬而徒，脚力疲通蹊，略約枯槎枝。疎鍾一杵出谷遲，雲端有無屋脊微。跨溪小亭，滿壁詩風軒寶勝，拏龍螭。玄公作記集古辭，黃絹幼婦世所稀。泉分釵股噴珠璣，輒遇石凹成幾池。魚可百尾游於斯，菖蒲九節亂青辭。行無十步有松扉，扣之山鳥皆驚飛。携筇笑迎眞，厖眉終南儼老的骨兒。白衣仙人滿月姿，端坐高堂八部圍。黃牧丹花映庭堦，芍藥亦有醉西施。連筒細溜與激資，藥畦菜畝旱中滋。蒲團置茶語移時，毗盧海藏舌抵披。眼魔對定豎降旗，脇不露床八十卦。我來問道乞爲師，傾困倒廩免虛歸。投閑一宿便忘機，十載紅塵萬事非。安得此身謝繫維，來隨老爛酣煙霏。山僧愛山出無期，俗士重來未可知。彷徨未忍卽分離，松頭落日三竿歎。

感渡海

扶桑之海遠不極，萬里蒼蒼接天色。有夷生寄海中央，木道纔通變難測。聖明本自留度外，邊將貪功謀欲得。受命東征自往年，東南師期在六月。千艘駕浪會一歧，鳥名屬日本國十丈風帆檣欲折。相望涉夏不交鋒，辛苦何須爲君說。炎氛瘴霧熏着人，滿海浮屍冤氣結。望舒虧盈潮落生，九月已當三十日。是時八極顛風來，擊碎蒙衝何大疾。蒼皇誰借千金壺，枉教壯士探蛟室。哀哉十萬江南人。

攀依絕嶼赤身立。如今恨骨與山高。永夜羈魂向天泣。當時將帥苦生還。念此能無增鬱悒。壯哉萬古烏江上。恥復東歸棄功業。

孤鴈行

洪侃

五侯池館春風裏。微波鱗鱗鴨頭水。闌干十二繡戶深。中有蓬萊三萬里。彷徨杜若紫鴛鴦。倚拍芙蓉金翡翠。雙飛雙浴復雙棲。綵羽雲衣恣遊戲。君不見十年江海有孤鴈。舊侶微茫隔雲漢。顧影低昂時一呼。蘆花相漠風霜晚。

嬾婦引

雲窓霧閣秋夜長。流蘇寶帳芙蓉香。吳歌楚舞樂未央。玉釵半醉留金張。堂上銀釭虹萬丈。堂前畫燭淚千行。珠翠輝光不夜城。月娥羞澁低西廂。誰得知貧家嬾婦無襦衣。紡績未成秋鴈歸。夜深燈暗無奈何。一寸願分東壁輝。

金尙書珣所畜山水圖達全師韻

千峯半入青天上。下有長江江水清。空翠生寒幾千里。颼颼萬壑松風聲。幽人隱見向何處。馱若塞驢江路明。崖崩澗絕望不極。一邊疎雨歸雲黑。歸雲斷處有樓臺。吹徹玉簫紅日側。君不見青蓮居士謫仙翁。一鶴肯與群雞同。列岳結軌不點頭。物外獨半東溪公。

送秋玉蟾曬史海印寺

先生詩格何清越。霜空萬里亭亭月。冰光浩蕩瀉山河。萬象森羅坐可掇。先生

眞筆何森嚴。古鏡飛出雙龍窟。是是非非俱自然。懦夫有立頑夫廉。吾聞伽耶
山海印寺。儒仙崔子曾遊地。人間風月不能到。寶書玉牒如雲委。此中奉使必
是神仙曹。三年鶴駕下雲霄。多君今年得此行。秋光遠與人爭清。青山落照永
嘉路。紅樹澄江晉陽城。翩翩駟騎如輕鴻。快於身馭冷然風。遙知三韓二十三
代之實錄。一一掀攬雲山中。歸來馬上無一事。採風應作南征記。臥閣豈無賢
刺史。灌園豈無隱君子。潁川大姓孰豪橫。巴徼窮民孰悲硬。碧雞金馬騁何嶺。
朱草醴泉發何境。山碑海碣訪古奇。野諺州箴推隱微。大書特書不一書。袖中
卷得湖南歸。南人南人好看客。皇華雖多無此客。埋輪露冕盡兒戲。此客褒誅
華袞雜鈇鉞。

次韻和金鈍村四時歐公韻

仲春嘉月長百草。龍吟虎嘯衡茅小。逍遙山澤有至樂。雋永之味獨自飽。半陰
半晴野花開。若煙非煙山色好。俯綸淵底之游魚。仰弋雲間之逸鳥。西隅倒景
雖不住。東嶺望舒生又早。縱心域外詠三皇。不知榮辱焉知老。

右春記張平子

松江叢書不輟草。紙札相壓篋箱小。杞末棘兮菊未莎。肯羨人間擊鮮飽。十角
吳牛二頃田。西山朝來一雨好。躬負畚鍤理吾稼。木決駢邊立水鳥。顧渚又復
置茶園。茶譜水經推勘早。此中清風知者誰。涪江漁夫紫溪老。

右夏記天隨子

過雨颼颼濕江草。西風萬里蒲帆小。吳中蓴絲美無度。金盤羊酪空多飽。折腰欲營身後名。適意何如眼前好。蒼海深深透網鱗。雲山杳杳投林鳥。華亭鶴唳上蔡鷹。曲突徙薪知不早。可憐黃花五百年。空傳吳兒及楚老。

右秋記張季鷹

雲屋山下多仙草。天壇山南雲屋小。景色不與人間同。長松清泉是素飽。視之人間在火中。心未清涼有何好。驢耳那得聽黃鶯。牛角元能抵翠鳥。赤玉之鳥遠遊冠。異境恨不歸來早。他時倘遇嶢崙奴。萬水千山訪張老。

右冬記張老

登燕京昊天寺九層大塔

釋達全

龍蛇窟深如夜黑。日光斜天滴不滴。躋攀上了天下白。紅埃腥風一時窮。眼中一粟大元國。莽莽茫茫是何色。血肉之身天外飛。仙耶佛耶何處歸。

次李賀將進酒韻

東方日高睡正濃。夜光枕頭三丈紅。鳳花半臂掛屏上。呼兒質酒梨花風。隆隆一槌呼月鼓。醉擊珊瑚如意舞。燭龍呀呀燒薄暮。闌干啼作眞珠雨。錦缺吐了復含卮。千鍾一品兩塵土。

次韻諸賢賦菊

桐風西吹屋頭裂。一夜虫聲寒欲結。天工放置金剪刀。紅情綠意掃無轍。淵明
嘒嘒臥蒿里。喚起古香香不死。黃粉麝囊天爲開。金窠四畔秋魂起。瓊液蟻面
喜飛下尊醪。徒亞田家瓦。勸君吸盡黃金花。頭上紅輪如走馬。

送李元帥赴鎮

甲光參差黃金鱗。少年斗膽文章身。馬蹄特特向何處。珊瑚鞭指江南去。紅旗
影拂細柳營。千里角聲雲外語。手提玉匣三尺水。欲斬長鯨獻天子。

望燕歧

尹頎

停驂西望燕歧山。浮雲靄色何蒼蒼。路人咨嗟行復止。云是前年大戰場。賊騎
來時知幾萬。滿空旌纛雲飛揚。初從江東掠四境。一經便作丘墟荒。誇雄恃力
屯此地。氣勢赫赫誰敢當。幕中美人絕世色。車中金帛兼四方。縱情耽樂日不
足。烹萬牛兮復千羊。黃金瓶白玉斝。醉舞高歌遊興長。天兵一舉俱潰散。何異
巨轍摧蟪蛄。笑哉區區不量力。計窮一旦就滅亡。吾君德業配兩儀。坐令四海
富農桑。閭閻熙熙共樂業。商旅不復行賫糧。愚儒何幸逢聖代。更覩中天日月
光。行歌聖德祝君壽。願君萬歲壽而昌。

送崔御史伯淵壽親還朝

安震

人生少壯能幾時。群才競逐功名馳。富貴在天若微幸。素志未就朱顏衰。明公
生長扶桑側。弱冠徑入中華國。忠誠豈獨朝廷知。名振江南與海北。昨夜使星

照遼陽。朝回鴨綠拜高堂。東陵郡公老更健。繡衣郎君鬢未蒼。壽觴喜氣春風裏。王事還促征鞍起。臣子美行鍾一身。入朝出覲三千里。

有所思

吳璲

玉人逢時花正開。玉人別後花如掃。花開花落無了期。使我朱顏日成老。顏色難從鏡裏回。春風還向花枝到。安得相逢勿寂寞。與子花前長醉倒。

神駒行爲尹栗亭澤九歲時作

崔斯立

飛黃驥子生有種。作駒權奇志千里。閃電光開夾鏡眸。追風氣壓批竹耳。由來飢食玉山禾。渴飲醴泉毛骨異。視之汝是服轅駒。萬里青雲心莫已。驥子驥子莫虛馳。願爲八駿長奉明君隨所至。

上元會浩齋得漏字

崔溼

我衣緼袍人輕裘。人居華屋我圭竇。天翁賦與木不齊。我不人嫌人我詬。今夕何夕是元宵。筵秩侯家隨客後。人間萬事何足論。身健且向尊前鬪。君乎添酒復回燈。轟飲直到傳曉漏。

春州昭陽江次韻

邢君紹

寒松松色凝蒼煙。鏡浦浦波光明遠天。叢石金蘭與國島。一一奇觀供眼前。我行此間恣遊覽。搜奇摘勝多留鞭。自言海東天壤裏。更無一遺好山川。昨過大關到此境。荒郡古縣空依然。到頭民逋問誰使。無人臥閣鳴琴絃。唯有昭陽一江

水袞袞不盡東流。年傍江官柳，間野梅。景物欣欣似慰懷。白沙鋪雪，白鳥白雨，派淨淥青於苔。關東佳致孰與此。終日點檢，首不回。我欲含情，酌江水。何人爲之奠酒盃。入州空館，亦云麗。涼軒煥室，絕點埃。壁間江行誰唱出。珠玉輝輝，照草萊。此江此行，更着色。吟哦可以破索寞。莫嫌狗尾續貂裘。紅綃署中舊遊客。

權友生家飲酒

白元恒

青松生南山，白日沒西海。世上英雄何代無，綠鬢朱顏不長在。昔人園樹成枯杏，昔人俠骨歸泥沙。同人之心非楚越，百年光景何飄忽。諸賓散盡髮獨留，醉臥君家滿堂月。

贈少年李異同

君不見南山於菟兒，始生三日窺牛馘。又不見丹穴鳳凰雛，一鳴已作王者瑞。李郎所蘊亦不凡，襁褓養出青雲器。讀書不煩勞，涉獵輒強記。作詩不用心，妙盡西峯意。及看新月篇，更覺天生智。冰姿盈盈二六餘，朱絃入手人心醉。我疑東壁星降靈，三韓主文字。我疑紫霞仙，偶下人間一遊戲。不然造物奚有偏，賦與才貌於君備。科登甲乙可前知，將相功名自家事。我初識子大人門，半面暗許平生志。往年相見在重陽，前年相見在冬至。今年何處樽酒同，杜鵑半落城西寺。別來幾多時，金鶯亂啼庭樹翠。人生聚散如旋蓬，羲和汲汲催龍轡。勸君須惜紅顏年，勸君須知結交地。占人愛士信陵君，能爲侯生入屠肆。直窮下客

青松心。東海生塵北斗墜。

白絲吟

白絲鮮。鮮雪華白。錦上新紋。眩紅碧。美人意在公子衣。織手殷勤把刀尺。姑惡姑惡。姑惡。姑惡。不許儂家事。縫作古來巧。語悅如簧。使妾今朝還故鄉。出門背立泣風雪。西北萬里雲天長。雲天長不見郎。斷蓬路遠心茫茫。欲彈朱絃世無耳。空嗟白日東流水。白絲一染無白時。棄妾重來當有期。

醉題翰院

今夕不知是何夕。偶與青州從事同。欣然引滿醉復醉。席上爛熳回春風。半壁青燈。翳復吐。時聞玉漏聲。丁東論交到深夜。不覺金樽空。醉鄉差可樂。世事終無窮。明朝醉醒後。揮汗紅塵中。

春日昭陽江行

崔 洵

上元佳節好風煙。千古昭陽江上天。山光青青倒鏡面。柳帶裊裊搖風前。江邊行客發春興。信馬閑吟垂竹鞭。入城景物更奇絕。野廣白沙分二川。停車久立汀洲際。白鷗落照心悠然。想見當時全盛日。朱樓畫閣擁管絃。繁華一逐東流去。江草江花年復年。誰家玉笛吹落梅。今人無端感旅懷。昔日紅粧映水處。浣紗石老空莓苔。吾人年少好遊樂。每逢勝景輒忘迴。鸚鵡洲邊木蘭棹。鳳凰臺上黃金盃。自從身嬰利名累。十載蝨蝨趨塵埃。如今按轡水雲界。坐使逸想凌

蓬萊此江無盡真聲色。休道關東多寂寞。誰將醉墨語江風。紫薇花下草綸客。
王昭君
安軸

次叢石亭詩韻

千條怪石成奇峯。蒼崖煙霏水墨濃。鯨濤起海雪霜漲。蜃氣浮空樓閣重。模糊
字沒大古碣。瘦瘦根蟠何代松。磯邊筍笠坐相揖。月下羽衣招可逢。悵望仙徒
已雨散。厭看俗子如雲從。若爲亭前伴鷗鷺。却掃人間塵土蹤。

東文選卷之六終

東文選卷之七

七言古詩

聽琴

禹天啓

畫堂白日開錦筵。琴師爲我張絲桐。絃將手語雅韻多。宮商角徵相爲宮。小成大成度不盡。極清極濁聲無窮。蕩如楊花急飄散。鬧如玉佩搖玲瓏。獨鴈叫群飛。曉霜幽禽得友呼。春風山靜流泉落深澗。風吹冷雨侵孤篷。錚鏘攫繹動入神。悲歌浩歎翻欲同。雍容恬淡古意深。峩峩洋洋山水中。君不見昔時虞舜制五絃。無聲之樂聞四方。南風薰兮草木香。又不見殷商一夫不脩德。滄漚之音亂五常。北鄙靡兮人民傷。聲音感動便如此。聖人於此尤謹詳。若爲奏得正始音。復使天下歸陶唐。

墨竹

昔年江海具扁舟。便逐清景窮清幽。滄浪雨夜宿孤洲。篙工報道瀟湘秋。猩猩苦叫猿啾啾。草木搖落風颼颼。爰有古竹臨江流。淇隄渭材難等速。貪看數日獨夷猶。洗盡胷中塵土愁。邇來飄泊阻重尋。歸夢自隔瀟湘濱。何意今朝塵壁上。一覽作我瀟湘身。硬直高竿暑不知。森嚴數朶風欲吹。君不見五侯池館花木繁。浮紅浪紫當階軒。幾蒙灌溉培養恩。又不見金宮玉殿圖畫屯。揮擢紛紜

神鬼奔。歲久易滅丹青痕。豈如墨君自非塵土物。朝昏相對兩無言。

琵琶行

小槽斑斑雙鳳紋。玉色鮮明金縷紅。輕攏重撚動香撥。大絃小絃聲不同。清商雅韻極廉細。微音澹弄還玲瓏。春禽得暖韻桃李。秋虫抱雨鳴梧桐。君不見呼韓婦人思漢宮。萬里秋風沙漠中。旆旌超忽地接天。簫鼓淒迷霜滿空。搔首重彈空塞鴻。又不見盆浦妖娘嫁商客。離別年年烟水隔。蟪蛄板屋月紛紛。蘆葦江亭風索索。擁袂一抹如裂帛。

獻高山半刺

周贊

白雲飛南日千里。客子望雲行未已。馬頭處處臘梅香。經盡山山雪溪水。五管雖是皆賢侯。雙目祇向征鴻視。竭來高山問主人。共道風流貴公子。一謁公顏識公意。待我眷眷心愈喜。不唯白飯與青藜。兼使蛾眉勸浮蟻。是時天氣回微暄。浴水蕩漾春波翻。倚醉時過竹翠寺。尋幽暗入桑麻村。高山之遊樂復樂。此樂盡是吾公恩。安得留公百萬日。陪公日日傾金尊。傾金尊弄綵筆。與君終始爲弟兄。君不見文舉曾收禰衡直。至今千載流嘉言。

送曹溪長老得霜字

韓宗愈

君不見西江之水深且廣。萬古不盡流汪洋。又不見南山之松挺然立。四時一色搖蒼蒼。上人乃江水曾襟山松節。操芳名馳四方。選佛堂中伎倆多。栢樹清

風生滿堂。今朝告別適南國。有如冲天逸翮。乘風長含情。回首望行色。山樓殘月溪橋霜。江南是我舊遊處。有時魂夢尋蒼茫。有人若問潁川子。平生詩酒多疎狂。

驪江讌集

釋禪坦

君不見昔時醉翁讌西湖。銀缸畫燭侵宵罷。金罍玉斝散不收。又不見賀監放浪遊稽山。輕舟短棹追煙渚。斜風細雨尋芳洲。中原牧伯繼前躅。畫船鼙鼓行樂錦江秋。七澤微茫白鷗外。三山隱映金鼇頭。抽簪夜扣洞仙扉。翠眉紅臉圍重樓。銀樓歌吹落半空。月上黃昏天色幽。星斗闌干火輪飛出五馬忽忽去。堪笑昌黎越女一笑三年留。

白鷺行

白鷺白鷺。蹺煙亦飛雨。心本忙態自閑。魚兒話頭無斷間。魚兒沉無處。尋蘋藻滿地春水深。蝦蟆水蛭亦不厭。一生口腹何曾贍。汝羽與生白。汝心終日黑。堪嗟綠影紅香裏。自謂風標貴公子。君不見五更待漏霜滿襟。王庭振鷺亦何心。

雪

李齊賢

朔風捲地暗河津。塞雲作雪愁行人。兩儀洪荒盪元氣。萬物陸離含古春。初疑倒瀉銀河空。轉恐壓折青山峰。天女霓衣戲鸞鳳。海仙貝闕翻魚龍。馬蹄凌兢鞭不動。身上氈裘百斤重。令人却憶孟襄陽。驢背吟詩忍飢凍。逆旅主人真可

人爲我一發浮蛆瓮。誰能興盡到門迴。席暖且與狸奴共。君不見吳中朱生畫稱絕。短幅曾掃燕山雪。河橋老柳不棲鴉。小店閉門煙火滅。客子驅車欲安適。應被名韁牽鼻裂。豈知瓦衣下黑甜鄉。一天歲月無炎涼。畫中之境今自蹈。畫中之意不可忘。白頭更有相逢日。握手披圖感嘆長。

雪用前韻

去年此日楊子津。雪華濛濛愁殺人。浮玉山前駐歸楫。百錢徑買金陵春。酒酣豪氣薄雲空。走尋北固登翠峰。海天下下同一色。日月東西迷六龍。長風掉鞅欲驚動。萬木含枚若持重。冥搜逸興太素前。援筆題詩愁硯凍。擁褐南窓夜色明。半輪霽月暉鐵瓮。神清宛在廣寒宮。勝賞只恨無人共。今年此日大愁絕。匹馬關河三尺雪。室韋草木冷蕭條。碣石雲煙杳明滅。向夕前程問幾何。酸風如刀面欲裂。君不見百年身在夢魂場。一年年去增悲涼。亦知銷金帳下。淺斟低唱有餘樂。亦知淮西夜半。提軍縛賊功難忘。日高閉門臥不起。最有袁安興味長。

函關行

夫子曰。三人有我師。十室有忠信。孟嘗之客。蓋三千焉。豈無一賢智奇謀之士。而獨賴鷄鳴狗盜者。然後脫身於孤秦乎。抑其好客。有類於葉公之好龍。而簪玉履珠者。亦似龍而已耶。鷄鳴狗盜。技之賤者。二客能處衆而

無愧意。既成功而無矜言。固自有過人之量。其處卑自汗。投機致用。豈以此矯衆客之浮誇。而激孟嘗之汎取耶。是則未可知也。

孟嘗賓客三千少。連鑣結軌臨淄道。大冠如箕劔柱頤。然諸相傾泰山倒。咸陽塵土令人老。天涯去夢迷芳草。孤鶴投籠不自由。猛虎得肉寧辭飽。馮驩無魚空自歎。雍門有琴且勿彈。冀闕天心幽谷遠。誰膏吾車度千山。張陳應慚養卒口。毛薛亦讓屠兒手。丈夫有志無賢愚。莫惜黃金鑄雞狗。

門生栗亭尹政堂得蒙主上爲之寫真仍題栗亭二大字其上千載一遇耳目所罕作詩以賀

君不見韓張良。漢皇字之稱子房。君不見白樂天。唐帝畫之留集賢。不名而字固偶耳。命工而畫奚是美。賢哉我友尹政堂。稀代恩榮蒙我王。金窓赭案絕點塵。玉手染翰爲寫真。水深山高清且靈。妙用直恐非丹青。更題栗亭二大字。鐵點銀鈎照天地。粉身何報萬分一。傳家誰貴金千鎰。凌煙休誇歐與虞。誠齋空羨范石湖。范成大參政號石湖宋帝書石湖二大字以賜楊誠齋萬里作古詩空羨拱手嘆賞傾朝官。六宮指目亦改觀。樸翁驚喜出真意。眼見門生奇特事。

汾河

汾河日夜流浩浩。兩岸行人幾番老。陶唐舊物山獨在。萬古興亡青未了。劉郎會此歌秋風。簫鼓動地愁魚龍。平生謾有凌雲志。未見仙人冰雪容。

題御畫尹栗亭澤真

洪彥博

忠良一箇老書生。眼高長與世異好。邇來見我何無言。風神颯爽須眉皓。世間物我本非真。亦知此身非所保。焚香對御共傳燈。未必桑門能達道。凌烟將相功謾多。未得君王親一掃。

唐太宗六駿圖

李穀

汴河錦纜人方厭。秦王順天提寶劍。風行電邁掃羶腥。所向金湯隨手陷。周襄千載一貞觀。功業赫然超兩漢。當時所乘有六駿。揮戈恢恢有餘刃。寫真刻石手自贊。片石屹與凌煙峻。昭陵秋草夕陽邊。行人指點多愴然。君不見轍迹紛紛王道缺。八駿曾到崑崙巔。又不見拔山力盡離不逝。烏江煙月漢家天。功成自古在知己。豈在蹄高并銳耳。

送漢陽鄭叅軍

西風庭樹鳴撼撼。長夜幽人正愁絕。舞罷黃雞擁褐眠。日高門外無來轍。今朝剝啄喜有客。乃是心親來告別。人生百歲所懽樂。大半離愁緣愛結。載酒東郊黃葉稠。一杯未盡歌先闕。歸途政指漢陽關。三峰入眼明如刮。揚州景物古所稱。我慣經由能細說。南江風雨亂漁火。北嶺煙霞明佛剎。所恨居民魚尾赤。籬落蕭條生事拙。君歸摩撫已恫瘼。要令一境先再活。年來世事不堪聞。我亦南遊意已決。待得半篙春水生。扁舟一扣漢江柂。

東文選七

一一五

天曆己巳六月舟發禮成江南往韓山江口阻風

驚風動地東南黑。四山低昂船尾側。蒼茫一葉浪花中。性命只憑管蒯力。雨聲颼颼濕篷底。三日一雲猶向北。但令元氣不傷和。達順於人互得失。何時風雨占十五。爲驅萬國歸皇極。

飲酒一首同白和父禹德麟作

物情好惡淡且濃。俱出造化爐中鎔。阮孚好屐和嶠錢。達人聞之面發紅。吾徒所好異於此。長向花前月下逢。白氏好飲不停手。禹君五斗方盪胸。李生平生不入務。舉眼厭見金樽空。忘形爾汝外天地。麴生於我良有功。君不聞千鍾與百觚。古來痛飲皆英雄。但可陶陶齊得喪。安用惺惺較異同。人事古多違。羿穀或未中。舉觴崔宗之。投轄陳孟公。應笑盧同七椀茶。誤疑兩腋生清風。

扶餘懷古

青丘孕秀應黃河。溫王生自東明家。扶疎山下徒立國。奇祥異蹟何其多。衣冠濟濟文物盛。潛圖伺隙并新羅。在後辱孫不嗣德。雕牆峻宇紛奢華。一旦金城如解瓦。千尺翠巖名落花。野人耕種公侯園。殘碑側畔埋銅駝。我來訪古輒拭淚。古事盡入漁樵歌。千年佳氣掃地盡。釣龍臺下江自波。

同禁內諸生遊紫霞洞

草堂睡起落花閑。捲簾南北多青山。青山笑我不出門。兀兀窮年文字間。長安

萬家無所適。肯向高門低我顏。山中之遊是何夕。履齒磴磴響溪石。詩豪更值玉堂賢。八斗文章超古昔。須攀翠壁記茲遊。明朝依舊紅塵客。

寄龍頭釋老

西原只有龍頭寺。龍頭詩老釋儒間。我行正值花時節。珍禽磔磔鳴春山。青衫故人亦好事。邂逅三笑開塵顏。高談劇飲白日永。何人更道書生寒。師乎勿謂不告別。山花未落吾當還。

橡栗歌

橡栗橡栗非栗。誰以橡栗爲之名。味苦於茶色如炭。療飢未必輸黃精。村家父老裹糲糧。曉起趁取雄雞聲。陟彼崔嵬一萬仞。捫蘿日與猿狖爭。崇朝掇拾不盈筐。兩股束縛飢腸鳴。天寒日暮宿空谷。燒桂燃松煮溪菽。夜深霜露滿皎肌。男呻女吟苦淒咽。試向村家問老農。老農丁寧爲予說。近來權勢奪民田。標以山川作公案。或於一田田主多。徵後還徵無間斷。或罹水旱年不登。場圃年深草蕭索。剝膚槌髓掃地空。官家租稅奚由出。壯者散之知幾千。老弱獨守懸磬室。未忍將身轉溝壑。空巷登山拾橡栗。其言淒惋略而盡。聽終辭絕心如噎。君不見侯家一日食萬錢。珍羞星羅五鼎列。馭吏沈酒吐錦茵。肥馬厭穀鳴金埒。焉知彼美盤上餐。盡是村翁眼底血。

靈山辛員外將赴燕京

梁 温

相公才氣超羣英。富貴功名俱滿意。長策能令社稷安。綵衣嘗向庭闈戲。今朝受命赴皇都。去路超超飛駟騎。惆悵無由逐後塵。舉頭遙望燕山翠。

己酉五月十二日入試院作

用東坡韻

李仁復

高堂下瞰淵魚行。白袍滿前吟嘯聲。筆床硯枯日影橫。閉戶絕餉防漏透。恐渠苦心成大瘦。大官無羊唯腐豆。御史監試來乘驄。問誰冬烘一禿翁。得酒更慚雙頰紅。

送鄭副令寓按于慶尚

田祿生

君看種樹橐駝傳。移之官理可養人。解道安民在無事。牧隱詩語醇且真。古人今人意不遠。蓋傷世法多立新。況今時勢如理絲。欲速還自成紛纒。願言爲事務從簡。勿使一毫加諸民。鄭君共稱慷慨士。世微鄭君吾誰親。傷心豈獨惜離別。南望不覺沾衣巾。

石灘行

李存吾

百濟古國長江曲。石灘風月閒幾年。野火燎原平如掌。時有數鯨耕菑田。我來構亭探勝景。萬景媚嫵爭來前。雲煙明滅蛟蛇窟。山翠澄濛浮遠天。白沙岸斷浦溼入。傑石邈迤橫江邊。扁舟南轉尤裊窳。石欄柱柱臨澄淵。石佛應見義慈代。唯有野鶴來叅禪。憶昔唐將航海至。雄兵十萬鼓淵淵。都門一戰謾傾國。君王拱手被拘攣。神物慘淡亦不守。石上遺蹤猶蜿蜒。落花峰下波浩蕩。白雲千

載空悠然

洪武四年駕行長湍拜獻主上殿下

白文寶

春閏三月歲辛亥。我王駕幸古端州。大人密輔有深意。暢叙從前堙鬱愁。漢江石壁號險瀆。千年勝跡至今留。聖祖陳兵亦過此。又是岳降生韓侯。龍舸浮橋擊玉輅。鳳笙龍管兼棹謳。漢時不獨祀河邊。投謁山陵心所先。耆英文武在從列。朱幘萬馬連錦韉。回車歌吹近郊垌。城中父老來相迎。天顏一顧卷翠幕。命開大射登俊賢。駕前虎賁皆少年。張弓發矢百步穿。箇中兩雄金用超與李沃精力拔萃何翩翩。天廡飛龍障玉鞍。輟賜拜受光班聯。家相感激愛所鍾。遙望近謝淚如泉。腐儒忽憶從毅廟。和進清平擬謫仙。錫馬拜職紫薇郎。今看盛事愧如前。况蒙君恩入兩府。年將七十叨執鞭。冀與同僚報歸美。獻詩爲付汗青傳。命於丙子年從毅陵如朝上言詩和賜馬以翰林直拜正言

朴淵瀑布行

危乎高哉因達之巖。水北流窮源我欲登巖頭。罅吸泉激湍湍流湊壑落雲間。匯爲石湫鉢無底。鉢中盤石作根柢。人言神物之所托。宏蓄清深瀉石壁。壁立斷崖千仞飛流懸。有如銀漢來青天。隱空似聽水龍吟。珠春玉碎颼颼兮萬尋。龍應抱寶潛其淵。陰壑白日常雲煙。嘗聞玉輦此經過。朴人定是考槃阿。只今名字傳不記。二賢緩急說神異。誰云走派背吾邦。百里邇迴西入江。江潮朝

時客揖主。北去人物來如古。去亦一時來一時。盛明千載風雲期。

予不樂樂故作長詩以代謔

李岡

中和堂前桃李花。中和堂下神仙家。城中少長各饒興。邀仙看花尋紫霞。登臨
疇昔謔舞地。獨向清風長吁嗟。古人無復耆英會。今人還聽中和曲。代舒鱗次
不暫留。百歲忽忽鳥過目。曾聞謫仙嫌晝短。願言夜夜長秉燭。莫道朱顏鎮長
在。滄溟亦變爲桑田。雲煙芬馥花如海。絃管啁啾日似年。一詠一觴心未足。婆
娑醉倒春風前。

昭陽行

李弁

峽中萬古凝翠煙。兩邊山木高撐天。沿溪細路石磳确。大嶺小嶺橫當前。行行
數日到光海。喜得平廣還停鞭。此間形狀畫不如。四山屏擁臨雙川。中流頓忘
來時苦。忽然逸興入渺然。誰能喚致琴高生。一彈流水泠泠絃。閨風玄圃是何
處。便欲於此消餘年。千金笑與早春梅。一展謝傅東山懷。江邊又築子陵臺。一
竿明月印石苔。携妓釣魚兩不惡。乘流上下不知回。盡將江水作春酒。日飲無
何那計盃。人生此志苟能遂。何須役役東華埃。況今太守政化最。田野盡闢無
蕪萊。與人喜怒不形色。頗設盃盤遣寂寞。我因王事得勝遊。却嗟不是忘機客。

送草亭員外得負字

金光載

誰爲羽翼興王家。唯公獨步三韓石。房杜清風傳說霖。都俞啓沃爲師友。如今

奉詔入朝聯千載鴻名傳不朽臨分何以慰離情三疊陽關一盃酒願公此去速回轅母意君恩莫虛負

怨別離

鄭誦

妾年十五嬌且癡見人惜別常發嗤豈知吾生有此恨青鬢一夜垂霜絲愛君無術可得留滿懷都是風雲期男兒功名當有日女子盛麗能幾時吞聲敢怨別離苦靜思悔不相逢遲歸程已過康城縣抱琴久立江南湄恨妾不似江上鴈相思萬里蜚相隨床頭粧鏡且不照那堪更著宴時衣愁來唯欲徑就睡夢中一笑携手歸天涯魂夢不識路人生何以慰相思

黃山歌

過雨霏霏濕江樹薄雲洩洩凝晴光黃山江深不可渡回望百里雲茫茫江頭兒女美無度臨流欲濟行彷彿鳴鳩乳燕春日暮落花飛絮春風香招招舟子來何所掛帆却下魚山莊問之與我同去路遂與共坐船中央也知羅敷自有夫惟底笑語何輕狂貌然不願黃金贈目送江岸雙鴛鴦君乎艤舟我豈留我友政待黃茅岡

苦寒吟

李衍宗

閉塞成冬冬欲竟寒氣最厲陰轉盛平埋聚落雪滿川着面錐刀風冽猛長安居人少出門酒價雖高力不競白日短薄易頽光霜華凝添星月冷銅壺凍裂

響空堂。隣雞無聲夜何永。潛身屋底骨欲冰。數挽衣衿深縮頸。胷次唯留一掬溫。其能保得須臾命。絲綿吾身尙如斯。况被藍縷不掩脛。願天火急布陽和。活盡寰中窮百姓。

謝朴恥庵惠茶

少年爲客嶺南寺。茗戰屢從方外戲。龍巖巖畔鳳山麓。竹裏隨僧摘鷹觜。火前試焙云最佳。况有龍泉鳳井水。沙彌自快二昧手。雪乳翻甌點不已。謁來從官走風塵。世味遍嘗南北嗜。如今衰病臥閑房。碌碌營營非我事。不思羊酪與蓴羹。不羨華堂擁歌吹。竹窓日午篆煙斜。一甌要及睡新起。幾回回首憶南烹。山中故人無信使。何況當時卿相門。肯記疎頑分內賜。恥庵相國獨不忘。寄與頭綱草堂裏。未暇開緘見紫茸。已覺透紙香熏鼻。銅灰雖恐損標格。活火煎烹手自試。松風入鼎發颼颼。聽之足可清心耳。滿椀悠揚氣味濃。啜過爽然如換髓。南遊昔時方童蒙。不識茗飲有深致。今日因公輒賜龍。通靈也似玉川子。亦欲時乘兩腋風。飛向蓬萊山上墜。一傾王母紫霞觴。洗盡從前煙火累。還將九轉真金丹。來謝我公珍重意。

寄鄭司空

有美人兮隔雲端。山高水深難跋涉。欲往從之歲時變。極目高空鳥飛捷。誰得知搔首無言日。又曛秋風颼颼捲黃葉。

姑蘇臺次韻

越有人兮圖霸時。吳兵雖精安所施。君王枕戈志願畢。天悔禍兮有今日。論功未必西子多。子胥江上空濤波。姑蘇往事悲乃何。

浮碧樓次韻

手携永明長慶僧。扁舟蕩漾江中流。宛在紅塵不到處。更窮滄浪欲盡頭。古來賢達知誰健。我醉欲眠君且休。月巖以南天下少。朝天石老煙雨愁。

鄭勉齋席上走筆

城東風景六月天。景物如畫在眼前。一盃一盃事有緣。且莫論量鶴與錢。賓如玉酒如泉。座中何者非酒仙。古來豪傑如雲煙。不知今夕是何年。

遊昭陽江

柳淑

江邊春氣煙非煙。江頭花開雨後天。蘭橈來往明鏡裏。松亭掩映屏風前。此間景物稱人意。徐行信馬不動鞭。良辰行樂莫辜負。頭上歲月如奔川。亭前大野天共遠。倚欄縱賞心豁然。落花紛紛飄舞席。春禽嚶嚶和鳴絃。喜予勝景遊觀日。正值居民富庶年。世間功名杏與梅。癡兒欲速焦中懷。我今老病百無用。癢并不食生陰苔。古來賢達今安在。大江東流不復迴。尊前一笑不易得。對花強倒三兩盃。人生聚散何足道。世事過眼隨飛埃。徘徊弔古空嘆息。千年斷碣埋山萊。要將詩酒酬春色。莫待無花空寂寞。誰家泉甘有竹林。招此無家遠遊客。

江一云
如明朝瘦馬西渡
夢瑤臺客

長歌行許迺軒韻

南 兢

我嘗鍊石補青天。雲煙蔽眼空泫然。又將玉斧修碧月。西望金樞耿不眠。平生
謬算百不遂。家有四壁無一錢。邇來恩霑累鍾祿。却爲小補未歸田。吾君肇位
勢可久。朝列清明新蕩垢。但問綺翁起商顏。安問湛輩登峴首。城西地僻日似
年。臺上天晴月如晝。祭酒官閑多在我。冒進徐行誰勝負。君不見鄭子真。名振
京師自谷口。君不見曹子建。詩成七步才。八斗美玉何終韞。檀藏有德見用人
之常。我愛磻溪直釣叟。口含兩齒遇文王。

金晦翁南歸作村中四時歌以贈

李達衷

山窓一夜春夢長。杏花微雨東風香。村南村北布穀啼。流水活活喧陂塘。老農
扣門告春及。畊牛正肥童僕忙。先生無事獨登山。山禽不去鳴其傍。幽花嫣然
出紅頰。韶顏亦復送眉睫。稚子牽攀嬌且癡。狂走曲徑撲蝴蝶。邑官憂民徵斂
稀。相傳只有勸農牒。
薰風南來麥穗黃。水田千頃雲蒼蒼。耘鋤作隊鴈陣白。低昂競進歌聲長。山枝
小亭臨大野。一邊清颯風微涼。先生怡然滿意閑。於此竟日聊倘佯。雖無心交
共清吟。亦有好事來相尋。白頭野老擔美酒。綠骨山人携素琴。一觴一曲愜幽
興。相將未覺生夕陰。

老鴈初飛霜露寒。小溪水清楓葉丹。嘉禾登場高過屋。穹窿培塿羅峯巒。山蹊盡日兒童喧。風枝墜實紅團團。先生高趣傲鍾鼎。時得清興便爲歡。秋來事事俱自得。蔗味佳處誰得識。東籬菊花三四枝。幽香滿袖塵採摘。携幼入室酒盈樽。頽然一醉山月碧。

穡事方成人力休。官租輸了生理優。東家西舍相勞慰。酒缸魚貫聊淹留。野笛山歌亦可樂。耕夫羹叟眞良儔。先生平生喜放浪。呼爲孟仲相獻酬。山椒日澹凍雲垂。嚴風吹折枯桑枝。雪花欲作客罷去。閉門還有一段奇。爛燒槽榼茅屋暖。隔窓聞竹尋小詩。

次春日昭陽江行

昭陽江草綠如煙。昭陽江水碧如天。情興難容宇宙內。吟哦已入羲皇前。平看大野正如局。遠數青山頻舉鞭。誰知仲尼嘆逝水。競效崔勝吟晴川。去年過此秋颯爾。今年過此春茫然。羅綺香熏琥珀枕。別離聲苦鴛鴦絃。多情自謂少壯日。屈指還驚老成年。江清安用心渴梅。江流可以寄予懷。繞江旱兮掇瑤草。愛江石兮坐綠苔。牽攀六龍日馭驅。挽到百歲風光迴。酤酒何論十千斗。逢人輒酌三百盃。從此倘伴山水窟。洒然脫落原衢埃。行險須知世道惡。多荒要去心田萊。東山不妨有聲色。首陽何苦守寂寞。主人聽此昭陽行。努力勞慰昭陽客。

雪軒鄭相宅青山白雲圖

山本乎止本乎靜。雲可以西可以東。本乎止靜者有體而附地。可以西東者無心而隨風。一動一靜將觀物所性。或青或白。己累吾之瞳。閑目嘿坐。入大素。曾襟寥寥如秋空。森然還有雲山態。誰爲詩人。誰畫工。畫工之神未易測。詩人所見何能窮。青山青青白雲外。白雲白白青山中。青山白雲爲一致。方信曾無九疑峯。

興海松羅途中觀海濤

朴孝修

颶風歘起翻滄溟。天水相兼晦且冥。銀山萬朶低復屹。百千雷鼓同一聲。扶桑將漂地軸動。龍王坐愁宮殿傾。波臣搖蕩水族亂。誰之所爲鯤與鯨。安得杖我倚天劍。一揮鱗甲雪碎輕。直效東海淨如練。復瞻白日涵清明。蛟螭蝦蟇樂得所。游泳聖澤之泠泠。

永慕亭行

韓修

至元天子建皇極。梯山航海無南北。唯是日本獨不庭。我遣信使示威德。庭臣縮頭皆自私。不願將身馳不測。吾州之豪郭壯元。曾懷直與天地寬。忘軀殉國是素志。受命甘爲書狀官。過間不與妻孥別。掛帆萬里輕波瀾。海天茫茫鴈飛絕。誰識子卿持漢節。爍爍有子獨在家。東望日夜腸內熱。陟岵兩眼墜玄花。號天寸心凝赤血。天憐終身慕不衰。侍側特送騏驎兒。兒心只欲寧親軀。溫清甘旨無所虧。自知不足以悅親。知無不爲常孜孜。新亭結構得處所。冬不多寒夏

無暑。既開方沼引泉流。更植嘉卉迎鳥語。春風花開秋月明。皆可慰吾之惻楚。百年養志儘怡愉。忠移於國懷此都。守道何曾枉尋尺。至今猶自範馳驅。所以位不滿其德。公不怨尤傍人吁。嗚呼吾鄉所矜式。巨手作記光竹帛。滔滔四海百萬億。幾人能盡臣子職。乃知永慕亭三世。天下後世來取則。

聞倭賊破江華郡達旦不寐作蛙夜鳴以叙懷

鄭樞

簷溜潺潺雨乍晴。篝燈熒熒翳復明。舍南舍北蛙閣閣。公乎私耶專夜鳴。我夢將成爾強聒。我機欲息爾紛爭。聽之悚然爲有氣。越王出見怒蛙乃爲之軾然起我憂世情。兒童吟哦杜陵句。豈意耳邊聞戰聲。自從西極天柱折。十載九作兵車行。去歲紅軍架入阻。至正己亥臘月晦河冰野雪屍縱橫。雲屯館穀西京市。四方繹騷如沸羹。逢人欲說去年事。毛骨颯爽先魂驚。至今遼海上。千里無人耕。如何寇至不旋踵。倭檣又集花山城。金銀佛刹香火冷。勞民像設空崢嶸。謂禪源龍藏二寺王師血濺水草腥。王怒豈不如雷霆。終軍弱冠請長纓。班超投筆流芳名。腐儒空有淚。無力能經營。自昔安危廟堂在。江湖何必憂蒼生。文恬武嬉莫爲慮。我心焉得不惻惻。城中萬家盡坐甲。海上千村生杞荆。君不見聖神天子御中國。海水不波河水清。安得有手斡天運。坐使群龍洗甲兵。

江陵東樓對月有感

大關以東天下稀。溟州樹老鶯亂飛。清晨騎馬訪招提。歸來賓館日已西。登樓

月色白如雪。鐵笛一弄山欲裂。闌干倚遍止愁絕。問月千年幾圓缺。夜深四顧人寂寞。城烏啞啞塵漠漠。小星耿耿月爭光。雲漢終古昭文章。昭文章臨萬方。浮雲欲蔽爲可傷。安得良劔依穹蒼。鯨濤接天渺無極。花浮邈迤藹佳色。庾信將軍信英雄。千載卓犖稱奇功。江陵有庾信祠

庚申三月三日雨中晝寢夢韓山君見訪置酒歡笑覺而有作寄呈

三月三日雨連風。掩關將以夢周公。周公遐哉不得見。乃夢韓山牧隱翁。白髭紅頰來我堂。宛然清笑索酒嘗。既際艱危身作相。欲澆磊砢須深觴。呼兒貰酒且炊黍。擬欲西軒終日語。風扉敲殘了無蹤。何所從來何所去。嗟予本是夢中人。夢中復夢知何因。祇爲從前情所在。叙情相見笑還新。

辛酉十月朔旦看日蝕

重光作噩陽月朔。日之將中光忽薄。始聞墻外聲鏗鏘。俄驚鞶韞連四方。矍然出戶仰天日。恍若日邊疑有物。呼兒將盆挹清淪。試從盆底窺金輪。金輪半破如缺月。天容慘淡若愁絕。陽烏萬古人所瞻。何奈一旦厄於蟾。陰消陽長邦乃昌。此日而蝕予心傷。春秋書災重日蝕。弭災莫若修衰職。予嘗載筆侍吾王。美質可爲周成康。朱光復圓能燭遐。君子改過胡不嘉。

淡菴作朴淵瀑布行示之次韻

成士達

朴淵之水雖逆流。我欲探勝四顧頻。回頭盤石澄潭瀉急湍。千尺素霓橫其間。

下有嵌竇不測底。應浸坤軸深連祗。龍潛抱寶本此托。琉璃影動雷殷壁。仰見銀漢空中懸。知是三清別洞天。却立惆悵復沉吟。輦遊往事從誰尋。松杉颯颯日照淵。澗谷馥郁浮祥煙。肅然笙鶴時時過。幾人縱賞趨山阿。長歌短歌或作記。競欲形容盡奇異。喜予生得山水邦。觀了好山與長江。樂哉此瀑布奇歟。挺作主。卓爾冠今古。願及未老春風時。駕言載酒遊無期。

復次前韻奉呈淡菴

盤石澄潭滙清流。走派急兮如車下坂頭。噴薄洶湧飛驚湍。色悖怳惚非人間。灣環踰黑萬仞底。沉竿續蔓誰窮柢。巨靈不知向何托。練翻珠春振峭壁。初聞雨聲長空懸。歎見白虬橫半天。戰戰霹靂兮潺潺。如笋吟香爐勝概那用尋。人言朴郎死名淵。水風習習常吹煙。驪龍相共馮夷過。悚然凝矚立崑阿。千奇萬恠未盡記。可嘆造物機巧異。休言此水背于邦。回互終入禮成江。前聖垂法有所主。四王鎮壓是從古。物理往還通塞亦各時。水之背向吾何期。

新到乾川諸公來訪次韻

李邦直

滿院和氣凝晴空。池塘春草樓臺風。小桃猶未放新紅。早梅先發荒園中。荒園中高軒過。噉盃共醉新豐酒。拍手齊唱襄陽歌。樂哉此樂樂復樂。有酒不飲當如何。

岸上行道江陰中

快遜

岸上青山石龍嵒。岸下黃泥萬篙孔。日落天寒不見人。一箇哀鴻度丘壠。我行感此歌慷慨。朔風吹衣骨欲僵。男兒墮地須侯王。安得排雲掃氛祲。致身稷契君虞唐。

歲暮行發江陰

男兒生未成名踰二十。歲暮江湖亦何益。到處那無骨肉親。去住寧如不相識。轉柁風來帆角斜。未知明日泊誰家。君不見翟公之門可羅雀。烏乎世情君勿嗟。

季冬行

季冬雨雪昆陵道。一片征帆疾如鳥。方入深溪指惠山。已覺孤城木雲杳。沙岸黃莎高復低。青松翠竹過雲齊。家家陶冶依林木。箇箇茅簷插酒旗。南望郵亭應許墅。故人正在梅深處。有約重來訪虎丘。今夜扁舟且須住。

瑤池會上南極老人授長生籙辭母親生日作

乾坤合清氣。雲物涵五色。零星纏大陰。光彩射南極。南極老人雙綠瞳。鶴髮炯炯顏如童。手把九節杖。談笑與之凌大空。三十六帝皆相從。或騎騏驎。駕飛龍。中道值九鳳。銜書乃是瑤池封。翩然竟指金天上。十二樓城玉相向。翠水之津。大古桃。有樹以來三萬丈。樓北朱萱金作花。樹前大棗大如瓜。鈞天奏曠樂。北斗酌流霞。玉京眞衆森如樹。羽蓋霓旌織煙霧。無數嬋娟之素娥。巧笑清謳起。

虛步。啁啾絲管。間以笙箏。麻姑擊節。飛瓊獻桃。南極老人。酣起舞。以手捧桃。指下土。可憐小兒癡。偷之意良苦。授以長生籙。請歸獻慈親。一如老人在南極。九十八萬三千春。坐看東海飛黃塵。與西王母長爲隣。

東文選卷之七

終

東文選卷之八

七言古詩

燕山歌

李穡

燕山之陽雲如堆。龍飛鳳舞源源來。長城中斷居庸關。春風秋月軒轅臺。昭王一去亦已矣。黃金千載空塵埃。天旋地轉光嶽合。土圭日影明堂開。四方漕賡蓄山海。萬國玉帛馳風雷。吾聞在德不在險。傳世百萬何疑哉。秦皇唐明共一轍。不足驪山爲禍胎。臨風獨立意蒼莽。日暮車馬爭喧豗。

天寶歌過薊門有感而作

天寶盛時何昌豐。天寶亂時何矇矓。沉香亭中春色濃。漁陽鼙鼓聲鞞鞞。馬嵬山下飛塵紅。天子劒佩鳴琤琤。三風十愆在省躬。宴安鳩毒須慎終。明皇一念常篤恭。此胡安敢行狂凶。乃知人事非天窮。不見吳王宮西施。半酣歌吹漾越兵。自渡江無風。

貞觀吟榆林關作

晉陽公子結豪客。風雲壯懷滿八極。赫然一起揮天戈。隋堤楊柳無顏色。已踵殷周成武功。宜追虞夏敷文德。持盈守成貴安靖。好大喜功多反側。三韓箕子不臣地。置之度外疑亦得。胡爲至動金玉武。嚙枚自將臨東土。貔貅夜擁鶴野

月旋旗曉濕雞林雨。謂是囊中一物耳。那知玄花落白羽。鄭公已死言路澁。可笑豐碑蹶復立。回頭三叫貞觀年。天末悲風吹颯颯。

同來僧渡溪墜馬失隻履戲作

山溪流入海。馬臥欲化龍。拄杖茫然忽落手。袈裟盡濕春雲濃。折蘆老胡亦戲劇。飛錫羅漢稱神通。借問隻履在何地。定應不在葱嶺東。不須更踏石頭路。自有一吸西江風。

醉中歌

先生右手探月窟。先生有足趨天闕。先生自是天帝子。意態乃與塵凡絕。遠尋妙道出羲皇。瞠乎灑灑並靈靈。旁求精義並思軻。中庸一篇真足樂。有時寥寥獨超群。莊騷班馬如飛蚊。先生獨笑齒久冷。孔門諸子屯如雲。雖然陋巷有真樂。舉世誰復希清芬。吾今老矣尙嬰鑠。高山仰止奚云云。先生且歌醉中歌。天地浩蕩無偏頗。頭上日月如飛梭。

青行纏歌

我有長脰黑無肉。閣得瘦軀如病鶴。少年才名動九重。力士脫靴寧少却。直將布襪踏御筵。把筆題詩天子樂。誰知尙有青行纏。雲崖石澗工黃緣。樹梢飛猿共超忽。柿栗漫山霜滿天。青行纏扶我兩脚自有日。欲歸未歸今幾年。

聽夷子歌

漢家龍飛泗水闢。秦宮二月紅焰烈。當時運籌身被瘡。諸公一旦高閶闔。礪山帶河宇未乾。韓彭薤醢冤誰雪。當時子房美婦人。素書一篇三寸舌。封留便與赤松游。羽翼儲皇真一瞥。乃知鴟夷子用心與人別。成功不退多禍機。先獲黃石公秘訣。五湖煙月天無邊。千古遺風吹不絕。

詩酒歌

酒不可一日無。詩不可一日輟。仁人義士心膽苦。欲寫未寫絕未絕。湘魂沉沉水無波。蜀魄磔磔山有月。手引深盃蒼海翻。口吟長句飛電決。盡將磊落付雲虛。不向須臾辨生滅。人間詩酒功第一。多少危時保明哲。酒有狂詩有魔。禮法不敢煩麾呵。自逃名網卽樂土。江山風月俱婆婆。

中秋翫月上黨樓上

去年翫月東樓下。柳林缺處金波瀉。今年翫月西樓上。薄雲弄影時澗漾。主人豪氣蓋一時。飲不盡器還能詩。憐我老病每相邀。歌呼不覺朱顏凋。去年今年一瞬息。樽前劇談忘得失。紛紛世間足榮辱。吾髮白兮難再黑。對月不飲吾則癡。我思古人誰我師。千鍾爲堯百斛孔。匪棘其欲維其時。我今不飲月應笑。月且少留吾一嘯。嘯如鸞鳳兮來天風。願言駕此遊彼蓬萊中。

狂吟

我本靜者無紛紜。動而不止風中雲。我本通者無彼此。塞而不流井中水。水兮

應物不迷於妍媸。雲兮無心不局於合離。自然上契天之心。我又何爲兮從容
送光陰。有錢沽酒不復疑。有酒尋花何可遲。看花飲酒散白髮。好向東山弄風
月。

松風軒詩絕嗣特索賦

月入濁水月無影。風觸頑石風無聲。樹木然後風振蕩。水泉然後月分明。江於
水也最潔淨。松於木也尤崢嶸。乃知相遇異於常。豁達之士取之名。懶翁江月
似舊白。絕嗣松風今又清。月白風清大平曲。寥寥天地誰能庶。我今把筆歌松
風。筆底髭髯松風生。松風搖月江湧波。對鏡淡然忘世情。大空至靜萬古碧。聲
色何從而滿盈。况今描出影中影。適使外物搖吾精。耳向松風江月兩佳處。高
臥鼻息如雷鳴。

謝郡守李公來訪

花政閒遊頭來。花欲語。遊頭迴。願留賓。軒共清夜。達曙快倒黃金杯。主人啜茶
殺風景。老癡至此何爲哉。百川東逝不復西。海底亦復生黃埃。無由上天繫白
日。胡不相樂如相猜。我向花神謝不敏。我雖未死心已灰。首陽薇蕨充我腹。不
受熊掌并豹胎。只緣從來識天明。乃與光景相徘徊。對花吟哦陶性靈。樂哉眞
似登春臺。太白歌行映千古。徒能使酒非天才。客去樽空時獨唱。天地闊遠呼
風雷。

甲辰仲秋有懷

鄭夢周

去年飲馬蒼海頭。咸州客舍遇中秋。山川超超草木落。明月滿天清景流。平沙萬幕寂無語。邊聲四起令人愁。將軍獨臥氈帳高。壯士悲歌鐵衣冷。帳前書生亦不眠。寂寞夜深相弔影。悄然興望望西南。浮雲橫空連鐵嶺。春風歸來計又非。扶蘇山前黃葉飛。今夜中秋去年月。去年客子猶未歸。庭除蕭索蟋蟀語。厨竈淒涼童僕飢。前朝舍弟付書至。白髮慈親願見之。功名富貴非汝事。客路年年有底期。明年何處逢明月。獨坐南窓自詠詩。

江南柳

江南柳江南柳。春風裊裊黃金絲。江南柳色年年好。江南行客歸何時。蒼海茫茫萬丈波。家山遠在天之涯。天涯之人日夜望歸舟。坐對落花空長嘆。但識相思苦。肯識此間行路難。人生莫作遠遊客。少年兩鬢如雪白。

剔銀燈詞

崔執鈞

昨夜細看蜀志。笑曹操孫權劉備。用盡機關徒勞心力。只得三分天地。屈指細尋思。何似劉伶一醉。人世都無百歲少。癡孩老尪悴。只有中間些子年少。忍把浮名牽繫。雖一品與千鍾。問白髮如何回避。

若有杖歌

武用洪韻

李崇仁

洪武丙寅季冬。予寓會同館。方患脚疼。躑於步履。通事鄭連遺以杖。得之。

甚喜。明年正月，自京師行至遼河之陽，未嘗頃刻不在手，忽於道中失其所在。夫以日月之既多，道塗之既遠，扶掖之既久，蓋雖微物不能不使予有感，故作歌。

若有杖兮從何來，會同館中初見之。不短不長尺度足，匪雕匪刻形勢奇。有時微呵香液生，觸以爪甲鏘然鳴。通事老鄭持見惠，既得奚啻錫百朋。京都酒樓與歌市，江淮青兗數千里。八仙祠下海連天，華表柱頭道如砥。我欲昂首吟高低，我或帶醉迷東西。或上孤舟破巨浪，或降楚丘登山蹊。苟非此物早扶我，半塗定是顛隴者。從來會遇豈在天，論功不必居人下。陶翁託爾如弟兄，寸心耿耿神明通。胡爲一日忽不見，茫然四顧尋無蹤。嗚呼吾固知爾之爲龍，嗚呼吾固知爾之爲龍。

嗚呼島一名半洋山

嗚呼島在東溟中，滄波渺然一點碧。夫何使我雙涕零，祇爲哀此田橫客。田橫氣概橫素秋，壯士歸心實五百。咸陽隆準眞天人，手注天潢洗秦虐。橫何爲哉不歸來，冤血自污蓮花鐸。客雖聞之爭奈何，飛鳥依依無處托。寧從地下共追隨，軀命如絲安足惜。同將一刎寄孤嶼，山哀浦思日色薄。嗚呼千秋與萬古，此心菀結誰能識。不爲轟霆有所洩，定作長虹射天赤。君不見古今多少輕薄兒，朝爲同袍暮仇敵。

行路難用古韻

行路難行路難。我今一鳴君一顧。平時坦道盡荆棘。白日大都見豺虎。萬慮燒胸腸欲爛。聽雞未禁中夜舞。明朝出門將安如。水能覆舟山催車。君不見長安陌上富貴兒。終然不讀一卷書。

渡遼曲

遼陽城中秋風起。遼陽城下黃沙飛。征夫渡海事驃姚。幾年望鄉猶未歸。空閨思婦繫雙蛾。挑燈扎扎鳴寒梭。織成錦字憑誰寄。青鳥不來知奈何。

贈送臨清釣隱詩

權近

鄱陽江水清且深。小亭翼然江之陰。有客持竿日日尋。志不在漁常獨陰。磻溪釣璜垂直針。鷹揚雋烈誰能任。桐廬客星久已沉。凜凜清風吹古今。賢聖高躅留碧潯。眼底萬物空蕭森。出處殊塗同此心。直教千載人皆欽。寂寥不鼓昭文琴。胷中至樂無知音。臨流兀坐涼滿衿。不覺歲月馳駸駸。歎爾徵起紆纓簪。風彩磊落傾士林。振鬣雄嘶萬馬瘖。茶雲歷井仍捫參。玉皇睿鑑如天臨。命掌房駟圍田禽。威加北漢南踰郴。豺虎遁走皆成擒。東遊奇氣增嶽岑。俯瞰溟渤同蹄涔。當事不敢忘規箴。高懷豈受纖塵侵。賓庖有魚炮且饜。公燕鹿鳴歌食芩。樽前只許魯酒斟。橐裏曾無南越金。節旄來趁清霜砧。去時方炎桑落楫。海外僻地久滯淫。舒憂嘯咏鏘璆琳。西歸我思漑釜鬻。送別繼綰情難禁。知君天上

霈傅霖永使萬方枯涸咸霑淋梯航世世爭輸琛

題漁村詩卷

孔伯共

蒼山之陽大江邊。茅屋竹籬相接連。民風朴略羲皇前。耕田釣水終歲年。上供
征輸猶有錢。仰事俯育常懽然。有士歸去辭班聯。綠蓑青蒻何翩翩。晨起持竿
乘小船。泛泛隨潮行。泝沿江烟漠漠。月中還。蘆雨蕭蕭篷底眠。任看光陰如逝
川。載酒自樂時烹鮮。高歌濯纓且扣舷。得魚不得俱忘筌。嗚呼此士真才賢。吾
知終入非熊畋。

東郊

尹紹宗

三韓禮樂五百年。蒼蒼萬古扶蘇山。攀龍附鳳六大師。白日大名天地間。安得
北斗酌滄溟。洗我生晚輪困肝。東郊痛飲浩浩歌。一眉新月隨歸鞍。

奉賀

李相國大破倭寇于引月驛振旅還都

扶桑寇發三十年。引月一鼓邯鄲坑。將軍槍急躍鐵馬。黃金甲照斜陽明。力拔
山兮膽如斗。許國一身鴻毛輕。區區管樂何足比。幅巾歸第師周程。周程之學
作伊周。公爲萬世開太平。

冬至

長養萬物歌南風。日永星火朱光融。積雪八極峩峩冰。焉知己向月窟凝。萬木
歸根蟄培封。雷聲半夜驚黃鍾。閉關三十六宮春。生生天地心無垠。我祖神聖

包義仁。剋業垂統生我民。太山盤石五百年。文明煥興三代肩。五閩遼金蟬。如宋氏元氏。今已墟。邊頭板蕩。知幾番。天下咸仰吾王尊。致此盛也。寧無端。好生之德。淪民肝。今臣紹宗髮蒼蒼。及事立陵。敬孝王。庚子上在白岳宮。上見狗病傷天衷。傳宣急呼大醫來。出藥與狗中使催。微物且加不忍恩。家法仁愛難名論。大明天子嘆再三。年年玉帛來江南。丁寧欲與吾東方。衣冠禮樂回虞唐。嗚呼晏駕金根車。大往小來吾其魚。否泰剝復同循環。今觀陽生怡我顏。東周之志竟不行。下泉匪風。夫子情。赤子向井無人扶。一片惻隱誰獨無。擴也可爲堯舜民。幡然三聘吾前聞。未厭豆粥鶴髮親。流離旅次潛傷神。

伏觀車駕臨幸

松軒李侍中第薦紳諸公咸作詩以賀得幾字

唐季開國到明興。立陵夢斷維熊虺。三十一朝統中絕。辛氏二世人憤悱。公奮絳侯梁公忠。神孫反正御丹宸。在天神聖復血食。混沌重開天日曄。詩謨更化同剋業。赤心光明無晷。私田害革經界正。食豐兵雄增俸菲。置學京坊盡鄉縣。選立師官文教燁。西鄙北鄙絃歌聲。東倭南蠻琛厥篚。漕斷陸輓四十年。漁鹽利通來流鬼。萬戰四散沿邊民。咸還鄉墟壑荆葦。經筵大儒侍朝夕。二帝三王陳亶亶。輔養聖德日日新。周公之後曾有幾。西山衍義進東宮。明德新民窮首尾。保傅賓友盡夔龍。出入起居寧比匪。萬世太平開自公。中興致治實天棊。帝嘉匡復特勞賜。三韓忠義公有斐。裴司空第趙普堂。未舉明主三代躋。公拜

卜畫獻萬壽。宗勛永與伊周偉。

題公州錦江樓

鄭道傳

君不見賈傅投書湘水流。翰林醉賦黃鶴樓。生前轍軻無足憂。逸意凜凜橫千秋。又不見病夫三年滯炎州。歸來又到錦江頭。但見江水去悠悠。那知歲月亦不留。此身已與秋雲浮。功名富貴復何求。感今思古一長吁。歌聲激冽風颼颼。忽有飛來雙白鷗。

中秋歌

去年中秋翫月時。歌舞縱譔開華筵。高堂簾捲夜如晝。清光凝座羅神仙。醉中呼月作金盆。玉壺美酒詩百篇。今年遠謫會津縣。竹籬茅屋荒山前。秋風颼颼動林莽。物像蕭條何悄然。是時對月倍怊悵。迴首舊遊散如煙。此身由來非異身。今年明月似前年。自是人情有異感。造物賦與原非偏。爲問明月之所照。幾人歡樂幾人悲。明年見月又何處。歡歎悲歎未可知。明月無言夜將半。獨立蒼茫歌怨詩。

戊寅九月到通州題叢石亭詩

鄭俊

乾坤鑄冶石爲峰。冥迷遠近烟霏濃。天低千尺赤崖立。風起萬頃蒼波重。莓龍剝落草中碣。笙鶴飄飄巖畔松。側身久立擬高蹈。屈指壯觀知幾逢。時有野僧好幽占。冥搜生事相追從。羽衣婀娜何處去。白雲千載尋無蹤。

奉和思謙題西字鍊師山水圖

釋宏演

畫山須畫華與嵩。畫水須極滄溟東。仙翁新意奪造化。筆底颯颯生秋風。蘿梯石磴三百尺。槎牙老樹撐蒼空。飛泉涓涓石鑿鑿。清輝粲爛開吟瞳。老關往矣小李死。孰云當代無良工。曾中丘壑自礪砢。揮洒墨妙精難窮。我家有屋松山下。此圖恍墮三韓中。自緣遊子遠在望。白雲日日生晴峰。

春米行

大婦春東白。小婦春西白。小郎春南白。大郎春北白。幼女護力攀碓頭。幼兒弄米翻柳斗。青裙大婦雲鬟高。氣猛脚踏碓牢。大郎小婦驚相問。謔浪笑傲聲嘈嘈。汗流浹背時暫息。以手按看白未白。欲白未白還更春。努力辛勤真可惜。天之降材非爾殊。奈何貧富不同途。雖然由此勞逸異。一治一養還相須。去年秋熟米價落。今年麻麥殊兩獲。那堪政又減科徭。婦簸夫篩良不惡。或春或揄或蹂簸。浙之叟叟蒸浮浮。大雅蒸民歌后稷。功奏萬古何時休。只今閭閻逢歲樂。四海清和塵不起。但願年年世太平。斗米三錢差可擬。

題驄馬飲水圖

昔聞韋偃畫無敵。解使房星落千尺。今觀頗似之。坐見落落精權奇。千里歸來汗未乾。碧波吸盡湘雲寒。波光雲氣填滿腹。便欲西走還長安。長安此去三千里。天閑駿骨差可擬。題詩卷圖還授君。眼見新龍欲飛起。

題飲馬圖

江南芳草春政肥。奚奴飲馬河水湄。波光照見五花影。蘭筋落落精權奇。乃知此是大官馬。五品以下焉致之。前年刷馬幽燕去。州縣遞送不敢遲。中途百萬半飢死。但留駿尾丞相知。大街白日馬聲少。蹇驢往往爭先馳。去年八月天詔下。寬恩亦許常人騎。人間驂驢不易得。駑駘或受黃金羈。豈無鹽車困良驥。伯樂已矣今何爲。嗚呼伯樂已矣今何爲。

秋夜宿蔣山寺

大江之南鍾山寺。巍巍樓閣開旃檀。雲外聽經白鷗下。洞中護法蒼龍蟠。塔影夜搖崖月淨。鍾聲曉襍松濤寒。舊說天人多集此。尙疑環佩來珊珊。

蓬萊驛有感

朴宜中

去年重五金堤郡。今年重五蓬萊驛。金堤郡中盡鄉黨。蓬萊驛裏皆殊俗。鄉黨爭持酒肉饗。值我先壠焚黃席。紅粉鞦韆綠陰動。打毬年少金鞍勒。此中風俗殊不同。空館寥寥人迹絕。年年此日天一涯。妻孥應向尊前說。

謫仙吟與李教授別

李詹

太白飄然謫夜郎。長安故人消息絕。梨園不奏清平詞。沉香百花香色歇。知音獨有杜草堂。夢中見之夢中別。風吹羽翼天網恢。錦袍坐弄水底月。醉中俯仰度春秋。萱花柳絮白如雪。濯纓才罷好婦來。江湖風波不堪說。

次裴秘書山茶花韻

憶昔探勝蓬萊東。山茶花開海雲紅。珊瑚枝橫錦繡宮。仲冬坐我春風中。屈指歲月苦忿忿。旌旗雜沓到處同。仙凡路隔信不通。自開自落隨江風。邇來眼亂桃花叢。句法已類山東農。益城城南忽相逢。向也所見空不空。花前置酒留雙松。且問誰是主人翁。

贈監丞池普門

東方人士都下遊。一朝得意侍龍樓。當時按樂多妙工。獨奏土風娛東宮。本朝自是外家國。東宮喜聽伽伽琴。千載風雲聖澤深。宮袍製錦腰帶金。蛾眉雙扶醉不起。蘭臺桂柱香沉沉。萬騎城頭鞞鼓驚。懽樂極兮哀思生。梨園弟子散如雨。騎驢蹭蹬還松京。歸來井邑宛如昨。高堂定省親朝夕。友天下士振英豪。功名富貴輕鴻毛。擱然更着征南服。手擊玉壺歌舊曲。箭頭零落劍鋒澁。何時掃破煙塵積。夢繞燕山臺上月。夜深獨向戍樓宿。君不見唐家李龜年。傷心每說天寶事。能令聽者悲不已。

有所思

頭流山高南海深。瘴煙四塞滿晝陰。三年逐客苦留滯。懷歸更奈傷春心。欲修尺書寄美人。塞鴈不征河鯉沉。山更高兮水更深。天涯地角力難任。相思一夜夢中見。美人遺我雙黃金。不重黃金重人意。覺來金與人難尋。

韓柳嘆

君不見韓退之。文章可起八代衰。又不見柳子厚。天脫羣羈高步驟。元和年間共南流。韓為潮州柳柳州。虺蛇爭結鱷如舟。叵堪瘴癘恒愁憂。居然長股薦蝦蟆。對按欲啖還咨嗟。惡溪黃霧冉溪沙。思君不復更思家。承恩一朝得生還。天宮再拜缺龍顏。逆鱗附勢罪有間。誰憐夢奠埋南蠻。兩賢窮達關天時。世上小兒宜不知。古人今人同一規。安用炎荒留滯為。

四皓

韓處寧

吾聞昔者商山翁。年皆皓首頗同道。風塵瀕洞暗豐鎬。鴻飛冥冥向秋昊。高山蒼蒼谷透遲。採採紫芝事幽討。龍虎相啗秦灰冷。幾人韜光恨不早。志在唐虞嗟世遠。豈向高皇展懷抱。前星失耀亂天常。義士聞此猶驚倒。周昌廷爭竟末如。蕭曹良平色枯槁。賁然一起羽翼成。微爾漢祚誰能保。惜哉隆準未繫駒。終令遠引從所好。我今作歌歌四皓。清風颼颼日杲杲。

應 製文皇帝賜本國世子詩

李 稷

御製詩。泚水東邊舊封域。八教疇能遵古式。簡編自足鑑安危。淵藪何須更藏匿。乾坤覆載靡不容。栽培歷皆一天工。時來難得苦易失。三韓揮霍空遺蹤。石渠肆誘逞儉。誦過眼。前看曾一警。溝渠樹綠草青雲。擁立苑漢封堦。余渠攄朝。廷過耕女。織疆場。寧吹蘆。搗鼓曰荒涼。曠野應無。佩犢行鴨。心綠。安得似金。石堅。確惟當慎。朝夕驕盈。只忠鮮求。終熟解沉。潛可長久。秉心。安得似金。石堅。確惟當慎。朝夕驕盈。只忠鮮求。終熟解沉。潛

到幽願昔年王子來朝享車騎蕭蕭出平壤清殺柳水凝冰迴首寒郊
 連葬蒼余視修貢萬里來年過十五堪成才讀書學道勿自棄勉旃毋使
 家聲隕從來禍福無禍鏑依伏之幾乘喜
 惡高山可礪海可移萬古忠誠是郭喜

聖人垂拱臨四域。建極明為天下式。紛然萬物各生成。蓋緣瑾瑜瑕垢匿。重譯
 殊方百般容。梯山航海通商工。唐虞尙有頑苗梗。聖德直躡三皇蹤。安南小蠻
 肯肆譎。迅雷一震真俄警。衣冠濟濟盛朝儀。熊羆外擁如環埒。小臣隨例立明
 庭。白日照耀乾坤寧。錫宴丹墀已踰分。况近天威咫尺行。既飽以德醉以酒。玉
 山入眼頽培塿。天樂鏗鏘隱半空。紅雲繞殿凝祥久。見舜更聞夔擊石。恍然不
 覺是何夕。胡歌越舞共恩波。閭闔晴開窈深曠。吾王述職誠于享。保我生民分
 土壤。世子朝天弱冠年。跋涉幾多馳莽蒼。至尊嘉嘆心無它。賜寵仍觀學詩才。
 三韓自古禮文邦。君臣大義安敢隳。仗信世守東門鑰。布昭聖武除奸惡。但願
 年登萬姓安。古來固國非城郭。

同前

李來

日月所臨盡疆域。車書混一皆承式。一時賢俊俱登庸。莘野傅巖無遺匿。忠言
 讜議虛襟容。任官九載二考工。高皇神武振華夷。柔遠能邇繼先蹤。三韓霑化
 已無譎。驅馳入貢疾如瞥。遨遊萬里勝賞多。跋涉雲山與水埒。金章玉佩入天
 庭。獲覩溫顏心且寧。自西自東無不服。北狄南蠻向化行。萬國共醉衢樽酒。秦

山之下皆小樓。吾王遣子出至誠。誠與天地同悠久。小邦獲被安盤石。昊天恩德謝晨夕。栽培傾覆理分明。天道玄玄終不贖。儀不及物猶不享。況是遐陬無執壤。心敦卵翼視猶孫。恩同春雨霑莽蒼。一札天章九重來。欲和慚非謫仙才。詩猷遠射奎壁爛。詞氣欲震岷崙隕。雞人報曉開金鑰。拜辭潛然懷抱惡。願言皇家享萬年。五雲長繞鍾山郭。

青鶴洞

柳方善

瞻彼智異山穹窿。雲煙萬疊常溟濛。根盤百里勢自絕。衆壑不敢爲雌雄。層巒峭壁氣叅錯。疎松翠栢寒蘓葱。溪回谷轉別有地。一區形勝真壺中。人亡世變水空流。榛莽掩翳迷西東。至今青鶴獨棲息。緣崖一路纔相通。良田沃壤平如案。頽垣毀逕埋蒿蓬。林深不見雞犬行。日落但聞啼猿狖。疑是昔時隱者居。人或羽化山仍空。神仙有無未暇論。只愛高士逃塵籠。我欲卜築於焉藏。歲拾瑤草甘長終。天台往事儘荒恠。武陵遺迹還朦朧。丈夫出處豈可苟。潔身亂倫誠慳慳。我今作歌意無極。笑殺當日留詩翁。

贈陳舍人

曹庶

朝鮮臣子遠流落。歲去年來歸未得。寒衣冷飯難度日。心折骨驚少筋力。君不見囊中黃金盡。豪人傑士無顏色。神龍雖有淤泥中。無雲不得昇天翼。又不見盛年不重來。莫把青春枉拋擲。時節正當天氣好。桃李花紅楊柳碧。思之不可

令人嘆。家在天涯山水隔。到處誰悲失路人。相逢皆是他鄉客。不尤於人不怨天。嗚呼。老來命途薄。勿恨功名苦不早。天子文明君正少。英華富貴各有時。莫使傷心買生老。

春日昭陽江行

趙浚

春城城裏無生煙。昭陽江頭十月天。腥膻賊氣蒸山阿。豕突鳥逝向無前。鼓吹期吞昭陽江。憑凌直投苻堅鞭。堂堂王師失紀律。至使賊足蹂伊川。哀哀子遺盡赤立。矯首問天誰使然。傷心走馬昭陽亭。昭陽水碧月正絃。更深鐵衣冷如水。風景悠悠似去年。亭前玉樹臨風梅。脈脈似慰王人懷。嗚呼清寧五百秋。歌舞故地生青苔。我願生平奮長策。致主三代欲挽回。腰懸斗大黃金印。一舉滅賊如舉盃。張皇威靈若風雷。洒掃日出無塵埃。遂銷鋒鏑作犁鋤。闢盡蒼蒼南畝萊。敷陳文物闡壽域。一慰蒼生多寂寞。開平昭陽江上日。不妨也作風流客。」

同前

權滄

十里江村桑柘烟。一江疎雨暮春天。昭陽亭在畫圖裏。氣概蒼茫一望前。女佩傾筐尋野菜。誰驅瘦馬搖征鞭。楊花漫漫飛古渡。草色萋萋連清川。天低野闊白雲遠。騷人遷客眼潸然。我來此地鬢生白。昭陽江月幾度絃。浮生忽忽逝日夜。水流花謝又一年。少年此手未調梅。異鄉空抱鬱鬱懷。昭陽誰道歌舞地。池亭牢落生春苔。我本疎慵物外者。愛此形勝每往迴。教授洪公亦吾輩。共倒春

風三兩盃。未用強顏隨世俗。悠悠碌碌趁風埃。大器由來當晚用。此身未必老
草萊。他日風雲魚水會。應念昭陽多寂寞。寄語川人須着眼。我亦當年紫薇客。」

贈權中慮遇

卞季良

東韓形勝稱永嘉。永嘉水深山崔嵬。永嘉山水孕神秀。生此磊落之奇才。岷岡
有鳥必鳳雛。渥洼自昔多龍媒。陽村於世若山斗。吾子又是英雄魁。詞源倒流
淮海奔。浩氣上薄雲煙開。少遊學固無論。一時縫掖皆逡巡。十五卓登司馬
試。聲名藉藉惟日新。君門射策行可必。自擬折桂同郗詵。却將絕藝屢見屈。和
氏之璞徒自珍。圃隱一日擅文衡。伯樂刮目當麒麟。場屋獨步無匹儔。圃隱爲
之重迴頭。揮洒健筆掀六合。心奪造化追冥搜。偶然擢秀捷巍科。白日光彩誰
比侔。嗟予狂簡無所裁。亦幸托契相綢繆。膠漆多慙龍與豬。雕虫烹鯉時相投。
幸今國步政清夷。聖上翼翼猶慮危。宵衣旰食不自逸。思得碩輔圖邦基。天生
丈夫爲天下。考槃荷蕢終何爲。時清要須立要津。他日共當携手升玉墀。

春日昭陽江行

李先齊

沃野漫漫橫素煙。中有鳳山撐蒼天。昭陽江水流山北。光海州治依山前。山西
水南是濊墟。風淳俗美示蒲鞭。向時憂華隨世塵。樓觀有基臨清川。宋公經營
不日成。心匠與此同豁然。簷牙高啄鳳岡阿。鳳去山空松彈絃。登臨一望萬景
奔。物像依然似去年。我來又見發春梅。東西役役每勞懷。光陰冉冉不我延。花

飛悄悄粘蒼苔。花粘蒼苔可奈何。倚柱空吟首不迴。今年春旱又倍前。渴飲茶湯代酒盃。苗不入土昭雲章。藹藹南畝飛黃埃。降香精禱象天麻。田峻欣欣治汗萊。來牟更明稼生穡。肯使北樓終寂寞。秋來把酒邀明月。莫爲虛作關東客。」

擊瓮圖

伊誰畫此擊瓮圖。掛君書堂之座隅。總角斑衣髻稚容。迥然自與凡兒殊。知是司馬相公眞。竦然軒眉久睢盱。畫師經營有深意。豈爲目前克細娛。異器由來大義求。誰從此圖觀步趨。聞說爲兒嬉戲時。指揮群童相擲揄。兒墜瓮中沒奈何。群童驚散徒嗚呼。當時知計已老成。手持一石今專軀。蒼黃應變捷如響。他年相道啓前途。果然一朝登相府。沛施天澤流寰區。剷除姦諛改新法。群賢策征德不孤。四海一日廓如清。前後活人如合符。不惟當時走卒知。流傳古今有是夫。望夫人兮已多年。忽然對此空噫吁。人亡圖存宛如昨。想見當年陳廟謨。九原可作願執鞭。坐令三韓致唐虞。

春日昭陽江行

俞孝通

江之濁兮凝濃煙。江之清兮涵晴天。或清或濁豈江性。被他外物交如前。人心明暗只如此。寄語少年須著鞭。利源一開而濫觴。誰能禦之同逝川。扶微去危充四端。煌煌特達泉火然。我本質魯性偏柔。戰兢自持師佩紘。馳騁長途未津涯。居然已作白首年。敢期殷鼎調鹽梅。任重才劣常憂懷。遙想故園花正濃。三

逕就荒生莓苔手種桑梓。夢蒼蒼。中有曲渚相縈迴。風景不殊。江山異登臨。縱目聊舉杯。江流山峙露眞機。遠近物像無塵埃。雖云信美非吾土。掛冠歸去鋤田萊。候門稚子有愉色。可與此輩排寂寞。我是我非天獨知。五十二年無事客。

歸來圖

姜碩德

先生初非避俗翁。誰知千載之英豪。偶爾隨雲出林壑。鄉里小兒非吾曹。歸來三徑任蕪沒。恰有琴樽供笑傲。環堵蕭然臥北窓。羲皇上人興陶陶。眼中忽見山河移。書晉甲子寸心勞。豈但高義凌天衢。忠憤直與秋雲俱。何如處士節獨高。當時廊廟多俊髦。余今撫圖重嘆息。清風颯颯吹鬢毛。

送高僉樞奉使日本

煌煌龍節指扶桑。雲濤湧連天長。風帆萬丈拂秋空。快若逸騎奔康莊。男兒何用守古丘。弧矢由來志四方。況是與國修舊好。講和須使恩信彰。吾聞彼俗尙儒雅。先生已自能文章。館待遙知享儀豐。耆艾竟覩孤鳳凰。金盤霜橙壓香橘。冰碗蔗漿洗煩腸。惜別置酒臨江樓。撫琴相顧天蒼茫。明年刮目定何時。鶯花春滿五雲鄉。

麻浦夜雨嘆

成俔

黑雲一片低青天。時聞獨鶴鳴遠渚。夜來渡口南風顛。倒捲西江作飛雨。魚兒出沒爭唼喙。馮夷鼓浪神靈舞。勢包島嶼歸洪濛。涼生軒戶收餘暑。江鴻搖蕩

聲嗷嘈。菱荷歷亂隨風濤。漁翁失纜叫江湖。大船傾側小舶飄。人間何處非至險。俄頃生涯臨不測。琅玕君子笑一場。半夜不眠頭鶴側。

清江曲

落日欲沒清江曲。斷霞一片魚尾赤。青山倒映琉璃滑。萬頃波濤寫秋色。橫槎渡口行人稀。漁舟一葉泛渺瀰。槎牙老樹臨灣碕。寒鴉亂啄黃牛飛。危亭迥絕江之涯。高人掀髯倚殘暉。白頭漁子搖煙霏。鷓鴣偷眼仍猜疑。秋風吹水江溟濛。相呼相倚望秋空。白鷗浩蕩尋無蹤。一雙飛入蘆花叢。

寄姜景愚

詩爲有聲畫。畫乃無聲詩。古來詩畫爲一致。輕重未可分毫釐。先生胷中藏百恠。詩歟畫歟不可知。時時遇興拈秃筆。拂拭縞素開端倪。須臾一水復一石。蒼崖老木臨清漪。乃知鄭老是前身。摩挲竟日神爲怡。雖然粉墨豈傳久。一朝散落隨煙霏。不如移就有聲畫。入人之耳解人頤。千古萬古留神奇。

寄徐剛中

早知窮達皆有命。舊書自可千回讀。冥搜萬古窺鴻濛。深淺不同俱可樂。我有舊業西山隈。家有鄴侯三萬軸。人間歲月雙跳丸。胡乃區區慕人爵。至今山鶴鳴夜闌。白雲有意遮舊壑。行當與子歸去來。十年不復窺門闕。策勳茲事知有期。夜夢車輪生四角。

舍弟景醇以小障求畫副之以詩作海山圖用其韻以示之

姜希顏

詩畫一法妙難詰。世間誰能兩高絕。少乏詩情只學畫。毫端往往驅造化。藝成屠龍人不數。君今求畫我始遇。唱得君歌知意密。爲作滄洲搜一一。研磨點綴試繪素。心手俱敏能得趣。得趣寧嫌障面小。縱筆掃盡蠻牋皎。須臾海沸見鵬圖。滄茫萬里開通衢。氣洩網緝唱海曲。葦密松盤長翠綠。晚浦月入潮退活。遠岫雲橫青作抹。風雲髣髴一洞房。那知仙侶更聊浪。我畫只此不須愛。君歌浩蕩令快內。春風驟裏如解絆。助筆有神麤欲斷。從知詞源已倒峽。且可待君作舟楫。

任子深邀我遊漢江招剛中用洪武正韻

洪逸童

勸君以蘇長公赤壁之遊。請君以王右軍蘭亭之會。期君以李謫仙園中之宴。共君以歐太守亭上之醉。駟馬高車不足榮。列鼎方丈不足貴。世間萬事幾時了。不如逢場須盡歡。勝遊難得幽絕處。古人臨水又登山。尊中有美酒。座上無惡客。與君連袂到江頭。一洗塵襟浮太白。

溫陽扈從與具綾城中高靈兩相

崔恒

翠華春幸靈泉曲。扈從大小疇不樂。雙城在南靈山北。去天尺五長蛇幕。况乃同盟又同幄。乘閑日夕恣歡謔。羽觴隨波停不得。高談浪語驚霹靂。若比八僊

纔半額。一飲斗石猶未足。日來夙夜少閑隙。暫從清唵膝未促。酒星應愧歡不續。半夜飛向天翁白。天翁老矣好戲劇。立召飛廉與騰六。水葩交加爛銀竹。萬竈無虞更清肅。寒威徹骨口拊束。無計可解惟酒力。又欲勸吾親杯酌。造物小兒亦不惡。此時不任陶劉責。無亦違天辜莫測。急呼奴星煖醞醪。霞隱亦宜來火速。徑臥醉鄉最上策。舍無何有吾安適。

題日本僧壽藺詩軸

申叔舟

天運坱圠無停機。人事變化隨遷移。坐見桑田爲蒼海。隙駟滅沒須臾期。先生乘運撫瑤圖。手整乾坤提綱維。至治馨香徹上帝。奇祥異端爭紛披。休聲仁化暢遐邇。梯航萬里來相追。當時藺師亦遠至。風格飄然來雙眉。先王一見授書幣。面命歸報國王知。上人拭目感榮遇。舉手拜命辭丹墀。間關三載今始回。殯宮寂寞垂玄帷。手擎國書復舊命。爐煙一炷悲風吹。人人見師暗悽惻。老臣血淚雙漣洏。念師往復只數載。天崩地拆非所期。師言鯨濤不足畏。滿國白刃交參差。連年鞞鼓尙未已。都中列壘方相持。萬死一生捐性命。出入劔戟如坦夷。天語丁寧猶在耳。敢爲知遇論嶮危。殉義輕身重然諾。慷慨燕趙秋風悲。昔我泛海窮東溟。綵纜手繫扶桑枝。馬島松浦隔海隅。九州山勢西南趨。莒崎斜連霸家臺。白沙十里松萬株。黑水揚波沒涯涘。平生漂梗緣桑弧。赤關尾路兵庫津。淡路四州羅星辰。王都百里山作城。西北峩峩東嶙峋。三川流惡南注海。町

條井井街巷。勻南仙相國領諸寺。觚稜日照輝金銀。似聞干戈起輦轂。朱門寶刹俱灰塵。栖芳有寺在西山。洞府幽深隔人寰。客中暫凭潭北軒。往往魂夢尋清閑。光陰倏忽三十秋。胷中歷歷懷舊遊。眼底紛紛田與海。天時人事同悠悠。撫今念舊重悲感。扶桑照檻空白頭。

呼耶歌

李石亨

呼耶呼耶在南北。呼耶之聲何時息。千人輸一木。萬人轉一石。華山之石拔幾盡。白雲之木斫幾禿。石盡山禿寧可虞。填坑仆谷民可惜。民可惜誰能識。惡卒捶督如電擊。朝未食夕未殮。可憐腰間空垂橐。猶唱呼耶口吻燥。口燥喉啞聲難作。聲衰力盡一僵仆。塵飛濺血萬人足。我願天公生大材。不置山林置君側。作我堂堂大厦之柱石。不勞萬民力。不爲萬姓瘼。莫使呼耶在山谷。

東文選卷之八終

東文選卷之九

五言律詩

長安旅舍與于慎微長官接隣有寄

崔致遠

上國羈棲久。多慚萬里人。那堪顏氏巷。得接孟家隣。守道唯稽古。交情豈憚貧。他鄉少知己。莫厭訪君頻。

贈雲門蘭若智光上人

雲畔構精廬。安禪四紀餘。筇無出山步。筆絕入京書。竹架泉聲緊。松欂日影疎。境高吟不盡。瞑目悟眞如。

題雲峯寺

捫葛上雲峯。平觀世界空。千山分掌上。萬事豁胷中。塔影日邊雪。松聲天半風。烟霞應笑我。回步入塵籠。

旅遊唐城有先王樂官將西歸夜吹數曲戀恩悲泣以詩贈之

人事盛還衰。浮生實可悲。誰知天上曲。來向海邊吹。水殿看花處。風櫺對月時。攀髯今已矣。與爾淚雙垂。

重遊九龍山興福寺

吳學鱗

日改物亦改。事移人又移。鶴添新歲子。松老去年枝。院院古非古。僧僧知不知。

悠然登水閣。重驗舊題詩。

石竹花

鄭夔明

世愛牧丹紅。栽培滿院中。誰知荒草野。亦有好花叢。色透村塘月。香傳隴樹風。地偏公子少。嬌態屬田翁。

甘露寺次惠遠韻

金富軾

俗客不到處。登臨意思清。山形秋更好。江色夜猶明。白鳥孤飛盡。孤帆獨去輕。自慚蝸角上。半世覓功名。

安城驛

高兆基

山雨留行客。郵亭薄暮時。春風無好惡。物性有參差。柳眼已開嫩。花唇欲吐奇。如何雙鬢上。不改去年絲。

珍島江亭

行盡林中路。時回浦口船。水環千里地。山礙一涯天。白日孤查客。青雲上界仙。歸來多感物。醉墨灑江煙。

永清縣

路橫層岫僻。城倚半天孤。碧洞長虛寂。行雲忽有無。古松能自籟。春鳥巧相呼。物像馴吟賞。留連倒酒壺。

宿金壤縣

鳥語霜林曉。風驚客榻眠。簷殘半規月。夢斷一涯天。落葉埋歸路。寒枝掛宿烟。
江東行未盡。秋盡水村邊。

感秋回文

李知深

散暑知秋早。悠悠稍感傷。亂松青蓋倒。流水碧蘿長。岸遠凝煙皓。樓高散吹涼。
半天明月好。幽室照輝光。

宿樂安郡禪院

金敦中

偶到山邊寺。香烟一室開。林深唯竹栢。境靜絕塵埃。俗耳聞僧語。愁腸得酒杯。
蕭然已清爽。况有月華來。

芍藥

趙通

誰道花無主。龍顏日賜親。也應迎早夏。獨自殿餘春。午睡風吹覺。晨粧雨洗新。
宮娥莫相妬。雖似竟非真。

雨夜有懷

印份

草堂秋七月。桐雨夜三更。欹枕客無夢。隔窻虫有聲。淺莎翻亂滴。寒葉洒餘清。
自我有幽趣。知君今夕情。

東都懷古

昔年鷄貴國。王氣歇山河。代遠人安在。江流水自波。舊墟空草木。遺俗尙絃歌。
崔薛無因見。嗟嗟可奈何。

澄賢國師影堂

寂寞老僧影。誰知是國師。碧苔隨地滑。落葉上階馳。異跡景宗代。遺碑周佇詞。住山年月久。檀檜老無枝。

送人

鄭知常

庭前一葉落。床下百虫悲。忽忽不可止。悠悠何所之。片心山盡處。孤夢月明時。南浦春波綠。君休負後期。

朝宋路上寄諸友

權適

別離真細事。此別意難窮。客路波濤外。家鄉夢寐中。出門纔暑雨。倚棹已秋風。他日江湖興。扁舟復欲東。

慈護寺樓

許洪材

早起獨登樓。悠然八月秋。白煙橫野外。紅日上峯頭。客路風霜冷。僧軒花木幽。一尊開笑語。消遣利名愁。

永寧寺次高按部韻

金莘尹

信宿永寧寺。一如行脚僧。晝吟憐影淨。夜坐覺神凝。身世風中絮。忠誠日下燈。天門萬重險。何術可飛昇。

珍島江亭次高按部韻

杳杳情難極。盤桓漾小船。雨來雲沒島。風動水浮天。愧匪餐霞客。今爲犯斗仙。

不知何郡國。鳥外碧生煙。

松風亭偃松次人韻

林宗庇

松偃老幽谷。風傳萬壑悲。乾坤自得疾。霜雪不渝姿。未遂大夫願。寧求匠石知。軒然真傲世。獨與白雲期。

靈通寺僧貯山泉封寄見戲

朴公襲

有客來相過。囊空欠一錢。本求廬阜酒。謾得惠山泉。虎伏林中石。蛇懸壁上弦。屠門猶大嚼。何況對尊前。

高山馬上得句書公館壁

崔永濡

自喜從王事。仍能占勝遊。山鴉啼壟樹。野鴨泛溪流。帶雪千峯瘦。連村一逕幽。選來逢絕致。立馬更遲留。

投某官

盧永綏

宦海風波惡。窮鱗去路停。老妻容寂寞。稚子淚颼零。衰鬢千年鶴。殘生十月螢。辱知恩不薄。阮眼一回青。

病目

吳世才

老與病相隨。窮年一布衣。玄花多掩映。紫石少光輝。怯照燈前字。羞承雪後暉。待看金榜罷。閉目坐忘機。

戟巖

北嶺石巉巖。傍人號戟嚴。迥撞乘鶴晉。高刺上天咸。揉柄電爲火。洗鋒霜是鹽。何當作兵器。敗楚亦亡凡。

謝見詒

林椿

長安霖雨後。思我遠相過。寂寞蝸牛舍。徘徊駟馬車。恒飢窮子美。非病老維摩。莫署吾門去。聲名恐更多。

李平章光緜挽詞

兩代黃扉相。時稱萬石君。獨全知畏慎。早白爲憂勤。遺令孤皆奉。陰功世莫聞。秋風數行淚。洒向北邙墳。

贈李湛之

去國同流落。今朝復入關。天教雙劍合。亂後幾珠還。歲月粘衰鬢。風霜改舊顏。平生交分合。猶喜更追攀。

獻時宰回文

李仁老

早學求遊宦。詩成謾苦辛。老懷春絮亂。衰髮曉霜新。倒甌朝炊斷。飢腸夜吼頻。報恩心欸欸。誰是救枯鱗。

謾興

境僻人誰到。春深酒半酣。花光迷杜曲。竹影似城南。長嘯愁無四。行歌樂有三。靜中滋味在。豈是世人諳。

喜僧惠文得寺

文也禪林秀。知名二十春。久聞詩摠好。爭及貌彌真。既住青蓮宇。應分白氎巾。通宵喜不寐。亦有玉堂人。

仍弗驛

金克己

悠悠山下路。信轡詠涼天。水有含芒蟹。林無翳葉蟬。溪聲清似雨。野氣淡如煙。入夜投孤店。村夫尙未眠。

田家四時

草箔遊魚躍。楊堤候鳥翔。耕臯莒葉秀。盭畝蕨芽香。喚雨鳩飛屋。含泥鷺入樑。晚來茅舍下。高臥等羲皇。

柳郊陰正密。桑壟葉初稀。雉爲哺雛瘦。蠶臨成蟹肥。熏風驚麥隴。凍雨暗苔磯。寂寞無軒騎。溪頭晝掩扉。

搯搯田家苦。秋來得暫閑。鴈霜楓葉塢。蛩雨菊花灣。牧笛穿烟去。樵歌帶月還。莫辭收拾早。梨栗滿空山。

歲事長相續。終年未釋勞。板簷愁雪壓。荆戶厭風號。霜曉伐巖斧。月宵乘屋綯。佇看春事起。舒嘯便登臯。

使金過免兒島鎮寧館

前途餘幾里。晚色漸微茫。天外北風黑。地中西日黃。婦人能走馬。童子解騎羊。

一曲梅花落，聲聲斷客腸。

胡家務館次途中韻

去家才一月，茫若隔三年。客路天低處，鄉心日出邊。病妻應自苦，嬌子有誰憐。學道元無累，今朝忽慘然。

過東峯館河橋

簇簇亂峯間，虹橋跨碧灣。雪寒愁北去，風暖喜東還。宿凍碎圭壁，驚灘鳴佩環。鄉心催縱轡，未暇弄潺湲。

送智勝

釋戒膺

好學今應少，忘形古亦稀。願予何所有，而子乃來依。窮谷三冬共，春風一日歸。去留俱世外，不用淚霑衣。

宿保寧縣

俞升旦

晝發海豐郡，侵宵到保寧。竹鳴風警寢，雲泣雨留行。暮靄頭還重，朝暾骨乍輕。始知身老病，唯解卜陰晴。

穴口寺

地縮兼旬路，天低近尺隣。雨宵猶見月，風晝不躋塵。晦朔潮爲曆，寒暄草記辰。千戈看世事，堪羨臥雲人。

趙相國獨樂園二首

蘇刻丹書額。壺藏白日仙。清歡雖共客。真樂獨全天。庭雨蕉先響。園晴草自煙。桃花流水遠。回却武陵船。

東臯塵跡斷。西麓石蹊微。樂沼魚相舞。馴階鳥不飛。柳春張翠幄。花午洒紅衣。喜我題詩處。林泉不放歸。

次柵城公館壁上韻

再過煩宵候。松明道兩傍。旌槍新翼衛。腰劔舊顏行。共待寒年續。誰分儉歲梁。酌民無小澤。每愧勸鵝黃。

宮中四景集句

林惟正

春

上林花掩映。王禹偁化國日舒長。胡真風暖鳥聲碎。杜荀鶴泥新燕影忙。白樂天輕輿臨大掖。陳叔達步輦御披香。王官儀聖藻懸宸想。崔湜詩無入俗章。潘閔

夏

冰盤消酷暑。張子房輦路挾垂楊。楊師道林熱鳥開口。杜甫雲披月吐光。王鐵新衣裁白紵。賈島薄汗染紅粧。李德裕何處添佳景。僧無本南風草樹香。白樂天

秋

秋晚岳增翠。司馬元俄符聖壽長。蔣防錦衣盤鸞鷲。黃晞珠殿瑣鴛鴦。李白撼撼風驚竹。曹團團月隱墻。杜甫瓊筵承湛露。王維御酒菊逾黃。宋之問

冬

寒日臨清晝。張政元苔乾著夜霜。柳開嚴風生北戶。魏野晚景麗東墻。謝地暖梅先發。
之楊微更疎漏正長。宋之問一承黃竹詠。李又銀漢洒宸章。楊源巨

詠雪

聽憐終夜落。齊已片薄逐風斜。辛寅幽澗迷松響。盧肇虛庭混月華。僧止繞墻全剝粉。李商隱着樹摠成花。趙滕為報詩人道。錢起前村酒可賒。和放

和狼川縣客舍留題

縣僻煙霞裏。孫何亂山為四隣。楊蟠林鶯鳴訝客。韓愈墻燕語留人。杜甫落照紅於燒。白樂天飛花白似銀。楊蟠清風北窻下。李白一酌送殘春。憶之

見德城卽事

庭靜秋雲淡。智圓城寬夜月澄。李洞沙鷗痕似浪。張翥山遠燒如燈。李師中酒熟思才子。
起錢起詩成寄岳僧。智圓天涯故人少。杜甫高閣與誰憑。智圓

閑中偶書

萬里江湖夢。清江千山橘柚鄉。樊堂砌涼鳴蟋蟀。智圓沙暖睡鴛鴦。杜甫事去青山在。錢公輔官閑白日長。禹偁人生都幾日。盧全甫痛飲信行藏。杜甫

龍津鎮通溟樓卽事

奔雲低帶雨。王承遠水倒垂天。李攝綠樹村邊合。王維孤城柳外圓。唐庚碧空猶未鴈

宋遠木欲鳴蟬。陸龜蒙豈不感時節。韓愈臨風一慨然。子瞻

和董文功錄事

學堂日無事。韓愈引睡臥看書。永叔洗酌開新醞。杜甫呼兒掃弊廬。司馬光幽花欵滿樹。

市涼月巧臨除。林敏虛室絕塵想。陶潛陶潛語不虛。樂天

秋夜入直都省偶題壁上

時秋積雨霽。韓公雲捲碧天長。西子浙浙風生砌。杜甫斜斜月轉廊。元龜殘燈生暗暈。荆公

老木犯新霜。呂本中病肺不飲酒。呂溫無因作醉狂。齊已

秋送金先輩登第還鄉

李奎報

射策登高第。騰裝返故鄉。春同鶯出谷。秋趁鴈隨陽。落日愁行色。孤煙慘別腸。明年會相見。好去莫霜裳。

沙平江泛舟

江遠天低襯。舟行岸趁移。薄雲橫似素。疎雨散如絲。灘險水流疾。峰多山盡遲。沉吟費回首。正是望鄉時。

下寧寺

偶到湖邊寺。清風散酒醺。野荒偏引燒。江暗易生雲。碧嶺侵沙斷。奔流夾岸分。孤舟何處泊。漁笛晚來聞。

犬灘

清曉發龍浦。黃昏泊犬灘。點雲欺落日。狼石捍狂瀾。水國秋先冷。船亭夜更寒。
江山眞勝畫。莫作畫圖看。

寓龍巖寺

羈紲不到處。白雲僧自閑。煙光愁暮樹。松色護秋山。落日寒蟬噪。長天倦鳥還。
病中深畏客。白晝鎖松關。

江行

路轉長川遠。雲低曠野平。天寒征鴈苦。沙漲宿鷗驚。鬼火林間碧。漁燈雨外明。
歸舟夜未泊。鴉軋櫓猶鳴。

草堂端居和子美新賃草屋韻

杜門無客到。煮茗與僧期。荷耒且學圃。歸田當有時。貧甘老去早。閑厭日斜遲。
漸欲成衰病。疎慵不啻茲。

寓興撫桐孫。虛心對竹君。林深鴉哺子。園靜鳥呼群。坐石吟移日。開窗臥送雲。
塵喧卽咫尺。閉戶不曾聞。

點點階苔紫。茸茸徑草青。殘生浮似夢。破屋豁於亭。不省空囊倒。猶嫌一日醒。
詩成誰復愛。自寫枕頭屏。

心已如焦穀。人誰射毒沙。老於詩境界。謀却酒生涯。默笑觀時變。閑吟感物華。
在家堪作佛。靈運已忘家。

寧爲學稼老。不作出貲郎。賦食籠狙類。忘機入鳥行。深藏玉自貴。不採蘭何傷。獨喜童鳥輩。踟躕繞我床。

聞琴次韻陳學正濼

人琴幸暗合。絃手穩相迎。寓古心逾淡。通仙骨欲輕。清於巖溜落。幽到谷風生。聽罷月微側。冷然洗我情。

九品寺

山險馬頻蹶。路長人易疲。驚鷗時入草。宿鳥已安枝。虛閣秋來早。危峰月上遲。僧閑無一事。除却點茶時。

洛山寺

釋益莊

海岸高絕處。中有洛迦峰。大聖住無住。普門封不封。明珠非我欲。青鳥是人逢。但願洪波上。親瞻滿月容。

南堤柳崔校勘韻

崔滋

南堤一株柳。濯濯秀風標。毒虺藏空腹。嬌鶯弄細腰。歲寒無勁節。春暖有長條。但問材何用。休論百尺喬。

元德太后挽詞

乾極會容配。坤儀正體元。枕前朝聖主。帳底見曾孫。陰慘俄沉月。星悲便沒軒。三韓千古淚。七十九年恩。

秋日書懷

陳 湜

富貴也悲秋。孤吟况弊裘。閱多人寵辱。問幾日歸休。落葉埋金井。疎砧響石樓。聊將倦遊興。欵枕夢滄洲。

次韻朝守

清切天居近。徘徊閣道深。樓明初榜殿。月落半庭陰。煙色籠溫樹。風聲度舜琴。醉顏侵夜起。殘夢雜微吟。

夕守

薄暮趨宸仗。彤庭逐貴遊。詩懷憑酒得。世態向人羞。新月彎宮樹。華燈上御樓。坐思天下事。何日借前籌。

苦熱吟

釋 圓 鑑

有地盡炎赫。無階奔廣寒。瀑川思雪岳。風穴憶冰巒。本朝雪岳有瀑川。水山有風穴。未學乘飈列。空希愛華潘。何當酷吏去。得與故人歡。

扈駕興王寺路上

郭 預

細雨南郊路。平林近復隄。空濛催柳絮。取次放桃花。雲影隨丹轂。山光濕翠華。春風扈從日。晚興浩無涯。

壽康宮觀獵

原上雨初霽。燒痕春色新。一鷹如箭疾。萬馬若雲屯。雉困還遭犬。鷹迷不避人。

長楊賦未就。慚愧諫垣臣。

東郊馬上

信馬尋春事。牛兒方力耕。鳥鳴天氣暖。魚泳浪紋平。野蝶成團戲。沙鷗作隊行。白嫌隨燕雀。不似鷺鷥清。

寄姪彥冲

李混

汝翁雖早逝。汝叔今幸存。恩愛何曾異。親疎且勿論。立揚期顯達。敦信護家門。所冀全忠孝。佳聲揭後昆。

贈送天台了圓長老

安震

老屋開溪上。經霖路出沙。相邀禪者杖。似遇貴人車。下榻談初穩。還山意已賒。他年作龍象。法雨潤農家。

得堂字送辛裔員外朝元

東歸席未暖。北去策偏長。別馬便驥首。情人空斷腸。雲間靄葵陸。天外望萱堂。富貴年猶少。須知定省忙。

送閔生員仲玉璿觀親還學

歲暮話離別。男兒豈定居。班荆酒一盞。連軫書五車。時俗不好古。斯人能起予。芳年知去就。臨路莫踟躇。

呈分司那懷廉訪

崔澐

肅政官何貴。分司望更清。千年鍾秀氣。四海服高名。問瘼先行惠。論囚盡得情。須憐荒郡倅。披霧倍欣榮。

大尉王挽詞

慶襲三韓社。功兼一字王。恩榮傾戚里。富貴冠朝行。德讓心何小。勞謙道亦光。克家傳有子。百世永難忘。

金童公主挽詞

玉牒流光美。璿源發派長。選歸宜世戚。占夢協男祥。月已雲端隱。舟難壑底藏。西門迎送地。行路涕滂滂。

燕子

白元恒

年年來自遠。雲水杳湘荆。庇雨依深樹。陶泥啁落英。語添春院靜。蹙破霽池平。問主聲猶切。幽居眼獨明。

題守城賓干光先達水閣朴石齋韻

崔沔

才望今誰比。清閑古莫儔。柳邊蓮沼淨。竹裏草堂幽。皎潔心如月。逍遙鬢未秋。自慙無定止。飄泊似沙鷗。

宿龍潭驛

安軸

寄宿茅茨下。霜濃冽氣嚴。困來伸病脚。危坐撚疎髯。屋老塵栖壁。窻明月掛簷。心忙眠未穩。斗覺夜厭厭。

題寒松亭

四仙曾會此。客似孟嘗門。珠履雲無迹。蒼官火不存。尋真思翠密。懷古立黃昏。

唯有煎茶井。依然在石根。松近為山火所燒故云

八月將赴京。又有旨仍行秋祭。南行路上有作

鞍馬關東望。秋黃再入槐。吏民嫌拙政。山水厭凡才。昨已推相送。今胡去又迴。

多慚見沙鳥。虛過釣魚臺。

贈友人

安牧

紫陌連苔徑。青山對草廬。好為無事飲。安用向空書。漸覺芳心玉。猶嫌寒意餘。

見詩殊有興。欲和愧才疏。

落職後到清州作

鄭顥

自我來桑邑。無人可說愁。身閑仍懶拙。地僻絕交遊。命亦任窮達。心難決去留。

南州已多感。蕭索更逢秋。

拱北樓

辛蕨

井邑山川好。居民尚太初。坐賓前內翰。牧伯舊中書。松櫟千峰秀。桑麻四野虛。

倚欄吟未已。林鳥苦催予。

北上

李齊賢

斷鴈秋聲苦。荒雞夜色闌。呼燈憎僕懶。騎馬怕兒寒。時率兒而行草動霜飄袂。冰穿

水迸鞍。主恩猶未報。努力敢求安。

去魯情何極。遊秦興未闌。每懷姜被暖。誰念范袍寒。對酒頻彈劍。吹燈乍枕鞍。白雲看漸遠。安得報平安。

題長安逆旅

車馬函關道。風塵季子裘。轍環天下半。心逐水東流。萬事唯呼酒。千山獨倚樓。青雲有知己。未用歎悠悠。

延祐己未。予從於忠宣王降香江南之寶陀窟。王召古杭吳壽山。一本作陳鑑如

誤也令寫陋容而北村湯先生爲之贊。北歸爲人借觀。因失其所在。其後三

十二年。余奉國表如京師。復得之。驚老壯之異貌。感離合之有時。題四十

字爲識

我昔留形影。青青兩鬢春。流傳幾歲月。邂逅尙精神。此物非他物。前身定後身。兒孫渾不識。相問是何人。

雪夜小酌

李穀

臘近纔呈瑞。冬溫不失和。履聲人起早。篆迹鳥留多。舊業餘書榻。歸期誤釣蓑。擁爐俱是客。奈欠酒錢何。

得家兄書

賤子成何事。年年作遠遊。棣華開處少。荆樹得庭幽。信字煩黃耳。餘生共白頭。

置書空悵望。江海日東流。

村居

尹汝衡

補國無長策。拋書學老農。人疎苔徑濕。鳥集蕁門空。煙淡溪聲外。山昏雨氣中。杖藜成散步。滿袖稻花風。

次旌善郡韻

許少由

樓上奇觀富。森羅指點間。水清何濯足。簾豁可迴顏。轟亂風前竹。螺排雨後山。當年誰撥此。天地所曾慳。

杏村李侍中岳挽詞

白文寶

泉裝何遽爾。吾謂老彌強。玉樹添風彩。銀鈎照日光。清新庾開府。終始郭汾陽。偶會還如昨。投壺意自長。

贈同年郭復佐郎

鄭居寬

遷居非市井。寂寞興何清。當戶丘麻長。滿庭秋草生。家貧自存道。身懶不營名。故舊相過少。方從閱世情。

送郭檢校九疇還河南

永錫

李岡

我在遼海東。君居天地中。相逢如隔世。一見喜同風。禮貌從輕重。交期誓始終。論文恐難再。歸騎莫匆匆。

詩邀河允源郎中

獨坐成幽興。苔深四壁空。菰蒲一池雨。枕簟滿樓風。壺底冰漿冷。盤心野果紅。此間閑氣味。思與阿兄同。

次郭諫議韻送崔德成持平分司舊京

北闕彤雲遠。南州白日遲。仲宣初作賦。賈傅獨傷時。洛曲一杯酒。陽關三疊詩。相逢何日是。漂泊負前期。

送契員外天民長壽奉使江南

金臺卿

奉使朝天去。颯然天地秋。承恩雖可賀。送別得無愁。祖席三竿日。風帆一葉舟。江南佳麗地。莫倚仲宣樓。

題蔚州官舍壁

鄭誦

極目丘園隔。回頭歲月侵。關山千里夢。風雨五更心。處世身如寄。居官力不任。攻愁無過酒。舉酒莫停斟。

寄獻春軒

飄零千里客。蕭索數家村。夢斷無由續。心寒尙未溫。滯留驚節物。陶寫賴琴尊。但得身能健。悠悠不足論。

東萊雜詩

官舍依梅塢。民居傍水湄。淳風猶袞袞。生物舉熙熙。看客皆携酒。爲儒摠喜詩。心憐仙境好。莫遣世人知。

雲水千年地。煙花二月時。郊遊無檢束。村老亦追隨。野廣天容肅。江晴日色遲。酒闌還有興。削樹遍題詩。

蘇叡知何往。東崖有故居。如聞騎白鹿。本自陋金魚。遺迹千年後。浮生一夢餘。偶來多感慨。欲去更躊躇。

落日逢僧話。春郊信馬行。煙消村巷永。風軟海波平。老樹依巖立。長松擁道迎。荒臺漫無址。猶說海雲名。

當日洪平甫。波瀾起筆端。高才不遇世。晚歲此爲官。憔悴身仍病。吟哦興未闌。壁間無一字。豈爲和詩難。

甞過清明節。閑憑積翠軒。地嚴森畫戟。山靜衛朱門。風細竹陰合。雨晴花氣繁。筦絃驚宿鳥。落葉滿金尊。

湯泉傳自昔。浴室自今存。水脈來非遠。槽欄尙帶溫。二年困瘴癘。半日洗囂煩。此藥除曾點。無人可與論。

亦知花鳥近。胡蝶作團飛。微雨不濡地。暗香行滿衣。小池魚自戲。高樹鳥相依。却喜同遊子。幽期不我違。

周令誰相識。江臺跡已陳。知渠是循吏。說德有遺民。政簡印生綠。宴疎琴繫塵。朱輪久放浪。回首媿斯人。

行行閱數郡。到此意尤長。香稻眞珠顆。芳醪琥珀光。泛舟尋水壑。扶杖上山岡。

遠謫君何恨。茲遊不可忘。

癸未重九

地僻秋將盡。山寒菊未花。病知詩愈苦。貧覺酒難賒。野路天容大。村墟日脚斜。客懷無以遣。薄暮過田家。

東文選卷之九

終

東文選卷之十

五言律詩

題拱北樓

權漢功

拱北樓新構。庚申十月初。詩從權贊善。功自尹尙書。古道依紅樹。清池倒碧虛。留連日將暮。山色正愁予。

廬山寺枕碧樓

十載讀書處。布衣今再遊。長松蔭古道。亂石漱寒流。白日山村暗。青春洞府幽。何時擁萬騎。一笑上江樓。

清州拱北樓

柳淑

北樓陪賞日。東國中興初。勝事將傳示。新詩強自書。旌旄森滿路。袞黻迥臨虛。此地雖云樂。松山苦僕予。

題興教僧統餞行詩軸

李達衷

但要無心耳。何傷有髮乎。莫言儒斥佛。嘗謂我忘吾。擾擾慕羶蟻。區區吞餌魚。幻生多恠事。轟醉乃良圖。

送河南郭檢校永錫九疇

李仁復

天子憂南紀。元戎控上游。遠交來使節。遙望卽仙舟。雪重貂裘暖。天寒驛路脩。

冬官如有問。爲我謝綢繆。劉工部是

送契寶符還大明

我同年

帝運初興漢。民心久戴商。羨君來奉使。愧我未觀光。驛路山橫翠。船窗月送涼。贈言吾不佞。努力更流芳。

送門生郭正言儀出按江陵

宵旰憂民日。郎官奉使秋。皂囊封暫輟。紅旆挽難留。邊靜無虛警。山高有勝遊。君看東海水。早晚我乘桴。

送朴部令宜中覲母金堤

時朴兼學官

籍甚芹宮客。飄然桂榜魁。斯文今未喪。吾子故多才。祖席西風急。歸鞍後騎催。嗟余獨何事。欲去更徘徊。

杏村李侍中岳挽章

秉志忠兼孝。持身險若夷。邇來方折屨。誰謂忽乘箕。黃閣風聲遠。蘭亭墨跡遺。含言更流涕。非獨爲吾私。時公姪珣破賊而還故有折屨之語

思庵柳政堂淑挽章

佐命由潛邸。成功及盛年。忠誠明貫日。讒說暗欺天。身退猶難免。名高更可傳。君恩已追謚。亦足慰重泉。

芸齋李政堂彥冲夫人挽章

奕世家聲著。疏封婦德崇。康寧垂八秩。柔順得三從。絳帳空留月。丹旌遠逐風。升堂記疇昔。有淚忽霑膺。

遼陽縣君三韓國夫人挽章

鸞檢皇恩渥。魚軒象服鮮。三遷修母道。八秩享天年。慈儉人皆法。哀榮史可傳。防山何處在。丹旆去翩翩。

夜坐次杜工部詩韻

韓脩

此日亦云暮。百年真可悲。心爲形所役。老與病相隨。篆冷香殘後。窓明月上時。有懷無與晤。聊和古人詩。

奉和韓山君所示

殘歲寒風積。窮居酒盞疎。愁雲低野迥。凍雀傍簷虛。拙可存吾道。閑唯愛我廬。南窻書課進。漸覺日行舒。

木落

木落悲秋盡。床寒覺夜長。回風搖閉戶。飢鼠鬪空梁。世事莊生蝶。人情華氏羊。塵纓未濯久。明發問滄浪。

寄密城李使君

釋之

極目望南州。西風意轉悠。相違纔數月。不見抵三秋。葉脫山新瘦。沙寒水急流。故人何處笛。長嘯坐江樓。

宿驪興清心樓

鄭樞

夜入黃驪縣。舟人欲臥時。渚行風作暴。樓宿月如期。天豁長江動。沙明雜樹奇。三更發清嘯。便覺舞馮夷。

送郭九疇檢校

金九容

萬里天王地。何年息戰塵。元戎方授鉞。信使遠交隣。跋涉來蒼海。驅馳向紫宸。自今爭刮目。重見至元春。

己亥年紅賊

慷慨豪談笑。幽齋清夜深。悲風嘶朽木。苦月上疎林。撫劒三長嘆。停杯一浩吟。鴨江豺虎滿。何似健兒心。

送鄭當寺丞之任忠州

春風方駘蕩。持節赴忠州。芳草東門路。垂楊古渡頭。彈琴開古閣。拄笏上高樓。應過驪江去。江邊繫釣舟。

宵夢

楔遜

龍蛇猶格鬪。豺虎尙縱橫。不見風塵息。胡爲江漢行。有身真大累。無地托餘生。寂寞中宵夢。淒涼去國情。

次權左尹鑄韻

楊以時

擬賦早春詩。轉頭春欲歸。斷腸芳草遠。滿日落花飛。修禊客方盛。浴沂人正稀。

浩然清興發。新沐振吾衣。

幽居卽事

金仲權

家貧營產少。草色滿庭除。妻病惟須藥。兒癡懶讀書。菊從晴後種。芘向晚來鋤。漸覺幽居好。門無長者車。

自遣

裴中孚

吾愛吾廬好。終年掩竹扉。檢書尋古架。換酒典朝衣。水淺魚猶樂。林深鳥自歸。怡然觀物化。不是避人譏。

次寒松亭韻

李茂芳

亭依松麓斷。東望海無門。境靜仙蹤在。沙明鳥篆存。碑心苔暈綠。石面雨痕昏。一掬泉無渴。源乎天地根。

讀漢史

李穡

吾道多迷晦。儒冠摠冶容。子雲殊寂寞。伯始自中庸。六籍終安用。三章竟不從。悠悠千載下。重憶孔明龍。

記安國寺松亭看雨

小雨仍村笛。斜陽又寺鍾。山遙多醞籍。水闊自春容。爽氣生明月。寒聲起碧松。至今心尚悸。雷電逐飛龍。

夜吟

行年已知命。身世轉悠哉。細雨燈前落。名山枕上來。憂時知杞國。請始有燕臺。恰到俱忘處。心原冷欲灰。

偶吟

桑海眞朝暮。浮生況有涯。陶潛方愛酒。江總未還家。小雨山光活。微風柳影斜。句回還游意。獨坐賞年華。

浮生

浮生安足恃。老病競侵尋。日月環雙鬢。乾坤矢一心。袖風晴倚杖。衣露夜鳴琴。萬慮自此靜。渺然天地深。

遣懷

倏忽百年半。蒼黃東海隅。吾生元跼蹐。世路亦崎嶇。白髮或時有。青山何處無。微吟意不盡。兀坐似枯株。

浮碧樓

昨過永明寺。暫登浮碧樓。城空月一片。石老雲千秋。麟馬去不返。天孫何處遊。長嘯倚風磴。山青江自流。

洪武丁巳奉使日本作

鄉夢周

水國春光動。天涯客未行。草連千里綠。月共兩鄉明。遊說黃金盡。思歸白髮生。男兒四方志。不獨爲功名。

偶題

今日知何日。春風動客衣。人遊千里遠。鴈過故山飛。許國寸心苦。感時雙淚揮。登樓莫回首。芳草正菲菲。

旅寓

平生南與北。心事轉蹉跎。故國海西岸。孤舟天一涯。梅牕春色早。板屋雨聲多。獨坐消長日。那堪苦憶家。

客夜

此奉使京師時作

客夜人誰問。沉吟欲二更。詩從枕上得。燈在壁間明。默默思前事。遙遙計去程。俄然睡一覺。童僕報鷄鳴。

送徐九思之江陵省覲

李崇仁

客從京國出。遙向故園歸。山水人居勝。樓臺暑氣微。寂寥徐孺榻。文彩老萊衣。何日能相見。尋君夢遠飛。

題玉田禪師松月軒有揭文安公曼碩歐陽文公原功諸先生題詠

獨向層峯裏。新開文室清。疎松留鶴老。好月近人明。河漢高秋影。風霜半夜聲。師心遣有相。燕坐樂無生。

送張衡叔還西都田宰相幕

相國經綸器。朝鮮禮義邦。叅謀今俊逸。遺俗更淳龐。樓閣臨平楚。風煙接大江。

君歸如記我，莫惜鯉魚雙。

扈從城南

郊甸秋成早，君王玉趾臨。觀魚前事陋，講武睿謀深。鼓角蒼江動，旌旗白日陰。詞臣多侍從，會見獻虞箴。

感興

久矣妨賢路，飄然落遠方。山川非故國，風露近重陽。冉冉蘆花白，團團菊葉黃。客懷何以遣，除却接杯觴。

民望傳郭秘丞見心歿嗚呼見心已矣吾與民望流離嶺表行且徂歲存歿可哀情見乎辭見心名復

此生足可惜，吾友復云亡。作賦山陽客，修文地下郎。風霜流景暮，詩酒舊游涼。何事中宵月，愁時滿屋樑。

憶三峯

不見鄭生久，秋風又颯然。新篇最堪誦，狂態更誰憐。天地容吾輩，江湖臥數年。相思渺何限，極目斷鴻邊。

正月十七日出自金川門馬上咏懷

男子平生志，何曾學臥馳。一身行地遠，兩眼閱人多。經緯山河大，蕃維宋漢和。歸來覺疎宕，馬上放高歌。

將赴都也宿楊州之廣陵驛見江都史知縣知張伯淵先生下世悵然有
作名溥號木訥軒者

歲暮仍爲客。今朝又哭君。一言曾刮目。千里共論文。契闊猶言情何限。幽明理
已分。雞龍山下路。有笛豈堪聞。

嘉州路上聞王評理下世

我自江南返。公亡路上聞。傷心將落日。滿目未歸雲。談笑三生夢。精靈四尺墳。
他時人物論。空此揖英芬。

避寇入城上牧伯金賞

權興

世故終難料。人心各不同。兢兢常履薄。咄咄但書空。相鳥猶求友。聞蛙似爲公。
仰天時大笑。吾道豈長窮。

寄鄭進士

龜晉

老子惜離居。何時復起予。冬裘慈母線。日課故人書。獨處情懷惡。相望信字疎。
錦還知不遠。榮彩耀鄉閭。

寄金副令

卞仲良

最憐金典校。華髮卜山居。睡枕松聲落。吟窓竹影疎。巖耕春種豆。水宿夜叉魚。
盛代求賢急。行當見鶴書。

閑齋同中慮偶吟

雪盡春光動。山圍暮色多。懶從生計薄。閑愛舊知過。古井初消凍。寒梅正結花。團圓風味足。賒酒更煎茶。

登宜州北城呈玄教官

迢遞鐵關北。孤臣奈此何。老狐棲古壘。夕鳥聚寒柯。湖海三年謫。秋風百感多。那堪正飄泊。賴有故人過。

憶弟

海郡驚時變。無端涕在衫。江雲白勝雪。春水碧於藍。歸夢萱堂北。孤蹤竹嶺南。監丞安穩未。相憶正難堪。

凌煙閣

九齋
燭刻

尹紹宗

定策雖群彥。酬功在一民。民心去隋久。天命向唐新。滌蕩三邊日。丹青萬古春。英雄何代乏。往事不須珍。益齋李曰吾所不及也

忠定王大妃挽詞

妃鈴平伯孫

開國元勛世。平戎積德門。皇天生倪姝。王室配神孫。夏啓謳歌往。周姜思媚存。聰陵封新隧。臣子正銷魂。忠定王葬聰陵

贈李詹從指揮

紫霞親試日。清問有虞風。黃甲名無右。玄陵眷在中。圖書闡河洛。文物煥岐豐。惆悵蒼梧遠。從戎平海東。

謁惠王眞于錦城

鐵原方啓聖。錦里爲儲英。一統三韓日。先登百濟城。山河扶王氣。廟貌見民情。願相東征鉞。重開萬世平。

西江帥府

鄭思道

出獵凌霜曉。彎弓愧鬢毛。放鷹窮野闊。馳馬試山高。詭遇元非意。長驅不覺勞。擊鮮將獻闕。肯爲作遊遨。

秋雨偶題

迢遞雲連塞。淒涼雨送秋。滴階驚坐睡。着柳長詩愁。夜暗憐鷄叫。天寒愧客遊。戀君心愈切。矯首獨登樓。

鎮守東江癸丑九日

登高誰舉酒。橫槊出城東。漠漠連江雨。蕭蕭落木風。聖明容我老。甘苦與軍同。定被黃花笑。醒吟酒罍空。

哭平齋李文敬公岡

韓方信

我出杏村門。視君如弟昆。忠清來有種。恭儉獨超群。謂答蒼生望。何違日者言。從今合坐所。高論更難聞。

送天台洪若海照磨

元松壽

客子起鄉思。蕭蕭霜葉飛。歡迎纔結襪。惜別已霑衣。祖席依寒樹。歸舟帶夕暉。

遠遊雖不惡，魂夢繞庭闈。

中秋歌

鄭道傳

歲歲中秋月，今宵最可憐。一天風露寂，萬里海山連。故國應同見，渾家想未眠。誰知相憶意，兩地各茫然。

順興府使座上賦詩

路長山有雪，村暝水生煙。乘興尋安道，吟詩似浩然。別離三載外，談笑一尊前。此曲難堪聽，蒼茫歲暮天。

聞金若齋在安東以詩寄之

滄海三年別，平原一笑同。風塵將歲晚，天地盡途窮。苦句難成讀，深情默自通。襄陽有山簡，共醉習池中。

贈君詩語苦，臨別不堪吟。書劍遠遊客，乾坤歲暮心。路長黃葉下，鄉近白雲深。獨立離亭畔，秋天易夕陰。

漢陽途中

李集

病餘身已老，客裏歲將窮。瘦馬鳴斜日，羸僮背朔風。臨津冰合凍，華岳雪連空。回首松山下，君門縹緲中。

遣興

朴宜中

節序忽云暮，客行何所之。一身長作梗，雙鬢已成絲。短帽風聲緊，疎燈夜影遲。

昨非今始覺。事事不如期。

首夏卽事

柳橋穿翠密。花塢惜紅稀。鑽改青榆火。裁新白苧衣。桑疎蠶已老。草茂馬初肥。久客緣何事。思歸未得歸。

春雨

鄭摠

霖霖知時節。廉纖逐曉風。簷間蛛網濕。階下燕泥融。着柳漜濛綠。催花蓓蕾紅。一犁敷土脈。佳氣屬田翁。

紀地名詩三首

權近

北渡桑乾水。南浮楊子江。金陵朝萬國。鍾阜鎮中邦。齊魯宗親盛。幽并醜虜降。三韓非化外。松岳氣鴻龐。

雨暗沙門島。風高碣石山。燕鴻今已至。遼鶴幾時還。水接蓬瀛闊。雲橫海岱閑。扶蘇何處在。夢繞紫霞間。

黃縣秋風晚。青州落日沉。沮江歸路阻。渤海客愁深。方丈疑無有。嗚呼弔古今。隅夷東表地。渺渺望鷄林。

挽趙宰臣

成石璘

溫溫吾益友。情話幾回同。未必仁人壽。空留長者風。塵棲經卷上。火盡藥爐中。惆悵平生事。松楸夜月籠。

書感

楔長壽

生理貧恒絆。歸期亂每妨。涸魚誰肯濟。巢燕自徒忙。道路風塵暗。箕裘事業荒。倚樓溟海闊。萬里迥蒼蒼。

歲暮雜述

漢江槎不至。鵠嶺思還仍。野闊時舒眺。樓高每倦登。群鳥飛落日。獨木蔓寒藤。却把三山興。都懷萬里鵬。

春色

春色可天地。江淮猶甲兵。謾依詩歲月。不羨世功名。白眼如無見。青山似有情。濁醪聊適意。時復喚兒傾。

僧曹溪禪師云鑑得無字

釋祖異

鑑老禪林傑。才全德亦俱。雲山知快活。世路脫崎嶇。谷密苔生逕。簾虛月上趺。安心行住臥。日用趙州無。

登州

李詹

久客饒情緒。春來更惘然。焚香靈應廟。乞火孝廉船。鴈度三千里。鵬鷺九萬天。幾時還故國。爛熳醉花前。

舟行至沐陽潼陽驛

一粟滄波上。飄然任此身。楚山遙送客。淮月近隨人。衰髮渾成雪。征衣易染塵。

那堪行役久。汀草暗知春。

懷歸

再拜子規鳥。思君淚滿衣。人窮人不愛。事往事多違。片月吹羌笛。枯桐送落暉。松山遙在望。安得一迴歸。

將赴密陽歇馬茵橋新院

行旅知多少。閑人似我稀。愛山隨處駐。得句獨吟歸。僧院秋方至。官塗露未晞。會當容此膝。江上有魚磯。

寄南教授

山寺讀書日。相同過一春。單裝流落處。匹馬往來頻。信字傳盈尺。音容隔幾塵。十年翻覆後。君獨有情人。

迎曙驛逢郭御史明日漢江上相別

再過三峰下。傷時淚滿巾。年來新日月。事往幾風塵。世路少相識。郵亭逢故人。依依不忍別。立馬漢江濱。

書懷

成石珣

骨肉分離日。空城獨自行。淚邊黃鳥近。愁裏白髭生。老已催年至。名猶與利爭。誰知天有眼。一一見人情。

題壁上

魚變甲

歸來棲息地。環堵兩三間。風雨弟兄話。晨昏父母顏。門聽雙磻水。樓對四窻山。只要君臣義。休官諒不難。

十一月二十日有雪夜坐

李原

西峯寒日暮。萬里凍雲凝。窻外三冬雪。床頭半夜燈。擁襟全似鐵。呵筆更生冰。欲向梁園醉。其如酒價增。

登聖居山金神寺

卞季良

攀蘿登絕頂。碧殿拱寒虛。佛古稱尊者。山靈號聖居。鍾聲雲外落。松影月中疎。最愛安禪子。渠心政自如。

題僧舍

俗客來叅佛。高僧坐誦經。晝燈熏古壁。老檜響空庭。塔立三層白。山回四面青。禪窓更無事。終日倚風櫺。

題青溪山行上人院

石路千崖盡。香煙一室清。客來求煮茗。僧坐自翻經。樹老何年種。鍾殘半夜聲。悟空人事絕。高臥樂無生。

次靈通寺壁上韻

地僻塵機息。樓高暑氣微。鳥隨鳴磬下。僧趁暮鍾歸。移石雲生袖。看松露滴衣。秋霜山菓熟。更此扣巖扉。

宿復興寺

失路投山寺。人傳是復興。青松唯見鶴。白日不逢僧。古壁留金像。空梁耿玉燈。前軒頗清切。過客獨來憑。

放洋遭大風。舟回不行還。泊于藍乙老浦。

朴瑞生

靡監惟王事。懸帆向日東。風撞巨鼇窟。舟盪老蛟宮。人物扶搖裏。形骸恍惚中。艱危何足說。頭上有蒼穹。

馬天使思親堂圖

李惠

思親堂可畫。孝子意難摹。懷橘戀河曲。乘查窮海隅。秋風吹去鴈。斜日照慈烏。囊底無長物。唯藏一軸圖。

郊居

柳方善

郊居近市闔。偃仰樂無厭。竹靜微風過。花香細雨霑。買魚尋晚艇。除酒向春帘。盡日登音少。青山自滿簾。

卽事

愛靜塵塵客。忘機狎水鷗。詩從三上覓。理向一中求。屋破茅茨古。山深樹木稠。江魚秋正美。有意買漁舟。

曉遇僧舍

東嶺上初噉。尋僧扣竹門。宿雲留塔頂。積雪擁籬根。小徑連深洞。疎鍾徹遠村。

蕭然吟未已。清興到黃昏。

僑居

僑居活計情。便覺漸忘形。覓句償詩債。煎茶解酒醒。玄經方欲草。陋室已曾銘。盡日渾無暇。還將笑此生。

謫居卽事

李種學

江山雖寂寞。天地自清寧。身困春欹枕。心愁晝掩扃。何人趨北闕。此地近南溟。客裏春初仲。時時讀楚經。

送朱子蘭

曹庶

文明天地泰。優老賜還生。侵路岷山碧。迴舟楚水清。琴書應有待。花木更含榮。擾擾吾何事。徘徊送子行。

禪興路上

權遇

不向禪興路。于今四五年。尋芳新草木。訪迹舊山川。斷壠犁耕雨。荒園鳥語煙。繁華皆已去。滿目摠蕭然。

題西江亭

愛此江亭好。登臨久不回。商帆投岸落。漁艇逐潮來。極浦寒煙積。遙山返照開。機心消已盡。魚鳥莫相猜。

至日還自錦山登日新驛樓

尹淮

貪程夜渡津。今日一陽新。竹籬疎映雪。梅塢別藏春。樓閣臨長道。經過問幾人。白雲看漸迥。回首暗傷真。

慶會樓侍宴

虎觀親臨日。薰風水殿涼。鳳姿瞻穆穆。天樂耳洋洋。病骨醺靈液。儒衣帶御香。端逢好文際。載筆愧三長。

呈大使

金益精

欲歸歸未得。人事苦相牽。回互路何遠。玄黃馬不前。秋風催落葉。白髮報殘年。兩地相思恨。難成一夜眠。

送秋

西風吹欲盡。白日向何歸。砌下蛩音斷。天涯鴈影稀。山應臨別瘦。葉爲送行飛。來往光陰變。衰翁也獨悲。

獨坐

權湛

朝來續殘夢。猶自擁紬衾。天地新春暖。圖書小院深。南山雖晦跡。北闕尙丹心。老去交遊少。幽禽傍竹林。

送日本僧文溪

釋卍雨

相國古精舍。洒然無位人。火馳應自息。柴立更誰親。楓岳雲生屐。盆城月滿闌。風帆海天闊。梅柳古鄉春。

山中

寒窻射朝旭。危坐爽煩襟。振筆摹山水。開書閱古今。無心千萬乘。有筭享千金。自適泉林興。因題方外吟。

次結城客館韻

權軫

石堡橫空半。孤村傍海前。古來征戰地。今見大平煙。往事浮雲外。流年客鬢邊。長安知幾許。極目意茫然。

病臥村莊書寄柳致養

梁汝恭

茅屋絕低小。煙花滿壁垂。飢兒啼索飯。病客臥吟詩。簷短朝光早。簾疎月色遲。沉緜無限思。爲問有誰知。

卽事呈朴副正

可與言人少。不如意事多。古賢猶若此。今我亦云何。欲語還緘默。將歌忽嘆嗟。眼前千萬計。爭似醉吟哦。

題金城東軒

李行

客裏秋風落。吟哦興渺然。溪山雲影薄。松菊露華鮮。倦鳥知何往。征驢更不前。平生無寸效。慙愧老承宣。

雙韻蓮花回文體幽居作

并序

朴堧

古人回文詩有十字體璇璣體玉連環體錦纏枝體各有別樣體例今予

不襲古轍別作五言四韻詩二篇畫作蓮花之狀寄意於君子名之曰蓮花回文云

獨處甘遺逸。安身一小園。谷盤宜陋室。灣細近青尊。竹翠棲明月。山青冠白雲。學仙心切切。難事世紛紛。

獨居幽興逸。安分守林園。谷密藏頽室。灣澄映臥尊。竹疎篩淡月。山遠出閑雲。學道勤磨切。難哉解錯紛。

題剛中家梅竹蓮海棠四詠

朴彭年

剛中吾執友。嗜好異尋常。竹愛霜餘靜。梅陰牖底香。水明搖淨植。風嫋泛崇光。揮洒閑中興。黃庭一兩章。

送徐修撰剛中榮親歸大丘

李壇

望雲飛傳急。仙桂媚堂萱。爵上南山壽。尊涵北闕恩。美談歸父老。佳氣藹鄉村。孝理仍文教。邦家重本源。

除夜

成侃

歲律今垂盡。端如赴壑蛇。呼兒數更漏。喚婦落燈花。永夜雲陰積。嚴風雪勢斜。清談仍促酒。不必阿戎家。

次張天使寧遊漢江韻

權學

此日足可惜。濠梁幸見招。春愁詩或遣。豪氣酒難消。綺席光凌亂。金尊影動搖。

清歡殊未已。落日日停機。

次伊川客舍韻

金禮蒙

杖鉞人爭賀。觀風我獨傷。才如餘月計。政可救年荒。自是吾無策。非緣法不良。聞詩還有愧。休咏召南棠。

次文川板上詩韻

金壽寧

盛漢當千載。匈奴值百年。掃氛長白嶺。歇馬黑龍川。聖德元和上。戎功大雅前。燕然須勒頌。留取後來傳。

東文選卷之十 終

東文選卷之十一

五言排律

御苑仙桃

崔惟善

御苑桃新種。移從閩苑仙。結根丹地上。分影紫庭前。細葉看如畫。繁英望欲燃。品高鷄省樹。香按獸爐煙。天近知春茂。晨清帶露鮮。是應王母獻。聖壽益千年。

東山齋應製詩

郭輿

何處難忘酒。虛經寶輦迴。朱門追小宴。丹竈落寒灰。鄉飲通宵罷。天門待曉開。杖還蓬島徑。屐惹洛城苔。樹下青童語。雲間玉帝來。鼇官多寂寞。龍馭久徘徊。有意仍抽筆。無人獨上臺。未能瞻日月。却恨向塵埃。搔首立階下。含愁傍石隈。此時無一盞。豈慰寸心哉。

謝文相贈扇

兩扇剪白黑二紙交織成紋
面書畫甚奇形如松扇

崔詵

誰爲新樣扇。黑白大分明。不用齊紈製。渾將剡紙成。方圓二體具。書畫一時呈。剪刻專偷巧。裁縫幾費精。手中孤月滿。席上好風生。忽被賢侯賜。尤爲衆客驚。却思三伏住。豈要九秋迎。謝相蒲增價。曹生竹有名。奉揚期不忝。藏襲永爲榮。感德徒爲切。何當報以瓊。

國者至公之器

高瑩中

國者之爲器。由來號至公。大含群俗類。用係一人躬。皞皞民居內。平平道在中。持盈曾有戒。傳世永無窮。只貴陶鈞妙。寧云鑄冶功。一傾難復正。願上慎初終。

石不可奪堅

金良鏡

二儀初判後。物種萬紛然。有石中含質。無人外奪堅。勢堪從擊破。性莫失生全。素受形資地。難移守自天。鐵慚融作器。銅恥鑄成錢。比若賢良士。操心固莫遷。

謝崔相國設餞宴

紫陌人相道。侯家有樂聲。誰知賢相國。寵餞老書生。琥珀春波潑。珊瑚晚照明。舞嬌回雪轉。歌妙貫珠清。別語千金重。歸心一羽輕。國恩何以報。出塞作長城。

扶寧馬上記所見

李奎報

分憂無暇日。乘駟走平原。是處花迷路。誰家竹鎖園。藤纏扶倒蔓。槐仆露孤根。逸駕如鞭鶴。輕裝可趁猿。湖天春霧暗。蠻店瘴雲溫。苔活添新暈。潮狂過舊痕。入村逢燕社。望海問鼇番。古堰晨開塹。宮城晝掩門。郡胥迎導路。邑宰出開樽。役役皆王事。陶陶亦聖恩。沙邊鷗獨舞。林表鳥能言。父老休驚避。書生不自尊。

上趙相詩

仲卿扶聖漢。趙憬相皇唐。根大瓊枝盛。源深玉派長。履龜生挺質。畫鹿早占祥。筆力千鈞重。心河萬頃汪。飛龍曾利見。威鳳歛高翔。天上文星魄。人間愛日光。判疑掀霹靂。論事振琳琅。扈從登青瑣。緘書拜皂囊。壁門趨閣道。璇極護文昌。

鐵棟明堂固。金城敵國防。望歸裴晉國。倚重郭汾陽。大手調殷鼎。丹心補舜裳。
品人同許郭。愛客似原嘗。利器金權鑄。長材玉杵量。沉珠寧鏃彩。幽菊競披芳。
無賴孤軀在。投閑十載強。妙齡初卯角。遊學遠羸糧。染翰功鉛槧。橫經對縹緗。
靜開孫敬戶。坐穴管寧床。樂器堪調雅。詩篇欲補亡。登壇屠沈謝。劇壘倒班楊。
科第連年捷。聲華一日彰。不曾吞墨水。聊得鍍金湯。便欲層霄擊。何思半路僵。
風濤終蹭蹬。雲漢轉微茫。反蟄跳蛙井。空尋覆鹿隍。嗚呼逾壑底。骯髒厭門傍。
有水誰霑鮒。多歧竟失羊。頗同殷咄咄。敢比孔遑遑。功寄堆文塚。窮牽送鬼檣。
本雖由薄命。半亦坐佯狂。萬事經三折。虛名愧七襄。早聞明鏡照。猶及覆盆藏。
果記冰鄉子。曾稱粉省堂。喜深跳欲舞。涕出拭還滂。燕谷思溫律。無鹽費靚粧。
銓衡今入手。造化大專場。益復伸吭望。方期傅翼揚。沐芳新振垢。磨鈍漸生鋸。
季嗣眞如玉。清朝早縮黃。幸承青眼眄。叨對白眉良。結髮初相識。論心誓不忘。
幾熏蘭室臭。同折桂枝香。綺席常陪後。花堤共綴行。自呼知我鮑。枉道起予商。
謬殿三千履。今移十五霜。茅菅新績繡。瓠齏側珪璋。爲惜纍纍狀。聊回惻惻腸。
屢將金諾重。欲借袞褒煌。今日何多幸。中心切自昂。私因誠不淺。公道亦何妨。
好試清琴撫。無嫌美錦傷。亮難堪劇郡。正合委偏鄉。最望鼇東海。還思鴈北方。
窮奔何擇木。饑口不須魴。躍躍哀鳴急。懸懸仰叩忙。

耿耿殘星在。曉隨烏鵲興。旅腸消薄酒。病眼眩寒燈。行李同村老。囊裝以野僧。歸田計未遂。戀闕意難勝。避世慚高鳳。知幾謝季鷹。露深巾墊角。風勁袖生稜。石棧霜猶重。雲崖日未昇。辭親兩行淚。到曙尙霑膺。

上右散騎

世家傳閎闕。系出費侯賢。蘭玉雙枝秀。虹霓一氣連。雲梯同坦步。仙省迭相遷。樹對鷄新舊。天分鴈後先。右貂榮最劇。旁乘寵何偏。五色絲封袞。三條雪入篇。鑄金從踊躍。翼轂助騰騫。爲愛蹊成下。叨將壁至前。囊錐容早脫。紈扇豈中捐。况接葭莩幸。平生恃淺緣。

上直門下

天上金精落。山西鐵幹喬。家承班定遠。國倚霍嫫媯。白玉含中潤。青松守後彫。虹盤三斗膽。嶽立八圍腰。李廣今飛漢。天驕不吠高。鼇擎仙島簞。鳳入禁池翹。直論驚群俊。孤忠翼兩朝。身兼雙美具。官剩十旬超。我是冰鄉冷。那堪陸海漂。引吭思一振。何幸借扶搖。

上左諫議

名家餘慶遠。鳳出鳳凰巢。彩筆浮紅蜃。華文吐縹蛟。良金當大冶。恢刃奪神庖。峻級超三獨。淳風鎮五交。人龍凌海躍。龍虎動天咆。明鏡妍嬈別。洪溟巨細包。尙容兼倚玉。那遣蕙爲茅。斗水如霑鮒。盤珠尙泣鮫。莫教埋似鈿。吾豈繫如匏。

已是知音幸。何煩筮仕爻。

上右諫議

本生執綺貴。猶事槩鉛勞。星魄從天降。花妖入壁逃。已傳張相印。合佩呂虔刀。
筆洗西臺肉。詩霑老杜膏。謀宜前箸畫。官忽後薪高。粉省登清地。冰銜落彩毫。
早知春有脚。何恨紙生毛。獸困甘搖尾。鷹飢望解條。賢侯同姓李。郎子一門桃。
亦是平生幸。寧教失意呼。

上中書舍人

家傳金鏡賜。名在桂仙科。舌下驚雷出。胷中列宿羅。玉斤修月妙。瓊尺剪雲多。
要職方當戶。清班已亞坡。五花榮最好。一佛賀如何。紫按擎荷橐。紅泥染印窠。
絲綸批密誥。芍藥播新歌。溫室那言樹。金鑾早脫靴。行調殷后鼎。曾取蔡公禾。
願記荆山下。窮年泣玉和。

次韻雲上人病中作

釋天因

師翁長已矣。時復淚霑巾。惡世難行道。何方更問津。十年承法乳。一旦付家珍。
遺迹留蟬蛻。歸期待鴈賓。草庵驚息化。蓮界快栖真。樹檠空悲鶴。經殘想泣麟。
冥扶斬佛祖。追獎籍王臣。朝議同推轂。皇恩命草綸。碑成黃絹妙。詔下紫泥均。
行業垂千古。功夫在上人。笠殘三夏雨。衣澹六街塵。觸境能遊刃。當機妙斲輪。
這迴偏有感。多劫好同因。江國秋先動。金天火已巡。幾時還舊隱。底處奉慈親。

蘭若居無事。伽陁唱入神。詩清非日暮。和寡是陽春。艾衲披殘縷。茶甌進缺唇。憐君彌晦朔。嬰病臥床茵。遠地憑誰問。幽懷不自陳。狗緣元是妄。蛇影莫生嗔。未審沉痾解。唯思晤語諄。海風吹夢遠。山月滿庭頻。早晚笑相值。煙霞老此身。

幽居

釋圓鑑

棲息紛華外。優游紫翠間。松廊春更靜。竹戶晝猶關。簷短先邀月。牆低不礙山。雨餘溪水急。風定嶺雲閑。谷密鹿攸伏。林稠禽自還。悠然度晨暝。聊以養疎頑。

東征頌

皇帝御天下。神功超放勛。德寬包有截。澤廣被無垠。車共千途轍。書同九域文。唯殘島夷醜。假息鼎魚群。但恃滄溟隔。仍圖疆場分。苞茅曾不入。班瑞亦無聞。帝乃赫斯怒。時乎命我君。一千龍鵠舸。十萬虎貔軍。問罪扶桑野。興師合浦濱。鼓鞞轟巨浸。旌旆拂長雲。驍勇皆趨死。英雄競立勳。江思韓信背。舟欲孟明焚。係越奚專美。平吳不足云。斫營應瞬息。獻捷在朝曛。玉帛爭修貢。干戈盡解紛。元戎錫圭卣。戰卒返耕耘。快劍匣三尺。良弓橐百斤。四方歌浩浩。八表樂欣欣。烽燧收邊警。風塵絕塞氛。當觀聖天子。萬歲奏南熏。

自敘

光陰忽已邁。老病鎮相依。脚跛筇全力。身羸帶減圍。飽閑仍得懶。殫道不成肥。日晏方纒糲。春深尙衲衣。居貧禪侶少。城遠俗緣稀。獨有孤雲伴。時從簷下歸。

伏聞主上陛下利觀天朝別承寵矜穩回鸞馭誠懽誠忭且顛且倒謹成
賀盛德頌一十八韻以當王庭之蹈舞云

青丘得釐降。立德類虞鰥。遂使君臣際。全成父子間。守藩供漢職。分闢討苗頑。
睿澤雖頻沐。宸階尙阻攀。逢春思再覲。行路任多艱。命駕辭東土。鳴鑾入北關。
迢迢過秦壘。去去度燕山。兩掖同隨侍。千官共衛環。雲端瞻雉尾。天上覩龍顏。
骨肉歡情洽。毛皮禮貌刪。累承嘉譙賜。仍受異恩頒。舊削地皆復。曾逋民盡還。
回轅花未斲。歸國葉初殷。巷拜渾黃髮。途逢半白鬢。頌聲登普率。瑞氣溢區寰。
已見乾坤泰。當觀甲刃閑。老僧誠鄙拙。喜淚亦潺湲。所恨林栖遠。難叅燕賀班。

上鎮邊金相公周鼎

郭預

秉鈞登左揆。杖鉞鎮東維。入幕多鸞鷲。連營擁虎貔。鼓樓晨氣壯。角壘夜聲悲。
籌策尋黃石。詩書討絳帷。鍊倉走琛幣。玉塞卷旌旗。仗靜雕鷹叫。畝稀駿馬羈。
軍情堅有倚。地面淨無疵。莫理平吳艦。宜沉上峴碑。掛高秋後鑑。分迫月中枝。
將相兼宗伯。天教少暇時。

詠橘樹

誰把炎洲種。移栽禁御傍。脫身辭瘴海。托地近宮牆。玉瘦叢多刺。雲繁葉有芒。
春葩渾帶白。秋實正含黃。結露凝爲腦。生綃用隔瓢。摘宜煩素手。熟必待清霜。
嘆露霑衣袖。飛泉沃肺腸。縱經淮水遠。不減洞庭香。氣味含仙界。音塵隔故鄉。

雖云非土性。只爲被恩光。恥與千奴並。唯容四皓藏。君看圯上老。去楚佐高皇。

高巒感興十二韻

崔澐

竭來孤嶼上。旅食度朝昏。婦矮行如鼈。民窮貌似猿。俗雖乖習尙。禮或識卑尊。日落腥煙合。秋深瘴氣溫。峰巒同翼翼。浦溆轉蜿蜿。帆截分天影。沙堆認水痕。海經將古驗。潮曆問今煩。老樹嫌風亞。驚濤得石喧。將僧同止息。與世隔囂喧。把釣時堪待。乘桴興又存。長歌誰見和。大息只無言。須信煙波樂。猶爲聖主恩。

送崔待御咸一貶涓島

薛文遇

直節眞烏府。微才忝豹冠。豈同腸錦繡。相倒腹琅玕。盛代雖無補。群僚盡聳觀。致君心不分。憂國鬢空殘。佞首多張禹。知音少比干。此時分去住。何處問平安。甌破憐誰在。天高聽不難。龍泉還古嶽。涓島是新官。兩地孤輪月。扁舟一釣竿。重逢當有日。好去更加飡。

送楊廣按廉韓掌令哲冲

李仁復

經術儒爲貴。廉能世所賢。判花叅國論。捧簡肅朝聯。揚歷名尤著。澄清志益堅。先聲威斧鉞。行色耀旌旃。王事雖云急。民生亦可憐。蠶絲方絡繹。烽火尙連延。海渴煙生竈。山空柿滿川。流亡思樂土。鰥寡望豐年。已覺無恒產。誰將解倒懸。賸窮宜速發。聽訟豈容偏。野廣田疇闊。春晴景物鮮。郡樓江遠練。官路柳飛絲。題詠交珠玉。謳歌入管絃。佇看風績立。應向月卿遷。顧我今衰矣。臨歧獨黯然。

願君須努力。吾道更扶顛。

鄭相國暉蒲萄軒次韻

架上蒲萄密。園中庶草稀。托根方張王。引蔓故憑依。勢似龍蛇走。恩霑雨露肥。滿堦初覆壓。繞屋欲旁圍。側展青羅被。橫垂碧縷衣。嵐光浮院落。雲彩動窻扉。嘉菓期秋熟。淒風恐葉飛。味珍殊可貴。酒力豈云微。試問爲州樂。何如一醉歸。

贈佐郎舅詩

并序

鄭誦

至正二年秋。予與家兄思謙。同遷于南。十月。以事會于福州。留半旬。時金佐郎舅。閑居福之檜谷。一日邀思謙兄暨僕遊柳牧使梁半刺亦與之俱焉。尊俎談笑。歡若平日。窮日而去。至明年夏。有旨安置予福州。思謙清邑。及至則柳與梁皆罷去。金氏舅亦不在。荒涼寓舍。無與爲歡。江山千里。味思之。居月餘。舅氏歸自京。則閱予流落。思所以慰予者。日與爲遊觀之樂。登山臨水。飲酒賦詩。心曠神怡。寵辱皆忘。竊比於閑人隱士。而不知爲遷客也。於戲。人生離合。莫不有數。今予之謫此也。柳梁皆去。而獨舅氏在者。豈非天使吾二人復相從此邪。感歎不已。爲賦此詩。

千里身仍竄。今年數更奇。聽零何所托。形影只相持。儒術將安用。空言竟莫施。自知爲世賅。又不喜人規。直道連三黜。餘生遇百罹。親朋無遠信。羈旅少相知。好事逢吾舅。清談卽我師。風襟自有契。來往亦無期。座上樽常滿。燈前席更移。

覓歡心袞袞。省事樂熙熙。草木浮和氣。溪山有令姿。聯鑣村巷遠。把酒水亭卑。却伴漁樵老。閑追射獵兒。感懷歌正冽。覽物淚空垂。憶昔同山簡。方冬醉習池。笙歌清讌後。燈火夜歸時。聚散還疑夢。悲歡只有詩。蹉跎猶可慰。矍鑠未全衰。

送白書記

彌堅

赴忠州幕

赴郡光榮重。渾家喜氣新。行陪堂上尉。去作幕中賓。萊服方添彩。潘輿不動塵。叅謀休更道。草檄想如神。聖善三遷教。平反一笑春。予生早孤苦。萬事摠酸辛。扇枕憐吾子。升堂愧一作古人。臨分數行淚。不獨爲情親。

山村雜詠

李達衷

山村信荒僻。人境隔林坳。木腐亦生蘂。松肪多化苓。行蝸頭角露。鬪雀羽毛零。老蔓斜纏石。遊絲向入冥。梯危通紫翠。筧遠引清泠。村覲譯神語。野髡誇佛靈。菰蒲新薦白。穉穉輒芻青。楓癭斷爲器。橡肥收可饌。幽蹊橫石角。小渚閃沙星。綠樹團如蓋。青山擁似屏。秋聲喧蟋蟀。日色耿蜻蜓。蘿草索泉脈。結茆隨地形。飯粗榜雜稗。鹽漬蓼和萍。黃犢觸樊圃。翠禽登水亭。山耕唯六甲。戶役至三丁。松穉細吹籟。蘭孤微吐馨。谷虛馘歷歷。林暗燐熒熒。芒屨或爭席。荷衣頻扣扃。陶罌提白醞。柳筐挈紅鯉。近者軍征歎。幾乎世運寧。秦庭安川哭。楚澤不須醒。恩露潤枯朽。妖氛收晦冥。孤忠懸鳳闕。壯志溢鵬溟。獲覩大平日。祝君千萬齡。

送慶尙道按廉康副令

韓脩

我自慶尙至。君今將宦遊。寸心潛有感。尺喙未能收。金椀世所寶。黃流傾化漉。放勛明峻德。擣抗畜陰謀。抱屈羅秦法。投荒作楚囚。幸蒙天卽定。生見國咸休。寬令隨時下。羈縲獲自由。尙殘雙臉泣。非爲一身憂。水賊浸陵數。軍官來往稠。瘦氓長戍役。恒產罄誅求。早甚歲仍惡。倉虛賑得周。還家猶在目。攬轡想搔頭。行色青春半。先聲碧海陬。何傷遇盤錯。固已試剛柔。封己猶知懼。防邊孰効尤。一方均雨露。萬落易田疇。駕洛遺風遠。雞林往事悠。廢興懷曩代。廉按憶前修。州府千年樹。江山幾處樓。如能祛弊瘼。不害縱冥搜。

遣悶

卓光茂

我生於此世。與世不相當。性直言無佞。形枯貌不揚。才微補袞職。德乏藥民瘡。混玉叨臺長。吹竽備省郎。不能量己力。思欲整朝綱。當路難高枕。排雲未括囊。皇天失舒慘。鬼物降災祥。始訝流遐域。終成退故鄉。乘軒何足貴。媚竈不知藏。樛櫟山中老。芝蘭林下芳。知音侍天陛。導澤及村莊。白髮千莖雪。丹心一炷香。自知恩莫報。但祝壽無疆。舊隱在泉谷。餘生寄草堂。老曾忘世事。病亦廢醫方。境勝風煙好。身閑日月長。看梅倚脩竹。賞藕立垂楊。花露衣巾濕。松陰枕簟涼。園中三畝菜。墻下百株桑。婢織供衣服。奴耕足稻粱。元戎開宴席。廉使闢歡場。坐客銀青貴。歌兒粉黛粧。珍羞堆玉俎。美酒灑金觴。朽質發豪氣。窮居生寵光。悲歡例相代。禍福亦無常。去歲楊曾逝。今年鄭又亡。芳年孫作鬼。未老婦爲孀。

揮淚復揮淚。斷腸還斷腸。隣人猶有痛。稚子不知喪。先沒嗟孔鯉。過哀聞卜商。賢回何短折。盜跖尙強康。此理誰能識。斯由我未詳。野花開雨露。嘉木落風霜。興歇自然耳。何須怨彼蒼。

謝元戎李密直來訪

明君憂閩外。授鉞遣雄才。深策海難測。嚴威山可摧。箭飛紛似雨。劍擊迅如雷。掃蕩妖氛盡。扶持化日回。元功歸帶礪。碩輔待鹽梅。豈謂高軒貴。親探陋巷來。紫駝峯出釜。綠蟻酒盈杯。席上綺羅擁。樽前絃管催。千愁割爾散。一笑粲然開。糜粉亦何報。兢兢不自裁。

賀李秀才就登第還鄉三十韻

鄭夢周

上乃憂初政。疇能共萬幾。念茲巖穴隱。欲以網羅圍。穆穆開閭闔。僉僉試禮闈。赭山收杞梓。灑海竭珠璣。之子聰明甚。成童比並稀。讀書窮聖域。負笈走王畿。道泰辭桴海。春暄趁浴沂。談詩遺訓話。玩易貫精微。楊馬賦堪獻。顏騫心所希。芹宮閱寒暑。桂窟向芬菲。戰藝才無敵。揚眉願莫違。丹墀張虎榜。紫殿卓龍旂。玉笋齊承寵。天顏爲霽威。閭閻聽呵唱。軒蓋動光輝。夾道人如市。聯鞍馬似飛。朝臣咸薦引。學者盡瞻依。忽夢萱堂愛。尋將綵服歸。縣官迎餽餼。津吏敢訶譏。夕次林初暝。晨征露未晞。玉鳴今日佩。錦換往時衣。漸認曾遊處。行逢舊釣磯。家人占喜鵲。稚子掃蜘蛛。孟母昔遷舍。蘇妻方下機。鄉隣候郊路。騶從到門扉。

太守稱觴賀雙親。有淚揮。塞予遭斥逐。盛代每歎歎。綠水信容與。青山無是非。鷗波深浩浩。鳳闕望巍巍。已負風雲會。難增日月暉。看君騰踏去。翰院賞薔薇。

送林主事使還京師

李崇仁

帝道經綸密。天心眷顧隆。真符歸正統。大慶御群雄。雨露霑濡遍。山河氣勢崇。時雍文致理。載戢武收功。萬國車書混。三韓貢賦同。輿情唯拱北。世職卽釐東。每遣人馳奏。何期路阻通。郎官今奉命。父老喜趨風。箕子祠平壤。宣尼謁泮宮。周諮懷靡及。餘事句還工。二闕芳逾遠。西湖澤不窮。郊迎賓禮盛。館待享儀豐。尊酒波搖綠。檠燈焰吐紅。從容酬酢際。傾倒笑談中。會面猶遲暮。分襟更遽匆。來塗隨社燕。歸轡伴秋鴻。岳嶺橫青黛。銀灘瀉白虹。贈行言款款。惜別恨忡忡。臣節無夷險。皇恩保始終。憑君對清問。爲我達孤忠。

癸丑十一月十四日霧

久惟冬寒薄。今驚曉霧新。轉頭迷去路。舉目失比隣。似雨難生物。如塵只汚人。五侯封既遠。三里術何神。變理知誰責。薰蒸入鼻辛。吾身要自愛。且飲一杯醇。

次漁隱韻

五十一韻時漁隱謫來光山年前有日月食

權興

日月交相薄。星辰亦不臧。與誰評得失。無處卜行藏。豈擬陪漁隱。相携入醉鄉。雪花吹鶴鬢。風浪打龍驤。美玉三經火。銛鋒百鍊剛。從軍看踏白。望闕跋飛黃。賴有前司藝。同吟古戰場。斯文猶未喪。吾道豈其昌。地僻無車轍。峰攢作劒芒。

識時雖閉戶。憂世欲提綱。才也等元稹。孝乎同阿香。幾秋曾鸚立。何日更鷹揚。
竊恐來題鳳。那辭往問羊。片心懸魏闕。清夢繞巖廊。未易排青鎖。疇能奏綠章。
官家眞容哲。宰輔稍賢良。國論深難測。天災顯可防。趙高欺二世。林甫誤三郎。
撫事情何限。思親泪數行。家聲超管晏。筆迹邁鍾張。否極當爲泰。柔貞卽克剛。
不能安泄柳。誰肯候任棠。去路三千關。行年四十強。依投多燕雀。薦進盡鸞凰。
琢句三條秀。流名幾葉芳。賈生窮適楚。蘇子再居杭。屬國終歸漢。宣尼竟畏匡。
倦遊還可歎。安坐亦何傷。對客論茶品。逢僧檢藥方。逃讒仍屏迹。待價久韜光。
道屈恒謀食。田饒尙報穰。白沙連竹逕。青嶂集松莊。已獲珠無踵。寧求璧截肪。
臥龍扶蜀主。非虎相周王。曷可歸盤谷。休煩餓首陽。幽憂彌瀕洞。遠抱轉淒涼。
以病嫌中酒。無言愧上堂。鶴書將喚起。魚夢謾信祥。陋室如懸磬。虛庭亦就荒。
樹林深翠密。煙靄暗蒼茫。楚語那成些。閑居却未遑。有儀皆可象。其貌不須駭。
獨立三叉路。難窺數仞墻。撐舟頻訪戴。問字每從楊。甚喜鵬南徙。還愁鴈北翔。
舉頭初日近。戢翼暮天長。鸛獨鳴于垤。人誰逝我梁。應欺原壤老。莫恠接輿狂。
此疾眞無妄。茲遊詎可忘。行看宣室召。勿用弔沉湘。

送鄭大司成奉使日本

權近

崧嶽天低北。扶桑日出東。鯨濤連浩渺。使節講交通。慷慨男兒志。周旋儒者風。
遠尋徐氏迹。應有陸生功。漸海聲初暨。無波譯已重。格苗文迺誕。事葛德彌弘。

銀漢星芒煥。咸池曉色紅。梯航紛玉帛。劔佩會英雄。帝闕承聽履。賓筵拜賜弓。名將勒金石。赫赫耀無窮。

送誥命使國子典簿周倬使還

宇宙開昌運。風雲奉至尊。九重端黼屨。萬國醉衢樽。朔漠非遐域。朝鮮作外藩。畏天心有切。執壤義彌惇。舜德曾綏遠。湯仁更固存。昭回光一扎。渾噩若三墳。日月貞明際。乾坤再造恩。疏封承舊業。恤典慰忠魂。睿澤通幽顯。殊榮暨子孫。皇華懷未及。儒雅藹孤騫。父老欣相慶。官寮競駿奔。路長山擁驛。地僻水縈村。露菊披黃豔。霜楓帶赤痕。遠遊乘傳置。更唱奏箎壎。俊逸風騷富。從容禮貌溫。侯邦方錫命。使節忽旋轅。咨訪誠知務。馳驅豈憚煩。願將傾嚮懇。一一達金門。

病中霖雨二十八卦寄野堂吁齋

尹紹宗

少年敦素履。無日不淵臨。射策升華秩。非才復陸沉。流離思舊寵。交泰夢相尋。妄比鴻冥弋。未隨鴉滿林。困貧無後患。恒疾負初心。節苦介如石。觀殊塵視金。睽孤幾半百。蒙暗惜分陰。鸚萃鸞鳳逝。鴻漸燕雀侵。家人飢盡墨。行旅淚盈襟。休向巫咸問。誰知子晉音。益齡公餌在。遜世道情深。何夕屯雲解。乾清同苦吟。

贈河南王使郭九疇

朴宜中

上帝申休命。明公佐盛元。名聲懸日月。功業照乾坤。美玉藏和匱。良材出匠園。宜乎稀世士。在我大人門。得雨脩鱗動。乘風逸翮騫。清標配瓊樹。警德襲芳蓀。

奉使能專對。爲詩可與論。道存纔擊目。意合竟忘言。交契從今始。相期永不諼。
奉贈雨千峰 柳方善

卓錫興天寺。禪家奕世孫。君王加禮貌。卿相謹寒暄。旱透曹溪學。兼探闕里言。
工詩曾破的。說法每逢原。竹次長江闊。詞華湛露繁。齊驅陶隱駕。優入幻庵門。
釋苑名逾重。儒林望更尊。已能遺月指。肯復鬪情幡。寂滅爲師樂。奔馳喪我存。
鼠侵藤欲絕。羊踏菜難蕃。精進功雖晚。歸依意自敦。眼思離鏡象。身愧縛塵喧。
玉帶寧嫌賭。金篋庶可援。願尋香穗去。一宿達眞源。

奉呈鄭三峰

卞季良

大挺人中健。髻年志四方。雪瑩窮聖學。風虎佐興王。偉量吞江海。全材作棟樑。
一身周禮樂。餘事漢文章。號令傾軍府。經綸冠廟堂。溫溫瞻麗日。凜凜望秋霜。
功誓山河大。名垂竹帛光。鹽梅聞傳說。帷幄見張良。勤儉書之訓。盈謙易所詳。
願言崇令德。終始似汾陽。

贈日本僧

崔恒

鯨域輿圖廣。龍飛寶曆賒。乾坤扶景運。羲昊撫淳飶。英傑歸鞭策。豪雄入網羅。
文超兩階舞。武軼大風歌。丕冒天無外。能容海叵涯。仁覃完猛狨。離燭洞幽遐。
日月熙神化。雷霆蕩舊邪。寔中閑奠枕。塞上久包戈。椎髻爭重譯。雕題盡一家。
搏桑渺如髮。行李疾於梭。俗尙猶波奈。禪居似洛伽。來朝須簡選。出世每逶迤。

可但遮梨夜。而兼鉢底裝。吾師奉綸綵。卽日謝煙蘿。杯泛六鼇伏。帆飛一鳥過。
蛟宮從帶嶼。蜃市任騰挈。紫闈善敷奏。彤庭謹拜嘉。周旋足不失。專對口無譌。
晉晝殊榮極。需雲寵渥沱。珍羞飫香積。仙液挹流霞。况敢頒宸越。仍申錫貝多。
衣冠瞻肅穆。禮樂覩繁華。襟帶山河壯。周遭雉堞遮。九街紛綺錯。雙闕聳崑崙。
聘魯嫌猶晚。觀周慕倍加。祥奇尋紺宇。瑞沓禮青螺。晴倒討幽屐。雨披探勝蓑。
碧溪穿窈窕。翠巘陟陂陀。妙悟希龍樹。澄觀繼烏窠。該窮四部業。贍富三車。
心共點頭石。跡同風脚駝。寂喧元不二。定慧卽非他。降呪豈無虎。聽經應有鵝。
高懷秋濯桂。淨性水抽荷。往往詩魔惱。時時技癢爬。章成看吐鳳。筆落認驚蛇。
文燄凌雲漢。詞源倒九河。道安堪齒列。靈徹可肩差。旅館初傾蓋。清燈乍啜茶。
金盃聞軟語。玉麈共高哦。却愛圓機活。方憐巧笑瑤。錫懷前日卓。松憶昔年摩。
忽擲騰空杖。俄乘貫月槎。來隨梅綻子。去趁菊開葩。玉露青汀草。金風響嶼葭。
鯨欣迎洗鉢。龍慣護歸椳。行咏月輪輾。臥占星斗斜。五雲長入夢。千里定含嗟。
顧我將頑鈍。憑渠庶切磋。汲深羞短綆。造奧愧蒸砂。鼠啣空鑽仰。龜毛謾琢磨。
控控拖紫綬。汨汨走烏紗。柱擬雲間鶴。其如井底蛙。眼花多掩鬢。髮雪亂鬅髻。
贈策言三復。書紳笑一渦。昌辰遇降準。盛化致驄牙。歲歲宜投李。年年好灌瓜。
師乎利他日。成佛薩婆訶。

銀燭朝天

無名氏

銀燭誰當秉。勤王一代賢。九街猶踏月。雙闕早朝天。馬首飛紅焰。螭頭散碧煙。
春風吹漏盡。曉影隔花燃。衣暖香薰麝。冠寒露濕蟬。鴛鴦行纔整。後召赴大平筵。
望夫石 無名氏

昔有貞心婦。難追杳杳途。化爲山下石。空望戰場夫。雨洒添珠淚。塵侵染雪膚。
綠雲連鬢起。新月帶眉孤。窈窕形容在。玲瓏笑語無。娥皇如見此。應恥泣蒼梧。

東文選卷之十一 終

東文選卷之十二

七言律詩

登潤州慈和寺上房

崔致遠

登臨甃隔路歧塵，吟想興亡恨益新。
畫角聲中朝暮浪，青山影裏古今人。
霜摧玉樹花無主，風暖金陵草自春。
賴有謝家餘境在，長教詩客爽精神。

秋日再經盱眙縣寄李長官

孤蓬再此接恩輝，吟對秋風恨有違。
門柳已凋新歲葉，旅人猶着去年衣。
路迷霄漢愁中老家，隔煙波夢裏歸。
自嗟身如春社鷺，畫梁高處又來飛。

送吳進士辭歸江南

自識君來幾度別，此回相別恨重重。
干戈到處方多事，詩酒何時得再逢。
遠樹參差江畔路，寒雲零落馬前峯。
行行遇景傳新作，莫學嵇康盡放慵。

春曉偶書

叵耐東流水不回，只催詩景惱人來。
含情朝雨細，復細弄艷好花開。
未開亂世風光無主者，浮生名利轉悠哉。
思量可恨劉伶婦，強勸夫郎竦酒盃。

暮春卽事和顧雲友使

東風遍閱百般香，意緒偏饒柳帶長。
蘇武書回深塞盡，莊周夢逐落花忙。
好憑

殘景朝朝醉，難把離心寸寸量。正是浴沂時節，日舊遊魂斷白雲鄉。

陳情上太尉

海內誰憐海外人，問津何處是通津。木求食祿非求利，只爲榮親不爲身。客路離愁江上雨，故園歸夢日邊春。濟川幸遇恩波廣，願濯凡纓十載塵。

和張進士喬村居病中見寄喬字松年

一種詩名四海傳，浪仙爭得似松年。不唯騷雅標新格，能把行藏繼古賢。藜杖夜携孤嶠月，葦簾朝捲遠村煙。病來吟寄漳濱句，因付漁翁入郭船。

酬楊瞻秀才

海槎雖定隔年回，衣錦還鄉愧不才。暫別蕪城當葉落，遠尋蓬島趁花開。谷鶯遙想高飛去，逐豕寧慚再獻來。好把壯心謀後會，廣陵風月待啣盃。

野燒

望中旌旆忽紛紛，疑是橫行出塞軍。猛焰燎空欺落日，狂煙亘野截歸雲。莫嫌牛馬皆妨牧，須喜狐狸盡喪群。只恐風驅山上去，虛教玉石一時焚。

御溝

崔匡裕

長鋪白練靜無風，澄景涵暉皎鏡同。堤柳雨餘光暎綠，墻花春半影含紅。曉和殘月流城外，夜帶殘鍾出禁中。人若有心上星漢，乘查未必此難通。

長安春日有感

麻衣難拂路歧塵，鬢改顏衰曉鏡新。
上國好花愁裏艷，故園芳樹夢中春。
扁舟煙月思浮海，羸馬關河倦問津。
祇爲未酬螢雪志，綠楊鶯語大傷神。

庭梅

練艷霜輝照四隣，庭隅獨占臘天春。
繁枝半落殘粧淺，晴雪初銷宿淚新。
寒影低遮金井口，冷香輕鎖玉窻塵。
故園還有臨溪樹，應待西行萬里人。

送鄉人及第還國

仙桂濃香惹雪麻，一條歸路指天涯。
高堂朝夕貪調膳，上國歡遊罷醉花。
紅暎蜃樓波吐口，紫籠鼈極岫橫霞。
同離故國君先去，獨把空書寄遠家。

郊居呈知己

車馬何人肯暫勞，滿庭寒竹靖蕭騷。
林含落照溪光遠，簾捲殘秋岳色高。
仙桂未期攀兔窟，鄉書無計過鯨濤。
生成仲虺裁商誥，莫使非珍似旅葵。

細雨

風縵雲緝散絲綸，陰暝濛濛海岳春。
微泫曉花紅淚咽，輕霏煙柳翠眉顰。
能鮮石逕麋蹤蘚，解衰沙堤馬足塵。
煬帝錦帆應見忌，偏宜蓑笠釣船人。

早行

纔聞鷄唱獨開扉，羸馬悲嘶萬里亭。
高角遠聲吹片月，一鞭寒彩動殘星。
風牽疎響過山鴈，露濕微光隔水螢。
誰念異鄉遊子苦，香燈幾處照銀屏。

鷺鷥

煙洲日暖隱蒲叢，閑刷霜毛伴釣翁。高跡不知舟頂鶴，疎情應及紺翎鴻。嚴光臺畔蘋花曉，范蠡舟邊葦雪風。兩處斜陽堪愛爾，雙雙零落斷霞中。

商山路作

春登時嶺鴈回低，馬足移遲雪潤泥。綺季家邊雲擁岫，張儀山下樹籠溪。懸崖猛石驚龍虎，咽澗狂泉振鼓鼙。懶問帝鄉多少地，斷煙斜日共淒淒。

憶江南李處士居

江南曾過戴公家，門對空江浸曉霞。坐月芳樽傾竹葉，遊春蘭舸泛桃花。庭前露藕紅侵砌，窗外晴山翠入紗。徒憶舊遊頻結夢，東風憔悴泣京華。

送儼上人歸乾竺國

朴仁範

家隔滄溟夢早迷，前程况復雪山西。磬聲漸逐河源迥，帆影長隨落日低。葱嶺鬼應開棧道，流沙神與作雲梯。離鄉五印人相問，年號咸通手自題。

江行呈張峻秀才

蘭橈晚泊荻花洲，露冷蛩聲繞岸秋。潮落古灘沙觜沒，日沉寒島樹容愁。風驅江上群飛鴈，月送天涯獨去舟。共厭羈離年已老，每言心事淚潛流。

馬嵬懷古

日旆雲旗向錦城，侍臣相顧暗傷情。龍顏結恨頻回首，玉貌催魂已隔生。自此

暮山多慘色。到今流水有愁聲。空餘露濕閑花在。猶似仙娥臉淚盈。

寄香巖山睿上人

却憶前頭忽黯然。共遊江海偶同船。雲山凝志知何日。松月聯文已十年。自嘆迷津依闕下。豈勝拋世臥溪邊。煙波阻絕過千里。鴈足書來不可傳。

早秋書情

占槐花落早蟬鳴。却憶前年此日程。千緒旅愁因感起。幾莖霜髮爲貧生。堪知折桂心還暢。直到逢秋夢不驚。每念受恩恩更重。欲將酬德覺身輕。

涇州龍朔寺閣兼柬雲栖上人

輦飛仙閣在青冥。月殿笙歌歷歷聽。燈撼螢光明鳥道。梯回虹影到巖扃。人隨流水何時盡。竹帶寒山萬古青。試問是非空色理。百年愁醉坐來醒。

上殷員外

孔明籌策惠連詩。坐幕親臨十萬師。騏驎躡雲終有日。鸞鳳開翅已當期。好尋山寺探幽勝。愛上江樓話遠思。淺薄幸因遊鄭驛。貢文多愧遇深知。

贈田校書

芸閣仙郎幕府賓。鶴心松操古詩人。清如水鏡常無累。馨比蘭蓀自有春。日夕笙歌雖滿耳。平生書劍不離身。應憐苦戍成何事。許借餘波救涸鱗。

上馮員外

陸家詞賦掩群英。却咲虛傳榜上名。志操應將寒竹茂。心源不讓玉壺清。遠隨旌旆來防虜。未逐鸞鴻去住城。蓮幕鄧林容待物。翩翩窮鳥自哀鳴。

九成宮懷古

憶昔文皇定鼎年。四方無事幸林泉。歌鍾響徹煙霄外。羽衛光分草樹前。玉榭金階青霽合。翠樓丹檻白雲連。追思冠劍橋山月。千古行人盡慘然。

鏡湖

崔承祐

採蕨山前越國中。麴塵秋水澹連空。蘆花散撲沙頭雪。菱菜吹生渡口風。方朔絳囊遊渺渺。鴟夷桂楫去忞忞。明皇乞與知章後。萬頃恩波竟不窮。

獻新除中書李舍人

五色仙毫入紫薇。好將新業助雍熙。玄卿石上長批詔。林府枝間已作詩。銀燭剪花紅滴滴。銅臺輪刻漏遲遲。自從子壽登庸後。繼得清風更有誰。

送曹進士松人羅浮

雨晴雲歛鷓鴣飛。嶺嶠臨流話所思。厭次狂生須讓賦。宣城太守敢言詩。休攀月桂凌天險。好把煙霞避世危。七十長溪三洞裏。他年名遂也相宜。

春日送韋大尉自西川除淮南

廣陵天下最雄藩。暫借賢侯重寄分。花送去思攀錦水。柳迎來暮挽淮濱。瘡痍從此資良藥。宵旰終須緩聖君。應念風前退飛鷁。不知何路出雞群。

關中送陳策先輩赴邠州幕

彌衡詞賦陸機文。再捷名高已不群。珠淚遠辭裴吏部。玳筵今奉竇將軍。尊前有雪吟京洛。馬上無山入塞雲。從此幕中聲價重。紅蓮丹桂共芳芬。

贈薛雜端

聖君須信整朝綱。數歲公才委憲章。按轡已清雙闕路。搢紳俱奉一臺霜。鴻飛碧落曾猶漸。鷹到金風始見揚。長慶橋邊休顧望。忽聞消息入文昌。

讀姚卿雲傳

曾向紗窻揭縹囊。洛中遺事最堪傷。愁心已逐朝雲散。怨淚空隨逝水長。不學投身金谷檻。却應偷眼宋家牆。尋思都尉憐才子。大抵功曹分外忙。

憶江西舊遊因寄知己

掘劍城前獨問津。渚邊曾遇謝將軍。團團吟冷江心月。片片愁開岳頂雲。風領鴈聲孤枕過。星排漁火幾船分。白醪紅膾雖牽夢。敢負明時更羨君。

別

人越遊秦恨轉生。每回傷別問長亭。三尊綠酒應須醉。一曲丹唇且待聽。南浦片帆風颯颯。東門驅馬草青青。不唯兒女多心緒。亦到離筵盡涕零。

鄴下和李秀才與鏡

漢南才子洛川神。每算相稱有幾人。波剪臉光爭乃溢。山橫眉黛可曾勻。紛紛

舞袖飄衣舉。裊裊歌筵送酒頻。只恐明年正月半。暗教金鏡問亡陳。

奉賀聖上受大尉册命初襲王封

崔承老

漢皇東注意偏深。美我君王事大心。八道詔書天上降。九霄星騎日邊臨。雲蒸紫殿浮佳瑞。雷動彤庭布德音。多幸微臣在朝列。不勝歡慶貢巴吟。

示座客

崔冲

水閣風檣苦見招。簿書叢裏度流年。朱櫻紫笋時將過。紅槿丹榴態亦妍。病久却嫌邀客飲。性慵偏喜聽鶯眠。良辰健日終難再。急趁花開作醉仙。

出守春州和人贈別

崔淪

吾家世受盛朝恩。欲繼忠清不墜門。但把螢輝增聖日。敢將蠡測議詞源。自慙風月無功業。回望雲霄已夢魂。駭汗未收還感淚。謫來猶得駕朱幡。

大宋睿謀殿御宴應製

李資諒

鹿鳴嘉宴會賢良。仙樂洋洋出洞房。天上賜花頭上艷。盤中宣橘袖中香。黃河再報千年瑞。綠醕輕浮萬壽觴。今日陪臣逢盛際。願歌天保永無忘。

賀元帥尹侍中

李頴

臨軒授鉞命東征。一缺腥膻盡掃清。漢塞已空無古月。秦人何苦築新城。滿庭諫切真長策。拓地功高是大名。從諫舉功缺最急。吾君聖制兩分明。

興王寺慶讚道場音讚詩

崔爽

衆寶城中創梵宮。巋然規範出宸衷。經探海底分龍藏。塔聳雲涯掛鴈空。鍾吼遠醒三界夢。殿巖全寫五天功。雖將大地研爲墨。難盡高王志願洪。

使宋過泗州龜山寺

朴寅亮

巉巖怪石疊成山。上有蓮坊水四環。塔影倒江翻浪底。磬聲搖月落雲間。門前客棹洪濤疾。竹下僧碁白日閑。一奉皇華堪惜別。更留詩句約重攀。

出鎮龍灣次示門生

金緣

十年臺閣掌絲綸。此日翻爲闕外臣。諫苑未能陳讜議。塞垣聊欲掃胡塵。鬢毛早白緣憂國。涕淚難禁爲戀親。多謝孔門諸子弟。百壺清酒送行人。

大同江

雲捲長空水映天。大同樓上敞華筵。清和日色篩帘幕。旖旎香煙泛管絃。一帶長江澄似鏡。兩行垂柳遠如煙。行看乙密臺前景。自驗十年表未然。

燈夕

金富軾

城闕深嚴更漏長。燈山火樹粲交光。綺羅縹緲春風細。金碧鮮明曉月涼。華蓋正高天北極。玉爐相對殿中央。君王恭默疎聲色。弟子休誇百寶粧。

題良梓驛

萬里江南人未歸。此中愁緒足堪悲。門前枯草秋霜後。窗外寒山夕照時。貧吏畏人如虺蜴。虛堂無主有狐狸。褒城古事無人問。唯有漁樵動所思。

玄化寺奉和御製

襄城前馬忽超然。行遇孤雲一握天。警蹕聲高盈遠壑。羽林兵峭裂寒煙。奇花墮艷繡經座。甘露浮香上壽筵。酬奉文章爭落筆。侍臣才氣似唐賢。

宋明州湖心寺次毛守韻

江山重複望難窮。更構層樓在半空。簷外蒼蒼河漢逼。階前浩浩海潮通。片帆孤鳥千家外。疎雨斜陽一氣中。想與衆心同所樂。騷人誰諷大王風。

自宋回次和書狀秘書海中望山

千載歸來却咲丁。雲帆數日出冥冥。早知海若觀難測。方恨天門夢易醒。月注波濤銀瀉白。雲橫島嶼黛凝青。君平昨夜占星象。應怪河間有客星。

和副使侍郎梅岑有感

中華地盡水茫茫。百尺張帆指故鄉。天闊波濤浮日月。雨餘雲霧襯巒岡。黃昏沸沫驚心白。朱夏濃陰着面涼。雖喜王庭行復命。猶思帝所樂洋洋。

西都九梯宮朝退休于永明寺

朝退離宮得勝遊。無窮物象赴雙眸。雲邊列岫重重出。城下寒江漫漫流。柳暗誰家沽酒店。月明何處釣魚舟。牧之曾願爲閑客。今我猶嫌不自由。

征西軍幕有感

山西留滯思惛惛。不覺東風散老陰。倦客拂衣江岸靜。行人催渡野洲深。鶯溪

里巷三更夢。鳳闕樓臺一片心。峴首風流吾敢望。閑吟時復遣幽襟。

軍幕偶吟

誰道朝廷好用兵。只因臣妾變豺狼。心緣思慮恒冰蘖。髮爲憂煎盡雪霜。曉枕聞雞忙似祖。牛窓捫蝨懶於康。君王英斷超唐憲。遮莫時人謗樂羊。

觀瀾寺樓

六月人間暑氣融。江樓終日足清風。山容水色無今古。俗態人情有異同。舴艋獨行明鏡裏。鷺鷥雙去畫圖中。堪嗟世事如銜勒。不放衰遲一秃翁。

兜率院樓

末俗區區不自閑。仲宣樓上獨開顏。路隨地勢相高下。人向宮橋自往還。雨後春容粧樹木。朝來爽氣襲江山。野田農叟不須避。我欲和光混世間。

謝崔樞密灌宴集

爲嘉東道主人情。文馬翩翩翠蓋傾。禮重賓儀瞻秩秩。義深朋舊賦嚶嚶。酒尊屢倒春添暖。舞袖初迴雪比輕。獨感留髡意尤重。從容談咲到三更。

葺新堂後有感

掃開塵垢作虛堂。已覺栖遲興味長。蕭洒軒窗貧亦好。蹉跎書史老難忘。花含細雨春陰薄。山帶疎煙曉氣涼。老去酒觴怯涓滴。客來時復更携觴。

對菊有感

季秋之月百草死。庭前甘菊凌霜開。無奈風霜漸飄薄。多情蜂蝶猶徘徊。杜牧登臨翠微上。陶潛悵望白衣來。我思古人空三嘆。明月忽照黃金臺。

裕陵挽詞

睿宗

昨日林亭玉輦遊。百官咫尺望珠旒。誰知豎入膏肓夢。便使民纏遏密憂。龍馭緲茫仙路秘。魚燈明滅壽宮幽。素輿空返城西路。目斷雲山血淚流。

敬和王后挽詞

睿宗

翩翩丹旆立宮墻。臣妾哀號淚滿裳。大姒嗣音家道正。莊姜無子國人傷。龍輶啓路雲煙慘。馬鬣因山樹木蒼。惆悵仙蹤何處問。黃泉碧落兩茫茫。

哭金叅政純

獨將功業到巖廊。壯氣憑凌莫敢當。東戰先登探虎穴。西征半夜出羊腸。君王訪事常前席。賓客追權每後堂。長說乞身縱煙棹。可憐此計落空亡。

哭權學士適

書劒當年入汴京。玉皇親賜好科名。揮毫敏捷渾無類。對酒缺別有情。忽忽浮生驚大夢。飄飄逸氣返元精。斷絃難得鸞膠續。含淚悲吟老友生。

天官寺

李公升

寺號天官昔有緣。忽聞經始一悽然。倚酣公子遊花下。含怨佳人泣馬前。紅鬣有情還識路。蒼頭何罪謾加鞭。唯餘一曲歌詞妙。蟾兔同眠萬古傳。

贈清平李居士

郭輿

清平山水冠東濱。邂逅相逢見故人。三十年前同擢第。一千里外各栖身。浮雲入洞曾無累。明月當溪不染塵。擊目忘言良久處。淡然相照舊精神。

和舍弟苦雨詩

金敦中

運旬密雨駕盲風。百谷狂噴氣勢雄。誰借天瓢傾倒盡。却疑蛟室捲來空。居貧豈免薪爲桂。禦濕還思麥與鶩。早晚蒼空收毒霧。便將餘澤及農功。

苦雨

金敦時

苦雨來隨舶舫風。雷車雲棧勢何雄。川塗汎濫輪蹄絕。里巷蕭條井竈空。欲學琴高騎赤鯉。還思無社問山鶩。萬民共失三農望。佇待熙朝變理功。

燈明寺

寺壓滄波遠淼茫。登臨如在海中央。捲簾竹影疎還密。欹枕灘聲抑更揚。夜靜經樓香燄冷。月明賓榻葛巾涼。堪嗟好景無緣住。終日昏昏爲口忙。

和詠柳

崔均

造物多情着柳梢。剪刀裁出更妖妖。雪消暗膩黃金色。日暖輕拖碧縷條。西子眉嚬如有恨。小蠻腰細不勝嬌。冷官寂寞人稀處。幾被春風取次搖。

長源亭

鄭知常

岩嶢雙闕枕江濱。清夜都無一點塵。風送客帆雲片片。露凝宮瓦玉鱗鱗。綠楊

閉戶八九屋。明月捲簾三。兩人縹緲蓬萊在。何處夢闌黃鳥囀青春。
春日

物象鮮明霽色中。勝遊懷抱破忡忡。江含落日黃金水。柳放飛花白雪風。故國
江山千里遠。一尊談笑萬緣空。興來意欲題新句。下筆慚無氣吐虹。

分行驛寄忠州刺史

暮經靈鷲峯前路。朝到分行樓上吟。花接蜂鬚紅半吐。柳藏鶯翼綠初深。一軒
春色無窮興。千里皇華欲去心。回首中原人不見。白雲低地樹森森。

題登高寺

石逕崎嶇苔錦斑。錦苔行盡入禪關。地應碧落不多遠。僧與白雲相對閑。日暖
燕飛來別殿。月明猿嘯響空山。丈夫本有四方志。吾豈匏瓜繫此間。

開聖寺八尺房

百步九折登噴噴。家在半空唯數間。靈泉澄清寒水落。古壁暗淡蒼苔斑。石頭
松老一片月。天末雲低千點山。紅塵萬事不可到。幽人獨得長年閑。

題邊山蘇來寺

古徑寂寞縈松根。天近斗牛聊可捫。浮雲流水客到寺。紅葉蒼苔僧閉門。秋風
微涼吹落日。山月漸白啼清猿。奇哉虜眉一老衲。長年不夢人間喧。

金使左光祿得家書有生子之喜詩以爲賀

崔 詵

北信初傳驛路中。侯家已驗夢維熊。充閭佳慶還應盛。容蓋高門轉更崇。駿足遠期登驥坂。桂枝新得長蟾宮。微官他日朝天去。揮麈清談奉阿戎。

大使見和復呈

一陪高論道途中。才似楊雄賦射熊。王氏系從淮水遠。相如名與泰山崇。詩妍自可侔西子。筆健還堪搏北宮。多謝賢侯廻顧眄。枉將珍鬣鬻諸戎。

喜姪文牧魁司馬試

積善吾家慶未央。後生頻見擅詞場。憐渠戰藝先多士。怪我乘軺滯遠方。喜淚也從雙袖汗。歸心空逐尺書忙。殷勤報道攻文字。且趁春風折桂芳。

題僧伽窟

鄭 沆

崎嶇石棧躡雲行。華構隣天若化城。秋露輕霏千里爽。夕陽遙浸一江明。漾空嵐細連香穗。啼谷禽閑遞磬聲。可羨高僧心上事。世途名利摠忘情。

登採真亭

朴椿齡

蕭然一上採真亭。目極征鴻入杳冥。往事回頭同夜夢。故人屈指半晨星。鬢絲斗覺今年白。山色仍猶舊日青。自慶重來還自愧。腹中未有孝先經。

大原寺 全州

簿領三年百病身。退公時訪舊情親。高低樹密疑無路。次第花開別有春。洞壑陰晴俯仰異。煙霞紫翠暮朝新。遠公不用過溪水。自有山人迎送人。

雞足山定慧守

雞足山前數日留。人間分外飽清遊。叅天老木難爲歲。拔地脩篁不受秋。石壁萬重雲浪湧。瀑泉千丈玉虹流。客軒睡美老僧定。杜宇一聲山更幽。

靈光郡憶金太守儒

下惠官卑自不辭。牛刀誰使割鷄爲。甘棠正是思人樹。峴首依然墮淚碑。父老空言遺愛化。兒童謾誦舊題詩。曾聞跖壽顏回天。天理茫茫未可知。

得病告暫往江村還京馬上

任奎

萬事悠悠一夢場。自憐身世未全忘。少而寡合多疎放。老不求名可退藏。書室舊開師子嶺。釣臺新占少華岡。國恩未報親猶在。更踏紅塵跡似忙。

過延福亭

誰勸君臣入酒鄉。不知禍自在蕭牆。酣歌不闕瓊樓上。腥血交流輦道傍。煬帝汴河秋冷落。明皇蜀道雨淒涼。當時此恨無人識。滿目溪山淚數行。

仁王挽詞

金貽永

高拱崑廊九閨強。性仁躬儉致時康。仙遊已遠空遺劍。聖孝方深每見牆。縱有謳歌歸啓德。那堪遏密服堯喪。孤臣更念生成德。洒盡春風淚萬行。

江口秋泊

朴浩

荻花如雪鴈南飛。倚棹行人動所思。晚浦風微青靄合。霽江雲盡碧天垂。雞潮

冷澗漁船枕。蟹火斜連島寺籬。湘瑟未休峰自翠。錢生新得夢中詩。

靈巖郡次朴壽翁韻

金莘尹

地接滄溟壯觀多。巋然喬嶽聳天涯。松篁交影六七里。雞犬相聞數百家。不分
每揮憂國淚。且堪留賞滿庭花。論情未已天垂日。更約登樓待月華。

仁王挽詞

金閔

玄默躬行漢太宗。群臣奏議每從容。宮懸筍簾凝塵蝕。園土基扁宿莽封。粟腐
太倉寬口算。貨通互市罷邊烽。霸陵不許金銀飾。却憶當時德儉恭。

東文選卷之十三

七言律詩

贈大光寺堂頭

吳廷碩

沿崖踏澗入雲霏。洞裏寬深絕世機。四面苔巖青障合。一條溪溜白龍飛。笙簫縹緲清風遠。煙月空濛晚色微。盡日逍遙塵垢外。喜吾早得脫讒譏。

山村海棠

誰適爲容飾好粧。村夫未解賞孤芳。可堪工部終無詠。不是昌州獨有香。陳后幽悲離館寂。王嬙遠嫁塞天長。愁煙慘霧多嬌態。空使行人幾斷腸。

龍藏寺獨妙樓

高惇謙

絕勝峰巒玉一叢。新開小閣壓青空。憑凌洞壑清虛裏。映帶煙霞縹緲中。雪後客登銀色界。月明人臥水精宮。吾師宴坐無心處。檻外嚶嚶萬竅風。

題羅州館

乙酉歲遊學到此書記朴元凱特於公館宴慰今忝按廉之命復過懷古感今因爲四韻

蔡寶文

此地來遊十餘歲。今秋又作鴈南飛。簾旌暮捲江山是。鏡匣朝開齒髮非。庭靜白沙留月色。園深綠竹醉春輝。腰黃眼赤新榮重。來去誰云一布衣。

珍島碧波亭次崔按部永濡韻

畫欄飛出碧波頭。夾道黃蘆與綠筠。柳岸緬思彭澤令。桃村時見武陵人。蔽虧

煙際蓬萊朶。出沒波間日月輪。金橘數枝低馬首。未應全道使君貧。

高山縣公館梨花

三月芳菲看欲暮。墻東梨樹始開花。人言冷艷清無味。我愛芳心靜不奢。滿院香風動簾額。壓枝殘雪拂窓紗。世間紅紫非吾偶。對此誰嫌白髮多。

昇平郡蔡按部韻

崔永濡

秋來征鴈已隨陽。觸物悠悠感恨長。數點鷺鷥沙上白。千頭橘柚道邊黃。山寒却愛形容瘦。稻熟偏知氣味香。爲奉往諧王命重。含杯那復舊時狂。

次韻金無迹見贈

吳世才

才先李賀賦高軒。道比楊雄入聖門。大百圍材無用用。長三尺喙不言言。仙童不寄西山藥。公子須傾北海樽。七葉蟬貂餘慶在。忠純終被漢家恩。

寄友人進退格

林椿

十年流落負生涯。觸處那堪感物華。秋月春風詩準備。旅愁羈思酒消磨。縱無功業傳千古。還有文章自一家。盛世偷閑殊不惡。從教身世轉蹉跎。

詠夢

疎慵多是泥春天。頻到香閨玉枕前。詩榻夜涼風斷續。唱樓日晏酒拘牽。一場曾把浮生比。千里長將別恨傳。更爲等閑拋世慮。近來還繞故山川。

冬日途中

凌晨獨出洛州城。幾許長亭與短亭。跨馬行衝微雪白。舉鞭吟數亂峰青。天邊日落歸心促。野外風寒醉面醒。寂寞孤村投宿處。人家門戶早常扃。

九日聞諸公有會

身在天涯歲又催。登高自有望鄉臺。五年去國長爲客。九日無人共把杯。紅葉忽聞霜後落。黃花猶似亂前開。莫嫌舉止非閑雅。須向龍山許一陪。

戲贈密州倅

紅粧待曉帖金鈿。爲被催呼上綺筵。不怕長官嚴號令。謾嗔行客惡因緣。乘樓未作吹簫伴。奔月還爲竊藥仙。寄語青雲賢學士。仁心不用示蒲鞭。

追悼鄭學士

先生蕭洒出塵埃。忽嘆風前玉樹催。上帝已教長吉去。海山曾待樂天來。當年翰墨爲人寶。高世聲名造物猜。從此四明無賀監。誰能知我謫仙才。

與李眉叟會湛之家

久因流落去長安。空學南音戴楚冠。歲月屢驚羊胛熟。風騷重會鶴天寒。十年計活挑燈話。半世功名抱鏡看。自笑老來追後輩。文思宦意一時闌。

次友人韻

十載崎嶇面撲埃。長遭造物小兒猜。問津路遠槎難到。燒藥功遲鼎不開。科第未消羅隱恨。離騷空寄屈平哀。襄陽自是無知己。明主何曾棄不才。

陪崔司業永濡訪吳先生

高文妙訣鬼神幽。早歷詞階翰院遊。杜氏胷中吞國子。褚生皮裏裹陽秋。聲名東漢無雙客。家世中朝第一流。筆下三千風月句。成編須爲後人留。

悼金閔甫

閔甫官至將作丞父司空端與權適同年寶貢

蟬貂七葉盛西都。光祿宜爲烈丈夫。映世片心清似水。致君忠膽大於軀。驥馳狹路爭驚馬。虎出空山舞孽狐。正是風流今頓盡。幾令多士涕冰鬚。

病中有感

年年虛過試圍開。臨老猶堪鬢鑠哉。科第由來收俊士。公卿誰肯薦非才。長鯨欲奮波濤渴。病鶴思飛羽翼摧。舊有江東隱居地。自憐頭白始歸來。

普賢院

釋惠文

爐火煙中演梵音。寂寥生白室沉沉。路長門外人南北。松老巖邊月古今。空院曉風饒鐸舌。小庭秋露敗蕉心。我來寄傲高僧榻。一夜清談直萬金。

燈夕

李仁老

電鞭初報一聲雷。春色先凝萬歲杯。銀燭影中寒漏永。玉簫聲裏暖風催。仙桃帶露枝偏重。瑞萸含煙葉盡開。輦路月明絲管沸。翠蛾爭唱紫雲回。

宴金使口號

流虹瑞節綺筵開。共喜仙槎海上回。萬仞雲峯鼇戴出。一封泥詔鳳銜來。香煙

暗鑱芙蓉帳。春色濃凝琥珀杯。醉擁笙歌乘月去。路人爭看玉山頽。

與友人夜話

試問隣牆過一壺。擁爐相對暖髭鬚。厭追洛社新年少。閑憶高陽舊酒徒。半夜聞鷄聊起舞。幾迴捫虱話良圖。胷中磊磊龍韜策。許補征南一校無。

傷杜相宅

藥階曾賞謝公苔。金鼎親調傅說梅。自許披雲開日月。時稱無地起樓臺。炎州忽被蒼蠅弔。華表難逢白鶴回。新壁未乾三易主。一聲隣笛不勝哀。

送朴察院赴西都留臺

朴會遊西都

百雉城盤九仞巖。繞城流水碧恬恬。垂楊古驛煙迷路。隔岸人家水拍簷。往事如波山獨在。夕陽聞笛淚應霑。風霜十月乘驄去。始覺寒威倍舊嚴。

飲中入仙歌

長齋蘇晋愛逃禪。脫帽張顛草聖傳。賀老眼花眠水底。宗之玉樹倚風前。汝陽日飲須三斗。左相晨興費萬錢。太白千篇焦遂辯。八人真箇飲中仙。

韓相國江居

鑿破雲根構小樓。江山無限入簾鉤。謝公不惜千金費。范相應將一舸遊。二水溶溶分燕尾。三山杳杳隔鼉頭。他年若許陪鳩杖。共向滄洲狎白鷗。

崔尙書命樂府送耆老會侑歡

白髮相懽笑語開。只餘風月侑金盃。却愁軒騎恣恣散。故遣笙歌得得來。醉倒始知天幕闊。歸時爭見玉山頽。夜闌草屋眠初覺。止似瑤臺曉夢回。

賀任相國門生趙司成冲領門生獻壽

十年黃閣佐昇平。三闕春闈獨擅盟。國士從來酬國士。門生今復得門生。風雲變化鯤鵬擊。布葛繽紛鷓鴣明。金液一盃公萬壽。王笙宜命喜遷鶯。

遊智異山

頭流山迥暮雲低。萬壑千巖似會稽。策杖欲尋青鶴洞。隔林空聽白猿啼。樓臺縹渺三山遠。苔蘚依徭四字題。始問仙源何處是。落花流水使人迷。

文機障子

玉色臨軒命管絃。春風淡蕩上元天。紅雲早綴鴉頭髻。碧縷輕飄獸鼎煙。桃熟已教金母獻。曲高新自月娥傳。壽杯浮動南山影。奉祝天皇八萬年。

文相國克謙挽詞

玉骨英英應上台。冰壺皎潔點靈臺。早從閭闔排雲叫。晚向虞淵取日迴。丹鳳久從池上浴。白雞爭奈夢中催。唯餘謝眺蒼苔詠。留作人間萬口雷。

韓相國文俊挽詞

青雲振翮早飛英。白髮歸休也稱情。再向池邊看浴鳳。三回谷口放遷鶯。雖無膝下王文度。尚有林間阮始平。憶昨笙歌侵夜散。那知春夢曉來驚。

仰巖寺

前壓蒼波後翠巖。蕭蕭蘆葦半松杉。謝公遺興唯雙屐。張翰歸心滿一帆。只要
緱山鞭皓鶴。不須湓浦泣青衫。十洲三島遨遊遍。自愧飄然骨換凡。

雪用東坡韻

霽色稜稜欲曉鴉。雷聲陣陣逐香車。寒侵綠酒難生暈。威逼紅燈未放花。一棹
去時知客興。孤煙起處認山家。閉門高臥無人到。留得筒錢任畫叉。

次張學士未開牧丹

春寒勒却小園花。舞蝶遊蜂欲戀何。楚雨未飄三峽暮。吳娃尙阻五湖波。苦遮
丹口晨粧嬾。深鎖紅房睡味多。自是含嬌呼不出。豈緣銷瘦却羞他。

乞退

師召入禁
二十餘年

釋寥一

五更殘夢寄松關。十載低徊紫禁間。早茗細含鸞鳳影。異香新屑鷓鴣班。自憐
瘦鶴翔青漢。久使寒猿怨碧山。願把殘陽還舊隱。不教巖畔白雲閑。

草堂書懷

金克己

蕭條白屋鬢成絲。世上升沉已可知。南阮定應輕北阮。東施那復效西施。預愁
直道遭三黜。先把狂歌賦五噫。誰識靖中閑味永。典書沽酒醉吟詩。

牛逸

爲君叩角相桓公。胡事奔忙逐下風。元放恐教安樹上。賈耽空遣覓巢中。迷途

乍似亡羊子。信命還同失馬翁。何苦臨風偏悵望。楚人已得楚人弓。

村家

青山斷處兩三家。抱壠縈回一徑斜。讖雨癢池蛙閣閣。相風高樹鶻查查。境幽柳巷埋荒草。人寂柴門掩落花。塵外勝遊聊自適。笑他奔走覓紛華。

思歸

數畝荒園久欲蕪。淵明早晚返籃輿。鬢衰却與飛蓬似。形瘦還將枯木如。無奈爲貧從薄宦。不妨因病得閑居。但聞明主求儒雅。投佩歸山計恐疎。

夜坐

紙帳沉沉夜氣清。圖書萬卷一燈明。嘯嘯石硯寒雲色。颯颯銅瓶驟雨聲。薄祿微官貧始重。浮名末利醉還輕。通宵塞鴈空南去。恨不歸家問死生。

讀林大學椿詩卷爲詩弔之

逸氣軒昂隘八區。才高正與世相當。蛾眉肯爲微顰損。駿足終因蹇蹶妨。未過劉郎舟側畔。空遊翠氏殼中央。天翁豈忍終遐棄。碧落官曹借侍郎。

世俗浮夸半死權。憐君獨往臥雲煙。草書入妙人傳聖。瓢飲安貧我歎賢。攬月倒江聊戲耳。乘風遊穴便翛然。錦囊幸有詩千首。簧鼓詞林觸處傳。

玉潔冰清不受緇。芳名藉藉動京師。禰衡鶚立人皆嫉。韓愈龍驤世盡疑。錦貝巧言雖大盛。虹星豪氣未全衰。可嗟器大無時用。陳跡空教後世悲。

高原驛

百歲浮生逼五旬。奇區世路少通津。三年去國成何事。萬里歸家只此身。林鳥有情啼向客。野花無語笑留人。詩魔觸處來相惱。不待窮愁已苦辛。

叢石亭李學士知深韻

東遊大壑訪鴻濛。萬象奔趨一望中。石束鸞笙臨碧海。松飛孔蓋向青空。大聲拂耳鯨牙浪。寒氣侵膚鶴羽風。恐我前身非俗士。真遊亦與四仙同。

派川縣偶書

信馬行吟海北垠。天教勝賞赴征軒。風蟬翳葉鳴槐縣。雨鷺依枝集柳村。飄盡斷霞花結子。割殘驚浪麥生孫。回頭却望鴻飛處。草色連空惱客魂。

涓江渡吳學士韻

渡口前驅擁劔撾。驚風卷地曉飛沙。寒髯颯颯冰凝毳。病眼濛濛雪眩花。鄉思望雲增宛轉。客行隨岸幾欹斜。隔林隱隱看青旆。遙認前村酒可賒。

書德豐縣公館

俞升旦

頃刻征鞍不整停。自緣王命有嚴程。侵宵燈火扶頭起。盡日風塵眯眼行。到處民廬皆剝落。有時僧院過豐盈。邇來積弊俱爬去。一段唯餘塔廟營。所經州縣大抵屋破

離穿往有蒼然巨厦皆是

和趙相國同年席上詩

般斧誰掄一代雄。靈椿獨秀衆材中。安危經濟當今日。將相功名屬我公。幾轉玉玃馴犬豕。時留珠唾警兒童。百般計校皆無歎。揚解唯祈壽不窮。

次韻孫綸院抹哭趙平章冲

已將偉績揭旗常。更把剛腸傲雪霜。一代黑頭名宰相。當年綠髮少賢良。橫流鎮俗如山嶽。儉歲傾人似稻粱。社稷安危方繫望。乘雲何忽去堂堂。

題皆骨山長淵寺集句

林惟正

行行尋勝自忘機。王觀好是登山臨水時。樂天亂瀑飛泉鳴浙瀝。齊已回峯疊嶂鬱參差。瞻子嵐光踈藹晴猶潤。張杲山色空濛雨亦奇。瞻子此景此時誰得意。智覺紅蓮社主碧雲師。錢起

和德嶺驛諸使臣留題

春到他鄉憶故鄉。王建離懷處處動悲涼。微之北山雲起南山雨。劉紋南舍花開北舍香。獎生公館無人春寂寂。可平野田極日草茫茫。胡曾國恩未報身先老。永叔惆悵紅塵白首郎。瞻子

和孤山驛李學士留題

忽傳車馬到溪東。敏若稅駕郵亭獨倚櫳。李至東嶺雲生西嶺白。泉和今年花勝去年紅。永叔半鈎簾幕三秋夜。歐陽落日樓臺一笛風。杜牧幸有山川供勝賞。永叔登臨吟望思無窮。永叔

吟望思無窮。永叔

三月下旬郊亭賞春

有客尋芳上占臺聖俞春風任放百花生永叔一枝未謝千枝發揚蟠三月將闌四月

催錢起山色好常晴後見鄭谷溪聲偏傍醉中來趙德麟可憐物像還堪賞寅遜莫學徽

之興盡迴朱服

和
林畔驛吳使臣韻

到處為家不解愁敏若壯年雙鬢已驚秋蔡襄蒼龍闕下思英主何錫永白玉京中夢

舊遊永叔壓地樓臺吞富貴夏竦携觴談笑醉風流荆公須知別後無由到永叔落日將

歸又小留荆公

和
宣德鎮客舍李學士知深留題

日落水流西復東杜牧淺深山色古今同何孫十年往事如飛鳥山谷萬里清江照碧

空孫何沽酒店藏花影裏郭震倚樓人在月明中趙鼎欲將累句酬嘉景舜欽但愧論酬

意未工王逢原

和
藍山驛樓留題

古驛登臨足勝遊舜欽林泉乘興訪清幽韓維萬家煙樹千重綠齊已千簇雲山萬壑

流周貫午夜溪聲來枕上揚蟠百年心事到心頭樂天曉來為報樓西月錢起且為詩人

更小留李紳

和
高州客舍韓學士留題

砌蛩相伴促寒更。晏殊暫到城來又出城。樂天別院幽庭松偃蓋。方干碧畦黃隴稻如
京子瞻花非識面迎人笑。齊己草不知名隨意生。李商隱吟罷倚筇南北望。孫惟故園迢
遞不勝情。光廷

和耀德鎮住華亭諸都統留題

問柳尋花到野亭。杜甫銅壺漏刻過三更。盧廷讀清風明月本無價。永叔綠水青山倍
有情。陳純益唯以琴樽住佳客。永叔莫教絃管作離聲。永叔武陵不與人間隔。胡藏岸
有桃花錦浪生。李白

題西村場

亂山高下水東西。子固到此令人詩思迷。樂天細雨濛濛煙漠漠。胡真平波渺渺草
萋萋。曹能歌姪女顏如玉。李宜愛酒山翁醉似泥。永叔別有夜深惆悵事。樂天遠峯高
處子規啼。無

題海門禪院

雲埋水隔無人處。樂天杖策多從物外僧。蔡肇樹影悠悠花悄悄。唐曹海山鬱鬱石稜
稜。樂天梧桐葉上三更雨。魏野蘆荻花中一點燈。樂天自愧國恩終莫報。永叔未能衣鉢
繼南能。郭震

登世祖願堂望海臺

一上高亭日正晡。胡僧欲回臨水更踟躕。夏煙滋疊嶂清如刮。五原風去長江靜似

鋪土嶺上晴雲披絮帽瞻子水中明月臥浮圖瞻子恨無韓晃丹青手蔡畫向屏風
張座隅樂天

暮春書事示李注薄

池南池北草如茵陳純益瑟瑟清波見戲鱗舜欽明月有期生薄暮缺落花和淚送
殘春陳純益不寒不熱好時節樂天半醉半醒無事人簡夫幸有南隣隱君子永叔因時
數面亦成親楊時

秋日有作

身閑何處最相宜郭震秋雨梧桐葉落時樂天涼吹已成團扇恨舜欽夕陽催就小窻
詩俞秀人問禍福愚難料樂天世上艱難醉不知孫何坐久欲醒還酩酊樂天碧天殘

月暎花枝程但

竹亭與友人飲

誰栽疎竹已成林李邦直四面涼風曲檻頭蔡持正月送綠陰斜上砌方巖排紅樹
巧粧秋舜欽勸君更進一杯酒維王與爾同消萬古愁李白醉臥白雲閑入夢蘇廣夢

飛孤枕蝶悠悠宋白

赴任耀德次觸事有感八首

經年遷謫厭荆蠻永叔我戀王門鬢髮斑羅隱閑作好詩消白日鄭暗驚清鏡失朱
顏惠洪門無過客朝懸榻焦千城對寒雲雪滿山杜甫我願天心從我欲宋庠長沙須

召賈生還臣 寶

道孤還與物情疎何 孫 釣直臨淵屢失魚韓 月照離庭人去後宗 韓 酒醒孤枕鴈來

初杜 春殘葉密花枝小荆 院僻簾深晝景虛蘇 舜 若報生涯應笑殺天 樂 家徒四

壁本無餘張 據 池亭歌舞心皆厭何 孫 唯有泉聲愜素機羅 曲檻柳濃鶯未老隱 羅 青叢花謝蝶還

稀司 空 莎階吏去庭無事何 孫 苔瀨魚跳水濺衣融 廖 故國家山在何許公 韓 三年無

日不思歸瞻 子 遠遊經歲去親闈瞻 陳 况復城邊樂事稀張 祐 松逕自荒青草合石 延 鄉心且伴白

雲飛瞻 蒼苔點點無人跡永 叔 血淚斑斑滿客衣李 若 萬里有家歸尙隔鄭 介 可

能須待政成歸羅 隱 山城寂寞小佳客永 叔 客舍蕭蕭晝掩扉聖 臥映松陰消酒病楚 蠻 坐牽蘿蔓掛朝

衣天 暑天長似秋天冷鶴 筍 晴色時兼野色微平 可 正 解道澄江靜如練李 郡中今

有謝玄暉草 應 雨岸煙汀好景時鶴 筍 搖搖煙柳不勝垂錢 惟 夢迴枕上黃梁熟永 叔 人在壺中白

日遲張 叔 樹石有坊皆枕水何 孫 樓臺無處不留詩王 隨 此情不語何人識天 樂 惟有

春風秋月知天 樂 時豐訟息多餘暇永 叔 正是三年官滿時天 樂 流水帶花穿巷陌魏 野 澄泉繞砌泛觴

時豐訟息多餘暇永 叔 正是三年官滿時天 樂 流水帶花穿巷陌魏 野 澄泉繞砌泛觴

時豐訟息多餘暇永 叔 正是三年官滿時天 樂 流水帶花穿巷陌魏 野 澄泉繞砌泛觴

時豐訟息多餘暇永 叔 正是三年官滿時天 樂 流水帶花穿巷陌魏 野 澄泉繞砌泛觴

時豐訟息多餘暇永 叔 正是三年官滿時天 樂 流水帶花穿巷陌魏 野 澄泉繞砌泛觴

卮干身爲醉客思吟客鄭谷人道新詩勝舊詩莊聖代也知無棄物羅隱不應窮巷

久低眉韓翃

終日官閑無一事杜牧登臨聊上最高臺舒溪魚弄影深深見陸長江月憐人夜

夜來孫直開巷每尋莊叟馬丁謂冥心將冷子綦灰宋月明更欲看花飲錢起爲問

庭花幾日開尹洙

題高城三日浦

半醒半醉遊三日杜牧短艇孤煙島嶼中尚明月清風非俗物山翠條紅刺罩春

叢永叔千年往事歸何處沈彬萬頃清波照碧空孫若有精靈應笑我樂樽前猶發

小年紅山

和東州客舍留題

回首舊遊成古今荆公郡樓今日更登臨柳平生素有煙霞趣王辟晚歲猶存鐵

石心子瞻獨對青燈數殘漏朱笑呼明月作知音韓塵埃奔走曾無暇蘇簡易一日

安閑直萬金樂

和長州客舍王相國度留題

三月芳菲欲暮天純閑來蓬島會神仙禹隔軒松籟寒逾咽肩附郭山光峭若

懸范高幸有清樽堪酌荆公能令佳客少留連永叔到頭傳寫新詩句齊已篋裏新

詩僅百篇孫

東文選卷之十三
終

東文選卷之十四

七言律詩

哭琴相國儀

瑞世文章五色麟。琴碁餘事亦清真。九門白日無雙客。十載黃扉只四人。身後清風千古鏡。手中丹桂萬家春。爲公誰不交揮涕。白髮門生淚滿巾。

宣慶殿道場音讚詩應製

仙仗紅雲擁法林。玉爐香穗襲檀沉。四筵山水肩肩衲。萬軸風雷口口音。曉殿日高驚覺照夜龕。燈徹訝禪心。大平應享千齡慶。歸佛精勤少似今。

寄吳德全

李奎報

海山東去路悠悠。一落天涯故倦遊。黃稻口肥鷄鶻喜。碧梧秋老鳳凰愁。煙波不返遊吳棹。雪月期浮訪剡舟。聖代未應終見棄。莫辭垂白釣清流。

河豐江泛舟

碧湖輕棹木蘭舟。滿日煙濤摠是愁。今歲漸非前歲貌。異鄉唯憶故鄉遊。龍湫日落腥雲合。蠻嶺秋寒瘴氣收。路斷方壺無計往。玉芝無奈老滄洲。

聊城驛壁上韻

幽谷一宵中。酒宿聊城半日解驂留。歸來阮籍空長嘯。寂寞相如故倦遊。郵吏

送迎何日了。使華來往幾時休。唯予幸是閑行者。來不煩人去自由。

辛酉五月端居無事和子美成都草堂詩韻

懶惰無心賦兩都。况堪著論效王符。緬思潘鬪三峯好。且任陳蕃一室蕪。小塢
移花邀客看比隣。有酒遣兒沽。何煩點檢人間事。出處悲歡命矣夫。
欲歸江郡詠汀蘋。尙滯京華失鬢春。自號灌畦閑老圃。皆言傲世一高人。談筵
屑落空驚客。睡榻雷鳴幾撼隣。酒渴時時須底物。櫻桃子熟摘嘗新。
不把餘愚汗及溪。幽栖粗免宦途迷。披襟快得風來北。隱几從教日向西。世味
淺深曾染指。人生得失已忘蹄。半窻林影搖森翠。讀罷書頭落鷺泥。
半捲疎簾獨倚欄。雨聲淙瀉劇驚湍。橫雲尙自暗千嶂。落日不知餘幾竿。遇客
只愁浮大白。學仙何苦鍊還丹。爲言隣叟好來往。除却閑談送老難。
古來達士貴知微。田園將蕪何日歸。莫問纍纍兼若若。不曾在是是况非。墮車
醉者只全酒。抱甕文人寧有機。禦寇南華如可作。吾將問道一摳衣。

過龍潭寺

水氣淒涼襲短衫。清江一帶碧於藍。柳餘陶令門前五。山勝禹强海上三。天水
相連迷俯仰。雲煙始捲占。東南孤舟暫繫平沙岸。時有胡僧出小菴。

寓居天龍寺

全家來寄碧山傍。矮帽輕衫臥一床。肺渴更知村酒好。睡昏聊喜野茶香。竹根

迸地龍腰曲。蕉葉當窻鳳尾長。三伏早休民訟少，不妨時復事空王。

重遊北山

俯仰頻驚歲屢更。十年猶是一書生。偶來古寺尋遺迹，却對高僧話舊情。半壁夕陽飛鳥影，滿山秋月冷猿聲。幽懷一釭殊難寫，時下中庭獨步行。

梅花

庾嶺侵寒拆凍唇。不將紅粉損天真。莫教驚落羌兒笛，好待來隨驛使塵。帶雪更粧千點雪，先春偷作一番春。玉肌尙有清香在，竊藥姮娥月裏身。

宿峯城縣

半山斜日過簷遲。清句唯吟杜紫薇。階竹困陰孫未長，庭梅飽雨子初肥。旅軒風簟牽人睡，野鼎春蔬慰客饑。十里倦遊誰勞問，石樓僧定鎖煙扉。

黃驪江泛舟

桂棹蘭舟截碧漣。紅粧明媚水中天。釘盤纔見團臍蟬，掛網還看縮頸鱸。十里煙花真似畫，一江風月不論錢。沙鷗熟聽漁歌響，飛渡灘前莫避船。

扶寧浦口

流水聲中暮復朝。海村籬落苦蕭條。湖清巧印當心月，浦闊貪吞入口潮。古石浪春平作礪，壞船苔沒臥成橋。江山萬景吟難狀，須倩丹青畫筆描。

杜門

爲避人問謗議騰。杜門高臥髮鬢髻。初如蕩蕩懷春女。漸作寥寥結夏僧。兒戲牽衣聊足樂。客來敲戶不須驚。窮通榮辱皆天賦。斥鷃何曾羨大鵬。

鸚鵡

矜披藍綠紫。翳丹砂。都爲能言見尉羅。嬌姹小兒圓舌澁。玲瓏處女慧容多。慣聞人語傳聲巧。新學宮詞導字訛。牢鑣玉籠無計出。隴山歸夢漸蹉跎。

軍幕書情呈副使朴侍郎仁碩

紅旆翻風颺半天。碧幢遮日卓高巔。震空雷吼三軍鼓。冠岫雲屯萬竈煙。筆下檄章慚我鈍。幕中籌策仗君賢。何時縛致渠魁首。一路垂楊奏凱旋。

中秋雨後

陳 溍

仰看濃墨久含情。忽喜涼風四面生。銀竹已隨雲脚捲。玉盤還共露華清。遊人欲散重呼酒。倡妓相招更按笙。應爲天瓢洗空碧。孤光全勝別宵明。

從海安寺乞松枝

疎慢年來困暑炎。小亭那更畫厭厭。叵堪日影侵虛榻。欲乞松枝補短簷。聞道老株流鳳髓。問將新斧伐虬髯。倘能分我清涼蔭。肯羨侯家水作簾。

京都

小雨朝來捲細毛。浴江初日暈紅濤。千門撲地魚鱗錯。雙闕攙天鷲翼高。吳苑袂衣晴鬪草。漢宮仙袂醉分桃。多慙每忝金闈侍。與倚清香捧赭袍。

月溪寺樓上初晴晚眺

小樓高倚碧孱顏。雨後登臨物色閑。帆帶綠煙歸遠浦。潮穿黃葦到前灣。水分天上眞身月。雲漏江邊本色山。客路幾人閑似我。曉來吟到晚鴉還。

賞春亭玉蘂花

禁籞春光雨後多。遊絲不動柳陰斜。閑携綠髮金閨客。吟對紅墻玉蘂花。幾片因風隨鳳輦。數枝和雪上烏紗。酒闌緩步西清月。更覺濃香繞鬢華。懶隨桃李鬪嬌饒。素艷閑愁鎖寂寥。虢國夫人嫌粉黛。漢臯仙子佩瓊瑤。半墻疎影風前亞。掠鼻清香雨後飄。十二玉欄春欲暮。急須摹取上鮫綃。

次李由之賀生女

分外何勞更苦神。無心駟馬納高門。偶因蛇虺成佳夢。長得兒孫有老盆。井淺亦能源吐派。竹枯猶解笋抽根。他年尙可傳遺業。已把浮生任有垠。幾年孤影每傷神。老去俄驚悅在門。弄筆豈能知數字。繰紛但要盡三盆。會看魚隊浮波面。厭聽虫聲叫草根。煩子清詩屢相賀。筆傾河漢若爲垠。

梅花

東君試手染群芳。先點寒梅作澹粧。玉頰愛含春意淺。縞裙偏許月華涼。數枝猶對撩人艷。一片微迴逐馬香。正似清溪看疎影。只愁桃李未升堂。

禳星變消災道場應教

崔滋

乾坤日月與星辰。同是毗盧一法身。散作光明猶謂化。指言妖異豈爲眞。人因幻見罹疑網。佛舉神章掃妄塵。一讀可消戕八萬。況今五日禮王輪。

奉答金政堂

鷄林千古事茫然。金積中兒降自天。從此雲來爲姓氏。至今風調帶神仙。一吟政事堂東竹。再問將軍幕下蓮。出武人文千態度。丹青何樣畫凌煙。

哭崔承制宗藩

紫樞雖作黑頭公。猶恨官班未極崇。名重三韓何足譽。步高千載固難蹤。手中丹桂還歸月。腹裏青松不耐冬。德宿文星渾四散。問誰今復一時鍾。

宣慶殿行大藏經道場音讚詩

花山新闕卽靈山。佛會如今尙未闌。金色頭陀煩一笑。肉身菩薩費三觀。花紅覺苑春長暖。栢翠禪庭月獨寒。九法已迴甘露火。莫言西竺隔東韓。佛土人寰兩杳冥。問從何處覓丁寧。十身遍滿塵塵刹。六合皆爲祖祖庭。石女木兒猶轉法。夏鶯春鷺亦談經。眞功已效天難老。坐見春風度楚檠。

同年劉待制兩臺長見和復次韻

趙冲

文陣當年鼓角雄。銀袍藍袂棘圍中。青雲穩步無多子。白髮相看不負公。烏府懋威搖嶽鎮。鴻樞慶頌及兒童。天章待制又如許。同榜飛昇甚日窮。

花山上元文機障子

洪功佐

率濟西來徒。邑岐花山新。長萬年枝。八仙鵠嶺微茫遠。三島鼇峯恍惚移。風遞玉簫過海送。月和蓮燭傍簾窺。都人士女顏如織。猶勝康安曲宴時。

賀陳翰林渾生女

李由之

素娥新琢月爲神。抱送風流學士門。四擁錦屏交繡帳。幾回香水浴金盆。雲生楚岫俄字葉。玉出藍田別有根。餘慶定知從此始。瓊林珠樹散無垠。

瑜伽寺

金之岱

寺在煙霞無事中。亂山滴翠秋光濃。雲間絕磴六七里。天末遙岑千萬重。茶罷松簷掛微月。講闌風榻搖殘鍾。溪流應笑玉腰客。欲洗未洗紅塵蹤。

寄慶尙按部韓侍郎就

柳色初黃出鳳城。嶺南仍過一陽生。尋僧不害穿山翠。携妓何妨踏月明。昨夜依稀相見面。前山重阻若爲情。簿書餘暇休忘我。我亦當年按轡行。

贈西海按部王侍御仲宣

北界營在
席島作

雲海茫茫空復空。倚樓長嘯生雄風。白鳥去盡暮天碧。青山猶含殘照紅。花塼侍講老學士。栢署提綱賢按公。握手一笑百憂散。乾坤可盡心難窮。

題童津山文珠寺次韻

李藏用

無限江山爛熳看。倦遊襟抱反悽酸。鶻翻落照金猶閃。鴉點平林墨未乾。杖底片雲舒萬里。檻中明月入千灘。綺街袞袞馳名客。爭識蒲團睡味殘。

禪月寺四涼亭次韻

襟袂殷勤片片涼。老禪欄檻俯崇岡。江山卽是解脫境。草木亦生知見香。地迥易教人倚久。天高剩與鳥飛長。功名二字真無賴。遮斷清風六尺床。

遊禪月寺

山寺春遊一杖輕。道情詩思覺雙清。桃花休道未徹在。飯顆從教大瘦生。今日鬢絲憐節物。他年汗竹笑功名。悠悠世上無窮事。付與閑窓睡到明。

投元朝王百一學士鶚

導宣皇澤及遐隅。膚寸毫端億兆蘇。聖主虛襟儒老遇。朝賢拱袂壯元呼。神清雅稱千莖雪。文妙爭傳萬斛珠。曾仰芳猷今幸覲。冀憐卑趣亦同塗。

紅樹

一葉初驚落夜聲。千林忽變向霜晴。最憐照破青嵐影。不覺催生白髮莖。廢苑瞞盱秋思苦。遙山唐突夕陽明。去年今日燕然路。記得屏風嶂裏行。

林拾遺來示蓮社詩因成一首寄呈大尊宿丈下

伴食黃扉已入春。無功可立謾因循。若爲去作社中客。應道何曾林下人。四軸初成傳異迹。百篇時出指迷津。遙知一榻香煙畔。恒見靈山面目新。

用林拾遺韻又呈

菊園松徑兩茫然。烏帽黃塵復幾年。長笑俗緣紛似絮。獨憐禪格淨如蓮。興來

欲學雲徐返。老去還驚月。屢圓香社迢迢空。役夢不禁幽思滿詩篇。

丙寅秋仲一日。謁平章慶源公。因語及宋學士王文公禹偁西湖蓮社詩。其起聯云。夢幻吾身是偶然。勞生四十又三年。時予適已過先師不惑之年。而加數歲。惻然有感。因和成一篇。遙寄呈大尊宿丈下。以達鄙懷。且約他時問道。冀綠蘿煙月。無以予爲生客耳。

林桂一

掖垣秋思坐蕭然。正是前賢結社年。貞節初期雞省竹。妙香終愛鷲峯蓮。九街車馬黃塵暗。千里溪山皓月圓。他日相從林下樂。先聲海角一荒篇。

復次李相國詩韻奉呈大尊宿丈下

二萬蓮經三十春。草庵諸子化循循。郵亭半世爲行客。香社多年戀主人。已與劉雷同入道。休憑沮溺欲知津。想看天際遙招手。雲捲台崖翠色新。

伏覩左拾遺結社詩不勝嘉歎依韻呈似

金祿延

塵勞眼底事紛然。汨沒虛消耳順年。吟藥不須腸吐錦。念經惟冀舌生蓮。羨君白業花曾秀。愧我玄門果未圓。只爲掛名香社裏。強將荒句續嘉篇。

前用王文公起聯中生字爲韻似聞藥省諸郎皆次林拾遺詩韻依樣更

呈

釋始寧

一葉秋來起浩然。年經年復幾年年。那知陌巷搖搖柳。元是淤泥濯濯蓮。白菊

籬邊篁韻碎。紫苔庭畔樹陰圓。長沙隻眼雖云在。一點靈犀露短篇。

同前

李穎

莞島攀援尙宛然。回頭二十二當年。久知眼境葩金屑。未暇心田種石蓮。萬里白雲無點迹。一家明月自長圓。作詩非爲供吟嘯。兩地胷襟要寫篇。

次韻答中書舍人金祿延

釋眞靜

逃名入社豈徒然。正是蘇山妙悟年。天台智者二十三始謁大蘇山思大禪師圓妙聖凡雖殊似塵靜。虎溪携靖節風清。象席引張蓮。爲成五十人隨喜。感悟遊遺躅。故及此云。塵靜虎溪携靖節風清象席引張蓮爲成五十人隨喜感悟三千境最圓。珍重中書賢學士。留心此事寄佳篇。

次韻答秘書閣金坵

龜蒙當日散江湖。只是行藏與世殊。祿隱何妨鸞鷲序。道心寧爽馬牛呼。多君輦下雲無迹。記我山中雪入鬚。蓮社芸臺無彼此。大千何處不參吾。幽居背巘面平湖。地位清高景物殊。拾橡生涯隨日足。種蓮賓客有時呼。仙遊却勝登鼇頂。世險都忘捋虎鬚。莫把古吾來辨我。古吾寧得敵今吾。

奉答柳平章蓮字詩寄呈

黑頭黃閣坐魁然。知是生當五百年。大手四分蟾窟桂。香根幾種鷺峯蓮。早曾厭飫空門味。况復虛明古鏡圓。更有故藏彌露處。韓公鉞與謝公篇。自注集賢殿大學士兼上將軍故云

次韻答朗州太守金惜所寄

仁政溫於有脚春。專城來鎮朗州人。誰知臥閣神明化。兼得空門氣味新。投社佳篇如串玉。絕塵清句可書紳。幅巾何日叅南遠。忙得程之作上賓。先儒雖藉桂林春。真樂好從方外人。應愧利名牽濁惡。故將寂滅洗精神。歸心佛隴聞梁肅。訪道天台見李紳。太守風流超古轍。不妨來往學玄賓。

次李居士穎詩

總角偕遊紫陌喧。綢繆瓜葛况連根。天涯遠別音書斷。林下相逢笑語溫。夜壑風寒松落子。春庭雨過竹生孫。此時清樂皆同賞。何用勞勞更吐言。端居一室自寥寥。觸發嚴風劇折膠。雪夜凍瓶黏柱礎。雲朝清磬響山椒。着毛蘿菹烹資鉢。掩體袈裟破失條。齋罷畏寒長縮坐。淡中隨分味逍遙。塵習龜毛兼兔角。雲遊鳳髓與鸞膠。抱貞自學虛心竹。含毒寧思合口椒。分衛多年孟五綴。工夫一日線三條。他生欲向蓮臺化。念念西方豈是遙。

林拾遺來示叅社詩因書以呈

柳 墩

天德當年鬢兩青。肩隨處處幾論情。白蓮魂夢無虛夕。黃閣功名誤半生。定罷側身松月白。齋餘洗足石泉清。莫教紅葉封苔徑。投劾他時倘可行。

興似聞樂軒懶齋二相國與諸卿大夫作詩結社予亦喜幸偶成長句寄

呈

鄭 興

平生出處若爲量。半壁青燈夜意涼。萬戶風塵何擾擾。一林煙月奈茫茫。洞猿不避安禪石。江鷺時來撰疏堂。雲臥他年拂衣去。好於瓶錫付閑忙。

屏俗幽居四十春。種蓮時復引遺民。講闌花影爭飄揚。定起苔痕半沒茵。魂夢自勞千里月。光陰虛遣九街塵。徑荒莫恠歸來晚。他日功成一幅巾。

端居演法許多春。密化遙知澤萬民。林下摘蔬甘美食。溪邊藉草侈文茵。來從南岳相傳鉢。常遇西風謾避塵。卜隱何年結茅草。倚筇長嘯岸綸巾。

走妄驅迷七見春。空王何惜濟窮民。但期杖屨尋蓮社。肯要笙歌醉錦茵。骨爽知君眠月露。顏醺愧我困風塵。爲言講下宗雷輩。且莫搔頭戀舊巾。

靜裏機關沒比量。幾年高臥北窻涼。忽思雲壑閑栖息。反愧塵區自混茫。慕道未能窺奧室。愛兒奚止誠垂堂。一朝勇捨君知否。已唾紅衢事事忙。

身如匹素可裁量。誰借空門氣味涼。未得投簪敲剝啄。潛期泛笠渡滄茫。逍遙不分煙霞窟。功業徒爲翰墨堂。笑殺他鄉浪遊子。一生多至百年忙。

寄呈龍穴大尊宿丈室

金 楷

膝下嘗聞桂苑春。老禪同是榜中人。臥龍一穴法雷殷。鳴鶴半天詩月新。道富生涯餘杖履。社高投契遍簪紳。朗州幸有通家好。茶席猶堪備惡賓。

次韻青谷老弔趙承制

釋 天因

昨聞高步入青雲。已到鴻樞拜納言。黃壤一朝成異物。蒼生何地望霑恩。帝前

譚席收宣室。天上遊車駕喜園。等是蘆廬歸宿客。莫憂追覓更無門。

舟次南海得眼疾寄常寂法主

行盡滄洲幾日程。此行還似督郵行。衲衣久被風塵澆。物色潛隨歲月更。已信幻泡非我有。更憐疣贅寄他生。若爲洗盡空華眼。常寂光中一笑呈。

以長句代書答崔學士

玉笋春來已出門。碧幢紅旆又南巡。一謙四益雖常理。半歲三遷復幾人。盡道文章爲國手。誰知道德蘊天真。秋初我欲尋前約。且待頭流月半輪。

再和

千里書迴到石門。遙知江北久逡巡。唱高白雪應傾國。路捷青雲更絕人。任是世間專寵命。何如林下樂清真。歸期莫訝光陰促。三轉須終妙法輪。

亭止寺

無名氏

半年塵土負青山。蕭寺偷乘一日閑。始見黃花知令節。更驚紅葉照衰顏。天圍大野蒼茫外。舟在清江寂寞間。賴有上房沽酒引。淡煙斜日未能還。

躑躅花應教

釋祖英

何年移植玉墀中。造物偏鍾剪刻功。綺葉未容粧嫩綠。錦蕤先已撮生紅。幾番珠綴枝頭雨。一陣香飄閣外風。想得宮娥攀折處。露和朱粉惹春葱。

宣慶殿行大藏經道場音讚詩

金 垢

一藏全勝百萬師。故應魔外不容窺。揀來龍象渾無畏。掃去豺狼更莫疑。畫講杵頭春玉屑。夜談梭腹吐金絲。願王已輦千祥至。社稷升平自可知。一會莊嚴是鷲峰。百爐香動瑞煙濃。講唇走玉翻三藏。譚舌飛珠演五宗。端信覺皇分着力。定教兵騎不留蹤。龍天亦感宸誠切。導酒真泠饋國容。

上晉陽公

兩世波瀾定海東。泰山功後泰山功。茆分萬戶猶毫末。河潤三韓亦掌中。胡影不侵榆塞月。漢歌閑倚玉樓風。黑頭丞相前應有。綠髮封侯始見公。玉上無端點作痕。已將名利負乾坤。早年爭奈埋塵土。餘孽那堪及子孫。金勝功夫誰見賞。雪窓文字未償冤。可憐百歲升沉事。決在明朝一片言。

中例消災道場音讚詩

游空宿曜偶相千。世眼無端作怪看。若是祓萌將醞造。當緣呪力旋消殘。壽山更疊千年翠。神杵纔春一粒丹。熾盛光中忝瑞氣。曠前春色滿三韓。

文機障子詩

一朶蓬萊湧海高。銀宮貝闕駕靈鼈。蘭燈燦爛赭虬卵。羽葆參差翠鳳毛。風護花奴頭上槿。露濃金母手中桃。請看明月徘徊影。應是姮娥望赭袍。

賀柳平章門生李右丞尊庇領門生獻壽

令公桃李四番榮。鶯谷當年薦壽觥。座主座看邀座主。門生門見領門生。三韓

慶閱喧騶哄。一代詞林摠俊英。更有罕聞奇事在。失來鞋帶得來呈。

次朴按廉恒題密城三郎樓詩韻

釋圓鑑

湖上青山山上樓。美名長與水同流。傍洲沙店排蝸殼。逐浪風船舞鷓頭。桑柘煙深千里暮。芰荷花老一江秋。落霞孤鶴猶陳語。故作新詩記勝遊。

抵宿王巖愛其境地清幽因書拙語

避喧求靜到王巖。滿眼幽奇未易談。石上松孤類巢許。門前柳老似彭聃。千重嶽色深還淺。一派泉流冷且甘。二八應眞曾駐錫。暫來聊喜得同龕。

閑中偶書

地僻人誰肯見尋。老來唯有病相侵。臂酸倩客煩書字。目暗呼童代衽針。計拙未成葵衛足。神安無愧竹虛心。小軒睡起松陰轉。洒面清風直萬金。

遊楞伽山

舊聞海上有名山。幸得遊尋斷宿攀。萬壑煙嵐行坐裏。千重島嶼顧瞻間。義湘庵峻天連棟。慈氏堂深石作關。避世高栖無此地。堪誇倦鳥解知還。

病中言志

古寺秋深木葉黃。風高天色正蒼涼。閑無檢束甘年老。病似拘囚覺日長。霜冷急尋三事衲。室空唯對一爐香。沙彌不解蔬餐淡。來點山茶勸我嘗。

先君於戊戌年間赴沃州不幸聖善遂厭世予時年三歲後二十有八載

濫承按部之命來拜先塋不勝感慄卽成四韻

洪子藩

兒啼乳歲別慈顏那料孤墳在此山雖隔音容冥路異尙存恩愛綵衣斑一抔宿草魂無味千里歸程淚忍潛萬種哀情言未盡題詩付與水潺潺

皇都次韻金鈿村見寄

鄭可臣

略無才德副民瞻底事奔馳突不黔坐臥何曾安寢餼居諸只任換冷炎鬢絲入鏡簪嫌重詩草盈囊筆退尖常憶雪齋時對榻靜聞風響動虛簷

甲午秋自鎮邊歸道次京山府示太守李東庵

安珣

夏初分鉞海邊來吟過三庚致遠臺驛使雷馳傳密旨文闈火迫選賢才星山暴潦乘槎渡月窟涼颺養桂催預想奏名開慶席鳳笙檀板錦千堆

寄曹溪晦堂和尚

時長男宿衛闕庭次
新投晦堂剃度

李尊庇

物無美惡終歸用苦李誰嫌着子多長息久朝天子所次兒新付法王家移忠固是爲臣分割愛其如出世何還笑老翁猶滯念有時魂夢杳天涯

至元甲子到京贈崔大博守瓊

李承休

幾年孤迹寄江山更踏京塵一夢閒故舊皆爲天上貴困窮誰救轍中乾相逢盡怪形容變欲語先羞舌頰頑曾忝金蘭緣不淺寬懷時復一彈冠

庚辰坐言事見罷謝柳中叢叢扶病來暗

元侯浪出未曾聞何況經年病杜門扶腋見臨隣里怪到頭傳說士林喧豈唯

頑品擡新價。當有來賢尙直言。見廢此身。可賀。值公親。暗枉高軒。
丁酉立春在都。酌吳僉舍。良遇。見寄

金 叵

憶曾同舍共鳴騶。分袂西遊已五秋。對鏡鬢華凋欲盡。倚樓心緒亂相繆。老來
豈戀觀金馬。客裏頻驚見土牛。遙想紫薇花下客。春風興在草詞頭。

在金山謝劉按部顯惠年魚

吳漢卿

誰遣波臣慰冷官。忽驚紅鬣動銀盤。吏人走報星軺餉。稚子爭尋尺素看。烹處
敢辭鬻自漑。食餘聊笑缺曾彈。平生口腹吾謀拙。多感公恩快一餐。

牛山莊聞洪中贊靈柩東歸

退老年來臥碧山。已於人世斷追攀。光陰早付形骸外。存歿猶驚俯仰間。纔報
安公拋世去。又言洪相異屍還。東韓耆舊今誰在。却念蒼生淚滴顏。

送李東庵落致仕赴原州

丈夫出處豈循常。時復虬蟠又鳳翔。忽見甘棠生綠野。安知丹桂長黃堂。懸車
再駕游龍壯。閉閣重開賀燕忙。慎勿忽忽促飛駟。明朝還恐上巖廊。

西京永明寺

李 混

永明寺中僧不見。永明寺前江自流。山空孤塔立庭際。人斷小舟橫渡頭。長天
去鳥欲何向。大野東風吹不休。往事微茫問無處。淡煙斜日使人愁。

諸郎席上次韻

洪 侃

江湖數載漫爲州。藍袂西垣又滯留。龍尾蛇頭安敢擇。牛溲馬渤幸容收。空濛柳色層城晚。狼籍荷花大液秋。物色惱人人不會。百年宦海苦沉浮。

次李密直學士宴詩

趙簡

具慶提衡罕見聞。得賢還勝舊龍門。觴中壽可重重獻。堂上親皆兩兩存。幾世蘭蓀相襲馥。一番桃李始開繁。悅軒喜氣那容說。人道新添甲桂孫。

次永明樓韻

大平車蓋欲東還。金碧重輝錦繡山。穿月棹聲連榻上。掛空燈影落波間。銀灘釣叟魚同樂。翠嶂禪僧鶴共閑。對此若論多少景。南賓八咏摠無顏。

曠湖樓

此樓風景惱人多。八咏雙溪不敢加。旗蓋影交樵牧路。管絃聲落吏民家。跨空簷豁虜生粟。照水軒危眼眩花。玉斧修成廣寒殿。飄然還訝上仙槎。

次韻寄金學士之岱

韓就

雨浥輕塵唱渭城。臨分醉臉纈紋生。嶺南遺愛春江綠。塞北閑愁夕照明。青眼縱多新識面。白頭那及舊交情。自天忽洒真紅露。不忝尙書舊按行。舊制四品帶紅鞋謂

謂之假紅三品

次韻李正言混花山懷古

釋達全

花山往事有誰知。今古興亡似奕碁。玉輦行街渾作畝。珠簾深巷半成池。斬新

楊柳幾多屋。依舊杏花三兩枝。細數盈虛春夢裏。只堪大笑不堪悲。

禪源寺清遠樓

不費登攀自曠然。四郊爲圃海爲川。蒲帆朝過有情吹。荊棟晚生何處煙。野抱山還山抱野。天吞水亦水吞天。般般形勝誰家具。樾兀明窗有毳禪。

福州曠湖樓

蔡洪哲

海山當日往來多。物外精神到此加。初謂夢遊雲雨峽。漸疑身入畫圖家。南江秋夜千峰月。北里春風萬樹花。雖是無情閑道者。登臨不得似枯槎。

月影臺

文章習氣轉崔嵬。忽憶崔侯一上臺。風月不隨黃鶴去。煙波相逐白鷗來。雨晴山色濃低檻。春盡松花亂入杯。更有琴心隔塵土。他時好與雨雲迴。

順興宿水寺樓

魯璵

輕裝短帽一尋幽。蘭院依然十載遊。壁價幾年詩共重。寺名千古水同流。寒推嶽色僧扃戶。冷踏溪聲客上樓。長嘯徘徊日云暮。倚欄回首起鄉愁。

益齋李學士榮親宴次尊公東菴韻

權溥

儒林此事古曾聞。盛事無如我一門。分桂孝親今最貴。傳鞮襲慶近猶存。新廳披豁天慳露。內帑聯翩上賜繁。欲把公詩編國史。流芳幾葉及雲孫。

送李稼亭之上國

安震

祖席高張碧澗濱。西郊日薄靄黃塵。今年雨雪連寒食。觸處烟花阻今辰。芳草未堪留去馬。綠楊豈解繫行人。男兒自有四方志。安用臨歧苦愴神。

賀副學士安判書軸

玉禁肩隨賞牧丹。邇來天榜接飛翰。六年共就冰銜列。四節嘗開桂苑歡。試院着鞭先遇主。慶筵聯袂獨無官。爲君遙薦萱堂壽。喜氣能挑竹嶺寒。慈堂在興州竹嶺

雞林郡公王政丞珣挽詞

正朝木稼豈徒哉。應爲高官報有災。草草蓋棺遼野遠。堂堂柱國泰山頽。朱門日迫千家慘。丹旄風生萬壑衰。回首德陵山下路。碧雲秋色鎖崔嵬。

送洪義軒濯賀天壽節朝元

朴忠佐

家世東韓第一人。冰壺秋月絕纖塵。論才猶歉侯蕃相。承寵當爲帝室臣。華表柱頭殘照遠。屏風山下晚花新。紫庭稽首呈金鏡。萬國衣冠識鳳麟。

北京路上

朴恒

一色平蕪觸處同。四時無日不狂風。淺山白日能飛雨。古塞黃沙忽放虹。地隔四千年共遠。喉磨雙隻路何窮。漢家信美非吾土。歸夢時時落海東。

東文選卷之十四 終

東文選卷之十五

七言律詩

己酉三月禡官後作

分將疎懶掩柴關。十日無人一往還。懷古誰憐空好古。愛閑自覺不如閑。風來樹影低簷暗。雨送苔痕上砌斑。尙友前修真枉尺。有時拈卷仰高山。

李正夫之公見次復成一首

十年塵土夢鄉關。暗想漁舟載月還。桑柘紅尾三徑靜。煙波白鳥一天閑。柿園

雨過金丹脆。栗塢霜飛玉殼斑。秋至欲尋青鶴洞。聯鞍相約鄭平山。外家桑梓

異山有青鶴洞。秋約與鄭鏡機權同往。晉陽故云。平山鏡自號也。

鄭載物以二博當遷而在下者。越載物爲上。博載物仍居其二。此古未之所聞也。遂爲唐律奉呈。

丈夫行止有天公。壘上曾嗟燕與鴻。任我自迷芳餌下。惟君仍在積薪中。已知與奪由今日。莫倚文章繼古風。猶勝雞林狂處士。十年咄咄坐書空。

次李正夫贈別詩韻

旅食荒村足斷腸。流年况復去堂堂。謾留空自多新句。獨飲如何放舊狂。北望王城秋色遠。南行澤國暮雲長。明君在上無欺蔽。不用虛今壯志傷。

在松山書院夏課次東庵追慕安文成珣所著韻

時常去聖欲從誰。盡棄常經競好奇。不是賢侯生命世。寧教胄子復尊師。抽錢慮遠資無極。函丈功深進有爲。配祀宣尼有公論。請先鐫石勒斯詩。

與諸教官分詠西漢名賢得張良

誤擊秦皇匿下邳。布衣奚望帝王師。請看功業無千古。只爲遭逢在一時。兵法早從黃石受。仙風晚與赤松期。韓彭見蹟蕭猶繫。須信初終計自奇。

送李林宗直郎歸舊隱

我欲歸歟久未歸。君胡去矣復來斯。衣冠恰似倡優戲。升斗爭教妻子肥。却羨已收匡國策。自憐苦乏買山貲。百年後有知音在。不用題詩淚滿衣。

嘆胡樓

禹倬

嶺南游蕩閱年多。最愛湖山景氣加。芳草渡頭分客路。綠楊堤畔有農家。風恬鏡面橫煙黛。歲久牆頭長土花。雨歇四郊歌擊壤。坐看林杪漲寒槎。

送洪敏求進士

文憲文和並主人。業文餘慶溢高門。世稱父子兩中令。今見雲仍一外孫。自往公崔冲氏第一。及第再知貢舉。位至中書。令論爲文。和公嗣子。惟善亦以第一。外孫久客難禁。人及第而再知貢舉。位至中書。令論爲文。和公嗣子。惟善亦以第一。外孫久客難禁。歸觀意老夫。何惜贈行言。北堂獻壽還西笑。當繼家傳乙壯元。自往赴內宴。嗣子惟善時以尚書令擁中書。令姪扶元扶甲壯元。當繼家傳乙壯元。自往赴內宴。嗣

曠湖樓

起樓詩眼費功多。月斧雲斤亦未加。自訝登臨橫翠閣。誰教飛上大清家。春江綠漲蒲萄酒。夕照紅酣躑躅花。待過已知軒蓋近。樹頭時有鵲槎槎。

驪興清心樓

北原西畔漢南端。我昔登樓一展顏。脚底蒼茫江繞郭。眼前平遠野連山。白雲仙想三清外。明月詩情八詠間。二十年來塵土下。至今思夢不曾閑。

永明寺浮碧樓

邢君紹

江樓孤笛動龍眠。醉裏風流白日仙。遠岫似雲雲似岫。長天浮水水浮天。兩崖出沒高低岸。萬派朝宗巨細川。一葉扁舟何處客。茫茫獨去夕陽邊。

主上除太傅瀋陽王

白元恒

玉詔傳從碧縷門。新除太傅作東藩。千年遇主山河誓。三葉勤王雨露恩。兔郡桑麻忝國界。鶴城花月入宮園。日迎賀客身無暇。又被呼來謁至尊。

上崔政丞宗峻

蟬冠馳劍押朝班。德齒爭高仰莫攀。際會千年忠貫日。功名四代望如山。琴書素蓄無餘玩。几杖曾辭尙未閑。明主乞言偏注意。天留一鑑照人間。

賀李通憲齊賢學士宴

尹奕

高門盛事復何言。青鬢提衡且莫論。一宴共歡三座主。四觴齊壽兩家尊。讓前

讓後蟬冠擁。迎北迎南鳳。蓋翻賓從林。林無可選。盡教桃李間蘭蓀。

謝松坡崔相國誠之惠茶紙首二

洪淪

惠賜重重。鶯轉深酪。奴側理勝。羸金龍團鳳餅。堪同調。毛穎烏圭。豈異心。陽羨遺風。清可掬。蘭亭故事。杳難尋。玉川已遠。右軍死。何處如今。寬賞音。骨肉猶難契。分深感公恩。愛重千金。文詞自有韓歐學。信義誰知管鮑心。侍從開平書可紀。陪遊真定夢相尋。吾生過荷吹噓力。只愧無由報德音。

在燕都次方敬齋子宣韻寄呈

百歲人生有幾分。孝虧愛日念先尊。九經繼業兼三史。五子連枝有十孫。書劍未酬平國志。箕裘欲報昊天恩。天涯游子思無盡。時望家山醉一樽。

登第

閔光鈞

四子同遊翰墨中。爭先高折桂林叢。二兄早得成龍器。一弟曾收中鵠功。縱薦萱堂慈母祿。誰承金榜大人風。瘦鴨尙有圖南翼。遙望雲霄萬里通。

水原雲錦樓

薛文遇

樓在林巒積翠中。登臨一望四方空。花間瓦影鱗鱗碧。石上苔紋點點紅。荷葉亂鳴鼓枕雨。柳條輕颺捲簾風。謫來到處江山好。萬事皆從失馬翁。

驪興清心樓次韻

萬景森羅指點端。登臨不覺屢回顏。長江西去赴蒼海。複嶺北來圍淺山。透網

魚跳寒雨裏。忘機鷺立暝。煙間一生脫。却功名累。青蕘漁翁也自閑。

贈孫斯慶進士

愁來却恨作書生。知有孫公共此情。事業渾歸管城子。功名不識孔方兄。樽前好語菊花發。樓上新詩山色晴。杖屨莫辭來數數。文書滿眼小窓明。

韓僉議大淳挽詞

靈風肅肅動雲幘。絳節搖搖凌紫冥。忠義高門心未竟。功名浮世夢初醒。庭中空有聞詩鯉。原上誰看急難鵠。惆悵清芬無覓處。不堪秋色滿林坰。

天曆二年五月受江陵道存撫使之命。是月三十日發松京宿白嶺驛夜

半雨作有懷

安軸

讀書求道竟無成。自愧明時有此行。但盡虛疎施實學。敢將崖異盜虛名。民生塗炭知難救。國病膏肓念可驚。耿耿枕前眠未穩。臥聞山雨往深更。

次和州本營詩韻

萬疊山圍四望中。東溟隔岸水浮空。龍爭古壘黃榆月。鴉噪遺墟老樹風。懷土重遷憐噍類。棄城謀變說姦雄。當時誰握籌邊策。惆悵無人衣一戎。

次襄州公館韻

名途信步不圖前。來往斯樓已二年。覆檻竹叢分爽氣。廕門榕樹撼蒼煙。歷觀民業憂吾國。虛負君恩愧彼天。計拙未能興利路。若爲溪壑湧金泉。

登州古城懷古

暮天懷古立城頭。赤葉黃花滿眼秋。不覺蕭牆藏近禍。唯憑海島作深謀。百年丘隴無情草。十里風煙有信鷗。遙望朔方空嘆息。一聲羌笛使人愁。

賀益齋相國

文園發策得英才。掌試傳芳壽宴開。白雪清歌和寶瑟。紫霞靈液滿金杯。門生自領門生到。座主親迎座主來。多賀相公連喜慶。二郎當作桂林魁。

登太白山

直過長空入紫煙。始知登了最高巔。一丸白日低頭上。四面群山落眼前。身逐飛雲疑駕鶴。路懸危磴似梯天。雨餘萬壑奔流漲。愁度縈回五十川。

永明寺次韻

朴義

擬欲輕舟訪僧寺。狂歌醉舞亂中流。臺前瀲灩一江面。島外出沒千山頭。興多游子語擾擾。道高老衲言休休。月巖峰上一輪月。照破人人今古愁。

送崔御史伯淵璿還朝

梁溫

東韓文物未陵遲。御史魁梧邁等夷。凜凜清威峩豸日。融融和氣弄烏時。忠臣孝子佳名藉。舊德耆年壽骨奇。下客無由叅慶席。向風高咏採蘭詩。

暮春

許伯

眼前世事劇紛紛。洗耳年來不願聞。病裏黃花如慰我。愁邊白酒苦招魂。悲來

幾讀出師表。醉後重吟弔屈文。三顧無人問興漢。臥龍終歲守柴門。

丁卯重陽

秋晚長風萬里來。登高極目思難裁。莫辭白酒殷勤飲。可惜黃花爛熳開。懷士衡猶得信。登臺子美不勝哀。舊時高契今餘幾。感嘆諸公骨已苔。

題杆城樓

山水縈回境靜幽。坐來心迹便清修。五更曉色先虛閣。一葉秋聲滿小樓。逐浪輕鷗知所止。投林倦鳥得其休。吾今役役成何事。俯仰東西閱數州。

平海東軒

辛 歲

亂紅濃綠遍村村。信馬平蕪雨後原。繞郭長川如故里。倚山修竹問誰園。宦途幾見鞭先著。客路多慙席未溫。幸得餘閑欵午枕。隔林無數鷓鴣喧。

福州曠湖樓

此樓佳致說毋多。摘勝探奇莫我加。百里桑陰藏野店。四山松翠護官家。江頭雨暗連天草。巷口煙濃出屋花。只解登臨如默默。詩人沒影也如槎。

沉鳳縣次趙元帥冲韻

方 曙

石棧高高信轡行。溪巒盡處有殘城。柘間煙霧蝸廬小。木末天低鳥道橫。滿壑煙霞成畫態。一區風月動詩情。我來數日留孤館。水色山光入夢清。

月光寺水軒次韻

韓宗愈

黃扉十載濫榮名。豈料今爲此地行。入洞忽迷春樹影。隔雲還有暮鍾聲。山屏
邈迤開千疊。水樂旬庭奏九成。兩寺往來陪兩叔。留連數日話親情。

驪興清心樓次韻

辛 齋

誰使天慳露一端。滕王高閣已無顏。錦鱗戲躍吹晴浪。白鳥驚飛映碧山。此景
却思供闕下。宦遊深愧在塵間。何方更化殘民業。得致羲皇上世閑。

八月十七日放舟向峩眉山

李齊賢

錦江江上白雲秋。唱徹驪駒下酒樓。一片紅旂風閃閃。數聲柔櫓水悠悠。雨催
寒犢歸漁店。波送輕鷗近客舟。孰謂書生多不偶。每因王事飽清遊。

諸葛孔明祠堂

群雄蠶起事紛拏。獨把經綸臥草廬。許國義高三顧後。出師謨遠七擒餘。木牛
流馬誰能了。羽扇綸巾我自如。千載忠誠懸日月。迴頭魏晉但丘墟。

思歸

扁舟漂泊若爲情。四海誰云盡弟兄。一聽征鴻思遠信。每看歸鳥嘆勞生。窮秋
雨鑱青神樹。落日雲橫白帝城。認得萸羹勝羊酪。行藏不用問君平。

路上自蜀歸燕

馬上行吟蜀道難。今朝始復入秦關。碧雲暮隔魚泉水。紅樹秋連鳥鼠山。文字
剩添千古恨。利名誰博一身閑。今人最憶安和路。竹杖芒鞋自往還。

函谷關

形勝平看十二齊。下臨無路上無梯。土囊約住黃河北。地軸勾連白日西。天意已歸三尺劍。人心豈特一丸泥。秋禾滿畝風塵靜。穩跨征鞍聽午雞。

一陵早發

予之將如成都也。內翰松雪趙公子昂以古調一篇相送。有勿云錦城樂。早歸乃良圖之句。十月北歸。雪後二陵道中。忽憶其詩。作此寄呈。

夢破郵亭耿曉燈。欲乘鞍馬覺凌兢。雲迷柱史燒丹竈。雪壓文王避雨陵。觸事誰知胷磊磊。吟詩只得髮鬢塵。巾折角裘穿縫。羞向龍門見李膺。

感懷

枕肱茅店夜三更。矯首金臺路幾程。苦節頗同彈鋏客。芳年已過棄繻生。窮通有命悲親老。緩急非才愧主明。畢竟行藏誰與問。滿窻霜月獨鍾情。半世雕虫耻壯夫。中年跨馬倦征途。孟盤草草燈花落。關塞迢迢曉月孤。華表未歸千載鶴。上林誰借一枝烏。有錢徑買澆腸酒。莫使詩斑入鬢鬚。長卿去蜀曾題柱。鄒子遊梁得曳裾。奔走無功合投劾。交遊似夢惜離居。未拚蓑笠盟鷗鳥。已分圖書養蠹魚。一望鄉關時自笑。百年天地亦蘧蘆。

多景樓雪後

樓高正喜雪漫空。晴後奇觀更不同。萬里天圍銀色界。六朝山擁水精宮。光搖

醉眼滄溟日。清透詩腸草木風。却笑區區何事業。十年揮汗九街中。

多景樓陪權一齋用古人韻同賦

楊子津南古潤州。幾番歡樂幾番愁。佞臣謀國魚貪餌。黠吏憂民鳥養羞。風鐸
夜喧潮入浦。煙蓑暝立雨。侵樓中流擊楫非吾事。閑望天涯范蠡舟。

高亭山伯顏丞相駐軍之地

江上山如淡掃眉。人家處處槿花籬。停舟欲問松間寺。策杖先窺竹下池。帆影
暮連芳草遠。鍾聲曉出白雲遲。憑欄一望三吳小。像想將軍立馬時。

宿臨安海會寺

梵宮臺殿遠嵯峩。沙步移舟夜始過。峽月轉廊隨響屐。溪風入戶動鳴珂。山因
蘇子知名久。樹自錢王閱事多。陌上春歸花寂寂。唯聞谷鳥和村歌。陌上花曲即此地事

黃土店聞上王見諳不能自明

世事悠悠不忍聞。荒橋立馬忽忘言。幾時白日明心曲。是處青山隔淚痕。燒棧
子房寧負信。翳桑靈輒早知恩。傷心無術身生翼。飛到雲霄一叫關。

咄咄書空但坐愁。式微何處是菟裘。十年艱險魚千里。萬古升沉貉一丘。白日
西飛魂正斷。碧江東注淚先流。滿門簪履無雞狗。飽德如吾死合羞。

十腸冰炭亂交加。一望燕山九起嗟。誰謂鱣鯨困。螻蟻可憐。蠅虱訴蝦蟆。才微
杜漸顏宜楮。責重扶顛髮易華。萬古金滕遺册在。未容群叔誤周家。

至治癸亥四月二十日發京師上王時在西番將往拜

主恩曾未答丘山萬里驅馳敢道難彈劍不為兒女別引杯聊盡故人歡五雲迴首籠金闕片月多情照玉關唯念慈親鬢如雪數行清淚洒征鞍

端午

旅食京華十過春西來又作問津人半生已被功名誤久客偏驚節物新萍梗羈蹤青海月松楸歸夢泰封塵旗亭且飲菖蒲酒未用醒吟學楚臣

題長安逆旅

倦客重遊秦樹老佳人一去隴雲賒愁聽杜叟三年笛悵望張侯萬里槎夢裏家山空蕙帳酒闌簷雨落燈花宦情已似秋雲薄曾次猶餘一寸霞

海上箕封禮義鄉曾修職貢荷龍光河山萬世同盟國雨露三朝異姓王貝錦誰將委豺虎謂仙韻古干戈無奈到參商謂曹使兄弟不和扶持自有宗祧力會見松都業更昌

早信忠誠可動天孰云仁聖竟容奸雞竿曙色開暘谷鳳闕春光到雪山讖雨池蛙喧欲鬪謂奸黨邀功者喉雲臯鶴倦思還謂陳乞而有沮之者老以忠宣王事上書

也國區區吳薛何為者自鼓嚙胡徹帝關謂清許有全二老不能久留將歸

達尊杏花韻

一株仙杏鳳城西占斷春光傍柳堤翳翳紫煙迷遠近離離紅日照高低暗香

帶露添蜂蜜。亂點隨風着。鷺泥忽憶錦波亭。下路滿身清影醉扶携。
淡蕩春光小巷西。倚牆無語俯長堤。蓆裝絳蠟風吹折。花蔭丹砂雨壓低。驚墮
佳人金捍撥。巧黏游騎錦障泥。綠陰青子空惆悵。滿意尋芳莫解携。
御溝南畔畫橋西。記得偷閑步綠堤。出屋數枝春雨過。繞城千樹夕陽低。玳筵
錯落啼紅燭。鳳詔淋漓濕紫泥。欲折長條賞天巧。却愁零落不堪携。

送李翰林還朝

早知毛骨異凡流。刮目青雲得意秋。三級風雷起蓬華。九天雨露洽松楸。鴨江
柳暗牽離思。鼇禁花開待勝遊。樽酒論懷更何日。白頭身事付蒼洲。

菊齋權文正公挽詞

揚歷清華到上台。君王獨倚棟梁材。詩書滿屋無樊素。簪履盈門有老萊。千歲
鶴歸三嶠月。九淵龍化五更雷。才疎未足銘清德。淚洒當年玉鏡臺。

鳳州龍湫

山前翠石雙扉啓。石底澄潭萬丈深。明浸日光紛閃閃。冷涵林影淨沉沉。斯民
政要滋湯旱。彼相誰堪作說霖。出沒魚兒休察見。龍應先遣試人心。

楊花

似花非雪最顛狂。空闌風微轉渺茫。晴日欲迷深院落。春波不動小池塘。飄來
鈿砌輕無影。吹入紗窻細有香。却憶東臯讀書處。半隨紅雨撲空床。

楊安普國公宴太尉藩王于玉淵堂

湖上華堂愜素聞。國公開宴樂吾君。十千美酒鸕鷀杓。二八佳人翡翠裙。菡萏香中聽過雨。菰蒲影際見行雲。笙歌未歇輪蹄鬧。漠漠西山日欲曛。

七夕

脈脈相望邂逅難。天教此夕一團圓。鵲橋已恨秋波遠。鴛枕那堪夜漏殘。人世可能無聚散。神仙也自有悲歡。猶勝翠婦偷靈藥。萬古羈棲守廣寒。

次朴持平韻呈安謙齋

白文舉

盡道新年多吉兆。端知慶閥萃榮光。傳來占儉先人宅。化作風流學士堂。自笑老夫華髮短。猶憐歌妓翠眉長。請公命把玻璃盞。澆我平生冰炭腸。

次普門寺閣上詩韻

釋禪坦

山石平生犖确行。此軒贏得十年情。雨昏鸚鵡洲邊草。雲卷芙蓉海上城。沙岸漁燈煙外遠。月樓人語夜深清。若爲長伴江鷗去。飽聽蒼波落枕聲。

九日次清淵詩韻

一曲高歌金縷衣。黃花無處不扶歸。江湖日月琴尊好。溪寺樓臺人馬稀。萬壑雨驚紅樹遍。四山朝見白雲飛。倚欄滿日悲秋意。木落年年心事違。

次鄭愚谷韻送洪敏求進士

禹吉生

崔公當日秉斯文。捷第連科起一門。十二徒名傳後代。半千年慶洽諸孫。報劉

日短宜先孝。佐漢時來可盡言。吟詠白華勤敬養。何妨獻策輔皇元。

晉州蠹石樓

鄭乙輔

黃鶴名樓彼一時。崔君好事偶留詩。登臨景物無增損。題詠風儀有盛衰。玉罍高飛江月出。珠簾半捲嶺雲垂。倚欄回首乾坤小。方信吾州特地奇。

壬午歲寒食

李穀

宦路從來足是非。更堪親老遠庭闈。已從客路逢寒食。也任京塵染素衣。細雨忽來驚節換。落花如掃惜春歸。忍貧要趁良辰醉。鬢髮多情心事違。

次韻答順庵

半生光景屬離居。旅食從來不願餘。窗外芭蕉饒夜雨。盤中苜蓿富春蔬。家貧自有箠瓢樂。計拙非因翰墨疎。時到煙花禪榻畔。坐忘身世等蘧廬。

秋雨夜坐

寒雲作色送昏鴉。獨倚書窗感物華。秋晚江山正搖落。夜深風雨更橫斜。利名少味徒爲客。魂夢無情不到家。曉鏡定應添鬢髮。羸驂肯復傍塵沙。

癸未元日崇天門下

正朝大闢大明宮。萬國衣冠此會同。虎豹守闈嚴內外。鸞鸞分序肅西東。壽觴灑灑浮春色。仙仗縱縱立曉風。袍笏昔曾陪俊彥。天門翹首思難窮。

七夕小酌

平生足迹等雲浮。萬里相逢信有由。天上風流牛女夕。人間佳麗帝王州。笑談
欸欸尊如海。簾幕深深雨送秋。乞巧曝衣非我事。且憑詩句遣閑愁。

正朝雪

雪從除夜到正朝。旋入春風不禁消。屏影未分雙闕仗。靴聲早集五門橋。從教
賀列朝衣濕。好傍昭容舞袖飄。便是新年多瑞氣。願隨椒酒進民謠。

苦寒

朔吹搖空歲暮天。颼颼老屋讀書氈。一寒到骨那能解。萬事關心只自煎。衾鐵
夜深明積雪。樵山市近絕炊煙。詩人耐冷今猶古。擬訪梅花澗水邊。

灤京送別川閔及庵韻

曉餞城東露浥筵。灤京百里好風煙。家家駿馬便弧矢。處處高樓鬧管絃。劉保
舊居雲滿谷。李陵遺迹草連天。及庵好古詩無敵。壯觀應須子細傳。

題曹溪龜谷覺雲禪師御書畫詩卷

李仁復

仰看奎畫照禪林。新賜圖書冠古今。八法既均真得體。二師惟肖可傳心。糝糠
顧陸天機妙。臣僕鍾王筆意深。留鎮山門有榮耀。上恩奚啻重千金。

贈郭檢校

檢校奉河南王李
搃兵命來聘我朝

金臺上客是詞臣。奉使東遊到海濱。旌旆聯翩行閱月。杯盤錯落座添春。獨賢
鞅掌名尤重。專對縱橫氣益振。幸遇今朝堪燕樂。區區爭席亦何人。

奇元朝同年馬彥翬承旨兼東傅子通學士

每向瓊林憶醉歸。賜花春暖影離離。別來更覺交情厚。老去安知世事非。鴛鴦
尚慙懷棧豆。鵬飛誰復顧藩籬。請君莫笑東夷陋。海上三山聳翠微。

送柳思庵

人間膏火自相煎。明哲如公史可傳。已向危時安社稷。更從平地作神仙。五湖
夢斷煙波綠。三經秋深野菊鮮。愧我未能投綬去。邇來雙鬢雪飄然。

留別東萊諸生

萊郡居民卽地仙。半年無事共盤旋。望煙南浦行鹽戶。泛月東湖棹酒船。積翠
海雲春爛熳。長松花路草芊緜。身輕更得朝天去。謝子相携浴檻泉。

書懷

張天翼

八旬雙鶴老家鄉。五馬歸寧興更長。壽酒獻來霞液溢。斑衣舞處錦筵香。身閑
正好醉花塢。世治何妨臥草堂。欲向清江垂直釣。白頭他日遇文王。

元日漫成

尹汝衡

去歲正朝是洛陽。今年元日又南荒。馮驩彈鋏長爲客。王粲登樓苦憶鄉。風軟
柳條纔弄色。日妍梅萼不勝香。鬢絲不管新春事。萬里天涯一鏡霜。

客寓靈光東資福寺

東林寺在郡城東。半落行裝寄此中。萬種羈愁紛若絮。十年遊跡蕩如蓬。雲含

暝色低巖樹。雨報秋聲打井桐。到處賈胡留底事。流年催鬢客囊空。

次明遠樓宴集韻

崔元祐

登臨日日却忘回。傍眼奇觀次第開。何處遙岑雲外出。有時飛雨野邊來。晚涼倚柱風生帽。夜靜吹簫月滿杯。流水亦知人若愛。樓前直到故徘徊。

賀元梅谿松壽掌南省試

壬寅

盛代人才獨異常。藹然雲會用賓王。提衡妙鑑尤清絕。入彀群材盡善良。已是公平由稟受。不因考閱始精彊。一身雨露誰能似。雞舌猶含十載香。

哭杏村李侍中岳

黃會山韻

田得良

直節高標冠世人。一身忠孝事君親。堂開綠野遺清興。會續白蓮修勝因。庭下芝蘭繁奕葉。門前桃李尙青春。風流者舊今何處。忍見琴書撲素塵。

自述

李元之

宋都六鷁敢圖前。鼈縮蝸廬度歲年。老病相侵何力濟。優閑自任要身全。窮途脚底藍關雪。謬算胷中杞國天。龜木幸逢知我鮑。白頭猶未賦歸田。

驪江樓

許邕

景物來呈非一端。登臨是處可開顏。好風微雨涼生樹。殘照歸雲半隱山。海客查通銀漢上。仙人笙降紫霄間。可憐老被名韁縛。只得樓中半日閑。

暎湖樓次韻

田祿生

北望松都疊嶂多。樓高客恨轉來加。仲宣作賦非吾土。江令思歸未到家。楊柳自搖愁裏線。辛夷初發亂餘花。若爲江水變春酒。一洗胸中滓與查。

雞林東亭

終日昏昏簿領間。偶因迎客出郊關。俯看逝水歎流景。坐對青山多厚顏。半月城空江月白。孤雲仙去野雲閑。更尋陶令歸來賦。千載高風未易攀。

上昇敬孝王挽章

龍潛燕邸萃人心。初政仁聲冠古今。洪範經筵聞至論。朱絃清廟聽遺音。山陵寂寞悲風起。殿閣淒涼白日沉。二十四年濡聖澤。可憐臣子淚盈襟。

送河南王使郭檢校永錫九疇

分政河南獨總戎。中興諸將盡趨風。乾坤整頓分高下。江漢朝宗有會同。任重誰知伊尹志。時危自許孔明忠。君歸好贊平南策。青史應傳不世功。

旌善郡次韻

許少由

地僻誰能取次行。驅馳併日得江城。犬牙當路高丹遠。娥黛浮空太白橫。冷淡爲歡違俗尙。優游自適是真情。土境賦重流亡遍。忍見家抽石蜜清。

東文選卷之十五 終

東文選卷之十六

七言律詩

九日登明遠樓

李容

新樓突兀鳥飛回。懷抱登臨得好開。異縣故人難再會。今年此日不重來。溪虛日影搖歌扇。山近秋光落酒杯。五十二年成底事。可堪千里獨徘徊。

送胡若海照磨還台州

二首

李存吾

南省郎官聘我邦。風儀瀟灑已心降。主人寵迫彤弓一。門客知深白璧雙。禹貢山川猶戰伐。箕封民俗自淳龐。秋風不識留君意。直送飛艎到浙江。遠遊看盡好山川。却掛雲帆思渺然。觀禮會聞吳季扎。乘查還憶漢張騫。扶桑出日明台嶺。渤海洪濤接越天。一笑相逢何處是。更期天下會同年。

還朝路上望三角山

三朶奇峯迥接天。虛無元氣積雲煙。仰看廉利攬長劒。橫似參差聳碧蓮。數載讀書蕭寺裏。二年留滯漢江邊。孰云造物無情者。今日相看兩慘然。

廣州村莊寄呈江華萬戶同年狀元河乙沚

安止常

三徑歸來本自窮。無絃琴在月明中。早持寶劒藏何用。只要窪樽飲不空。乳燕辭巢拳瘦竹。草虫驚節咽深叢。怡神久晒庭柯立。可快淒然滿帽風。

次鏡浦臺韻

白文寶

何人詩接謝宣城。自覺高遊不世情。美酒若罈瓶屢臥。澄江如練句還成。得兼康樂登山興。未必知章騎馬行。月白鑑湖餘一曲。休官明日負休明。

丹陽翠雲樓

奉使關東一上樓。松陰十里最深幽。蔭程老樹童童立。遶郭長江袞袞流。橫麓斷煙迷犢臥。滿軒涼吹勸人留。此行未暇登臨賞。他日重來載酒遊。

到安老縣聞新事復用前韻

金臺卿

百歲光陰五十餘。半生今已誤詩書。豈知世有干戈難。終致時無甌石儲。何羨憑河能暴虎。却嗟緣木欲求魚。縣名正合安吾老。一曲清灣遶屋廬。

迦智寺板上韻

百尺浮圖插半空。飛樓傑閣幾千重。尋僧野興閑彌篤。學佛機緣老漸濃。揭厲屢經無盡水。扶持更上最高峯。晚來雙脚多酸楚。木枕蒲團忽放慵。

自警

李吉祥

班白豈非爲老翁。飄飄日用尙孩童。驚人只有疎狂語。輔世曾無細小功。嗜酒過三杯止渴。題詩無一句全工。乾坤容汝德何厚。汝自加修善始終。

次鄭愚谷子厚韻送洪敏求進士

黃石奇

好賢明主幸崇文。君出儒宗積善門。十世祖文憲公崔冲九世祖文和公崔養惟善教人稱爲儒宗皆位至中書令

老心爲洪佛子洪誥宣和中藉有粟者活九萬五千人公出無不以手加額呼
捷科榮迫魏公孫魏公孫景茂射策甲科豈同荆璞經三獻只効周詩蔽一言
况復遭逢叅選舉却勝韓愈遇貞元遷大常博士稱書庫

贈李天覺達尊

鄭誦

萬事隨時各有宜仕齊操瑟豈非癡平生耻與噲等伍後世必有楊雄知刻鵠
不成猶有類屠龍雖妙竟何施如今更信儒冠誤不忍乘酣廢我詩自註時罷舉科

病中投鄭長官天儒

蕭條門巷少來人盡日床龜獨自親窻下藥爐勤着火案頭書帙漫生塵誰憐
壯歲常多病尙戀微官只爲貧尊酒龍山負高會西風回首一悲辛

送白介夫彌堅遊河東

十年京洛共遊歡今日河梁別更難獵獵秋風吹破帽淒淒朝雨濕征鞍樹疎
野店投人宿山好溪途立馬看莫向南州苦留滯倚閭慈母眼長寒

壬申春予所畜馬暴死外舅春軒公聞之有書云袖詩來馬可得也因以
是詩獻

塊處依依類楚囚臙將心事更添愁傍花行樂雖堪廢束帶趨朝詎可休得馬
愧居張藉後作詩先被晉公求聖門也有乘肥者款段還嗤馬少游

次韻李明叔晉理問見訪有詩追呈

早修天爵樂閑身。死厭馳名拜路塵。去國士衡長作客。登樓王粲政思親。秋風浙浙黃花老。世事悠悠白髮新。尊酒論文更何日。異鄉相見恐難頻。

福州次友人韻

旅館荒涼一事無。小窓終日學僧趺。流光冉冉欺遊子。世故紛紛困腐儒。誰見仙人曾化鶴。自知老馬反爲駒。從君結屋清江上。晚歲鷗盟豈可渝。

大都旅舍偶題

病起馮顛雪秋侵。拋書兀坐意殊深。流光冉冉不我與。舊事茫茫何處尋。故國江山千里夢。宦途塵土十年心。相如政有長門賦。一字須知直萬金。

甘露寺多景樓

權漢功

北固登臨望閩州。一尊難洗古今愁。浪奔江勢猶含怒。國破山顏尙帶羞。淮海風煙連古壘。金焦鍾鼓殷岑樓。憑誰與問興亡事。唯有沙鷗近葉舟。

聖居山元通寺

寶殿臨風鳳欲騫。最難忘處是西軒。未晨已得東方日。不雨先占北嶺昏。路險更愁攀石磴。泉甘猶喜吸松根。地靈似有留人意。打起煙霞鎖洞門。

次韻贈朴宜中壯元門生

柳淑

王業中興似漢劉。況今經濟有伊周。遠方玉帛觀光日。盛代衣冠復古秋。魂夢漸疎楓葉密。衰羸只愛草廬幽。先生年少才名大。莫學閑人物外遊。

次伽椰寺住老詩三首

少年歌舞醉華堂。肯想清遊雲水鄉。老去不堪趨綺陌。退來隨分坐藜床。閑中氣味茶三椀。夢裏功名紙一張。多謝新詩慰幽獨。上人深意若爲量。林下閑開綠野堂。溪山勝景稻魚鄉。菊將松竹成三逕。琴與圖書共一床。但願交遊繼支許。何須富貴羨金張。古人可笑歸來晚。宦路風波浩莫量。流年逐水去堂堂。農圃餘生寄此鄉。山雨來時新得句。樹陰深處屢移床。家貧只有書堪讀。客至還無席可張。早晚飄然陪杖屨。山林高趣共論量。

復用前韻寄姪趙瑚副使

爾輩何時會我堂。團欒樽酒說江鄉。晝携孤杖山如畫。夜卷疎簾月滿床。要把文章輔堯舜。莫將言論効蘇張。友朋可愛還堪畏。山海胸襟不可量。

哭李侍中岳黃檜山韻

清高嗜好異時人。種竹移梅手自親。再整朝綱方有望。忽歸仙府問何因。風摧玉樹悲涼日。雨打瓊花寂寞春。一路泥丸先後耳。不須哀痛肺生塵。

三月有日寄鄭直齋

南 兢

今歲東君入醉鄉。不知鱗序去堂堂。蝶墮幾怨三春闊。鶯噎猶驚四月忙。瑞雪妬梨封淡白。薰風護柳染新黃。金神準備東籬菊。莫負陶家九日觴。

有贈

閔思平

就第年來日日閑。尙驚宦海足波瀾。釣魚靜坐籬邊石。採蕨晴登屋上山。時有野僧來問字。不妨溪友與同歡。愧予非是風塵吏。猶未隨君拂袖還。

李政丞

凌幹挽章

百年終始似公難。看取凌煙畫壁間。羽蓋不來雲杳杳。漆燈無盡夜漫漫。平生事業唯清白。夢裏功名幾險艱。地下有知應喜見。德陵松栢暗西巒。

次韻

流年過眼隙駒如。忽放狂歌憶孟諸。今世有誰收老馬。此身無處泣前魚。銀蕩玉膾清江上。蕩笠蓑衣細雨餘。好趁秋風飛一棹。不須回首更踟蹰。

哭雲窩弟

李達衷

三李蟠根赫葉光。我家兄弟襲餘芳。愧予體短才尤短。恨爾身長壽不長。白髮何忘共姜被。青燈無復對蘇床。可憐妻子鄉關阻。吾爲存亡倍斷腸。

炭洞新居

魚游江海鳥投林。揭厲須當適淺深。拂石坐苔伸脚膝。尋泉掬水洗胸襟。興來畢卓方偷酒。老去昭文不鼓琴。醉擊唾壺真可笑。凝然默坐有餘音。

次會慶樓詩韻

古今多少帝王州。合復爲離散復收。天意由來歸有德。地靈安用剩包羞。輿輪寺近鍾聲殷。斷石山高劒氣浮。題柱相如非敢効。可云舒嘯仲宣樓。

咸州樓上作

我家劣能唯簡篇。匡時節鉞非青氈。文明日久略戎事。誤恩山重羞蚊肩。禪僧飛鷹已可矣。盲人瞎馬尤堪憐。空餘耿耿寸心赤。籌邊樓高仰前賢。

次襄州官舍詩韻

此樓風景僅瞻前。來往登臨又一年。簾額冷露銀漢露。琴心暖起玉田煙。清閑可喜壺中日。阨塞還嫌瓮裏天。欲和諸公冰雪句。羞將短綆汲深泉。

辛曉二首

曉初為理骨僧玄陵朝濫受領都僉議時人以老狐目之

天地生成品彙煩。誰干洪造擅寒暄。歡情淡洽藏春塢。怒氣陰凝蔽日雲。雉蜃鷹鳩猶足恠。龍魚鼠虎豈容言。可憐老木風吹倒。蘿蔦離披失所援。

聘恠馳妖老野狐。那知有手競張弧。威能假虎熊羆懾。媚惑為男婦女趨。黃狗

蒼鷹真所忌。曉性畜鷹犬者憚之烏鷄白馬是何辜。曉既貴以烏雞白馬肉作宜淫之藥餌嘗聞汝死必丘

首。已見城東官道隅。

普門社西樓

朴孝修

松間喝道遠尋師。春盡山花半在枝。簿領堆邊身自老。水雲鄉裏夢常馳。祖禪每欲將心問。民瘼那堪放手醫。徒倚未能題勝景。俗塵還繞下樓時。

偶題俗離寺

嵯峩四面碧芙蓉。長岬靈源第幾重。文藏臺封千古蘇。丐陞窟蔭萬株松。龍歸

塔裏留眞骨，騾臥岳前訪聖蹤。永福三韓誰是主，珊瑚殿上紫金容。

星州青雲樓上偶題

樓下居人笑語譁，畫橋流水柳陰多。恨無崔顥題芳草，誰爲滕王詠落霞。山雨
曉催燒笋興，野風時送插秧歌。強留拙句眞蕭散，滿壁龍騰醉筆斜。

題金海府披雲樓次韻

連山斷處海門空，猶勝靈仙擘華功。七點煙鬟憑檻外，自注土人云南浦中有七點山萬竿霜
骨捲簾中。鯨濤暗澹和腥雨，蜃閣虛明映彩虹。自恠登臨簿書裏，紛生喜怒似

狙公。

次安邊官舍韻

登和往事角聲中，遠上峰頭瞰碧空。地接金源山似戟，天低桑域海無風。慎郎
旗倒千年恨，趙暉卓正之亂兵尹相碑成一代雄。尹侍中確拓地寄語東偏衣

皮類，吾王神武厭興戎。

次三陟竹西樓韻

竹西簷影漾清流，潭上山光可小樓。佳節遠遊多感慨，斜陽欲去更遲留。曾聞
有客騎黃鶴，今恨無人狎白鷗。挾岸桃花春又老，角聲吹徹古眞州。

奉呈廉相國

形如枯木鬢如霜，屢荷君恩老益狂。喜舞不知曾破瓮，醉吟猶訝誤翻觴。欲叅

權思復

楚客三千履已括。坤文六四囊。夙夜論思身未暇。豈期呼我對碁房。

次江陵東軒韻

早日孤遊已隔年。此行重到豈非天。但聞依舊琴三尺。不問當時鑑半邊。風過竹聲初似雨。雲歸松翠欲生煙。坐看紅白花如海。却憶坡仙賦玉仙。

題德興君素屏

林樸

棄木滔滔逐末行。泰山還似一毫輕。投鞭直欲橫江去。嗜餅徒勞畫地成。得瓮舞時誰識破。吹竽混處謾求榮。莫將繪事迷人目。我愛天然古石屏。

楊若齋乘舟來訪飲舟中

韓脩

驪江煙雨泛扁舟。隨意隨流或泝流。千點岡巒同暗淡。兩邊花木各清幽。魚因知樂潛相趁。鳥識忘機近尙浮。不有詩仙居此地。豈能爲此畫中遊。

陪牧隱先生往天壽寺賞蓮次先生韻

花開花落幾回新。前度劉郎今老人。幸得高軒尋舊迹。追懷往事似前身。當時共飲荷心酒。此去多爲松下塵。物與我皆無盡處。坡仙眞箇筆如神。

九月十五日邀牧隱先生登樓翫月

雲捲長空露洗秋。無聲河漢近人流。濁醪亦足償清景。黃菊寧羞上白頭。地湧金波澄客位。天修玉鏡掛吾樓。請公莫厭留連夜。不見前賢秉燭遊。

次平海越松亭韻

宋因

地接逢萊方丈山。越松仙去幾炎寒。搜奇未遍嗟行迫。請暇無多覺住難。舊友不逢空記面。良辰雖樂孰開顏。明朝欲向溫泉去。携酒誰從寂寞間。

次江陵東軒韻

客程容易送餘年。臘盡江城雪滿天。歸夢共雲常過嶺。宦愁如海不知邊。濤聲動地來喧枕。蜃氣浮空望似煙。鏡浦臺空茶竈冷。更於何處擬逢仙。

病中詠瓶梅

楔遜

病愛仙人玉雪肌。愁無健步也能移。林逋遂有西湖樂。何遜還成東閣詩。小研虛屏供自照。疎燈斜月摠相宜。靜中忽契先天畫。已被枝頭數葉知。一月江梅亦有情。亂開花萼滿銅瓶。若爲折寄逢邊使。恨不移栽作弟兄。庾嶺樹曾雲外辨。羅浮春每夢中行。何由盡結和羹實。長笛猶教怨落英。

三月晦日卽事

大麥青青小麥齊。柳花如雪杏花稀。風前一鳥打人過。天際孤雲學鴈飛。轉愛晴光卽欲醉。却愁春事便相違。錦幘玉勒紛紛滿。日暮遙憐獨詠歸。

贈薛鶴齋

鶴上仙人薛上卿。齋居自愛鶴爲名。遠從小保傳眞骨。已托杜陵題雅情。赤壁秋高江月小。青田雨足石苔生。何緣許借冲霄翮。直結雲松巢大清。

九日思家

九日思家憶去年。移居東郭野橋邊。青山當戶開秋障。紫菊成畦帶晚煙。賴有詩書供雅好。都無車馬雜塵緣。西風古岸毗陵道。却駕扁舟興黯然。

船頭

船頭潺潺迸水聲。篷上浙浙晚風生。青山如龍入雲去。白浪捲花飛雪明。日落平疇群鴈集。天涯倦客一身輕。故鄉歲晏不歸去。拔劍長吟無限情。

病中奉寄平齋土亭二先生

許錦

久臥青氈欲破穿。何人記憶訪蕭然。平生多病知誰使。壯歲無成只自憐。事與世謀違素志。道隨時變慕前賢。秦來莫忘分燈讀。靜處長懷共被眠。

權大夫鎬靜亭詩次韻

楊以時

新亭迥出塵埃外。大隱不離城市巾。萬瓦參差分上下。衆山盤屈抱南東。恍如避世遊真境。政可披襟快北風。靜裏高懷誰認得。乾坤應與是心同。

景濂亭益齋所名

卓光茂

懶向人前強作顏。水亭終日對青山。吾家嗜好與時異。此地清幽非世間。風月無私隨處足。乾坤大度放予閑。逍遙自適忘機裏。臥看長空倦鳥還。

省直偶題

李玖

詭遇誰知範我馳。邇來人事盡皮毛。屠龍手亢竟無用。相馬眼高還見疑。祇辱壯心難掉舌。待乾唾面更低眉。由來野趣多違世。始覺儒冠誤一時。

寄全獻納

朴形

掖垣詩酒記同遊，分袂如今歲五周。賤子空馳塵土老，先生深愛水雲留。匡時策短慚無效，傲世情高肯有求。竹邑莠城元接境，君恩粗報欲歸休。

靈通寺西樓次古人韻

釋月窓

岩泉一派曲通林，老樹當軒積翠陰。秋至洞門偏洒落，雲還松嶺轉幽深。苔碑勝迹傳從昔，素壁新詩記自今。坐久精神更清爽，磬聲搖月夜沉沉。

天壽節人覲大明殿

李穡

大闢明堂曉色寒，旌旗高拂玉闌干。雲開寶座聞天語，春滿霞觴奉聖懽。六合一家堯日月，三呼萬歲漢衣冠。不知身世今安在，恐是青冥控紫鸞。

新寓崇德寺

千車萬馬九街頭，咫尺祇林境自幽。枸杞映階紅欲滴，葡萄滿架翠如流。僧窓寄食生前事，客枕思親半夜愁。屈指歸軒今到未，鎮江煙雨滿漁舟。

奉寄伯父

西風昨夜入庭柯，回首思親可若何。藍浦蕁絲飛醉席，鎮江秋色滿漁蓑。弟兄無故懽情足，父老相從樂事多。獨恨遠遊心况惡，黃塵眯目語音訛。

通州早發

鍾動樓門曉色明，獨鞭羸馬問前程。半空白塔見雲影，一曲清江聞棹聲。東北

山含王氣壯。西南地控帝都平。檣烏接翅桃花漲。穩送番商入鳳城。

南新店

文章可是立功名。自笑儒冠大瘦生。楊子著書空自負。馬卿題柱竟何成。人情不似春山色。客夢偏驚夜雨聲。過了長城風日好。何人盡我海邊行。

自京師東歸途中作

楊柳依依送我歸。此行還勝昔歸時。雖然物色無干涉。自是人心有喜悲。走馬看花猶到我。落驢在野未知誰。松都醴酒今應熟。狂興先判醉賦詩。一曲沙堤傍碧溪。毬庭東畔紫門西。陳言又切譏應急。見事殊遲意轉迷。窻近綠槐風細細。塔翻紅藥雨淒淒。重游未必年顏少。更草諫書雞欲棲。

又賦

病裏情懷每自悲。蒼天肯復管安危。時時對鏡憐黃瘦。事事臨機恨白癡。頗信流光如電影。又驚芳信到花枝。半籠物像知無力。驅使由來只小詩。

東山

東山高頂立移時。思入鴻濛自不知。飛鳥片雲俱縹渺。連岡斷壠自逶迤。秋風杜老破茅屋。落日山公倒接罹。吠畝忘君非我志。更將餘力念安危。

讀杜詩

錦里先生豈是貧。桑麻杜曲又回春。鉤簾丸藥身無病。畫紙敲針意更真。偶值

亂離增節義。肯因衰老損精神。古今絕唱誰能繼。臏馘殘膏丐後人。

曉雨

清晨小雨洒茅簷。客興悠然白柄鐙。江上平田煙漠漠。山崖細逕草纖纖。載花
侯館初開塢。沽酒詩家欲典衫。最是病夫謀口腹。海天歸思滿歸帆。

卽事

年來舊故漸相疎。瘦骨支持臥病餘。身後敢期千字詠。腹中空載五車書。德璋
北嶽移頻勒。靖節東臯嘯獨舒。回首南陽今寂寂。何人繼起孔明廬。
病後東風日日狂。馬蹄隨處泛崇光。花心欲寫天心巧。酒力能扶筆力長。達士
忘形如魏晉。可人携手喜參商。自憐春服猶成未。禊飲熊川趁夏涼。

有感

病餘身世兩蘧蘧。白髮如今數丈餘。豪氣何曾妾換馬。道情還似子非魚。雲煙
暗淡埋青嶂。樹木參差際碧虛。欲學蓋公清淨處。自憐衰老負吾初。

夜詠

消磨豪氣入醇真。漸悔高歌動鬼神。少日賦傳希有鳥。老年說着不祥鱗。楚囚
吟苦猶思越。孔聖名垂尙在陳。自念秋風吹又急。白頭難避庾公塵。

有感

先生未必是清流。白髮蕭然獨倚樓。晋相自尊寧仕宋。韓仇已報可封留。赤松

霽霽寒雲晚，碧柳依依細。雨秋畢竟安心無寸地。每從天際望歸舟，
卽事

幽居野興老彌清。恰得新詩眼底生。風定餘花猶自落。雲移少雨未全晴。牆頭
粉蝶別枝去。屋角錦鳩深樹鳴。齊物逍遙非我事。鏡中形色甚分明。

春晚

春晚南城遍綠蕪。寂寥庭宇鳥相呼。天陰欲雨連山暗。花落猶風掃地無。放膽
幾年揮筆札。乞身何日向江湖。古來豪傑能輕世。自笑區區一腐儒。

夜雨

夜雨空階滴不休。病餘情興轉悠悠。神仙已遠誰青骨。天地無窮我白頭。頗信
殘年如下瀨。可憐當日欲東周。祇今心跡誰能辨。高臥元龍百尺樓。

秋日

曉上高樓獨自憑。白雲青嶂共層層。一庭雨過苔逾長。萬里天晴日又昇。膽氣
崢嶸身老大。顏容枯槁鬢鬢鬢。乾坤幾度秋風起。回首江東憶季鷹。

雀噪

雀噪茅簷日欲西。遙憐晏子惜泥豁。王風幸矣興於魯。女樂胡然至自齊。衰草
淡煙迷遠近。白雲青嶂互高低。鳳歌忽向門前過。老我方將傳滑稽。

定州重九韓相命賦

鄭夢周

定州重九登高處。依舊黃花照眼明。浦淑南連宣德鎮。峰巒北倚女真城。百年戰國興亡事。萬里征夫慷慨情。酒罷元戎扶上馬。淺山斜日照紅旌。

重九題明遠樓

青谿石壁抱州回。更起新樓眼豁開。南畝黃雲知歲熟。西山爽氣覺朝來。風流太守二千石。邂逅故人三百盃。直欲夜深吹玉笛。高攀明月共徘徊。

甲辰十月贈江南使胡照磨

十載風塵首獨回。與君今日共含杯。三冬足用文章富。五世同居吉慶來。使節遠遊箕子國。歸舟却向越王臺。何時四海清如鏡。共上天台一笑開。

乙丑九月贈張溥

大明聲教暨東溟。蕃國年年貢帝庭。天子遠頒新寵典。使臣來續舊圖經。雞林樹葉心同赤。龍首山光眼共青。華夏卽今歸混一。臨分不用涕頻零。

渡渤海

之罘山下片帆張。不覺須臾入渺茫。雲接蓬萊仙闕遠。月明遼海客衣涼。百年天地身如粟。兩字功名鬢欲霜。何日長歌賦歸去。篷牕終日寸心傷。

大倉贈禮部主事胡鍊

男子平生愛遠遊。異鄉胡乃歎淹留。無人更掃陳蕃榻。有客獨登王粲樓。萬戶砧聲明月夜。一竿帆影白蘋洲。時來飲酒城南市。豪氣猶能塞九州。史掃一作爲下竿一作

江作

多景樓贈季潭

欲展平生氣浩然。須來甘露寺樓前。瓮城畫角斜陽裏。苻浦歸帆細雨邊。古鑊
尚留梁歲月。高軒直壓楚山川。登臨半日逢僧話。忘却東韓路八千。

皇都

尺劍龍飛定四維。一時豪傑爲扶持。山河帶礪徐丞相。天地經綸李太師。駙馬
林池春爛熳。國公樓閣月參差。始知盛代功臣後。共享昇平萬世期。

偶題

此以下五首
本使日本

海島千年郡邑開。乘舟到此久徘徊。山僧每爲求詩至。地主時能送酒來。却喜
人情猶可賴。休將物色共相猜。殊方孰謂無佳興。日借肩輿訪早梅。
夢遶雞林舊弊廬。年年何事未歸歟。半生苦被浮名縛。萬里還尋異俗居。海近
有魚供旅食。天長無鴈寄鄉書。舟回乞得梅花去。種向南溪看影疎。
弊盡貂裘志未伸。羞將寸舌比蘇秦。張騫查上天連海。徐福祠前草自春。眼爲
感時垂淚易。身因許國遠遊頻。故園手種新楊柳。應向春風待主人。
山川井邑古今同。地近扶桑曉日紅。但道神仙居海上。誰知民社在天東。斑衣
想自秦童化。染齒曾將越俗通。回首三韓應不遠。千年箕子有遺風。
客子年來已遠遊。又觀風俗海東頭。行人脫履邀尊長。志士磨刀報世讎。藥圃

雪深新綠嫩。梅村月落暗香浮。自知信美非吾土。何日言歸訪葉舟。

謝日東僧永茂惠石硯

海石曾經巧琢磨。上人持贈自天涯。噓呵滿面寒雲起。涓滴盈池片月斜。觸處精金鏘有響。洗來團璧滑無瑕。清晨點筆秋牕下。頓覺詩情十倍加。

登全州望景臺

千仞岡頭石徑橫。登臨使我不勝情。青山隱約扶餘國。黃葉繽紛百濟城。九月高風愁客子。百年豪氣誤書生。天涯日沒浮雲合。悵無由望玉京。

蓬萊驛示韓書狀尙質

昨日張帆涉海波。故園迴首已天涯。地經遼囂軍容壯。路入登萊景物多。客子未歸逢燕子。杏花纔落又桃花。同來幸有韓生在。每作新詩和我歌。

次延爽樓韻

朴晉祿

緣崖隱見有微徑。古邑依山山作城。礪确石田延雪早。崎嶇松磴入雲橫。欲成小隱真無策。縱說休官似不情。數日郡齋公事少。下簾高臥有餘清。

次江陵東軒韻

擁節觀風已二年。臨瀛浮水水浮天。宦遊如在金鰲頂。詩眼增明白鳥邊。軒戶早延東海日。簾旌半濕北山煙。傍人不識爲儒腐。將謂西垣玩世仙。

尹憲叔來言錦之禮賢驛。有龍家嫗者。龍家卽其子也。里閭高嫗年不敢

名而以子號之。年過百歲。強康無恙。去年以病死。渠云生七歲。見東征之師。蓋宋之季元之至元乙亥。乃其生年。而東征則辛巳日本之役也。嫗年一百又四矣。子太史氏宜做左氏記絳老人例。書之於策。予聞其語。姑題

四韻一篇。以爲後日張本云。

年已未作

李崇仁

錦郡山中有老嫗。一身無恙閱期頤。生先南取錢塘歲。語及東征日本時。過客皆驚顏似玉。曾孫自歎鬢如絲。自從德祐來洪武。終始宜爲太史知。

眼疾

阿睹昏花未易醫。彼蒼嗔我好看詩。逢人豈作嗣宗白。視物真成老子夷。翻覆多時尤有味。妍媸擾處竟無知。閉門塊坐蒲團上。遮莫兒曹笑大癡。

秋回

天末秋回尙未歸。孤城落照不勝悲。曾陪鴛鴦趨文陛。今向江湖理釣絲。骨自罹讒成大瘦。詩因放意有新奇。明珠薏苡終須辨。只恐難調長者兒。

九日謾成

登臨處處好山川。只恨無人送酒錢。藍澗一詩今膾炙。龍山當日卽神仙。天邊白鴈秋聲遠。籬下黃花晚色鮮。想得故園諸子弟。尊前笑我未歸田。

丙寅十二月六日赴京師

弧矢當年志四方。如今奉使幸觀光。江分燕尾成天塹。山似龍蟠遶苑牆。金碧

雲開尊象魏。綺羅風動照康莊。神京制度超前古。說與鄉人語合長。

元日奉天殿早朝

煌煌蠟燭照彤墻。宮漏聲催動曙光。彩仗分開庭上下。赭袍高拱殿中央。梯航玉帛通蠻貊。禮樂衣冠邁漢唐。朝罷更叨霑錫宴。東風吹暖泛椒觴。

登州蓬萊閣感懷

征鞍初卸郡城西。又向峰頭杖瘦藜。暘谷波翻看日出。蓬萊雲近訝天低。坡仙絕唱誰能和。烏客幽魂每欲迷。自是登臨多古意。非關遊子獨悲淒。

定遼衛

東連靺鞨北幽燕。沃壤漫漫過海壖。勛舊向來開幕府。懷綏不必用戈鋌。風吹畫角梅初落。日映朱旗火欲燃。漢代聲容無遠近。天驕那得敢窺邊。

遁村寄詩累篇次韻錄呈

金九容

百年春夢倚南柯。一陣新涼感歲華。風月有期長作伴。乾坤乘興卽爲家。李侯不悟倉中鼠。杜簿猶疑蓋底蛇。從此共成真隱遁。莫將虛譽向人誇。

送江陵徐廉使

載酒東郊欲暮秋。菊花叢畔送君游。一聲鴈度青天外。千里人歸碧海陬。鶴髮慈親曾斷織。綉衣使者正停輜。遙知州郡爭奔走。獻壽堂前喜氣浮。

寧海

卞仲良

二月江城霽景遲。芳洲散策動春思。少年流落傷豪氣。半日娛歡遇舊知。梅柳
開時難把酒。樓臺多處謾題詩。京華北望幾千里。每賦芘亭獨自悲。

東文選卷之十六

終

東文選卷之十七

七言律詩

書懷

尹紹宗

孤身野服謁天門。玉色溫溫授正言。更把何心謀性命。重懷古義誓乾坤。未封社稷安危計。大負君王眷拔恩。千載不欺皇上帝。陳湯劉向缺忠魂。公為正言。
倖臣金與慶。斬寵宜廣。大同舍覺之。希與慶旨。或以他事。効公使不得。上疏請黜。漢書曰。今外家日盛。必危。劉氏吾幸。以同姓。蒙漢厚恩。吾而不言。孰當言者。遂謂湯曰。極諫公意。蓋以湯既為鳳所信。任若不為漢計。洩向言於鳳。則鳳必先去矣。向之封事。安得上乎。深嘆今舍之不然也。

淡庵白忠簡公文寶挽詞

佛法東方久顯行。先生奮起接周程。喟然引聖排邪說。卓爾知天着踐形。踐形
佛所著性。為命自今誰潤色。發朦無復仰高明。悠悠萬世重泉下。舊友從游我栗

亭與栗亭及第同年

仰巖與李詹同賦

錦城城在海南邊。大姒家邦五百年。一葦甄王歸命路。萬嶽顯廟誓師天。興龍寺外浮佳氣。開界院前生白煙。聖祖樓船迎此地。東征今日思悠然。

鎮守西江作

鄭思道

將軍兀坐鬢如絲。風雪連江五夜遲。天近鸞凰正翔集。路長騏驥倦驅馳。敢希令尹三無懼。每憶陳平六出奇。刁斗聲殘無夢寐。呼燈援筆寫新詩。

遊高住寺

偶出村廬成獨遊。尋僧馬上更悲秋。長松偃蓋如迎送。疊嶂開屏解挽留。坐久夕陰生邃壑。風來霜葉亂虛樓。團欒煮茗同清話。忘却悠悠放逐愁。

遊東巖

無家遠客寄山中。試得禪家定裏功。脚困危梯緣絕壁。眼明飛閣聳層空。疎鍾隱隱催西日。高鐸鈴鈴響北風。夜坐蒲團心正靜。老僧無語佛燈紅。

得疾請寓安成立家秋雨連日

秋雨淒淒久未晴。煙林寂寞斷人行。愁添巷柳空濛色。睡破茅簷點滴聲。獨自思家嫌地遠。敢能披霧覩天明。漫漫寒夜知何刻。喜有隣雞不廢鳴。

次金寺丞赴錦州韻

康好文

錦溪形勝似朱陳。地僻天深俗亦醇。十里絃歌武城宰。一區煙火葛天民。蒼苔到處經過少。紅杏開時勸課頻。幸有貧居在楸邑。南遊觀政不違春。

壬寅清州作

元松壽

去歲鸞輿出鳳城。雲離雨散淚盈盈。誰知今日猶存喘。却想當時似隔生。頭白

忽驚聞老大。眼明深喜見昇平。作詩不是真乘興。聊記臨津路上行。

次安政堂村居閑詠

綠野堂開洞裏天。世塵終不染江煙。新詩滿眼山當戶。喜氣渾家水漱田。兩岸微風楊柳外。一池明月藕花前。但教有酒身無事。安用垂名動萬年。

挽李密直彰路

鄭道傳

憶曾受業益齋門。獨立當時亦有聞。積善盡知餘慶在。老成雖遠典刑存。金樽美酒春長滿。玉子紋楸日又曛。最恨難將仙掌露。一杯救得病文園。

題劉仙巖

釋宏演

山遶孤村小逕隈。遠林暑薄訪蓬萊。鶴飛雲洞知仙起。童掃玄關待客來。泉至石渠鳴暗玉。火存丹竈活寒灰。忽聞鐵笛空中響。十里松花一夜開。避暑看山上石臺。紫霞宮殿一時開。松陰圍座青凝嶂。榭葉連山翠作堆。童子雲中採藥去。高人竹外抱琴來。汲泉旋煮山中茗。不用蒲萄浸酒杯。

送人之臨江

舉目江村楓葉飛。霜華滿地侵人衣。正憶慈親歲年老。怕聞客子鄉里歸。湖海魚龍秋水冷。東南耆舊曉星稀。碧嶂清江可行樂。如何不採故山薇。

遊紫清宮

洪崖先生舊所隱。階下碧桃花飄零。夜光出井留丹藥。春露浥松生茯苓。天女

或携綠玉杖。仙人自讀黃庭經。隣寺歸來不五里。回頭望斷煙冥冥。

警世

釋懶翁

金烏東上月沉西。生死人間事不齊。口裏吐將三寸氣。山頭添得一堆泥。塵緣擾擾誰先覺。業識茫茫路轉迷。要脫輪回無別法。祖師公案好提撕。寒暑催人日月流。幾多謹喜幾多愁。終成白骨堆青草。難把黃金換黑頭。死後空懷千古恨。生前誰肯一時休。聖賢都是凡夫做。何不依他樣子修。

驪江宴集詩

權近

黃驪山水自清奇。冠蓋相逢若有期。別院絃歌筵秩秩。長江雲月夜遲遲。浮查縹緲通霄漢。飛雪霏微落酒卮。幸與諸公陪盛集。風流文彩勝當時。

送林行人使還

銅柱扶桑四海遙。盛時聲教煥文昭。裕孫成德湯傳甲。協帝重華舜繼堯。曆改月正尊大統。天開星象供中霄。臨分贈別無長策。莫謂吾謀似繞朝。

航萊州海

十丈風帆萬斛船。雲開蒼海渺無邊。星垂雪浪相涵映。水拍銀河共接連。可向半洋悲壯士。不須三島問群仙。舟中偃仰堪乘興。自是浮槎便上天。

金剛山

雪立亭亭千萬峰。海雲開出玉芙蓉。神光蕩漾滄溟近。淑氣蜿蜒造化鍾。突兀

岡巒臨鳥道。清幽洞壑秘仙蹤。東遊便欲陵高頂。俯視鴻濛一盪胸。

耽羅

蒼蒼一點漢羅山。遠在洪濤浩渺間。人動星芒來海國。馬生龍種入天閑。地偏民業猶生遂。風便商帆僅往還。聖代職方修版籍。此方雖陋不須刪。

次松堂趙政丞韻

沙堤依舊倚門斜。喬木三韓積善家。道上問牛憂國功。朝中薦鶚進賢多。勳臣鐵券聯雙軸。冢相麻書疊五花。已道魯論分二半。更加一半著功何。

夜泊金陵

趙浚

蘭舟綠水晚荷紅。夜泊金陵一夜風。老柳長堤楊子渡。寒花細草館娃宮。百年榮辱人將老。六代興亡鳥沒空。天下莫強仁可結。鍾山隱隱月朦朧。

次原州東軒韻有懷元秉甲

鐵關胡馬若風行。一劍功高白面生。許國孤忠應貫日。忘身大義便長城。至今父老蒙餘澤。後世英雄揖盛名。我亦掃清敷奏已。杏花春雨耦而耕。

江都夜泊

嶽色江聲共寂寥。朱樓何處夜吹簫。月明淮水霜初落。秋盡江都柳未凋。去國頻驚佳節過。繫舟還憶故園遙。可憐煬帝春遊處。一色蘆花欲晚潮。

日月寺壁上

平生疎蕩愛清幽。遠上寒山古寺秋。一望前朝仍拭淚。都忘萬事獨登樓。崧巒
凍雨寒聲急。紫洞歸雲翠色浮。安用栖栖居寵利。飄然欲與赤松遊。

角山獨釣

霜落江寒鴈正飛。千帆一色夕陽時。高冠扶國有榮辱。短棹釣魚無是非。萬頃
稻梁黃世界。半江秋浪碧琉璃。蘆花如雪山如畫。薄暮歸來雨滿衣。

次旋善客舍韻

溪山初雪少人行。乘興高吟到鳳城。水疊雷轟衝地入。峰層屏束半天橫。引杯
看劍寬吾志。攬轡觀風檢俗情。滌蕩東溟當有日。居民洗眼待澄清。

次沙門島壁上韻

朴宜中

曉日初昇宿霧收。仙宮金壁耀沙頭。三隅鼎峙山朝拱。四面環回海漫流。激石
驚濤常湧雪。含風虛閣自生秋。無窮爽概應難盡。故作新詩記勝遊。

在固城寄舍弟

成石璘

舉目江山深復深。家書一字抵千金。中宵見月思親淚。白日看雲憶弟心。兩眼
看花春霧隔。一簪華髮曉霜侵。春風不覺愁邊過。綠樹鶯聲忽滿林。

寄題吉再冶隱

山下數間溪畔廬。手栽松竹碧條疎。細君洗爵開新醪。稚子挑燈讀古書。玩世
肯爲中散鍛。韜光正似子陵漁。門前官道多冠蓋。高臥從渠自覆車。

題南谷先生詩卷

許國孤標曠斗南。歸來谷口逕開三。晚年身世鳥飛倦。少日功名蟻戰酣。步履春風觀物化。班荆月夕聽農談。江湖廊廟心何異。爲愛吾廬睡味甘。

新春感懷

楔長壽

新年萬物俱含新。九見鵲峰龍岫春。草池未碧不成夢。梅花滿枝如笑人。中原安得息豺虎。北闕幾時來鳳麟。形迹從教猶碌碌。謾傾濁酒偕比隣。

漁翁

不爲浮名役役忙。生涯追逐水雲鄉。平湖春暖煙千里。古岸秋高月一航。紫陌紅塵無夢寐。綠蓑青蒻共行藏。一聲欸乃歌中趣。那羨人間有玉堂。

舍弟延壽來江村喜而成詩

三年費我鵲鶴思。一日那堪十二時。形影自憐孤且弱。光陰還覺老將衰。紫荆花樹歡娛阻。青草池塘夢寐隨。邂逅相逢悲喜處。春風尊酒漢江湄。

高秋感興

居庸關下古昌平。龍虎臺前舊帝京。半夜涼風吹毳帳。一盃清露出金莖。三千武士嚴輿衛。十六天魔適性情。萬里却嗟行樂地。淡煙衰草滿空城。

次清心樓韻

都元興

十載還憑此檻端。美人應笑變朱顏。兩竿落日明孤塔。一帶長江抱衆山。野鶴

遠盤紅樹外，征鴻高沒碧虛間。飽聞前輩遊湖事，今見灘頭畫舸閑。

陋巷

鄭摠

陋巷生涯只一瓢，門堪羅雀轉寥寥。樹頭病葉知秋下，階面新苔挾雨驕。懶慢有如鬻叔夜，醒狂或似蓋寬饒。邇來三徑荒松菊，五斗今人尚折腰。

弓王故都有感

時諸軍都摠
公駐軍于此

姜淮伯

孤城蕪沒帶疎林，斷碣燒殘歲月深。鼓角聲高風不止，旌旗影動日將沉。山含故國千年恨，雲抱長空萬里心。自古興亡皆有致，願因前轍戒來今。

春日寄昆季

旅牕簷雨苦難聽，况復萊衣隔鯉庭。心與暮雲歸不駐，愁隨春酒醉無醒。江山此日頭先白，骨肉何時眼更青。宦路險夷曾歷試，是身天地一浮萍。

奉天殿早朝

御溝楊柳正依依，月上觚稜玉漏遲。環佩丁當鸚鵡集，羽林磨戛虎賁馳。螭頭忽暗香煙動，鳳尾徐開綵仗移。稽首紅雲瞻肅穆，日光先照萬年枝。

重遊合浦

李詹

天機人事兩參差，城郭依然似舊時。細竹更長新出笋，殘花還有未開枝。江湖半夜孤舟夢，幕府十年千首詩。此日南樓風景好，元戎何處駐旌旗。

奉送同年郭正郎赴寧越任

城郭蕭條石逕斜。吏民相半十餘家。溪春夜急天初曉。崖蜜秋深菊正花。風俗有時咨古老。官曹無事廢朝衙。臥治小郡君休薄。竹馬來迎亦可誇。

宿滅浦院樓

長江袞袞向東流。野闊山開天盡頭。舟楫幾年人渡水。風塵萬里客登樓。煙籠杜子清淮夜。月小蘇仙赤壁秋。歧路向南通巨鎮。征驂時到此中留。

寒食

今年寒食滯京華。節序如流苦憶家。楊柳愁邊初弄線。荼蘼雨後欲生花。尋春院落多遊騎。上墓郊原集亂鴉。物色漸新人漸老。慕真何處鍊丹砂。

蔚州雜題

雲雨紛紛作晦明。鴻毛直似太山輕。天涯孤枕故鄉夢。月下誰家長笛聲。骨肉百年三遠別。波瀾萬丈一浮生。莫嫌席地南來盡。還有滄溟眼底平。

題宣孝院樓

勞生孰與道塗長。雲際東流各杳茫。事往江山皆寂寞。秋晴雲物已淒涼。劉公此日髀生肉。杜子今年鬢帶霜。畢竟功名惟兩字。登樓獨眺久彷徨。

新都雪夜效歐陽體

鄭以吾

繡屏圍暖酒初酣。不覺庭除勢已嚴。夜靜更無風掃地。窗明疑有月窺簷。茅茨萬屋平初合。蓑笠孤舟重乍添。曉望終南渾一色。應餘馬耳出雙尖。

登山題惠上人院

卞季良

山徑迢迢半入雲。茲遊足可避塵喧。百年身世客迷路。滿壑煙霞僧閉門。晴澗束薪隨野老。秋林摘實共寒猿。我來欲問楞伽字。合眼低頭無一言。

村居卽事寄京都李先達

村居寂寞亂峰前。數樹柔桑二頃田。斲藥每從林下步。曬書偏向日中眠。江天雲盡見歸鴈。山竹月明聞杜鵑。回首兩鄉何限意。新詩一首爲君傳。

將赴京都長湍途中寄呈鼎谷

蓬轉東南影與身。舊情誰復似雷陳。病深藥物渾無效。吟苦詩篇頗有神。虛白連天江郡曉。暗黃浮地柳郊春。自憐令節情懷惡。題句時還寄故人。

題吉注書詩卷次獨谷韻

冶隱先生歸弊廬。雲情自與世情疎。門垂彭澤五株柳。架有盧仝千卷書。早把利名同草芥。好將心事付樵漁。一區古國山溪勝。或棹孤舟或命車。

送尹叅贊都觀察江原道

陳義貴

少年杜閣揭清風。注意安危獨在公。棠芟幾回持節鉞。柳營今復駕英雄。煙花爛熳鶯啼外。雪浪蒼茫鳥沒東。攬轡行吟沙路永。白鷗疎雨小桃紅。

奉送雨亭趙恩門

璞

出鎮西北面

尹淮

前古箕疇禮義邦。至今遺俗尙淳厯。樓臺縹渺臨平野。雉堞巍峩映大江。分闔

英材誰與並。運籌長策固無雙。也應期月恩威遍。會見明時築受降。

敦化門晨鍾

閭闔鍾鳴夜向晨。宵衣元不待鷄人。千門金鑲須臾闕。五彩雲旗次第陳。日表
溫溫臨寶座。朝儀濟濟拱楓宸。勒功將相懷忠盡。爭進謀猷補聖神。

柳議政觀挽章

如海清風傳說星。黃扉白屋短長亭。堂堂朝著有元老。袞袞相門生列卿。國論
不須稽卜筮。山頽無復見儀形。曾叨家叔同年契。執紼難禁老淚傾。

奉使日本有感

朴瑞生

一飯聊申一祝辭。君恩偏重遠游時。盤飧日日多兼味。尊酒時時滿大卮。異卉
幽花隨處好。回山曲水到頭奇。不因奉使來東域。天下奇觀總不知。

卽事

四山松櫟一茅廬。坐負墻暄睡味餘。衣縫每捫王猛虱。漁竿空釣呂望魚。軒裳
已是無心得。金玉何須滿意儲。芋栗自堪謀送日。盤飧不必蟹爲胥。

重九有感

曹庶

閑中忽念趁良辰。走到東陽共主人。溪繞樓臺涵落照。驛分南北動行塵。風煙
淨盡山如畫。草樹彫零菊更新。與客登臨多感慨。秋光不老一壺春。

賀李中樞貞幹年七十壽九十慈親

契楮

共羨高門積慶長。斑衣皓首奉萱堂。怡愉志篤晨昏念。烜赫恩承雨露香。映日
玉杯浮激灑。過雲金縷雜峩洋。會須續製唐雞曲。萬古三韓樂府藏。

同前

鄭招

慈親九十尙康寧。晴日高堂敞畫屏。身上彩衣浮喜色。手中金盞進遐齡。羅紈
聲色盈前席。簪履雲仍列後庭。惆悵早孤今白首。看君此事涕頻零。

寄梁使君汝恭

慙也端宜世我疎。天涯且喜故人書。羸形有似喪家狗。濡沫誰憐涸轍魚。良會
謾勞馳夢想。窮愁唯有話樵漁。金雞何日流洪澤。匹馬相從展素摠。

次韻

梁汝恭

莫嗟西北信音疎。一月三回圻寄書。人訝塞翁非失馬。世傳莊叟卽知魚。雖然
去作天邊戍。不似行吟澤畔漁。飛詔賜環應有日。客中懷抱向誰摠。

次李而立見寄之韻

平生交契卽雷陳。出處常論不爲身。自是朝廷無闕失。况今風俗已眞淳。敢將
梨掖封章手。忍向苔磯把釣綸。慈父由來忘子過。聖明終不棄愚臣。

題砥平東軒

釋丁近

巨嶽撐天似覆盆。居民挾岸水平分。臨窓赤葉風前舞。出谷疎鍾月下聞。靜裏
有聲憐石澗。閑中多事笑山雲。主人清節將誰比。却恨鈴齋欠此君。

興海鄉校月夜聞老妓彈琴

朴致安

七寶房中歌舞時。那知白髮老荒陲。無金可買長門賦。有夢空傳錦字詩。珠淚幾霑吳練袖。薰香猶濕越羅衣。夜深窻月絃聲苦。只恨平生無子期。

次江陵東軒韻

俞孝通

棠芟奔馳足一年。區區裁決愧人天。扶桑日出鯨波裏。大嶺雲連鴈塞邊。鏡浦夜涵羅代月。寒松朝帶濺時煙。坐來景物非塵世。疑是從遊禦寇仙。

寄柳泰齋

金久尙

君在南邊我北邊。昔年同戲夢依然。淚因別久成河落。心爲愁深貯火燃。沙暖海棠紅勝錦。日晴江柳綠如煙。何時握手成佳會。兩地相思路二千。

次密陽嶺南樓韻

承綸來自九重天。有嶺南樓忽在前。碧瓦玲瓏晴日表。朱欄照耀彩霞邊。寒聲滿座江噴雪。翠色凝簾竹鞞煙。勝概遙聞年已久。登臨更踏雨雲筵。

松京懷古

李孟昀

五百年來王氣終。操鷄搏鴨竟何功。英雄一去豪華盡。人物南遷市井空。上苑煙霞微雨後。諸陵草樹夕陽中。秋風客恨知多少。往事悠悠水自東。

次鐵原聚錢州

世上難兼鶴錢州。此亭形勝解人愁。青山似畫圍平野。綠樹含風動素秋。麗祖

乘龍何渺渺。弓王失鹿亦悠悠。憑闌賸得胷中豁。雲表何須汗漫遊。

賀李中樞年七十壽九十慈親

黃鉉

慈顏九表尙平安。七十霜髯爲奉歡。滿座佳賓皆國族。趨庭群季盡朝官。金樽酒冽春方暖。鳳管聲催日未殘。世世高門知有慶。更看奕葉長芝蘭。

次鎮南樓韻

許稠

爲緣清景倚新樓。縱目初驚一葉秋。萬戶炊煙青靄靄。四山佳氣碧浮浮。分符留守二千石。杖鉞觀風五十州。自幸此時當盛際。雞鳴狗吠達窮陬。

次安東映湖樓韻

崔修

春滿江樓景氣多。詩人清興尙來加。一城桃李潘安縣。兩岸園池習氏家。牧隱新文珠泣月。陽村麗句筆生花。南巡往事何須問。老樹潮侵臥作查。

次驪江清心樓韻

辛碩祖

世事紛紜日幾端。登臨此夕偶開顏。江邊老樹不知歲。天末遙岑何處山。仙境肯尋三島外。風流却勝五湖間。忽忽仗鉞皇華使。胡奈奔馳未暫閑。

寄子安命

李那

朔風號怒雪飄揚。念汝飢寒感歎長。色必敗身須戒慎。言能害己更詳量。狂荒結友終無益。驕慢輕人反有傷。萬事不求忠孝外。一朝名譽達吾王。

用姜日用賦牧丹故事寄呈翰苑

權躔

沉痾數月殆將蘇。行步欹斜信杖扶。眼底鴉花隨物象。耳邊蛙樂雜笙竽。玉堂群彥褰高鳳。金匱千秋繼董狐。待制三年慚不分。傍人應咲畫葫蘆。

哭尹大提學淮

朴彭年

孫桐祖粟繼箕裘。華國文章第一流。楊子夢中成吐鳳。庖丁眼底欠全牛。人間未畢抽金櫝。天上誰催記玉樓。惆悵九原難可作。遺書應傍茂陵求。

題八景圖

安止

虔州異景未曾知。一幅生綃恍惚移。殷壑鍾聲明月夕。傍林嵐彩雨晴時。日斜浦口帆飛疾。雪滿沙頭鴈下遲。不出戶庭看盡處。渺然幽興入新詩。

送徐剛中兄弟榮親歸大丘

河緯地

一家文武姓名香。兄執金吾弟玉堂。鶴髮北堂應孝養。錦衣南國已輝光。鶴原先後君堪羨。荆樹參差我獨傷。回首月波亭下路。滿山松柏鬱蒼蒼。

次茂朱寒風樓韻

金淡

半在山崖半水邊。柴門茅屋度年年。版籍未刪方外地。巡遊如入洞中天。浪傾太守丹霞液。錯和諸公白雪篇。共幕二郎先占句。才名定合在盧前。

碧松亭禊飲

權探

碧松亭下華山陞。雲淡風輕日正遲。宛似羲之脩禊處。還如點也詠歸時。斜陽影裏傳觴急。長笛聲中舞袖垂。嗟我不才叅席末。斯文高會共論詩。

移病在家書懷寄仁叟

李永瑞

有誰能記一迂儒。久矣離群獨索居。唉殺昌黎悶已賦。任他中散絕交書。家貧未辦賢人酒。地僻難邀丈者車。攀附青雲既無分。鹿門歸計可虛徐。

無絃琴

淵明自有一張琴。不被朱絃思轉深。真趣豈能聲上得。天機須向靜中尋。鯤絃鐵撥渾閑事。流水高山謾苦心。古調未應諧俗耳。悠悠千載少知音。

齋室讀黃庭內景一篇其久視長生之術不過離世累斷人慾二事耳復用前韻寄景醇

姜希顏

仙境何曾比世間。瓊樓玉殿坐中寒。聽雞馳道人應倦。揮麈談經我則閑。沉水香燒煙蠹蠹。步虛聲斷露溥溥。老君高拱青冥上。俯鑑丹忱始破顏。羽客生涯泉石間。山深空翠滴衣寒。乾坤妙用離和坎。藥餌功夫忙與閑。神水華池初合配。黃茅白雪久成溥。吾生當日遼東鶴。千歲歸家依舊顏。莫怪蒼華忽滿顛。子能脩煉可長年。葛洪求令因成道。梅福休官便學仙。換骨迴陽應有訣。留形住世豈非緣。已聞青鶴是鄉洞。歸隱何須負郭田。晚歲人皆笑我顛。我顛將欲制頽年。久知世上夸侏子。未及林間自在仙。白日有時常導引。碧山無處不攀緣。終然密盼成奇妙。一以張家力服田。

聞量移之命偶吟

公丙子年謫居金海
己卯年從便還公州

成 燻

見逐明時乃老何。四年憔悴二毛多。漢城客作益城客。銀海波添金海波。自擬屈原吟楚澤。誰憐賈誼謫長沙。聖恩已許歸田去。應向公山作酒魔。

次襄陽樓韻

金禮蒙

澄清敢望范公前。遊賞猶能及壯年。影逐峴山官道月。夢尋華岳御爐煙。恩深欲報嗟無地。任重難堪愧有天。佳境逢來饒逸興。興狂還似飲狂泉。

奉寄徐剛中

宋處寬

日長城下古茅廬。歸去吾今已卜居。老病維摩空愛睡。清貧杜甫酷耽書。匙秋流滑長腰粒。盤日行鱗巨口魚。何夕廣津津上路。一壺相訪醉騎驢。

送具檢詳從事關西

朴仲孫

出處行藏不可期。一文一武是男兒。元戎望重裴丞相。司馬才雄韓退之。聖德自來覃異域。天驕那得犯邊陲。從容談笑妖煙熄。莫向關西惜別離。

上綾城具左相

崔士老

落魄功名似積薪。晴窓萬卷更誰親。材無適用還宜散。酒不能賒始覺貧。末路堪悲身作客。此心猶與物爲春。莫言陋巷常岑寂。上相頻過是故人。

次成川樓船詩

朴元亨

江上羣峯劔樣尖。峯前江水正接藍。鸚洲芳草嫌風亞。滕閣長天對鏡涵。春老柳堤添綠線。雨晴山市簇青嵐。使君舟楫終收用。政化如今見二南。

登巨濟撫夷樓

權攀

聖聖相承鎮四溟。戎夷賓服自來庭。戈鋌不用封疆靜。戰伐無聲海岳寧。千尋浩浩鯨濤白。一點茫茫馬島青。幸是大平無一事。元戎閑臥亞夫營。

次古城板上詩韻

金壽寧

窈窕磨雲最上端。嶺嶢老馬不勝鞍。舊聞鳥道三千里。今陟羊腸百八盤。宿霧輕嵐衣半濕。懸崖絕壁眼雙寒。憑君莫話東征事。鬢髮西風又欲斑。

謾成

蓬轉東西滿面塵。白雲高處望鄉頻。未成報國寧辭勩。不早歸田正坐貧。三徑尙深移竹興。青門多謝種瓜人。世間事了終須退。藜杖相尋綠野春。

次金天使湜詩

海天飛駟獨登樓。豪氣元龍浩不收。漠漠長空迷去鳥。深深芳草沒行牛。分溪白石灘聲急。夾路青山樹影稠。好雨已隨車馬至。陂塘五月欲先秋。

謫居次韻徐剛中學士見寄

尹子潔

謫來雙鬢白無餘。驅馬鄉關信所如。偃蹇雲山堪晦迹。衰遲歲月謾成書。自知老木難重活。休道寒灰得再噓。爲報他時按南國。星軺肯許訪三閩。

題昌原寒碧樓

李石亨

平生不學冷儒酸。每上高樓便倚欄。山帶煙光入簾碧。溪涵竹影浸人寒。還疑

鶴背三天近。試見鼇頭四海寬。自笑老來狂更甚。風情詩興幾時闌。
山勢巖嶢控海來。際天形勝望中開。雲飛萬古曾何限。鶴去千秋不復回。斷岸
有臺空皓月。殘碑無字祇蒼苔。悠悠往事憑誰問。長揖高風酌一盃。

蔚珍東軒韻

高城越絕鎮邊陲。直壓滄溟勢最奇。逐浪雄風吹海倒。干霄老木倚雲垂。思鄉
肯作登樓賦。把酒聊吟問月詩。邂逅相逢盡萍水。欲忙歸去去還遲。

途中卽事

悠悠馬上送烏蟾。忽忽人間換冷炎。山腹雲歸橫翠帶。海唇松掩長蒼髯。魂驚
絕棧泥仍滑。病怯寒風雪更添。弧矢當年曾結意。百千辛苦也無嫌。

東文選卷之十八

七言排律

和羅倅李先生寄金郎中緣

金富軾

今日朝廷寂異聞。李公聲價獨超倫。倦遊平昔諳時態。力學多年識道真。皎皎胷襟蟠古劍。凌凌風節拔霜筠。雲間羽翮橫千丈。天上官班接七人。未報國恩期粉骨。敢將私計避嬰鱗。嚴如夏日摧姦議。輕却秋毫許國身。巨室縮藏空睥睨。懦夫感激立忠純。一言已破邦家弊。大用方宜社稷珍。誰謂便辭青瑣闥。翻然出牧錦城民。無功在位寧爲退。不義多財豈似貧。襦袴疲氓誠小幸。牋毫餘事與誰陳。宸心委任維無外。文石何人蹈後塵。

上首相詩

金克己

昂宿騰精降九天。文章賈馬德淵騫。棟樑異器宜支廈。舟楫長材稱濟川。鼎位當年提玉鉉。台階拱北冠珠躔。春風惠澤還齊相。夏日威名襲晉賢。妍醜易分徵鏡下。重輕難避亮秤前。衆英振拔皆堪羨。孤迹衰窮獨可憐。柳壁佐戎雖半稔。花塲揮翰費多年。新官考績雖居後。舊署論功合處先。初與下流甘鷓退。忽聞前例望鶯遷。倘蒙一手霑陶鑄。增秩何妨七品聯。

城樓感興集句

林惟正

獨上邊城城上樓。野晚煙疎雨不勝愁。李成青山與我長爲伴。鄭棧白髮無情已
 滿頭。羅便取瑟觴供笑語。葉不莫辭車馬暫遲留。楊蟠樓臺影動中流月。李蟋蟀
 聲生半夜秋。羅沽酒獨教陶令醉。子瞻題詩應許惠連遊。楊蟠閑鐫溪石爲碁局。西
 咲折花枝作酒籌。樂天萬事早知皆有命。公濟人生萬事不須謀。荆公

普門寺

李需

海上穿雲線路通。玉毫光透水精宮。眼前瀲灩瑠璃碧。舌上分明齒落紅。頂戴
 莊嚴無量壽。手回摩撫善財童。回旋紺髮垂蒼玉。掩映圓光繞彩虹。度世真功
 懸寶掌。憫人愁色著慈瞳。經抽卷卷披黃机。燈列行行罽絳籠。一佛應緣開鷲
 嶺。五丁無計達蠶叢。簸掀怒木金猊吼。搪突奇巖鐵象雄。殿閣盡吞千世界。樓
 臺直掛一虛空。林僧長在畫屏裏。江叟難逃明鏡中。巖下觀空黃面老。庭中聽
 法綠髯翁。黎床作穴多年事。霞衲成層幾臘功。問路歸來何處客。接賓溫雅主
 人公。九條衣拂田文曬。三箇柴成成品字烘。向壁寥寥眉帶雪。烹茶習習腋生風。
 寅朝擊磬三邊靜。乙夜鳴鍾九野豐。五體投來疑欲碎。雙趺結處兀如聲。退殘
 戎馬安遼北。馴養靈龜鎮海東。在一侯門人有幾。第三番客意僉同。營齋一月
 殷勤祝。繡邸千年福壽洪。

教坊小娥

梁楚歡情結灌瓜。從今塞外戡干戈。芙蓉幕府香塵靜。翡翠樓臺瑞氣多。世祝

我公長綠髮。天分仙女遣青蛾。樂章已了三千曲。稚齒俄臨五六儺。若不胎中成結習。誰能膝上教絃歌。晝戲粧閣珠爲箔。夜瑣香閨錦作窠。君子不曾耽獨翫。嘉賓共賞樂如何。侍中頂上蟬冠貴。列相頭邊燕尾峩。金穴共承偏雨露。玉笙長弄定風波。烏紗小小裁華帽。鳳繡微微製舞靴。千種風流朝玉闕。九重梅杏映金坡。巧將雲傘迎王母。還奏霓裳引月娥。樹捧珊瑚頰暈醉。桃攢琥珀纈。痕醅瑤琴韻。暖粘紅日。玉板聲寒凍碧渦。羯鼓百枝乾欲霑。鶻衫雙袖疾如梭。一開咲臉彈圭璧。再賞歌喉殿綺羅。兩部老工慙塞澁。三行秀色愧蹉跎。欲知勝事逢千載。全賴新都擁一河。更感周公成洛邑。不妨韓愈頌元和。沉香舊服今猶在。記事冰毫口自哦。

次韻

李奎報

六實呈祥一蒂瓜。人心混合偃金戈。地封萬戶名藩大。天與千年樂事多。欲共簪紳浮酒蟻。盡呼紈綺列眉蛾。龍膏遍熟同燈夕。鼉鼓爭拚勝歲儺。別有女童皆卯歲。簇成仙隊善嬌歌。雛鶯舌澁猶啼樹。稚燕翎成始出窠。只爲伶才生得耳。不然亂齒慣知何。六銖輕製紅衫細。雙角歧丫綠髻峩。纔是離懷唇免乳。誰教邀寵眼回波。檀槽欲抱微揜袖。綵毯將行更整靴。高閣快登如坦道。巍階穩踏似平坡。禁闈未必無名媛。新伎應稀見小娥。因想九重疎宴集。未容一日示醺醅。遣供宸昝資歡緒。不怕君顏轉笑渦。嚶亮絃聲鳴咽水。翩躚舞態往來梭。

纏頭不計翔鸞錦。隨意兼拋織鳳羅。恩許六宮同翫賞。勅張百戲任蹉跎。當冬頃刻廻春氣。入夜從容到曙河。今古罕聞斯事勝。君臣孰有此時和。美哉文閣能詩客。贏得千金一筆哦。

次賀琴平章得外孫

咸郎才調世皆知。奠鴈高門早叶龜。英物夜生光照室。賀賓朝集祗成帷。不因外姓求佳壻。豈向諸孫得異兒。要待識聲溫大尉。何煩摩頂誌禪師。羽毛會作冲天鶴。氣膽應吞拔樹鵲。欲驗吾言如合契。他年徵此一篇詩。

上琴承制

陳 濬

南省掄材早忝魁。亞元還領桂宮春。青雲路上初甘分。白日光中也立身。王事獨勞雖竭節。國恩難報每沾巾。嚴君舊愛雲無迹。慈母殘生甑有塵。清白漫留傳世寶。文章未療病家貧。銀鈎若點分憂籍。須念三朝歷仕人。達情宣澤爲高憂。早領群儒價益優。西掖尙餘紅葉興。內庭兼侍赭袍遊。擎天巨梓千尋直。捧日祥雲五色浮。御案獸香熏袖裏。詔牋鴉字落毫頭。會因物得傾朝望。不許人聞告后猷。想像萬機偏有賴。蓬窻喜泪亦難收。

次李需教坊少娥詩韻

崔 滋

知公萬壽等靈瓜。白日何勞欲駐戈。東海桑田猶是早。南山松歲不爲多。錦筵連夜添紅蠟。繡閣長春鑲翠蛾。天恐小娥將及壯。臘成餘閨却延難。蓮開相府

傳新曲。柳折娼樓罷舊歌。鶯子腰輕初脫殼。鶯雛舌軟欲離窠。不知古亦聞如此。更問年今定幾何。低斂霓裳還訝重。淺攙霞帽不勝絳。情猶感德丹恒露。眼亦知恩綠不波。粧閣未專龍背鏡。舞筵猶困鳳頭靴。捧來璇邸珊瑚樹。踏入金鑾錦繡坡。罕古新歡供幄座。從今舊樂失宮娥。金桃盤上春光醉。綵藥階頭日影醲。巧奏伶詞喉欲浪。笑呈仙戲臉將渦。鷓絃四撥驚攏玉。羯鼓雙槌以弄梭。天上皇恩霑露浥。人間國色粲星羅。人人欲賦爭揮翰。韻韻皆高最險。我亦強賡投隴右。仍將狂語達清河。幸今江國聊憑險。坐使強隣屢請和。要倩小娥歌薄伐。哀音怨曲莫吟哦。

復次韻

丹樓碧閣葛連瓜。畫列門前更列戈。堂上承歡金印錯。階前獻壽玉簪多。繞筵紈綺濃噴麝。暎燭瑠璃巧弄蛾。無賴寒更催夜宴。大平和氣越春儺。厭看偻老傳家伎。欲聽仙娃絕世歌。果有鷓頭來柳谷。應煩鶴觜拆蓮窠。是應天遣供歡耳。若作人看奈幼何。嬌臥尙便珠襖軟。弱躋應憫畫堂峩。窄衫剪繡難專暈。尖襪縫綾細縮波。一搦腰輕猶困帶。雙回步跲不勝靴。小梅早櫟風和苑。細草初茸日暖坡。鸞馭欲朝天上闕。羽衣還作月中娥。黛山淺掃候家綠。臉纈微生香醲醲。花部別開春一塢。椒房空列水千渦。調高音促春珠顆。舞快身忙擲玉梭。琴弄未終還弄笛。錦纏猶歎更纏羅。嘗聞今樂斯爲古。正似弛文武作跼。若也

吾民聞管籥。欣然喜氣遍山河。是誠天地神明鑒。猶勝韶鈞律呂和。寄語小娥須努力。鄉音雖鄙好吟哦。

洪英上人以詩見贈次韻答之

釋天因

久聞身世兩都忘。飽得禪門氣味長。東請幾時甘粉骨。南詢此日再遊方。皇州應厭風塵擾。江國還思橘柚香。斥鷃一枝聊適性。冥鴻千里好隨陽。已知榮辱多翻覆。不用機籌巧度量。萍迹隨波元不住。雲心戀岫更何忙。珠迴妙唱驚投暗。冰釋窄愁似灌湯。萬事空華纔過眼。百年歸客又催裝。多君獨向煙霞老。素抱難迴鐵石腸。靖退空閑猶小節。好從佳處早開場。

次韻答皖上人二首

與子形骸已坐忘。澹然相得意彌長。眼前豈許容纖翳。象外還期踏大方。挹海幾慚懷小器。近蘭偏感襲清香。始驚玉彩生荆璞。漸見桐材長嶧陽。不學自工詩點綴。無師亦妙道商量。交情肯逐風雲變。道業唯將歲月忙。不啻和冥成水乳。要當依倚作金湯。草庵此日同除糞。蓮界他年共俶裝。好把明珠還照世。普將甘露爲澆腸。此言非是閑文字。醜拙從君笑一場。自笑筌蹄久未忘。每憑師訓討論長。蓮華似欲成三昧。檀施那能受十方。不意藏身還露影。盡教掩鼻反偷香。九旬冰雪逃青谷。數朶湖山對晉陽。千里稻麻他自萃。二時桂玉若爲量。講長豈決狐疑了。廈大空懷薦賀忙。人事煩於梅子雨。家風淡似橘皮湯。妙觀

會得調禪味。寂忍應須辦道裝。夢裏紛華眞兔角。眼前危險劇羊腸。誰知疇昔因緣在。是處重來結道場。

寄尙州牧伯崔學士滋

金之岱

去歲江樓餞我行。今年公亦到黃堂。曾爲管記顏如玉。復作遨頭鬢未霜。洛邑溪山雖洞府。晉陽風月亦仙鄉。兩州歸路閒何許。一寸離懷久已傷。欲把琴書尋舊要。况看簾幙報新涼。嗟公虛負中秋約。更約重陽飲菊香。

次李需普門寺詩韻

李藏用

截斷滄溟一葦通。五雲深處梵王宮。俯臨玉鏡澄澄碧。先挹金輪閃閃紅。狂客如今無賀老。高僧自古有天童。地靈忽作霏微雨。谷密時成頃刻虹。一鉢閑蹤屬圓頂。三壺逸想寄方瞳。六鷲海近豈堪釣。隻鶴天遙不可籠。清景也應移盡軸。勝遊從此入談叢。退藏正好爭相劣。奔走何勞鬪欲雄。錦里句工山吐月。雪堂言好水浮空。夜燈影落虛汀外。曉磬聲搖過櫓中。共道晴波騰蜃氣。但看春浪浴鳧翁。一爐靜稽圓通境。萬像冥搜造化功。題詠更逢香案吏。經營猶記黑頭公。松杉壑底尋常冷。膏火人間取次烘。掃地燒香爲佛事。飢飧渴飲是家風。年光不管花唇鬧。潮曆空占水面豐。眼隔塵埃那得味。耳將毀譽亦皆聾。謀身自笑恒爲左。迷道終非別有東。官况嗟跼知我少。生涯淡薄與僧同。何當粗報君恩了。來伴筠溪老惠洪。

三角山文珠寺

城南十里平沙白。城北數朶重岑碧。老守疎慵放早衙。出遊浩蕩尋幽跡。還他駕鶴楊州天。添却騎驢華山籍。官事欲了無奈癡。賞心易失尤堪惜。黃裾唱引大俗生。碧眼相携有高格。試攀崎嶇石逕斜。漸出像籠林嶺隔。俯臨絕谷但蒼茫。上到危巔增跼蹐。晴峰距日纔數尋。雲棧凌虛幾千尺。鳥飛杳漠楚天低。野廣分明漢江畫。非煙西望卽仙洲。大浸南連通水驛。一迴徙倚獨嗟咨。八極須臾可揮斥。懸磴參差九十層。舊躅依稀上下屐。奇哉不世青蓮宮。云是大智真人宅。石崛呀開苔蘚斑。林龍眩晃丹青射。眸容宛若福城東。寶趺高馭金猊脊。相望遍吉長者居。誰識法界玄開闢。大慈的的蠲煩惱。一掬涓涓貯靈液。遊人恐觸天龍嗔。卜領試呪盃椀擲。煙霞影裏孤塔白。鍾梵聲中一燈赤。依然勝會移普光。應有妙供來香積。聞昔先王焚御香。至今中使祈宗祐。我來適值雲揚秋。僧留歡賞山色夕。倚簷列岫玉嵯峩。當檻瑤林錦狼藉。喜飡蔬食飫清芳。旋借蒲團寄安適。語闌缺月入深扉。夜久微風吟聳栢。最憐禪榻靜寥寥。忽笑人生何役役。未能容易掛衣冠。倘可功名垂竹帛。清眠恰被健稚呼。紅暈已動鴉輪赫。擬追台崖招手人。愧同廬嶽攢眉客。莫嫌塵語污青山。曾演綸言直丹掖。

扈從安和寺應製

趙永仁

梅檀寶殿許多層。十里香風髣橘洲。曾爲遠圖占勝地。又因嘉致創高樓。前泉

通漢騫應路。後嶽支天杞。不憂幸值良辰。仍命駕。小留清賞。更探幽。東西仗衛。歡聲洽。遠近溪山。協氣浮。角奏五更無事曉。河澄九曲。大平秋。周王賜宴。歌常棣。漢帝吟風。感葶收。只磬三歸。資福利。敢并四事。恣遨遊。君恩海闊。魚相樂。聖壽天長。鶴自羞。似識明朝。迴鳳輦。洞門煙景。慘爲愁。

次韻

柳公權

松徑崎嶇石自層。不教凡骨到仙洲。鸞輿忽幸黃金剎。鳳袞俄臨白玉樓。霞月勸留三日賞。溪山供解萬機憂。風蟬噪破祇園靜。谷鳥啼殘小室幽。庭栢依然溫室樹。軒溪卽是醴泉流。禪僧詩句碧雲暮。法部笙歌紅葉秋。北塞近聞妖霧捲。南州已報稼雲收。大平多暇揮神翰。巨韻成篇記勝遊。過沛宴酣何足美。橫汾樂極亦應羞。微臣濫預賡歌列。自愧無鹽倚莫愁。

賀崔中令赴內宴

金行瓊

紫綬金章子及孫。共陪鳩杖醉皇恩。尙書令擁中書令。乙狀元扶甲狀元。曠代唯聞四人到。一門今有兩公存。家傳冢宰猶爲罕。世襲魁科最可尊。幾日縉紳相藉藉。今朝街巷更喧喧。聯編功業流青史。雖禿千毫不足言。

賀琴平章得外孫

趙冲

排陰命代我先知。行止休憑六眼龜。英物一朝呱繡帳。微陽午夜動葭帷。何煩弓韜勤求子。已呪桃花屢覩兒。叶得半千爲世瑞。看將十五作人師。文高華國

青錢驚威敵扶王白捧鬮。自昔通家恩岳在。賀懷聊展一篇詩。

次扈從安和寺應製詩

崔 讜

紅葉秋山錦作層。依稀仙境鳳麟洲。紺筵初罷葆光殿。綺宴還開花萼樓。菊染霜黃攻却老。草含秋綠勸忘憂。嵐霑翠葆風翻重。洞闢青霄日射幽。繡岸丹楓新富貴。舞簷蒼檜舊風流。月明石壁猿啼夜。露冷瑤階鶴警秋。宵旰勤勞吟外歇。水雲嘉勝望中收。鵠原懿戚承三接。鷺序名臣從一遊。電舉金觴千日醒。星羅玉俎八珍羞。不才濫仄忠嘉宴。眩視空懷海鳥愁。

北行國家遣衣冠子弟入侍天朝

李守年

國耳忘家十五人。陰山萬里指中宸。塔邊古屋曾經漢。雲末長城暗想秦。月苦沙場牛作伴。風寒毳幕犬為鄰。擁氈夜臥溫於被。拾糞朝炊當却薪。欹枕旅魂猶繾綣。半年行色最酸辛。牧羊野闊多情草。驅馬途長滿面塵。千載功臣真可惜。一朝勞悴豈堪嗔。殷家再造由良弼。周室中興有亂臣。好把壯心終莫逆。須教兩域永相親。笙歌擁路迎車蓋。歸奏吾君萬歲春。

童女詩至元十二年令本國選良家女五十人歸蓋取古者昏媾之意也

金 贊

四海遑遑枕一家。勅令東土進宮娥。閨居恐未藏身密。官選那堪閱眼多。薄掃愁眉兩斂翠。強擡羞面十分醜。稚鶯欲轉辭深樹。乳燕將飛失舊窠。園苑移花開頃刻。廣寒添桂養婆娑。行須緩緩氈車載。欲發忿忿寶馬馳。父母國遙魂正

斷。帝王城近。淚猶沱。絳紗繫後。專恩寵。彤管貽來。合詠歌。生子若教鴻舉絕。作
妃當協鳳鳴和。矧今下嫁周姬在。彼此皇孫正匪他。

次韻

閱窮宗室與良家。得此玲瓏二五娥。塞外護行歸客幾。禁中扶入侍兒多。欲墮
降問聲猶澁。却愧傍觀色尙醜。養自朱門珠絡襍。生從紫卵錦爲窠。纔離母乳
丹唇小。未學宮粧綠髮娑。新寵必專金屋貯。弱齡應困繡鞍馳。蹄翻沙漠飛塵
暗。腸斷庭闈泣涕沱。里堠堪嗟催去意。祖筵那忍聽離歌。海邦修貢瓊枝好。天
闕承恩玉露和。爲報時人須記取。大平眠食不由他。

次韻李蒙庵西京懷古

洪侃

鏡裏山光齒茗斜。古人長使後人嗟。始封箕子名空在。遠徙秦人迹轉賒。鳩鵲
觀傾松櫟暗。鳳凰臺沒草萊多。時時峽雨飛成雹。歲歲江槎臥放花。般觶拖春
耕野燒。鉤輶隔葉和村笳。隱儒能說紅綾燄。桑女猶傳玉樹歌。城郭鶴身來又
去。古今蝸角靜還嘩。興亡袞袞何時盡。歎乃聲中水自波。

永嘉鄉校諸仙設宴送行作詩爲謝

李璵

槐市諸儒敵別筵。畫堂銀燭夜如年。杯盤錯落眞非分。絃管鏘洋最可憐。座上
三行相玉嘆。樽前七字幾珠聯。飲狂解倒蟬腸客。舞巧誰呼鶴背仙。坐撫敢言
嘉政化。挽留休唱好因緣。寒生厚意誠難負。傾盡囊儲到一錢。

拙詩六韻呈狀元修撰宋本誠夫先生兼奉示同年諸公共爲一笑

崔澗

我是唐朝侍御孫。筆耕遺業繼專門。敢從聖域論超詣。粗向科場免數奔。揣分始慙充國舉。觀光何幸拜天恩。簪因朋盍威儀盛。軌與文同教化敦。重詔每承深感德。卑懷欲敘澹忘言。諸公若賜詩爲寵。歸詒鄉人永不諼。

叢石亭

辛歲

叢叢壁立四仙峰。晴好雨奇宜淡濃。一面長天白浪接。一邊落照青山重。鷺鷥汀畔踏紅蓼。猿鶴巖頭捫翠松。秋月春風尙依舊。霓裳鳳蓋今難逢。幾年荒廢客歎息。一日經營民悅從。欲掃苔碑問往事。上有水墨稀微蹤。

晉州蠹石樓次鄭勉齋韻

白彌堅

遊賞非關不遇時。湖山勝景要哦詩。窮誰眼力曾經始。誇我身年未及衰。倚柱乾坤無處斷。織波簾幕半空垂。風流秋月謫仙詠。款乃暮江漁父詞。談笑一杯聊自遣。榻來三日以爲遲。茂林脩竹西南岸。還恐吾亭分外奇。

蠹石樓

白文寶

登臨偏憶舊遊時。強答江山更覓詩。國豈無賢戡世亂。酒能撩我感年衰。境清易使塵蹤絕。席闊何妨舞手垂。點筆漫成春草句。停杯且唱竹枝詞。妓從坐促爲歡密。人與時偕欲去遲。此地高懷真不世。赤城玄圃未全奇。

次叢石亭詩韻

李達衷

冥搜晨登群玉峰。海口欲上雲錦濃。珊瑚樹老枝葉脫。砥柱湍驚煙霧重。歲月糝糊峴首禍。風霜寂歷峩眉松。莫詠滄浪濁斯濯。休歌粲爛生不逢。老胡曾來獨大叫。仙子已去吾誰從。小立峰頭便上馬。塵卑未合攀高蹤。

前判三司孫白外進闕賜鳩杖

卓光茂

明公歷仕五王代。功大早知君子機。松竹故山開綠野。桑榆晚景謁金扉。臨軒不以尋常待。前席那容咫尺違。謇謇始終能有幾。皤皤八十古來稀。平生已厭富且貴。上賜不宜輕與肥。敬老故將靈壽授。拜恩還向永嘉歸。信扶剩得高人趣。閑倚時看倦鳥飛。身入葛天躲物役。家居蓬島息天機。豈知雲雨有翻覆。自與乾坤無是非。留客酒樽盈湛露。祝君香篆照清輝。緇衣尙有敝爲改。鞶帶亦遭三褫譏。此物實爲千載寶。定應青史爛光輝。

送日本釋大有還國

權近

林濟遺芳遠不窮。扶桑釋子振宗風。一龕靜坐心灰冷。萬里游觀眼界空。馬島雲光鄉樹外。鷓峰秋色客窓中。情懷每向詩篇寫。言語須憑象譯通。海闊蓬壺連浩渺。天低星斗漾冲融。故人刮目知多少。舊壑松枝盡指東。

花山君無盡亭詩次崔寧城韻

朴元亨

花山秀氣降英雄。才調飄然滿大東。名向麒麟留閣上。夢尋鸚鵡到洲中。亭開

有日堪修禊。途坦何人效。哭窮幕席寬。來千慮散。輪蹄少處一尊同。滄浪半夜。詠漁父。鷗鳥多。時狎海翁。春暮正應真趣在。浴沂吾與咏歸風。

無盡亭

崔恒

天慳異境屬豪雄。無盡奇觀盡漢東。春雨海鷗凭檻外。夕陽霞鶴引盃中。儻來竹帛名何益。老去溪山興叵窮。倒跨蹇驢隨處好。知閑倦鳥若爲同。綠蓑扶醉從漁父。白氎高譚伴牧翁。自是不歸歸便得。愧余空憶五湖風。

桃源圖

桃源縹緲隔東韓。梅竹何從蔦地看。忘我天遊酣一枕。馳神高臥任三竿。高懷杳杳耽奇勝。逸思飄飄跨汗漫。却向武陵聊放浪。且携詞客共躋攀。地靈豈自嫌幽討。造物應爲好戲慢。入洞茫然迷磴逕。穿林倏忽遇山冠。行通小有乾坤闊。坐覺無何日月閑。百轉丹崖屏掩映。千盤碧澗玉淙潺。高低竹塢靄交密。遠近桃源霞亂攢。柴戶半關依古樹。漁舟一葉漾前灣。雲扃何代開蒼巘。月榭誰家斲翠巒。馬渡從教時屢變。蛇分寧覺世多艱。爛柯事往空回眼。鑿谷吟餘偶解顏。凡骨不宜尋玉局。羸蹤亦預逐金鞍。清遊得殿珠千履。輕舉那憑煉九還。誰料是身曾蝶化。相誇此處信仙寰。恍騎白鶴同登嶺。休羨青牛獨度關。纔覺翻疑見蕉鹿。續殘無計藉膠鸞。靜思兀兀心猶記。追想悠悠興未闌。綉口便能揮玉筍。虎頭仍遣掃霜紈。依稀寫出丹青裏。彷彿徜徉紫翠間。境與夢移隨指

點文兼畫妙更心酸。雨雲兩手幾翻覆。雷電一生何控搏。擾擾宦情螳怖雀。紛紛世態觸爭蠻。可堪回首壺天路。安得抽身陸海瀾。紫綬金章已而殆。青鞋布襪果哉難。石田茆屋幽人趣。流水浮雲達者觀。不是胷襟浩風月。肯將魂夢落湖山。芙蓉行樂渾誇語。梅樹逍遙亦浪歡。孰與此中高雅致。今人長憶採芝環。

戒二子

戊子端午後六日余以太虛亭小雨洒庭攤飯黑甜之餘觀伯清贈季淑詩和之令兩兒書紳

坐忘予欲學神凝。火宅奔趨惱鬱蒸。蝸角是非憂轉劇。龜毛得失病還增。兢兢日接常流汗。疊足台聯幾履冰。憐我老衰甘瑟縮。喜渠強壯易梯升。已將實藝攀蟾桂。何用浮文售鳳綾。志節尋常須岳立。心源夙夜要淵澄。麴生迷了魚貪餌。妖物蠱來蛾撲燈。一動或狂辜自速。三緘乍放禍方興。面諛預怕吹毛刃。膚受周防利角菱。守默勿嘲人短劣。撝謙莫詖己才能。居高唯念小心翼。遇險但思攘臂仍。清直他時收令譽。恪勤何任患難勝。我言維服勿爲笑。子職當爲盍服膺。空百萬群期電驥。擊三千起擬雲鵬。聞詩汝更終身誦。言志吾徒信手憑。善誘寧同過庭訓。切磋須待盍簪朋。

光陵挽章

大德端宜大命膺。一朝龍向九霄騰。風飛電掣乾坤整。海晏波恬宇宙澄。赫赫隆功終古罕。巍巍盛德始今稱。粃糠湯武業彌大。陶鑄羲軒治允升。敬益日躋寧少暇。聖真天縱又多能。圖恢景運規摹遠。駕馭群雄氣概弘。武緯文經增繪

藻。宵衣旰食尙淵冰。詢黃髮每凝旒。推赤心常禮股肱。貽燕憲章昭大典。縣
鴻慶瑞叶明徵。目唐綱漢九功叙。出聖入神三教興。乙夜將分友黃卷。鳳綸頻
下子黎蒸。陽飶競翥栖梧鶯。霜烈那容止棘蠅。獠獫並完懷惠澤。梯航爭走譽
威稜。衢樽綺陌歌時泰。擊壤編閭樂歲登。代歷百千遭可得。化超三五見何曾。
壽臧魯士斲天錫。戩穀周人祝日昇。準擬萬年朝玉座。何期二紀卜金滕。九齡
共怨文還斬。百歲猶嫌舜遠崩。兆庶如喪哀曷極。六宮安仰訴誰憑。神胡不祐
悲胡及。數孰能窮問孰譬。萬世尊崇推世祖。三光炳耀眩光陵。鱗潮消長元相
變。兔魄盈虧亦靡恒。游震承祧賴天迪。重離繼照仰時乘。丕圖更覺熾而熾。懿
武從知繩又繩。碧落詎攀仙馭迥。丹丘空想羽人仍。草茅幸與山河誓。樛櫟偏
深雨露承。祇把槩鉛微報效。謬叅鈞軸忝甄陞。違顏咫尺音猶緩。回首尋常慕
倍增。魂斷橋山雲縹緲。夢迷嶮岫雪峻嶒。豈緣病眼長流涕。自是摧肝獨不勝。

贈日本師

聞道扶桑別一寰。洪濤渺渺隔三韓。浮杯不假多方便。持節誰能數往還。炯炯
虛襟涵海月。稜稜道骨聳秋巒。乍聽軟語詩能誦。便見修容禮自閑。師也圓機
鳴業白。吏乎專對罄忠丹。曾齎玉帛趨丹陛。仍奉絲綸返赤關。雨露九霄偏寵
渥。風波數載任危艱。却忙堯殿朝龍袞。豈爲虞階舞羽干。奄闕天光悲入骨。新
瞻日角喜浮顏。漢儀肅穆欣重覩。周樂颯決快再觀。修睦祇憑三寸舌。講和聊

保一彈丸。烏肩日信堅泥絮。蠶足何妨縱轍環。青眼共憐方外傑。赤心唯冀域
中安。客窓每惜蟾淪彩。旅枕俄驚鴈趁寒。野鳥難籠歸思急。虛舟莫繫久留難。
臨分不覺蚊珠落。竣事非唯趙璧完。雅韻鏗鏘詞吐鳳。豪才跌宕筆翔鸞。擬將
逐電隨飛錫。安得凌雲並逸翰。遠壑楓翻秋色老。故園松偃露華團。夜闌獨對
金盆影。肯憶青丘一老孱。

東文選卷之十八 終

東文選卷之十九

五言絕句

贈隋右翊衛大將軍于仲文

乙支文德

神策究天文。妙算窮地理。戰勝功既高。知足願云止。

秋夜雨中

崔致遠

秋風唯苦吟。舉世少知音。窗外三更雨。燈前萬里心。

郵亭夜雨

旅館窮秋雨。寒窓靜夜燈。自憐愁裏坐。眞箇定中僧。

寒松亭曲

張延祐

月白寒松夜。波安鏡浦秋。哀鳴來又去。有信一沙鷗。

入宋船上寄京中諸友

崔思齊

天地何疆界。山河自異同。君無謂宋遠。迴首一帆風。

古意

羲軒去大忙。天地何早闢。散髮臥清風。一鳥沒空碧。

大興寺聞子規

金富軾

俗客夢已斷。子規啼尙咽。世無公冶長。誰知心所結。

東宮春帖子

曙色明樓角。春風着柳梢。鷄人初報曉。已向寢門朝。

山莊夜雨

昨夜松堂雨。溪聲一枕西。平明看庭樹。宿鳥未離栖。

馬上寄人 三首

迴首海陽城。傍城山嶙峋。山遠已不見。况是城中人。

看山帶慘色。聽水帶愁聲。此時借何物。能得慰人情。

一別有一兒。暫別又何傷。情知不再見。斷腸仍斷腸。

江村夜興

月黑鳥飛渚。烟沉江自波。漁舟何處宿。漠漠一聲歌。

書星龍寺雨花門

古樹鳴朔吹。微波漾殘暉。徘徊想前事。不覺淚沾衣。

庚寅重九

輦下干戈起。殺人如亂麻。良辰不可負。白酒泛黃花。

題墨竹後

閑餘弄筆硯。寫作一竿竹。時於壁上看。幽姿故不俗。

晉陽留別

全坦夫

高兆基

崔 讜

任 奎

崔鴻賓

金莘尹

鄭 叙

久住眞無計。重來未必期。人生百歲內。長作一相思。

山居

李仁老

春去花猶在。天晴谷自陰。杜鵑啼白晝。始覺卜居深。

書天壽僧院壁

待客客未到。尋僧僧亦無。唯餘林外鳥。歎曲勸提壺。

眼

不安劉琨紫。何須阮籍青。冥然在一室。萬事見無形。

耳

郭郭還繚繞。洞穴自虛明。日永夔玄國。誰將赤犢行。

鼻

長作洛生詠。思揖隆準公。何時郢中質。一遇運斤風。

御殿春帖子

金闕韶光早。銅壺曉漏遲。五雲含瑞氣。先繞萬年枝。

書大觀殿黼座後障無逸圖上

輅重驚馳短。天高鶴戀長。舊衣經幾濯。猶帶御爐香。

園花紅錦繡。宮柳碧絲綸。喉舌千般巧。春鶯却勝人。

邊山路上

李奎報

旌旗光客路。鼓角壯人心。野鼠跳藏竹。驚麝走覓林。

絕句杜韻

曲塢花迷眼。深園草沒腰。霞殘餘綺散。雨急亂珠跳。

北山雜題

欲試山人心。入門先醉爨。了不見喜慍。始覺真高七。
高巔不敢上。不是憚躋攀。恐將山中眼。乍復望人寰。
山花發幽谷。欲報山中春。何曾管開落。多是定中人。
山人不浪出。古徑蒼苔沒。應恐紅塵人。欺我綠蘿月。

晚望

李杜嘲嗽後。乾坤寂寞中。江山自閑暇。片月掛長空。

卽事

靜戶風開幔。明窓日弄塵。屋烏啼孝子。簷鷺舞佳人。

閑中雜詠

捲箔引山色。連筒分澗聲。終朝少人到。杜宇自呼名。
山青仍過雨。柳綠更含煙。逸鶴閑來往。流鶯自後先。
溪喧山更寂。院靜日彌長。採蜜黃蜂鬧。營巢紫鷺忙。

示諸子

趙仁規

釋圓鑑

事君當盡忠。遇物當至誠。願言勤夙夜。無忝爾所生。

秋日泛舟

吳漢卿

海霧晴猶暗。江風晚更斜。滿汀紅葉亂。疑是泛桃花。
水鳥浮還沒。沙洲直復斜。傍舟山展畫。迎棹浪生花。

次安謹齋題竹院

安震

西堂多後學。風味亦依前。挽袖爭添酒。何輸昔少年。

朴杏山全之宅有題

洪奎

酒盞常須滿。茶甌不用深。杏山終日雨。細細更論心。

己酉三月褫官後作

崔澐

塞翁雖失馬。莊叟詎知魚。倚仗人如問。當須質子虛。

雨荷

貯椒八百斛。千載笑其愚。何如綠玉斗。竟日量明珠。
牧隱云此者不廉饒富者

風荷

清晨纔罷浴。臨鏡力不持。天然無限美。摠在未粧時。

龍宮閑居金蘭溪得培寄詩次其韻

金元發

江闊脩鱗縱。林深倦鳥歸。歸田是吾志。非是早知幾。

寄元校書松壽

郭瑠

今朝展清眺。詩興屬南山。岸幘發長嘯。始知天地寬。

寄金鍾寺清長老

睡起思舊友。舉頭望松山。清風吹不盡。白雲心自閑。

光陽縣望海樓

天遠雲帆小。風輕麥浪翻。公餘一登眺。稽首感君恩。

安州送金政丞深上朝

朔雪滿平野。凍雲低古關。聊將一盃酒。出郭送征鞍。

題錦江松亭

隋家賀若弼。晋室祖將軍。仗劍過江水。期還誓掃雲。

錄鎮邊軍人語五首

我本農家子。今來戍海隅。每見風色惡。怕上耀兵船。
深院春光暖。崇臺月影清。向來歌舞地。戰鼓有新聲。
烽火遙傳警。弓刀卽啓行。休言今賊易。倭俗本輕生。
慶尙徵兵急。全羅轉粟遲。自從囊褚盡。誰與療朝飢。
樓上旌旗動。江頭鼓角鳴。終當聞杖杜。免使賦重英。

下第贈登第者

白日明金榜。青雲起草廬。那知廣寒桂。尙有一枝餘。

崔思儉

李季城

鄭地

李仁復

李公遂

寄故鄉諸老

山月黑溪路。江風吹戍樓。角聲孤起處。紅葉近中秋。

贈友人

白日有朝暮。青山無古今。一尊榮辱外。相對細論心。

江口

移舟逢急雨。倚棹望歸雲。海闊疑無地。山明喜有村。

癸卯冬送北征崔元帥瑩

朔雪關西路。熊羆百萬兵。將軍出塞曲。已是太平聲。

碧瀾渡

久負江湖約。風塵二十年。白鷗如欲笑。故故近樓前。

書洪州家壁

自從無始來。生死知幾迴。旁人應眼冷。老物已心灰。

山中雨

一夜山中雨。風吹屋上葑。不知溪水長。祇覺釣船高。

題平陵驛亭

稻花風際白。豆夾雨餘青。物物得其所。我歌溪上亭。

擘行

鄭之祥

崔林

鄭誦

柳淑

契遜

楊以時

咸承慶

清曉日將出，雲霞光陸離。江山更奇絕，老子不能詩。

卽事

吉再

盥水清泉冷，臨身茂樹高。冠童來問字，聊可與逍遙。

春興

鄭夢周

春雨細不滴，夜中微有聲。雪盡南溪漲，草芽多少生。

鎮浦歸帆

李穡

細雨桃花浪，清霜蘆葉秋。歸帆何處落，渺渺一扁舟。

漢浦弄月

日落沙逾白，雲移水更清。高人弄明月，只欠紫鸞笙。

贈鄭進士龜晉

權興

盛代洪恩洽，幽居野趣長。樵夫猶解事，笑殺不談王。

送僧之楓岳

成石磷

一萬二千峯，高低自不同。君看日輪出，高處最先紅。

自適

李詹

舍後桑枝嫩，畦西薤葉抽。陂塘春水滿，稚子解撐舟。

漁艇

僕長壽

撒網群魚急，回舟一棹輕。却從紅蓼岸，齊唱竹枝聲。

詠梅二首

鄭道傳

久別一相見。楚楚着緇衣。短知風味在。莫問容顏非。
鏤玉製衣裳。啜冰養性靈。年年帶霜雪。不識韶光榮。

偶題

柳方善

結茅仍補屋。種竹故爲籬。多少山中味。年年獨自知。

贈本國海守師在雲南
圓通寺

曹庶

三業水俱淨。一生雲與閑。觀空微一笑。皓月當青山。

春帖字

姜碩德

青歸園菜嫩。白放野梅新。圭竇逢佳節。瑤徽賀小春。

詠海棠

成三問

子固不能詩。不能亦何傷。我愛柳中郢。衣不喜薰香。

詠梅題徐剛中四佳亭

姜希顏

白放天寒暮。黃肥雨細時。看見一生事。太早亦遲遲。

次聞慶縣主屹靈祠韻

權擊

祕殿青山下。陰機白日中。人情聊報祀。神意肯邀功。

次竹山東軒韻

崔士老

好雨村村足。溪流岸岸深。飛潛與動植。渾是一存心。

七言絕句

途中作

崔致遠

東飄西轉路歧塵，獨策羸驂幾苦辛。不是不知歸去好，只緣歸去又家貧。

饒州鄱陽亭

夕陽吟立思無窮，萬古江山一望中。太守憂民疎宴樂，滿江風月屬漁翁。

山陽與鄉友話別

相逢暫樂楚山春，又欲分離淚滿巾。莫怪臨風偏悵望，異鄉難遇故鄉人。

題芋江驛亭

沙汀立馬待回舟，一帶煙波萬古愁。直得山平兼水渴，人間離別始應休。

春日邀知友不至因寄絕句

每憶長安舊苦辛，那堪虛擲故園春。今朝又負遊山約，悔識塵中名利人。

留別西京金少尹峻

相逢信宿又分離，愁見岐中更有歧。手裏桂香銷欲盡，別君無處話心期。

贈金川寺主

白雲溪畔緇仁祠，三十年來此住持。笑指門前一條路，纔離山下有千歧。

贈梓谷蘭若獨居僧

除聽松風耳不喧。結茅深倚白雲根。世人知路繾應恨。石上莓苔污屐痕。

黃山江臨鏡臺

煙巒簇簇水溶溶。鏡裏人家對碧峰。何處孤帆飽風去。瞥然飛鳥杳無蹤。

題伽耶山讀書堂

狂噴疊石吼重巒。人語難分咫尺間。常恐是非聲到耳。故教流水盡籠山。

代人寄遠

崔承老

一別征車隔歲來。幾勞登觀倚樓臺。雖然有此相思苦。不願無功便早迴。

戲贈闍師

師嘗赴內道場醉睡。涕洟為有司所斥。

釋宗聆足

貝葉翻為竹葉盃。天花落盡眼花開。醉鄉廣大人間窄。誰識佯狂老萬回。

絕句

崔冲

滿庭月色無煙燭。入座山光不速賓。更有松絃彈譜外。只堪珍重未傳人。

駕幸東京獻王內相融

東京老人

九天光動轉星辰。日旆籠旗並海巡。黃葉雞林曾索寞。煙花今復上園春。

伍子胥廟

朴寅亮

掛眼東門憤未消。碧江千古起波濤。今人不識前賢志。但問潮頭幾尺高。

贈妓

鄭夔明

百花叢裏淡丰容。忽被狂風滅却紅。癩髓未能醫玉頰。五陵公子恨無窮。

十日欲招咸尙書同飲聞其仙去有感

十日秋香未必衰，登高意欲共傾卮。舊遊伴侶今無在，獨有黃花尙滿籬。

內殿春帖子

金富軾

雪垠猶在三雲陛，日脚初昇五鳳樓。寶曆授時周太史，玉卮稱壽漢諸侯。

宋明州湖心寺次書狀官韻

郡城南畔水無窮，曲徑浮橋關復通。安得此身謝拘檢，扁舟容颺一江風。

安和寺致齋

窮秋影密庭前樹，靜夜聲高石上泉。睡起淒然如有雨，憶曾蘆葦宿漁船。

酒醒有感

天淨雲飛暑向殘，清風落日小闌干。老來生計皆知足，方信劉伶席幕寬。

聞教坊妓唱布穀歌有感

容王喜聽此曲

佳人猶唱舊歌詞，布穀飛來櫪樹稀。還似霓裳羽衣曲，開元遺老淚霑衣。

熏脩院雜詠

院靜僧閑夜向分，殘燈孤枕臥幽軒。自嗟情習何時盡，夢把花枝對酒尊。

農家生計看來慣，市道交遊日漸疎。應被輪人堂下笑，白頭勤苦未捐書。

西湖和金史館黃苻

老大無心泛五湖，不開書卷卽提壺。有時扶病來蕭寺，一簇江山似畫圖。

東郊別業

水穀微黃風浩蕩，園蔬膩碧雨淋浪。有時閑步田邊踞，逢着漁樵咲語長。

臨津有感

秋風嫋嫋水洋洋，回首長橋思渺茫。惆悵美人隔千里，江邊蘭芷爲誰香。

赤道寺

聖祖樓船憩此中，江山王氣尙葱蔥。當時故事無人識，除却堂堂十八公。

清讌閣親賜雙角龍茶

郭興

雙角盤龍入小團，蜀山新採趁春寒。俄回御手親提賜，露氣天香惹一般。

隨駕長源亭上登樓晚眺有野叟騎牛傍溪而歸應製

太平容貌恣騎牛，半濕殘霏過隴頭。知有水邊家近在，從他落日傍溪流。

登智異山

金富儀

歷險疑登大華峰，歸途還怯夕陽紅。偶因王事遊方外，還愧當年楊次公。

洛山寺

一自登臨海岸高，回頭無復舊塵澆。欲知大聖圓通理，聽取山根激怒濤。

江陵送安上人之楓岳

江陵日暖花先發，楓岳天寒雪未消。翻笑上人山水癖，未能隨處作逍遙。

水多寺

經旬雨雪且狂風。獨坐無聊小閣中。賴有白衣觀自在。一回瞻禮萬緣空。
僧舍書眠

天靜無氛麗景遲。僧家良與睡相宜。無人喚起華胥夢。盡日疎簾寂寞垂。
寄遠 高兆基

錦字裁成寄玉關。勸君珍重好加飧。封侯自是男兒事。不斬樓蘭未擬還。
書雲巖鎮

風入湖山萬竅號。宿雲歸盡塞天高。蒼鷹直上百千尺。那箇纖塵點羽毛。
智異山次季父韻 金敦中

躋攀直上最高峰。回首塵寰十片紅。徙倚煙霞得幽趣。風流不愧晉羊公。
東都客館 金君綏

武烈王孫文烈家。雞林真骨得無誇。故鄉尙在天東角。今幸來遊作使華。
九日和鄭書記 崔惟清

黃花紅葉又今年。老興滔滔對綺筵。飲罷狂歌倚殘月。十生襟抱更超然。
遊奉巖寺

春盡山花掃地無。綠林高下鳥相呼。故知楊柳風流在。飛絮時來繞座隅。
杏花

平生最是戀風光。今日花前興欲狂。願借漆園胡蝶夢。遶枝攀蘂恣飛揚。

偶書

老閱詩書手不停。可憐事業竟何成。西窓風雪寒蕭索，獨對殘燈笑一生。

初歸故園

里閭蕭索人多換。墻屋傾頽草半荒。唯有門前石井水，依然不改舊甘涼。

西都

鄭知常

紫陌春風細雨過。輕塵不動柳絲斜。綠窓朱戶笙歌咽。盡是梨園弟子家。

送人

雨歇長堤草色多。送君南浦動悲歌。大同江水何時盡。別淚年年添綠波。

醉後

桃花紅雨鳥喃喃。繞屋青山間翠嵐。一頂烏紗慵不整。醉眠花塢夢江南。

長源亭

玉漏丁東月掛空。一春天與牧丹風。小堂捲箔春波綠。人在蓬萊縹緲中。

團月驛

飲闌欹枕畫屏低。夢覺前村第一雞。却憶夜深雲雨散。碧空孤月小樓西。

新雪

昨夜紛紛瑞雪新。曉來鷓鴣賀中宸。輕風不起陰雲捲。白玉花開萬樹春。

瑞祥花

鄭沈

新祥喜見滿枝春，果向今朝得好賓。花瑞一家賢瑞國，誰收花愛摠移人。

褫郡職

無名氏

此詩

揮汗當年蜀道行，槐陰一睡足平生。倚樓長笛無情思，驚破南柯夢裏榮。

誰作世傳一吏官繼出身得郡寄為趙按廉所出有是作

孤大山飛來房丈普德聖師真

朴春齡

卽闋皆通卽實虛，獨來獨往故無居。飛房一夜無千里，乃是神人道用餘。

鏡

朴浩

明如日月清如水，外照妍蚩內照心。我鑑圓通長不變，可憐群動自浮沉。

厭蠲舍人廟

釋大覺

千里歸來問舍人，青山獨立幾經春。若逢末世難行法，我亦如君不惜身。

東都戲題

李之氏

乘醉昏昏曉夢顛，不知帳下玉人眠。故應解賦西江月，莫咲風情減少年。

西都口號

大同江水瑠璃碧，長樂宮花錦繡紅。玉輦一遊非好事，太平風月與民同。

晉州山水圖 李相國家藏

鄭與齡

數點青山枕碧湖，公言此是晉陽圖。水邊草屋知多少，中有吾廬畫也無。

安北寺詠竹

權適

大雪漫天萬木摧，琅玕相映一枝梅。不如六月炎蒸酷，呼召清風分外來。

途中聞鶯

吳廷碩

白矜丹口金衣麗，宜向紅墻綠樹鳴。何事山村寥落地，隔林時送兩三聲。

題任實郡公館

金若水

老木荒榛夾古蹊，家家猶未飽蔬藜。山禽不識憂民意，唯向林間自在啼。

喜舍弟新除翰林

林宗庇

鴈行聯拜玉堂春，屈指于今有幾人。想得入花輒上過，傾朝應羨寵光新。

和

宸極恩波暖似春，鴈行繼作玉堂人。閑從院吏徵前事，演誥花牋墨尙新。

李僕射出小屏命作墨君地，窄未能展意只寫竹頭數梢。仍題其後云

安淳之

樓下篁林百尺脩，樓高只得數梢頭。要看拔地淩淩玉，且踏層梯暫下樓。

過漁陽次李眉叟韻

李百順

一上鵝毛寺後峰，祿山曾此鍊軍容。只因欲奪鷄頭肉，豈是爭爲月化龍。

宴會驪山玉葉宮，芙蓉那似酒酣容。不知今有明駟使，千里殷勤寄瑞龍。

李花

金克己

淒風冷雨濕枯根，一樹狂花獨放春。無奈異香來聚窟，漢宮重見李夫人。

途中卽事

一逕青苔濕馬蹄。蟬聲斷續路高低。窮村婦女猶多思。笑整荆釵照柳溪。
東郊值雨

黃埃漠漠漲晴旻。舉扇西風欲污人。多謝晚雲能作雨。半途湔洗滿衣塵。
贈彌勒住老

林端窈渺路逶遲。境僻寧教俗士知。唯有雪衣松上鶴。見公初到結廬時。
秋晚月夜

日落頑風起樹端。飛霜買買葉聲乾。開軒不用迎清月。瘦骨秋來慟夜寒。
興海途上

桑間婦女趁微行。撥穀飛來繞樹鳴。只爲田家趨耒耜。何人寫出管絃聲。
洞仙驛晨興

竟日長吟蜀道難。橫眠姑得一身閑。却嫌枕上多情蝶。千里殷勤訪故山。
西樓觀雪

怒嶺崑岑繞郭來。橫空萬疊玉成堆。水仙向曉遊何處。江上銀屏灑迤開。
鴨江道中

徂年旅客兩依依。信馬行吟背落暉。戍鼓一聲來遠路。行行征鴈帖雲飛。
西樓晚望

江風習習獵春叢。塞日濛濛臥晚空。水色連天煙覆地。樵溪釣瀨有無中。

江村晚景

晚風獵獵酒旗翻。斜照孤煙淡遠村。水鳥忽投何處宿。沙頭殘篆尙留痕。

漫成

文章向老可相娛。一劍遊邊尙五車。衙罷不知爲塞吏。紙窓明處臥看書。圖書滿室亂紛披。睡起西軒已夕暉。寒雀定栖何處樹。尙貪餘粒傍階飛。

春日

柳岸桃溪淑氣浮。枝間鳥語苦啁啾。春工與汝爭何事。慢罵東風不自休。

書情

晚年佐邑竟何成。唯有千篇寫客情。邊吏不知詩有味。幾回相睨絕冠纓。鳥散楊花落屋除。樓頭一榻黑甜餘。家童火急供執扇。正是炎風用事初。

書齋

殘花滿眼懶擡頭。客思悲於落木秋。安得倒江供日飲。爛隨蜂鳥鬪喧啾。

讀林大學詩卷

性命年來欲保難。天翁贖贖鬼神姦。不須厚送傷清德。容膝平生亦易安。碧江鏡淨抱長湍。曾命蘭舟信滌漫。蘋末清風時渡水。恐君筆下起波瀾。曾訪徐侯共醉歸。別來燕鴈喜相違。我今紫塞君黃壤。終始睽携似此稀。

愁腸恹恹涕漣漣。獨掩塵篇。一問天。顏跼短長。誰與奪。大空無主。但茫然。足庵勝境。品題難。憐子華篇。照壁間。過客仰看空極目。雲端明月有誰攀。

朝叅

雞人報曉漏聲殘。拜手龍墀。缺賜環。尙歎紅雲前。繚繞。擽頭才得覩天顏。

通達驛

煙楊翠地拂金絲。幾被行人贈別難。林外一蟬。語客恨。曳聲來上夕陽枝。

麟州早發

漏鼓逢逢報五更。張旂出郭赴前程。戍樓隔嶺催殘角。腸斷先聞出塞聲。

鳴江西岸望統軍峰

龍灣轉處保州城。馬上遙瞻眼更明。珍重統軍峰一朵。隔江奔走笑相迎。

漁翁

天翁尙未貫漁翁。故遣江湖少順風。人世嶮巇君莫笑。自家還在急流中。

茶店晝睡

林椿

頽然臥榻便忘形。午枕風來睡自醒。夢裡此身無處着。乾坤都是一長亭。

虛樓罷夢正高春。兩眼空濛看遠峯。誰識幽人閑氣味。一軒春睡敵千鍾。

戲贈皇甫若水

聞君閉戶對塵編。讀過長安積雨天。要向柴扉尋病叟。清談終勝卷中賢。

暮春聞鶯

田家甚熟麥將稠。綠樹時聞黃栗留。似識洛陽花下客。殷勤百轉未能休。

東文選卷之二十

七言絕句

西塞風雨

李仁老

秋深笠澤紫鱗肥，雲盡西山片月輝。十幅蒲帆千頃玉，紅塵應不到蓑衣。

題草書蔭子

紅葉題詩出鳳城，淚痕和墨尙分明。御溝流水渾無賴，漏洩宮娥一片情。

梅花

姑射冰膚雪作衣，香唇曉露吸珠璣。應嫌俗蘂春紅染，欲向瑤臺駕鶴飛。

月季花

萬斛丹砂問葛洪，何年深窞小園中。芳根染缺雲霞色，故作仙葩不老紅。

初到孟州

造貢墨處

雉川腰綬白雲邊，手採丹砂欲訪仙。自笑驚蛇餘習在，左符猶管碧松烟。

宋迪八景圖

平沙落鴈

水遠天長日脚斜，隨陽征鴈下汀沙。行行點破秋空碧，低拂黃蘆動雪花。

遠浦歸帆

渡頭烟樹碧。童童十幅編。蒲萬里風。玉膾銀蕹秋正美。故牽歸興向江東。

江天暮雪

雪意嬌。多着水遲。千林遠影已離離。蓑翁未識天將暮。誤道東風柳絮時。

山市晴嵐

朝日微昇疊嶂寒。浮嵐細細引輕紈。林間出沒幾多屋。天際有無何處山。

洞庭秋月

雲端瀲灩黃金餅。霜後溶溶碧玉濤。欲識夜深風露重。倚船漁父一肩高。元朝趙子昂承旨收此聯云記得大湖楓葉晚垂虹亭上訪三高

楓葉晚垂虹亭上訪三高

瀟湘夜雨

一帶滄波兩岸秋。風吹細雨洒歸舟。夜來泊近江邊竹。葉葉寒聲摠是愁。

煙寺晚鍾

千回石徑白雲封。巖樹蒼蒼晚色濃。知有蓮坊藏翠壁。好風吹落一聲鍾。

漁村落照

草屋半依垂柳岸。板橋橫斷白蘋汀。日斜愈覺江山勝。萬頃紅浮數點青。

偶吟

買斷烟林理小園。南窓睡起負朝暄。白頭不悔儒冠誤。尙把塵編教子孫。

野步

十里烟村際碧蕪。獨遊仍佩紫微壺。雲拖雨脚斜陽外。掩却前山半有無。
郭外人家路盡蕪。隔林啼鳥勸提壺。未成數句前山暮。老覺詩情澁欲無。
八關日扈從

五鳳樓高敞黼筵。佳期適及一陽天。戒香已遍三千界。鼎祚應經八百年。
雲帆一片渡鯨波。金橘千苞帶露華。宴罷歸來雙袖重。洞庭春色散千家。
早春江行

花遲未放千金笑。柳早先搖一搦腰。魚躍波間紅閃閃。鷺飛天外白飄飄。
碧岫巉巖攢筆刃。蒼江杳杳漲松烟。暗雲陣陣成奇字。萬里青天一幅牋。
書豐壤縣公舍

峰下人家陽朔境。雲間鷄犬武陵源。使君不許黃牛佩。喜見風前麥浪翻。
內庭寫批有感

孔雀屏深燭影微。鴛鴦睡美豈分飛。自憐憔悴青樓女。長爲他人作嫁衣。
燈夕

風細不教金燼落。更長漸見玉虫生。須知一片丹心在。欲助重瞳日月明。
谷寒未放金鶯囀。風峭難教海燕來。須信帝城春色早。銀花千樹徹宵開。
宿韓相國書齋

二水溶溶分燕尾。三山杳杳駕鰲頭。他年若許陪鳩杖。共向蒼波狎白鷗。

賀新及第第三

韓信旌旗背碧江。齊城趙壁一時降。論功縱在蕭張後。國士從來罕有雙。

崔太尉騎牛出遊

奇節何須蹄角瑩。徐行偏愛性情馴。牟然一吼黃鍾動。似識當時問喘人。嗜酒謫仙扶上馬。愛山潘闥倒騎驢。爭如穩着黃牛背。處處名園任所如。

題東臯子真

貌古形枯鬢亦霜。此生端合水雲鄉。若無子美編詩史。千古誰知黃四娘。

崔太尉家藏草書蔗子

顛張脫帽落雲烟。妙筆通靈迸作仙。不見明珠還舊浦。空留畫餅出饑涎。

川東坡榴皮題沈氏之壁之韻

三山鶴唳風吹斷。一幅蛟緡蠹食餘。丹篆未傳千歲術。榴皮空見數行書。

暮春

老來心事向春慵。睡起空驚落絮風。紅雨濛濛簾捲處。青陰漠漠鳥啼中。

醉鄉

醉鄉淳寂隔齊州。聞說陶劉始得遊。飲露吸風千萬戶。剪圭何日許封侯。

穿石

巨靈含意擘青山。蓬島樓臺第幾間。明月幾穿深窈窕。白雲應透碧巒岫。

碑石

筆蹤猶似衛黃門。薤葉離披帶雨昏。無計得尋黃絹語。龜龍剝落長苔痕。

白芍藥

無賴千花夢已空。一叢香雪獨春風。太真纔罷溫泉浴。白玉肌膚未點紅。

過漁陽

槿花低映碧山峰。卯酒初酣白玉容。舞罷霓裳歡未足。一朝雷雨送豬龍。

剡溪乘興

山陰雪月色交寒。却棹孤舟興盡還。何必揚眉資目擊。茫然千界一毫端。

山陰陳迹

此身念念異前身。俯仰人間跡已陳。賴有銀鈎留蠶紙。山陰風月古今新。

四明狂客

萬里吳天一棹歸。荷花零落暮秋時。鏡湖風月元無主。何必君前乞一枝。

杏花鸚鵡圖

欲雨未雨春陰垂。杏花一枝復兩枝。問誰領得春消息。唯有鸚之與鵲之。

逍遙堂

大瓠宜從江海浮。散材寧畏斧斤求。彷徨無爲物莫累。此是莊叟逍遙遊。
蟋蟀那肯識春秋。勛堂杯水芥爲舟。解笑鷗鷺擊萬里。蓬蒿深處有蜩鳩。

詠龜山寺冬日四季花集句

林惟正

別留春色在壺中。陳師道却向霜餘染爛紅。子瞻若問此花誰是主。子瞻龜山山下感

麟翁張戴

叙情

百年三萬六千日。李白三萬六千能幾何。敏若談笑勝愁歌勝哭。樂天不妨談笑助清

歌。李師中

新及第行

春風得意馬蹄輕。孟郊宰相相逢避路行。龔原好是夜深絲竹罷。秦韜時時聞喚壯

頭聲。鄭合

竹

桃紅李白薔薇紫。陶弼零落山煙山雨中。杜牧唯有壇邊數枝竹。張衡宜煙宜雨又宜

風。鄭谷

松

山人不愛牧丹紅。隱剪却牧丹栽野松。鄭谷廊廟乏材應見用。荆公莫教虛老化蒼

龍。齊已

三月晦日聞鶯有感

三月更當三十日。賈島綠窓殘夢早聞鶯。賈休曉來枝上千般語。齊已似向東風話舊

情李高夫

東林寺上房醉後戲題

一尊酒盡青山暮。方醉臥石樓雲滿床。杜半夜老僧呼客起。子月明金地桂花

香樂天

自景靈殿出補興威衛夜直有感

我是玉皇香按吏。元微二年不見赭袍光。禹珊瑚枕上汪汪淚。葛次拭却千行

更萬行。潘

曉起

金良鏡

玉帳燈殘入睡鄉。康安親捧赭袍光。門前曉角渾無賴。咽罷雲霄夢一場。

宮詞

銀臺承制五更來。月在西南玉漏催。再拜請將金鑰出。千門萬戶一時開。

賀新承宣李公老

千里書回一鴈天。新承宣代舊承宣。不才見擯雖堪愧。猶向皇朝賀得賢。

夏日

李奎報

輕衫小簾臥風櫺。夢斷啼鶯三兩聲。密葉翳花春後在。薄雲漏日雨中明。

春日晝眠尹學錄韻

睡鄉偏與醉鄉隣。兩地歸來只一身。九十日春都是夢。夢中還作夢中人。

列子御風

從來道境尙遺身。何必乘虛始自神。若向風頭尋禦寇。滿空飛鳥亦真人。

子猷訪戴

訪人情味雪溪中。若便相逢一笑空。莫道興闌回棹去。造門直返意無窮。

右軍換鵝

費盡溪藤始掃殘。滿籠剛換白鵝還。不如癡姥烹相待。破却山陰一段慳。

漢江

朝日初昇宿霧收。促鞭行到漢江頭。天王不返憑誰問。沙鳥閑飛水自流。

延福亭

複道渾成碧草蕪。笙歌散盡鳥相呼。筒中殷鑒分明甚。莫遣遺基掃地無。

南中逢故人

到處相逢新進易。他鄉得見故人難。別來華皓添多少。互將衰須子細看。

讀林大年詩

一枝丹桂雖無分。百首清詩合有聲。英魄不知何處去。兒童唯喜說君名。

回安淳之詩卷

詩高全似庭堅體。文贍猶存子厚風。但恨未成華國手。草間吟叫似秋蟲。

過奇相林園

相公曾此日開筵。一擲青錢僅百千。借問華堂誰喚出。不如茅屋舊天然。舊有

臨池環坐飲酒
今易以瓦屋

金釵零落歸何處。珠履紛紛記昔年。我亦當時居客後。白頭今過淚如泉。

朴丞家盆竹

欲試君賢豈一端。悍根又耐石盆寒。箇中尚有湘江意。直作攬天玉槊看。

守歲

門上挿桃何詭誕。庭中爆竹奈支離。辟溫丹粒猶虛語。爲倒深杯故不辭。

內省夜直

一抗封章乞老骸。却煩中使下天來。人臣進退皆君命。慚愧身無可惜才。

兒子涵編詩文書其後

常恐身先草木枯。區區詩卷不如無。茫然千載還知否。姓李人生東海隅。

春日訪山寺

風和日暖鳥聲喧。垂柳陰中半掩門。滿地落花僧醉臥。山家猶帶大平痕。

四時詞

春

柳撚金絲颺曉風。一雙閑鷺語玲瓏。美人睡起心煩悶。皓腕擎花吸露紅。

夏

銀蒜垂簾白日長。烏紗半岸洒風涼。碧筒傳酒猶嫌熱。敲破盤冰嚼玉漿。

秋

騎省初驚見二毛。西風一夜碧天高。夢魂盡處山重疊。月苦霜寒斷鴈呼。

冬

浙瀝風輕雪驟飄。王孫不憚捻鸞簫。綺筵熏暖猶教摺。不用剛添獸炭燒。

春

陳溫

玉帳牙床別院中。閑吟隨意繞花叢。忽聞杏杪鶯兒囀。手放金丸看落紅。

夏

金盤紅縷聳冰峯。畫閣陰陰樹影籠。半岸烏紗欹玉枕。互教纖手扇清風。

秋

釵砌微微着淡霜。袂衣新護玉膚涼。王孫不解悲秋賦。只喜深閨夜漸長。

冬

繡幕深深畫毯重。龍爐鳳炭發春紅。酒酣蘭麝熏人面。掛起金窓向雪風。

有感

柳仲

一項烏紗雪鬢寒。數間茅屋對青山。十年吏隱無人識。只把銀鈎洗眼看。

春日和金秀才

陳澤

繞檻爐烟學細雲。酒醒愁重兩眉春。鶯驚雨脚斜穿院。蜂把花心懶避人。

滿樹春紅泣露華，映門垂柳欲藏鴉。作詩亦是妨真興，閑看東風掃落花。

五夜

五夜不知風雨惡，醉和殘夢度晨鷄。家僮忽報南溪漲，半泛山花到石階。

遊五臺山

畫裏當年見五臺，掃雲蒼翠有高低。今來萬壑爭流處，自覺穿雲路不迷。

靈鵠寺

已臨絕壑俯長松，更踏層梯策瘦筇。還咲遊人心大躁，一來欲上最高峰。

野步

小梅零落柳微垂，閑踏青嵐步步遲。漁店閉門人語少，一江春雨碧絲絲。

春晚

雨餘庭院蒨莓苔，人靜雙扉晝不開。碧砌落花深一寸，東風吹去又吹來。

陳仲子

口適何煩食萬錢，身安可以謝重甦。一言坐却百金使，須信先生妻更賢。

海棠

酒暈微微點玉腮，暗香搖蕩隔林人。紅杏紫桃無遠韻，一枝都占上園春。風輕不用燕脂雪，月冷潛驚玉露香。別殿曉寒煙淡淡，數枝和睡靚新粧。

過海州

候騎傳呼未入州。紅旗翠蓋滿天浮。金符刺史迎遮道。猶走驂驢不點頭。

列子御風

衣冠軒簸向空飛。旬五歸來自有期。須信冷然非大適。無風還有待風時。

子猷訪戴

月浸長江雪壓枝。中流回棹漾漣漪。相忘不獨山陰客。興盡歸來我亦誰。

陶潛漉酒

督郵風味最高高。何用真珠滴小槽。漉罷拂巾還自着。不妨衰鬢帶霜糟。

潘閬移居

三峰縹緲是新居。一抹斜暉轉碧虛。已信此行無去住。浪吟猶自倒騎驢。

哭趙承制伯琪

妄僧醫手本非真。門下黃鶯誤囀春。長笛一聲猶在耳。恨無重見倚樓人。

崔滋

國子監直廬聞採真峯鶴唳

雲掃長空月正明。松巢獨鶴不勝清。滿山猿鳥知音少。刷盡疎翎半夜鳴。

贈館伴趙學士

金之岱

鳳城高壓碧江涯。藹藹卿雲弄日華。回首玉樓簾半掩。一聲長笛是君家。

愁歇院途中

花落烏啼春睡重。煙深野濶馬行遲。碧山萬里舊遊遠。長笛一聲何處吹。

自寬

李藏用

萬事唯宜一笑休。蒼蒼在上豈容求。但知吾道何如耳。不用斜陽獨倚樓。

慈悲嶺

慈悲嶺路十八折。一劍橫當萬戈絕。如今四海白昇平。空有杜鵑啼落月。

燈籠詩

洪功佐

赫赫東方君子國。煌煌南極老人星。餘輝散作籠中焰。來表吾王萬歲齡。

三日浦丹書石

金孝印

刻碑鐫碣古猶多。蘇食塵侵字轉訛。爭似指頭千載血。一淪山石不銷磨。

題三陟木橋

金贊

一木成橋臥淺灘。往來人影倒澄瀾。渠心但怯危難渡。豈識樓中作畫看。

過昇平郡

會作此郡太守孫億眷官妓

張鎰

霜月淒涼燕子樓。郎官一去夢悠悠。當時座客休嫌老。樓上佳人亦白頭。

東都懷古訪金韻察

四百年前將相家。競開臺榭幾雄誇。只今繁麗憑誰問。野杏山桃泣露華。

分水嶺途中

金坵

杜鵑聲裏但青山。竟日行穿翠密間。渡一溪流知幾曲。送潺湲了又潺湲。

出塞

峽中盡日踏黃沙，橫擁旼裘冒雨過。山盡已疑胡地盡，地多還恐朔天多。

落梨花

飛舞翩翩去却回，倒吹還欲上枝開。無端一片黏絲網，時見蜘蛛捕蝶來。

冷泉亭

鑿破雲根構小亭，蒼崖一綫洒泠泠。何人解到清涼界，坐遣人間熱惱惺。

說法臺

南臺四面石纍纍，恰是湘公說法時。當日點頭人不見，誰知一性本無虧。

栗

霜餘脫實赤爛斑，曉拾林間露未乾。喚起兒童開宿火，燒殘玉殼迸金丸。

福州

山水無非舊眼青，樓臺亦是少年情。可憐故國遺風在，收拾絃歌慰我行。

遊山回過三郎樓舟中作

杖回五老峰前路，舟過三郎樓下灣。沙鳥馴人不驚避，掠帆飛過又飛還。

舍弟平陽新守

睽離之意不覺至天明，因記蘇雪堂贈子由詩中所引韋蘇州何時風雨

夜復此對床眠之句，作一絕以贈之。

與君相別十三年，洛北江南兩杳然。那料雞峯風雨夜，白頭今復對床眠。

伏蒙隴西相國尊庇辱示嘉什二絕并引一首。一以叙東征軍容之盛。一以叙支辦軍須之艱。奉玩忘斲。謹次元韻。強成山語。寄呈閣下。以資抵掌云。

天王號令走如雷。諸將東馳幕府開。彩鷁千艘飛截海。未秋應奏凱歌來。
東溟日夜鼓濤雷。兵艦將行若鏡開。風伯亦知天假手。徑從西北送帆來。
病脚自戲

訪道尋師三十年。青纏黻衲五湖天。不因問着蒲鞋老。便學韶陽跛脚禪。
作野牛頌示同志

野牛天性本難馴。細草平田自有身。何意鼻端終有索。牽來牽去總由人。
雨中睡起

禪房閑寂似無僧。雨浥低簷薜荔層。午睡驚來日已夕。山童吹火上龕燈。
偶吟

舊輕衲重知衰甚。曾熟經生覺病深。唯有此心終不老。興來時復一長吟。
閑中偶書

飢來喫飯飯尤美。睡起啜茶茶更甘。地僻縱無人扣戶。庵空喜有佛同龕。
賀元帥金公方慶攻下耽羅 俞千遇

北來萬馬不隨鞭。南聚群彪欲吠天。馴既難馴制難制。論功何止上凌煙。

與同年李密直尊庇訪同年宜春朴祿之扁其所居曰藏春塢

許珙

老矣宜春朴秀才。何曾望我二人來。紫樞黃閣同年會。試向藏春塢裏開。

朝天上馬

洪子藩

百歲人生石火光。高官異寵足於良。愧將林下轉經手。遮却斜陽向帝鄉。

雲

鄭可臣

一片纔從泥上生。東西南北已縱橫。謂爲霖雨蘇群槁。空掩中天日月明。

曉起

朴恒

昨宵夢入九重天。五色絲綸演帝前。覺後此身還白屋。布衣猶襲御爐煙。

訪山寺

白文節

十笏禪房花木深。丁東山溜響於琴。解衣盤礴雙楓下。時有人間未見禽。

樹陰無罅小溪流。一炷清香滿石樓。苦熱人間方卓午。臥看初日在松頭。

唐堯

茅茨影裏土階卑。萬壽毫生八彩眉。四海人民無一事。耕田鑿井外何知。

光武

百戰車中講六經。八珍案上憶萋亭。雲臺滿壁丹青濕。七里灘頭訪客星。

初夏

郭預

千枝紅卷綠初勻。試指青梅感物新。困睡只應消晝永。不堪黃鳥喚人頻。
鷓逸

夏涼冬煖飼鮮肥。底事穿雲去不歸。海燕不曾資一粒。年年還傍畫梁飛。
扈駕丹山途中

三韓神器保盈成。人相兼提十萬兵。黑纛黃旗映山去。穿雲一曲落梅聲。
廣淺南郊

百官連幕夜成城。燈火依稀拱北星。三節鼓闌紅日湧。羽林前隊過長亭。
直廬

半鈎疎箔向層巔。萬壑松風動翠烟。午漏正閑公事少。倚窓和睡聽鈞天。
賞蓮

賞蓮三度到三池。翠蓋紅粧似舊時。唯有看花玉堂老。風情不減鬢如絲。
東都 朱悅

萬家日蹙入千家。往事漁樵話自誇。黃落鷄林無可吊。樓臺空記舊繁華。
清風客舍寒碧軒

水光澄澄鏡非鏡。山氣藹藹烟非烟。寒碧相凝作一縣。清風萬古無人傳。
上朴舍人暄 柳葆

紫薇花下仙毫露。化出人間萬樹紅。唯有東門一株柳。年年虛度好春風。

古燕道中

鄭 曙

燕塞高風戰白楊。道邊唯見古祠堂。郎官出獵天微雪。狐兔原頭意氣長。

東還寄李起郎在燕都

二首

丈夫功業一鞭頭。肯念家山萬里秋。知子任他風雪重。玉皇連賜錦花裘。客路風塵滿馬頭。去年行過薊門秋。相逢一笑還分袂。別淚如泉墮弊裘。

代書寄李起郎

春光欲入萬株楊。燕市笙歌沸畫堂。爛醉知君送佳節。不應離恨似吾長。

書江城縣舍

鄭允宜

凌晨走馬入孤城。籬落無人杏子成。布穀不知王事急。傍林終日勸春耕。

早朝馬上

洪 侃

紫翠橫空澗水流。風烟千里似滄洲。石橋西畔南臺路。拄笏看山又一秋。

過龍興溪有感呈李蒙庵

憶昔前遊二十年。舊時風物故依然。一溪流水渾無賴。只送詩斑到鬢邊。

送李東菴赴安東

草長江南三月天。永嘉山水好風烟。文章大守謝康樂。珠翠佳人玉井蓮。

席上贈白彝齋

炎洲翡翠莫同遊。金絳毛衣揔是愁。愛殺兒幾能避雨。荻花深處一沙鷗。
公與彝齋

會聯句白唱云鷗入荻花能避雨公擊節嘆
賞卽對曰蜂隨柳絮不禁風又作此詩贈之
雪

花開玉樹靜無風。頃刻春光滿海東。記得爛銀堆上月。五雲深處訪壺公。

次李眉叟過漁陽韻

韓就

人心元是九疑峰。粧點梅花白雪容。堪笑胡雛徒稔禍。不知靈武有飛龍。

春日江上卽事

李混

多景樓前水接天。連滄橋外草如烟。和風澹蕩吹難定。細雨霏微止復連。
昨夜雨晴江水肥。朝來兩岸柳依依。渡斷一舟橫泛泛。波閑雙燕掠飛飛。
風定江清上小舟。兩兩鴛鴦相對浮。愛之欲近忽飛去。芳洲日暮謾回頭。

書懷

權坦

宦途猶似厄黃楊。誰記疎狂訪草堂。洞密烟深車馬少。枕書閑臥睡偏長。

答寄權奏事漢功

蔡洪哲

珍重同年權相公。再三回首嶧陽東。不彈帝舜薰風曲。願作無聲一老桐。

寄謝方于宣學士見過

崔誠之

應門僮僕頑如木。誤使明公興盡迴。踏襪歸鞍攀未得。至今胸臆撥難開。

訪咸安先人故居感之而作

尹頎

草沒垣墻一逕微。門前桑柘自依依。相逢盡說當年事。清淚無端滿客衣。

病中偶吟

風軟街頭暗綠楊。小堂人靜日偏長。病多身懶饒春睡。藥譜針經共一床。

琳宮

安震

隣雞爭送兩三聲。新沐峩冠坐五更。寫畢青詞才入睡。天東瑞日漏窓明。

金執義成用書堂

煙雨空濛碧洞深。小花紅白轉幽禽。狂歌醉舞酬佳節。誰識超然野外心。

燕居

白願正

矮屋蕭條十肘餘。焚香靜讀聖人書。自從人爵生天爵。情欲秋林日漸疎。

兒孫慶八十

權溥

黃菊丹楓九月天。炊金爨玉設華筵。兒孫薦壽誠殊重。倒了霞觴骨欲仙。

蔡中庵學士宴

仙閣羣飛碧洞天。滿園桃李上元前。松山瑞氣濃如酒。禮樂重興五百年。

夜宴次韻

露洗銀河添月色。酒盈金盞却天寒。紫泉一曲人如玉。紅燭燒殘夜未闌。

謁元朝王百一鶚學士祠堂

朴全之

雪髭紅頰宛如存。人道中朝老狀元。對我相看何不語。相公會職樂軒孫。

寄蒙庵晁長老

萬壽山前秋月苦。居庸關外晚風寒。兩都來往三年客。戀國思家鬢已斑。

山居偶題

李璘

滿空山翠滴人衣。草綠池塘白鳥飛。宿霧夜栖深樹在。午風吹作雨霏霏。

寄許迺軒

朴忠佐

水在山中可濯沿。或因高士得流傳。自從許子休官去。人道丹溪似潁川。

待人

崔斯立

天壽門前柳絮飛。一壺來待故人歸。眼穿落日長程晚。多少行人近却非。

寄友人在燕都

潘阜

黃榆塞外但回頭。不覺飄然兩鬢秋。速返庭闈長獻壽。相逢不惜萬金裘。

次百花軒

李兆年

爲報栽花更莫加。數盈於百不須過。雪梅霜菊清標外。浪紫浮紅也謾多。

寄金問民龍劍

許富

景陽山水一區幽。物像尤宜賞九秋。不見東坡老居士。昔年樊口五年遊。

遷居

崔溢

平生業已誤爲儒。是處謀身拙且疎。莫恠遷居無物載。聖賢經典尙盈車。

追次郭密直預賞蓮詩韻

紅粧翠蓋擁秋池。鷗鷺相依喜得時。想得去年崇教過。薄雲殘照雨絲絲。

三月自高巒而還路過村莊

桃花籬落嘆清渠。門外良田二頃餘。每過村家心語口。一作自愧無官不去竟何如。

五月二十日題

園林風過栗花香。獨坐空齋愛日長。可是盛朝爲棄物。身閑儘得養疎狂。

次大同江船窓權一齋韻

濃濃淡淡雲烟好。去去來來客子多。極口道人難到處。又因行迫未成歌。

四皓歸漢

漢用奇謀立帝功。指麾豪傑似兒童。可憐皓首商山客。亦墮留侯計畫中。

太公釣周

常年把釣釣無鉤。意不求魚況在周。終遇文王真偶爾。此言吾爲古人羞。

責任長沙監務

腐儒無狀自招尤。敢向傍人說所由。身負國恩微一報。未應此去便休休。

到縣和人韻

榮辱循環理自然。有誰哀怨向蒼天。高名千古長沙上。只愧才非賈少年。

縣齋雪夜

三年竄逐病相仍。一室生涯轉似僧。雪滿四山人不到。海濤聲裏坐挑燈。

閔仲玉璿東觀西回亂道爲別

平生事業愧空疎也忝科名至治初人使歸來煩見問因風寄謝宋尙書人使往來使

履承同年宋禮部榮問兼此致謝

西京次權一齋大同江船窓韻

邢君紹

江中石老烟波沒城上臺荒草樹多好古客來何所感黃河一曲昔人歌

次晦軒安相國瑜韻上座主鄭雪齋可臣

白元恒

位極蟬貂德愈光經邦妙策勝三章要今末俗知吾道朝退長開萬卷堂

燕都秋夜

思家步月未成歸庭樹秋深錦葉飛故國三千八百里夜闌雙杵擣寒衣

宮詞

君王宴罷據胡床特喚名臣賜碧香須信恩波醺草木牡丹芽拆柳絲黃

春日次白清讌禁池之作

瑠璃滑色漱方池魚樂無心上釣絲柳外曲欄簾半捲燕輕微雨小晴時

雪齋暮春小雨

綠楊十里野人家餘在春風也不多盡日倚欄山鳥語碧苔微雨落梨花

行到祖江石作

小舟當發晚潮催駐馬臨江獨冷哈岸上世情何日了前人未渡後人來

金連川

平野殘山遠入烟，川流不盡草無邊。此行償得男兒志，打破醯雞甕裏天。

窮居冬日

破屋颼颼薪欲絕，袁郎高臥門遮雪。江南地暖足田蠶，妻子圍爐深夜說。

七月初六日夜久不寐

草堂清夜暑情收，小雨寒螢濕不流。獨臥床頭思往事，砌虫啼獻一作一簾秋。

桃源圖

金翔漢

碧瓦朱欄玉洞天，桃花亂落一溪烟。至今世上荒唐說，都在漁人好事傳。

有感

朴莊

溪水藍青竹外斜，浣紗人似白蓮花。天生美質非無意，莫道尋常百姓家。

東還訪敬齋宅

洪淪

畫舍淒涼絕點塵，滿園花卉四時春。客中懷抱憑誰說，時向鶯溪訪故人。

臥水木橋

安軸

木搖搖跨石灘，望來惟恐踏波瀾。居民足與心曾熟，如過平途不細看。

歸田詠

李晟

藥砌青春嫌我老，竹溪明月誘吾情。昨宵已決歸田計，雪盡湖南匹馬行。

山居春日

王伯

村家昨夜雨濛濛，竹外桃花忽放紅。醉裏不知雙鬢雪，折筭繁萼立東風。

送人游關東

李堅幹

一麾行色到關東。寒食將闌二月風。此去馬頭應得句。鷓鴣聲遠海棠紅。

奉使關東聞杜鵑

旅館挑殘一盞燈。使華風味淡於僧。隔窓杜宇終宵聽。啼在山花第幾層。

萬景臺

吳軾

臨風一嘯上高臺。何恨蒼波袞袞來。安得鵬搏九萬里。下看東海正如盃。

罷安東移任晉州

鄭倬

五月催裝赴永嘉。晉陽歸路已黃花。宦遊南北成何事。從此歸田學種瓜。

示子拜代言

安牧

累葉龍喉古未多。晦軒竹屋自傳家。不才蹭蹬雖堪恨。生得千金亦可誇。

送子判書出鎮全州

閩外分憂任不輕。吾家曾有兩書生。汝今幸繼箕裘業。當樹元功報聖明。

秋日

金希祖

滿林紅葉無情日。一院黃花得意時。世上相逢難袞袞。尊前欲去更遲遲。

映湖樓

金忻

十載前游入夢清。重來物色慰人情。壁間奉繼嚴君筆。堪詫愚兒萬戶行。

東文選卷之二十終

東文選卷之二十一

七言絕句

比干墓

李齊賢

墓在衛州北十許里。蓋周武王所封。而唐太宗貞觀中。道過其地。自爲文以祭。其石刻剝落。亦可識一二焉。夫二君之眷眷于異代之臣者。豈非哀其忠愍其死乎。而武王忽伯夷於勝殷之後。太宗疑魏徵於征遼之日者。何耶。因作此詩。亦春秋責備賢者之義也。

周王封墓禮殷臣。爲惜忠言見殺身。何事華陽歸馬後。蒲輪不謝採薇人。從來忿欲蔽良知。日暮令人有逆施。芻矣親祠比干墓。胡然却仆魏徵碑。

淮陰漂母墳

重士憐窮義自深。豈將一飯望千金。歸來却責南昌長。未必王孫識母心。婦人猶解識英雄。一見殷勤慰困窮。自棄爪牙資敵國。項王無賴目重瞳。

涿郡

美壤每每接大行。東秦右臂北燕吭。劉郎却愛蠶叢國。故里虛生羽葆桑。

白溝

誰將督亢餌強隣。空費金縉歲結親。尺水區區遏南牧。可能臥榻不容人。

松都八詠

鵝嶺春晴

八仙宮住翠微峰，縹緲烟霞幾萬重。一夜長風吹雨過，海龍擎出玉芙蓉。

龍山秋晚

去年龍岫菊花時，與客携壺上翠微。一逕松風吹帽落，滿衣紅葉醉扶歸。

紫洞尋僧

石泉激激風生腋，松霧霏霏翠滴巾。未用山僧勤挽袖，野花啼鳥解留人。

青郊送客

小溪深處柳飛綿，細雨晴時草似烟。客去客留俱不礙，一樽相對好山川。

熊川禊飲

沙頭酒盡欲斜暉，濯足清流看鳥飛。此意自佳誰領取，孔門吾與舞雩歸。

龍野尋春

偶到溪邊藉碧蕪，春禽好事勸提壺。起來欲覓花開處，度水幽香近却無。

南浦烟蓑

一灣蒲葦雨蕭蕭，隔岸人家更寂寥。漁罷呼兒收綠網，刺船歸趁晚來潮。

西江月艇

江寒夜靜得魚遲，獨倚篷窓捲釣絲。滿日青山一船月，風流未必載西施。

范蠡

論功豈啻破強吳。最在扁舟泛五湖。不解載將西子去。越宮還有一姑蘇。
和朴石齋尹樛軒川銀臺集瀟湘八景韻

平沙落鴈

行行點點整還斜。欲下寒空宿暖沙。惟得翩翩移別岸。舳舻人語隔蘆花。
遠浦歸帆

行舟賈客似兒童。香火人人乞順風。賴是湖神能泛應。衆帆齊舉各西東。

瀟湘夜雨

楓葉蘆花水國秋。一江風雨灑扁舟。驚迴楚客三更夢。分與湘妃萬古愁。

洞庭秋月

三更月彩澄銀漢。萬頃秋光泛素濤。湖上誰家吹鐵笛。碧天無際鴈行高。

山市晴嵐

漠漠平林翠靄寒。樓臺隱約隔羅紈。何當捲地風吹去。還我王家著色山。

漁村落照

落日看看看。看嚙遠岫歸潮咽。咽上寒汀。漁人去。入蘆花雪。數點炊烟晚更青。

江天暮雪

柳絮飛空欲下遲。梅花落地亦多姿。一樽且盡江樓酒。看到蓑翁捲釣時。

煙寺晚鍾

一幅丹青展不封。數行水墨淡還濃。不應畫筆真能爾。南寺鍾殘北寺鍾。
和李明叔雲錦樓四詠

荷洲香月

微波澹澹月溶溶。十頃荷花一道風。記得臨平山下宿。酒醒身在畫船中。

松壑翠雲

一林黃葉遠無聲。萬壑蒼雲漲欲平。捲上山頭吹不散。料應晚雨未全晴。

漁磯晚釣

魚兒出沿弄微瀾。閑擲纖鈎柳影間。日暮欲歸衣半濕。綠煙和雨暗前山。

山舍朝炊

山下誰家遠似村。屋頭烟帶大平痕。時聞一犬吠籬落。乞火有人來扣門。

四皓歸漢

見說扶蘇孝且仁。此下四絕和菊齋胡令二世禍生民。逋翁不爲卑辭屈。未忍劉家又似秦。

廬山三笑

釋道於儒理本齊。強將分別自相迷。三賢川意無人識。一笑非關過虎溪。

鷺尋玉京

翩翩隻燕訪空閨。應感佳人惜別詩。相對知心不知語。一庭風雨落花時。

范蠡五湖

功成亦欲試良圖。月棹烟蓑向五湖。捲却吳宮春色去。獨留秋草滿姑蘇。

山中雪夜

紙被生寒佛燈暗。沙彌一夜不鳴鍾。應喚宿客開門早。要看庵前雪壓松。樂宿天

紙不嫌冷似用儀禮宿賓之宿子美

九曜堂

溪水潺潺石逕斜。寂寥誰似道人家。庭前臥樹春無葉。盡日山蜂咽草花。

題任實縣壁

釋禪坦

衝泥瘦馬過山城。挑盡寒燈聽雨聲。客路不隨年矢盡。明年何處見新正。

楞伽山中

鞍馬紅塵半白頭。楞伽有病早歸休。一江煙雨西山暮。長捲疎簾不下樓。

寄息影菴禪老

李崑

浮世虛名是政丞。小窓閑味即山僧。箇中亦有風流處。一朵梅花照佛燈。

應製

玉輦親臨松嶺上。靈芝秀發石亭間。吾王盛德那能說。先賀天齡等此山。

題金海客舍

金得培

來管盆城二十春。當時父老半成塵。自從書記為元帥。屈指如今有幾人。

城南

洪彥博

水際碧蕪渾欲合。牆頭紅杏未全開。春風日日城南路。信馬哦詩自往來。

天壽寺追和崔斯立韻

溪深柳密乳鴉飛。滿路清陰信馬歸。畢竟功名將底用。回頭五十二年非。投壺圍坐箭輕飛。清興時時醉欲歸。來往共君成二老。人生此樂未爲非。

慈孝寺次蓮樓詩韻

白藕花開翠荇長。柳陰秋水滿陂塘。莫言今日空歸去。隨喜吾師一瓣香。

北山途中

千章古木兩山間。滿壑風烟信馬還。不是向來名利路。世人那解此清閑。

偶吟

尹澤

醉後却思陳藥石。老來無復進鹽梅。謬算狂謀年九九。平生事業已焉哉。

從毅陵宴杏園

雨灑紅簾酒滿尊。檀槽一曲感皇恩。城南春色皆圍遶。應爲東君在此園。

元巖宴集次黃檜山韻

少年花下醉沉香。立進清平光焰長。潦倒如今看武庫。空餘紫電與清霜。

守福州寄寧海李府使叔琪

蔡禍

海棠紅點白沙洲。想見文章太守遊。山水永嘉應不下。若爲來往校風流。

依山村舍

辛 葳

松竹陰崖有古村。青山繞屋水侵門。朱陳風物渾無事，雞犬聲中暝色昏。

臥水木橋

斫斷長條跨一灘。濺霜飛雪帶驚瀾。須臾步步臨深意，移向功名宦路看。

將赴沃州漢江船上用華嚴信聰師韻

黃 瑾

欲知民水載君舟。要盡忠誠誠逸遊。諫苑未能呈藥石，長沙見謫不須愁。

題玄悟大禪師蘭若

金 倫

我性平生酷愛山。愛山何事又催還。山靈應笑紅塵客，擾擾曾無一日閑。

漢陽村莊

韓宗愈

十里平湖細雨過。一聲長笛隔蘆花。直將金鼎調羹手，還把漁竿下晚沙。

單衫短帽繞池塘。隔岸垂楊送晚涼。散步歸來山月上，杖頭猶襲露荷香。

金陵懷古

辛 裔

秋風忽上鳳凰臺。一水三山活畫開。欲賦六朝興廢事，愧無當日謫仙才。

題中書譯史牧丹圖後

李 穀

畫師妙思奪天工。國色依然帶露紅。記取明年相對處，沉香亭北倚春風。

寄鄭代言

百年心事一扁舟。自笑歸來已白頭。猶有皇朝玉堂夢，不知身在荻花洲。

題草溪公館曲松次韻

李仁復

公館無人對病翁。老松猶喜送清風。此身雖屈心難屈。吾儻何須問直躬。

送慶尙鄭按廉

聞說先賢按嶺南。動將絲竹醉厭厭。近來物議君知否。清似夷齊謂不廉。

益齋李文忠公挽詞

宣祖崇儒要贊襄。故留元老相今王。十分潤色重興盛。身退年高道更光。夷險忠誠竟不渝。曾隨永廟入燕都。同車只有吾文烈。行到重泉得見無。近世文章與世衰。公將大手獨持危。剷除舊習開來學。須信東方有退之。

寄妻兄閔及菴

白彌堅

笛聲江郡落梅花。西望長安日已斜。栗里舊居楊柳在。不知春色屬誰家。

有感

李公遂

身登鷓嶺望東溟。中有揚波奮鬣鯨。日欲上時風更起。好將舟楫待澄清。

安城

許湜

逸客木同籠外鳥。世人誰羨井中蛙。竭來山郡探春事。籬落雨晴紅杏花。

憶故鄉

尹汝衡

水畔梅花雪裏開。夜深明月上樓臺。此間着我詩應妙。閑跨驢兒歸去來。

關東旅夜

乾坤蕩蕩我無家。一夕挑燈九起嗟。誰使遠遊人有耳。杜鵑啼血杜鵑花。
往隨緣山谷途中

千章古木拂雲烟。頭上蒼蒼一席天。瘦馬亦知山態好。臨風却立任揚鞭。
上辛草亭齋 吳洵

漢江南畔釣魚翁。來入紅塵謁相公。欲去欲留心未決。滿庭黃葉又秋風。
草堂

綠樹交加黃鳥飛。草堂高臥日遲遲。從今漸覺風情減。春盡都無一首詩。
觀稼亭

春耕欲耨夏多熟。秋歛未終天已寒。安得茲亭移輦道。君王一見此艱難。
望三角山

聳空三朶碧芙蓉。縹緲煙霞幾萬重。却憶當年倚樓處。日沉蕭寺數聲鍾。
花塢

披書獨坐百花林。魏紫姚黃淺復深。讀了塵編欲吟賞。風吹紅雨滿衣襟。
江頭

春江無際暝烟沉。獨把漁竿坐夜深。餌下纖鱗知幾箇。十年空有釣鰲心。
永州文會樓 崔元祐

林外長川野外山。倚樓人在畫圖間。已爲才俊登臨地。雲物千年定不閑。

題茂珍客舍

脩竹家家翡翠啼。雨催寒食水生溪。蒼苔小草官橋路。怕見殘紅入馬蹄。

送僧

揖送吾師嶺外行。春風一杖野裝輕。碧山杜宇聞何處。古寺梨花月正明。

題順天八馬碑

來往昇平節物移。送迎多愧奪民時。莫言無德堪傳後。復起崔君八馬碑。

獻洪侍中彥博

陽坡居士愛清閑。役役紅塵是強顏。何日閉門麾俗客。焚香相對說溪山。

山居

扣門俗客直須麾。莫使山家奇事知。屋角梨花開滿樹。子規來叫月明時。

廉侍中悌臣第盆梅

一見初驚眼不塵。青裙縞袂照人新。隔窓風雪徒爲惡。好向華堂已報春。

題舍浦營

此地前遊僅十春。豈圖來鎮有今晨。壁間拙字知予否。誰是當年下筆人。

送金子粹生員歸覲安東

浩然歸志白雲秋。大學諸生可得留。侍奉高堂應不暇。那堪一醉嘆湖樓。

東萊客館

成士弘

朴尙衷

田祿生

金仁館

先人往歲赴東萊。孤子方爲襁褓孩。今日巡臨民喜迓。恍如身入故鄉來。

芒浦村舍訪權學士質

迎陽浦口蘆花白。仰德巖邊江樹紅。有約扁舟載琴酒。金沙灘上訪詩翁。

送李副令毅使江浙省

李存吾

天地紛爭問幾回。南朝往事不勝哀。君歸應過岳王墓。爲我丁寧酌一盃。

次韻金仲賢齊顏

不須揩眼苦看書。隨意吟哦亦自如。黃鳥園林清晝永。偶然乘興愛吾廬。

示讀書諸生柳衛

嬉遊不學過芳年。墻面如今只赧然。爲報諸君須着力。光陰終不爲君延。

鄭正郎夢周見贈次韻寄呈

遊學三年雪滿巖。醇醪不覺自沉酣。別來歲月奔如電。惆悵無人爲指南。

走筆寄江陵李使君

海濶天高一郡平。州城人道是蓬瀛。霓旌羽蓋寒松月。想像風流太守行。

宿弟存中錦州村家有感

愧我與君俱老大。眼前豚犬已多生。天胡早奪爺孃壽。不見兒童項領成。

從便後贈弟存斯

狂妄眞堪棄海邊。聖恩天地賜歸田。草廬隨意生涯足。一片丹心倍昔年。

赴任公州

田濡

公事如雲鬢欲絲。雪晴江路馬遲遲。吏人不識憂民意。誤道溪山覓好詩。

臨漪亭

朴允文

浩浩東溟入眼前。蒼蒼老樹幾經年。此亭佳致誰能畫。夕照西山橫斷烟。

泛舟遊晉州南江

崔咸一

鷗鴨雙雙掠水飛。映山紅倒碧琉璃。畫工未意千般景。盡入書生一首詩。

清州元巖宴集

黃石奇

碧玉杯深美酒香。嵇琴聲緩笛聲長。箇中又有歌喉細。七老相歡鬢似霜。七老杏村

李侍中品漆園尹侍中桓瑞谷廉侍中梯臣唐城洪元哲壽春李壽山啓城王梓檜山黃石奇

員外辛草亭之朝上國諸公分字作詩得紛字

洪鐸

忠臣間世遇明君。承命朝天路入雲。想得九重前席語。夜深金殿月紛紛。

惠陰院途中

鄭誦

驅馬悠悠渡小溪。斜陽古碣草萋萋。山村四月行人少。深樹黃鸝自在啼。

次韻示同里諸君

詩顛草聖外無餘。自笑平生與世疎。竹弟縱能從我老。錢兄還有絕交書。

立春曉起有感

春酒春幡似去年。廚人早起語燈前。此時無客同情話。感節思親一泫然。

次韻季明叔理問見訪有詩

有錢且莫對空罇。無事須當數舉盃。佳節屢從愁裏過。好花多值病中開。

戲洪陽坡仲容

天地於人豈有私。有生必死固其宜。神仙安有長生術。却笑留侯老更癡。

西江雜興

青山似畫滿篷窓。細雨如絲灑石缸。已是夜闌清不寐。舟人更唱禮成江。樂府有禮

成江曲

江村秋後轉多蠅。對案時時食不能。早晚雨晴天氣好。飄然一棹過昌陵。

題梁州客舍壁

五更燈影照殘粧。欲話別離先斷腸。落月半庭推戶出。杏花疎影滿衣裳。

瀛國公第盆梅

權漢功

玉瘦瓊樵意未平。出塵仙骨更輕盈。細看不是春風面。萬里明妃雪裏行。

與元朝馮子振待制

玉樹清風滿九天。紫皇香案一儒仙。太平文物重興後。圖畫凌烟尙少年。

在都下

鴈北來時不寄書。鴈南飛日更愁予。故園正隔三千里。水草年年無定居。

琵琶行

公主烏孫萬里程。江州司馬淚千行。後人豈解絃中趣。清夜沉沉月轉廊。
皇慶癸丑酒酣得四書于大同江軒窓

磯邊綠樹春陰薄。江上青山暮色多。宛在水中迷遠近。夕陽何處竹枝歌。

永明樓

白鷗波上疎疎雨。黃犢坡南點點山。有興卽來忘返轡。長閑那似此偷閑。
送式無外上人乘舟如上國

滄海西頭天一涯。片帆高掛欲何之。與師相識渾無賴。又作春風送別詩。

沒朴恥菴

閔思平

散策松蹊尋寺了。聯鞍夕照與樵還。數峰晴雪青驢背。好被人嘲飯顆山。
東國四詠益齋韻

獨跨青驢訪碧山。山僧應是後豐干。不因此老閑饒舌。誰作黃扉上相看。

右金侍中乘驢訪江西惠素上人

千尺雲根聳北山。古賢遺跡畫應難。自從相國題詩後。多少行人指點看。

右崔大尉冒雪遊城北皺巖

蟾影圓流露桂枝。夜深斗覺爽襟期。世人誰是知音耳。一曲廣陵空自知。

右鄭中丞月下撫琴

萬柄亭亭上下池。幽人乘興獨尋詩。一番細雨蒸霞氣。數里香風泛柳絲。

右郭翰林雨中賞蓮

從玄陵朝元東還路上

柳淑

戀主心馳燕塞雲。思親夢到胡州月。平生忠孝兩難忘。茫然獨立長程雪。

讀史

讀罷殘篇秋夜深。淒然吊古又悲今。廢興千載無窮事。多少英雄未了心。

丁酉夏上賜安社功臣錄券仍降宣醞諸功臣會洪相彥博宅設筵座上

呈請功臣相國

雨餘庭院樹陰涼。宣醞盈盈白玉觴。再拜功臣諸將相。願同終始郭汾陽。

大師踏青賦詩次韻

儒釋相從自古傳。身閑况有好林泉。良辰一醉吾何厭。百歲還同下瀨船。

寄佐郎趙瑚

七十人生自古稀。功名要路足危機。分陽終始亦萬幸。茅屋青山無是非。

書懷寄趙瑚先輩

他鄉作客頭渾白。到處逢人眼不青。清夜沉沉滿床月。琵琶一曲鄭瓜亭。

寄同年閔執義璿

窻明窻暗事還生。一夢南柯辱與榮。不是知幾能早退。難將病骨強趨名。

扈從應製

朴瑗

絕巘環回銀漢外。危樓斗起翠屏間。臨軒此日揮宸翰。朱草新生白馬山。

同前

安起

霞鶻齊飛丹檻外。君王同樂翠微間。此時行幸眞堪畫。百紫千紅已滿山。

奉呈郭提學珣

南兢

香案鴻樞一路通。青雲步步動春風。汾陽舊事人如問。指說明朝郭侍郎。

送僕符寶還朝

河乙沚

混一功成四海清。使星光彩照東瀛。歸舟所載非他物。祇是三韓上下情。

奉使日本

羅興儒

千年古國三韓使。萬里洪濤一葉舟。留滯海東驚歲暮。寂寥山月水明樓。

鄭中丞謫居東萊對月撫琴

韓脩

半輪江月上瑤琴。一曲新聲古意深。豈謂如今有鍾子。只應彈盡伯牙心。

石房途中

巉巖石路倦躋攀。何寺疎鍾遠出山。畏日已升青嶂表。宿雲猶在翠松間。

無題二首

水流有本何時盡。雲出無心旣雨歸。漢上平生行樂處。復携童冠着春衣。

浩蕩白鷗千萬里。斯須蒼狗古今雲。何妨卽墨不求譽。無復張湯巧舞文。

枯木

李湛

白虬倒立碧山陰。斤斧人遙歲月深。堪嘆春風吹又過。舊枝無復有花心。
聞鶯有感用元內書韻

鄭樞

夏木陰陰雨乍晴。金衣相喚百般聲。知渠固有驚人喙。齊鳥三年不肯鳴。

讀唐高宗紀

天皇重色逐功臣。自是忠言無一人。謾笑隋亡因拒諫。不知家索牝鷄晨。

讀唐中宗紀

由來哲婦敗嘉謨。話譎盟言淺丈夫。地下若逢韋處士。帝心還愧點籌無。

福州旅舍有雨欲訪韓祭酒脩以風不出

細雨如絲颺晚空。杏花消息滿樓風。柴門盡日無車馬。黃卷慵拈睡正濃。

橋西

橋西楊柳盡飛花。信馬尋春到日斜。滿地竹陰門半掩。隔溪亭館是誰家。

定州途中

定州關外草萋萋。沙磧無人日向西。過海腥風吹戰骨。白榆多處馬頻嘶。

老妓

寒燈孤枕淚無窮。錦帳銀屏昨夢中。以色列人終見棄。莫將紈扇怨西風。

陶隱李諫議自誦省中述懷用其韻以戲李公爲門下舍人時事

屈己從人氣未伸。若教更事定無嗔。不爲俯仰多乖岸。不愛當年李舍人。

賈誼治安謀策新。當年或毀議非真。嚶嚶喜作書生論。不愛當年李舍人。
滿腹琅玕六尺身。錦囊千首粉垣春。好從花底留人醉。最愛當年李舍人。
花月娟娟照北宸。傳呼中夜命詞臣。揮毫落紙驚風雨。最愛當年李舍人。
送客促馬到湖樓。客已去登舟有作。權思復

送客江頭客已歸。登舟對酒漫尋詩。恨無顧陸丹青手。畫出衰翁走馬時。

放鴈

雲漢猶堪任意飛。稻田胡自蹈危機。從今去向冥冥外。只要全身勿要肥。

長守驛壁上。有題

我昔來遊此館中。看花盡日醉春風。今來人事不如古。花在昔時紅處紅。

謝友人惠茶

南國故人新寄茶。午窓睡起味偏多。令人少睡還堪厭。睡可忘憂少睡何。

丙寅三月病後題

病與年深生事微。不知日去况春歸。落花飛入軒窓裏。始覺枝頭紅自稀。

莊村醉歸口號

踏碎斜陽到遠村。到時已是月黃昏。主人愛客情何極。傾殺田家老瓦盆。

傑遜

摘來嫩韭新炊飯。沾得香醪旋打魚。白髮山翁健如鶴。只愁賓客不歡娛。
綠楊如蓋蔭方塘。亭着肩輿數稻秧。遙指遠山如瓦屋。紫雲飛繞大茅岡。

東家借得竹肩輿，後院牽來瘦塞驢。避酒偷歸度花逕，石頭鉤破白羅裾。
一箇塞驢嘶葉行，山田水滿學泉聲。不知身在肩輿上，直到船頭睡未醒。
欵斜草帽花枝重，寬博絺衣水氣涼。山月忽當船尾照，野風渾作鬢頭香。
過營城口號

雲深沙路淨無泥，碧草如茵散馬蹄。五月營城涼似水，冥冥山雨杜鵑啼。
七站途中

千山飛雪曉模糊，忽放新晴學畫圖。不似江南春二月，石橋流水浴雙鳧。
將赴春官途中自嘲

蕭條霜雪滿脩途，慘惓風雲屬老儒。杜甫常懷憂國志，賈生重上治安書。
扁舟短棹江南客，歲暮天寒愁殺人。好去明年謁天子，宮華分得殿頭春。

警世

釋懶翁

昨是新春今是秋，年年日月似溪流。貪名愛利區區者，未滿心懷空白頭。
終朝役役走紅塵，頭白焉知老此身。名利禍門爲猛火，古今燒殺幾千人。
智異山庵醉後有作

釋無名

求名求利不如閑，屏跡煙霞二五間。好事何人來勸酒，袈裟半濕愧青山。
新住水多寺感舊有作

十里松間官道大，一聲鍾後梵宮幽。滿山猿鳥休相恠，少日經過與共遊。

東文選卷之二十一
終

東文選卷之二十二

七言絕句

閩重陽日登屋山懷逸民憲叔

許錦

多病良晨怕酒盃。登高搔首獨徘徊。今年可是重陽閩。滿眼黃花節後開。

炙背

南窓兀坐靜無塵。炙背温温味自真。直欲獻君開化日。旋將和氣與民春。

新堤村莊

咸承慶

晝景那如夜景清。朝暉纔出事還生。夢迴獨坐塵機少。耿耿西窓雪月明。

扈從白馬山應御製

金永燾

翠葆行尋蒼海上。玉簫吹送白雲間。紅塵一片飛難到。萬點螺分雨後山。

趙副令出按關東記關東隱君子二首

李玖

三陟官樓是竹西。樓中嘉客沈中書。而今白首能詩酒。暇日相遊爲說予。

右沈中書東老

鳳池司諫臥仙槎。早和滄浪漁父歌。爲說鹽梅時所急。天廚鼎味待君和。

右崔司諫卜河

幻菴

釋了圓

三界癡如作蠶蠶。白駒光景不停驂。茫茫天地無人省。早悟浮虛只幻菴。
與葉孔昭賦青山白雲圖

李穡

風塵漠漠暗銷魂。獨立乾坤日欲昏。一望便知山下路。好携藜杖過雲門。
喬桐

海門無際碧天低。帆影飛來日在西。山下家家藟白酒。斷葱斫膾欲鷄栖。
洞庭晚靄

一點君山夕照紅。闊吞吳楚勢無窮。長風吹上黃昏月。銀燭紗籠暗淡中。
雨暗江林

天低山遠樹浮雲。政是江天日欲曛。虎嘯猿啼愁不盡。逐臣騷客苦思君。
田家

一犁微雨暗田家。桃杏成林路自斜。歸跨老牛蓑半濕。陂塘處處泛殘花。
獨坐

寂寂虛堂白晝長。乾坤一片黑甜鄉。數聲啼鳥南風細。身世悠然墮渺茫。
寄東亭

春深門巷少經過。桃李花開落又多。記得去年亭上坐。一簾疎雨酒生波。
感春

花今衰未問來人。恐是城中別有春。步上東山還大咲。東君何處着嫌親。

小雨

細雨濛濛暗小村。餘花點點落空園。閑居剩得悠然興。有客開門去閉門。

滕王閣圖

落霞孤鶩水浮空。畫棟飛簾雲雨中。當日江神知我否。何時更借半帆風。

驪江

不是無錢買小舟。飄然直泝漢江流。只憐當戶龍山碧。日日吟詩獨倚樓。

訪密城兩朴先生

碧桃花下月黃昏。爭挽長條雪洒樽。當日同遊幾人在。自憐携影更敲門。

呈省郎諸賢

宦途今古足危機。何恠衰年惹是非。再拜聖恩天地大。萬山殘雪掩柴扉。

板橋

板橋江畔草如烟。落盡寒潮近午天。隔岸小船呼不應。漁人分去賣魚錢。

絕句

玉堂高處絕塵埃。白日清風動綠槐。一揖長官終日坐。數聲啼鳥滿庭苔。

榆關小憩寒松禪師沽酒

寒風吹雪滿榆關。冰結疎髯馬不前。賴有吾師三昧手。破囊擊出醉鄉天。

題牧菴卷

亂山深處路橫斜。日暮牛羊自識家。此是老翁真境界。淡煙芳草接天涯。
紀事

衣鉢誰知海外傳。圭齋一語向琅然。邇來物價皆翔貴。獨我文章不直錢。
復作絕句

絕壁飛湍雪灑缸。冰消春水漲驪江。高人獨坐扁舟去。無數青山自滿牕。
登定州城樓 鄭夢周

歸心杳杳入長空。萬里登樓滿帽風。已信此身無定止。明年何處聽秋鴻。
哭李密直種德

自是韓山積善餘。賢郎欠壽竟何如。古來此理誠難詰。孔聖猶曾哭伯魚。
漂母墳

漂母高風我所歆。道經遺塚爲傷心。莫言不受王孫報。千古芳名直幾金。
懷金海舊遊

鷺子樓前鷺子迴。郎君一去不重來。當時手種梅花樹。爲問東風幾度開。
楊子江

龍飛一日樹神功。直使乾坤繞漢宮。但把長江限南北。曹公誰道是英雄。
姑蘇臺

衰草斜陽欲暮秋。姑蘇臺上使人愁。前車未必後車戒。今古幾番麋鹿遊。

舟次白鷺洲

白鷺洲邊浪接天。鳳凰臺下草如煙。三山二水渾依舊。不見當年李謫仙。

舟中夜興

湖水澄澄鏡面平。舟中宿客不勝清。悄然半夜微風起。十里菰蒲作雨聲。

題驪興樓

煙雨空濛滿一江。樓中宿客夜開窓。明朝上馬衝泥去。回首滄波白鳥雙。

寄李正言

春風苦憶李長沙。徙倚南樓日欲斜。宣室承恩應未遠。石灘明月不須誇。

寄三峯隱者

華山南望一髮微。山中幽居晝掩扉。渠心豈肯避世者。自是俗人來往稀。

過金仲賢故居

園林春盡落花飛。門掩蒼苔半上扉。詩酒十年渾似夢。龍山此日淡斜暉。

登樓

西風遠客獨登樓。楓葉蘆花滿眼愁。何處人家橫玉笛。一聲吹斷一江秋。

沙門島懷古

憑高欲望蓬萊島。渺渺煙波接蒼昊。安期空有棗如瓜。斜日茂陵生秋草。

八仙當日訪壺瀛。雲間旌旄擁鸞輦。令人悵然欲從遊。且問弱水今清淺。

千古之罌一點山。鴉鬢倒影滄波間。祖龍遺迹復誰記。石刻剝落苔紋斑。

西江卽事

清嘯長歌卽勝游。機心消盡狎沙鷗。瓦盆濁酒家家有。從此江頭日典裘。
杏花如雪柳如絲。春滿江城日正遲。低帽短靴人不識。歸來馬上有新詩。

草堂

權興

懶讀詩書臥草堂。夢魂不到利名場。子雲識字終何補。臨老方爲執戟郎。

金鼇山大穴寺廣寒樓

吉再

竹色春秋堅節義。溪流晝夜洗貪婪。心源瑩靜無塵態。從此方知世味甘。

閑居

臨溪茅屋獨閑居。月白風清興有餘。外客不來山鳥語。移床竹塢臥看書。

夜泊楊子江

金九容

月滿長江秋夜清。繫船南岸待潮生。篷窗睡覺知何處。五色雲深是帝城。

武昌

黃鶴樓前水湧波。沿江簾幕幾千家。釀錢沽酒開懷抱。大別山青日已斜。

野莊

閉門終不接庸流。只許青山入我樓。樂便吟哦慵便睡。更無餘事到心頭。

述懷

徐甄

千載神都隔漢江。忠良濟濟佐明王。統三爲一功安在。却恨前朝業不長。
休暇 金齊顏

天下紛紛事鬪爭。黎民何日見昇平。水沉烟裏茅堂靜。時復挑燈憶孔明。

益齊李文忠公挽辭

文章道德獨兼全。問禮聞詩二十年。一曲顏回誰解聽。從今我欲絕琴絃。前命夕

齊顏曰明早來朝往則公已卒矣

次狼川客舍韻

趙浚

宇宙風塵一歎長。朝天馬上憶南陽。山西將士誰豪俊。圖畫凌煙鬢未蒼。

壬戌夏倭寇慶尙遂屠州郡。六月一日承督戰之命。倍道馳驛歇馬于赤

登渡因題一絕

接接六月路三千。野渡無人獨上船。採蕨出師誰得計。赤登樓下水如天。

次尙州客舍詩韻

炎蒸酷暑欲生煙。奉使南方路二千。滅賊朝天知有日。聞雞起讀出師篇。

次牟良驛詩韻

雞林山水欲清秋。萬古興亡客倚樓。尙使後人還不鑑。有誰知得我悠悠。

安州懷古

薩水湯湯漾碧虛。隋兵百萬化爲魚。至今留得漁樵話。不滿征夫一笑餘。

鐵關途中

卞仲良

鐵關城下路歧賒。滿日煙波日又斜。南去北來春欲盡。馬頭開遍海棠花。

竹堂入直

知印尙書最少年。承恩直到玉墀前。紫泥濕盡青衫袖。夜半黃麻下九天。

別正言李存吾

丙午與鄭樞諫議疏論辛屯貶長沙監務

尹紹宗

大廷白日雷霆後。南北三年幾夢思。復上離亭重回首。秋高喬嶽易生悲。

栗亭

先祖種栗於亭因以自號每春秋良辰必邀耆老置酒亭上

社稷壇前舊栗亭。耆英會遠草青青。茂陵仁義云云對。汲黯丹心炳日星。

敬孝大王挽詞

夢中咫尺謁天顏。豈意遺弓十日間。自念生成無髮報。微臣也合殉橋山。夢中

口號先生忠孝以周家垂柳陰中大道斜昨濛濛春雨過乾坤萬里一時花

題碧蹄驛

明明白日照靈臺。某也忠臣某也回。天鑑何曾違咫尺。謫來猶復望蓬萊。

枕流亭

廉興邦

金沙居士枕流亭。楊柳陰陰暑氣清。洗耳不聞塵世事。潺湲只有小溪聲。

次韻呈韓山君李穎叔

鄭思道

柳巷輕煙寒食後。松山翠色晚晴餘。苦吟未得賞春句。還向明窓讀佛書。

西江贈鄭先生達可奉使江南

去年京洛遇中秋。醉擁笙歌月下樓。今夜船窓滿江雨。一燈離思浩難收。

迎日閑居

屏迹村廬車馬稀。出門看雪立移時。漁蓑堪畫晚江上。只恨都官無好詩。

題熊川江

江水茫茫入海流。青山影裏一扁舟。百年南北人多事。只有沙鷗得自由。

偶題

風尖月細春猶淺。酒冷燈昏夜向深。人在西窓愁不寐。十年前事摠經心。

送江浙使次使者韻

韓方信

萬里滄溟秋月白。渺渺長天同一色。舟中吟得幾篇詩。記予苦與東歸客。

晝眠

元松壽

窮達誠知在彼天。不須辛苦慕前賢。心無念慮身無事。只管西窓晝日眠。

燕至

秋葉題詩送爾歸。春來還傍主人飛。杏梁亦有安身處。應爲權門足禍機。

次郭忠秀摠郎韻

倦鳥其如縱壑魚。祇今吾亦愛吾廬。箇中日用知何事。只有中庸一卷書。

正旦賣慵懶

慵懶由來不直錢。相呼相賣謾爭先。世人肯把千金擲。今歲依然似去年。
送安宗源赴江陵府使

出按關東有幾人。漁樵猶說謹齋仁。至今樂府遺聲在。應向樽前淚滿巾。
伏觀洪南陽侯彥博次曹南堂詩韻 三首

少日心期未老閑。宦途容易損朱顏。君恩報了方歸去。吾眼無由對碧山。
十載馳驅尙未閑。紅塵無處得怡顏。似聞昨日江流漲。何日扁舟向故山。
無能只合乞身閑。松柏難爲桃李顏。不敢作堂追綠野。應須結社學香山。

崇教法眼上人自江浙省渡海將遊金剛山未遂而歸

南北東西鼓角悲。九州人物盡流離。箇中只有餘杭境。煙火闐闐似舊時。
四月初一日 鄭道傳

山禽啼盡落花飛。客子未歸春已歸。忽有南風情思在。解吹庭草也依依。
重九

故園歸路渺無窮。水繞山回復幾重。望欲遠時愁更遠。登高莫上最高峯。
訪金居士野居

秋陰漠漠四山空。落葉無聲滿地紅。立馬溪橋問歸路。不知身在畫圖中。
訪金益之

墟煙暗淡樹高低。草沒人蹤路欲迷。行近君家猶未識。田翁背指小橋西。

萊州城南驛館屏有婦人琴碁書畫四圖戲題其上

芳園春到日初長。懶整雲鬢倚綉牀。彈罷一聲無限恨。不知誰賦鳳求凰。
檻外花枝轉午陰。閑敲玉子逞芳心。輸來莫賭黃金百。一笑還應直百金。
美人如玉罷粧梳。盡日凝眸讀底書。下女相看亦不語。無由得近遺瓊瑤。
可憐雲雨夢中人。又向瓊臺寄此身。思入丹青終不應。謾勞心力喚真真。

癸酉正朝奉天殿口號

春隨細雨度天津。大掖池邊柳色新。滿帽宮花霑錫宴。金吾不問醉歸人。

擊甕圖

權近

玉斗碎時虧霸業。珊瑚擊處有驕心。爭如幼日多奇氣。倉卒全人慮已深。

蓬萊驛懷古

祖龍鞭石竟無功。誰見神仙不死翁。三十五年真一瞥。從教鮑臭滿車中。

題柳少年山水圖

方善

墨池龍起雨濛濛。石走江翻鬼泣空。一陣好風天地霽。分明元化在胸中。

金居士雪中騎牛遊皴巖

雪裏溪山特地奇。遊觀牛背任行遲。皴巖可是非人境。長使儒仙爲賦詩。

卽事

夜深新月照天明。行路相驚避富平。自注漢成帝微行自稱富平侯家人未進白龍魚服戒。多慚

諫院得題名。

訪騎牛子不遇

成石磷

德彝不見大平年。八十逢春更謝天。桃李滿城香雨過。謫仙何處酒家眠。

賀趙侍中邀座主開謙

得士方知座主賢。侍中稱壽侍中前。天教好雨留佳客。風送飛花落舞筵。

養性亭

河允源

養性亭西蠹石東。竹林深翠柿垂紅。秋光滿院還無主。長入征夫一夢中。

赴任尙州次板上安相詩

爲州頃刻已三年。政拙那能及古賢。縱被推擠猶未去。自將尸素愧蒼天。

送春日別人

趙云仡

謫宦傷心涕淚揮。送人兼復送春歸。春風好去無留意。久在人間學是非。

遊金剛山

金剛山下雨中遊。白石入雲山無頭。更宿山中夢泉寺。松風半夜鳴颼颼。

題九月山小菴

山中猶在戊辰雪。柳眼初開已巳春。世上榮枯吾已見。此身無恨付窮貧。

卽事

柴門日午喚人開。徐步林亭坐石苔。昨夜山中風雨在。滿溪流泛花來。

題雲錦樓

雲錦樓前雲錦臺。醉看雲錦滿池開。世間豈有千年術。日擁笙歌倒玉盃。

卽事

偃長壽

不知春色深多少。祇見桃花爛熳開。遊蝶一雙無意緒。愛花飛去却飛來。

過楊子江

鄭摠

兩岸春旗簇酒樓。數聲柔櫓過滄洲。白鷗也識忘機客。故故飛來近葉舟。

斷俗寺見梅

姜淮伯

一氣循還往復來。天心可見臘前梅。自將鼎鼐調羹實。謾向山中落又開。

渡丐叱浦

李詹

篷窓一夜耿疎燈。行計還如物外僧。舴艋爲家何所適。春江風浪碧層層。

夜過涵碧樓聞彈琴聲有作

神仙腰佩玉縱縱。來上高樓掛碧窓。八夜更彈流水曲。一輪明月下秋江。

晉陽亂後謁聖眞

靡宇丹青一炬亡。頑童尙解護文坊。十年海嶠風塵裏。獨整衣冠謁素王。

慵甚

平生志願已蹉跎。爭奈慵疎十倍多。午寢覺來花影轉。暫携稚子看新荷。

漂母墓

老眼元非識健兒。千金當日豈爲期。墳前春草年年綠。料得王孫解報施。

贈彭城監務李君

三月彭城布穀啼。千畦麥浪與雲齊。使君日用非他事。點檢春畊東復西。

丁丑重九雷動虹見

重陽佳節苦無權。閑傍黃花過小灣。雷有殘聲虹未斷。滿江風雨送秋寒。

聞秭歸

瘴海山前雲月凝。秭歸哀怨聽來增。夜深休向西川哭。再拜今無杜少陵。

平壤奉呈頤齋

李原

事親日短事君長。有底年年客異鄉。回首大同江上路。春歸草木又蒼蒼。

通州途中

鄭俊

松磴排鱗高復低。蒼波萬里入冥迷。海棠處處停歸轡。爲惜繁英襯長蹄。

在襄州寄春州金使君邵

跳丸日月苦奔忙。西望相思幾斷腸。鴈過長空音問少。海風吹夢到昭陽。

叙懷

閑花半落綠初肥。門掩春風柳絮飛。春帶愁來歸又速。春歸胡不帶愁歸。

宿儀真口夜雨聞鴈

夜泊儀真水驛頭。西風吹雨送清愁。宦遊萬里身如寄。新鴈聲中又一秋。

翰院寄晉陽諸生

鄭以吾

三月江南天氣新。諸生誰與賞青春。翰林醉客渾無事。細雨薔薇夢遠人。

次韻寄鄭伯容

二月將闌三月來。一年春事夢中回。千金尙未買佳節。酒熟誰家花正開。

竹長寺

衙罷乘閑出郭西。僧殘寺古路高低。祭星壇畔春風早。紅杏半開山鳥啼。寺有老人

壇星

次茂豐縣壁上韻

立錐地盡入侯家。只有溪山屬縣多。童稚不知軍國事。穿雲互答採樵歌。

試闈

卞季良

春闈曾見士如林。萬萬花容有淺深。李白桃紅都自取。天工造物本無心。

題文殊騎牛圖

朴瑞生

長裾垂地獨騎牛。鬚末清風滿天地。放下繩頭緩緩歸。溪橋碧草煙華膩。

船上卽景

家家門壓碧琉璃。怪底居人有是奇。多事紅花依綠竹。淡粧香霧漾清漪。

卽事

柳方善

晝靜溪風自捲簾。吟餘傍架檢書籤。今年却勝前年懶。身世全教付黑甜。

次清心樓韻

咸傳霖

秋月春風混大江。蘆花柳絮畫篷窓。早年遊覽半天下。一片驪城信少雙。

慶安府

曹庶

水光山氣弄晴沙。楊柳長堤十萬家。無數商船城下泊。竹樓煙月咽笙歌。

五靈廟

村南村北雨淒淒。五廟靈宮楊柳低。十里江山和睡過。竹林深處午雞啼。

次廣州清風樓韻

南在

自憐阿堵已飛花。尙且逢場發興多。可笑此翁猶矍鑠。百端無計住昭華。

題池浦家壁

魚變甲

謝病歸來一室幽。荒涼草樹古池頭。若予豈避功名者。祇爲慈親不遠遊。

哭鄭三峯

陳義貴

應時開國際。明君畫圖長。生第一勳。恨不當年端國本。泰山功業等浮雲。

次碧松亭唱和詩

尹祥

老願春遲花底飛。每嫌山鳥喚催歸。松陰此會蘭亭飲。須把流觴次第移。

廣州北樓

權湛

風撼薔薇已謝花。綠陰滿地恨何多。少年歌舞一樓月。十載歸來兩鬢華。

題廣州清風樓

河崙

少年曾此一看花。老大今來感慨多。歲月不留人換盡，眼前風物尙繁華。

送權司諫兄左遷赴清風郡

湛

權弘

宦海風濤人共愁。未知何日得安流。濯纓一曲滿江月，悵悵獨登寒碧樓。

無極溪上別而立而立有詩次韻贈之

梁汝恭

盛朝同作掖垣臣。謫宦分離可愴神。料得春風相憶處，永山煙樹漢江濱。

次燕子樓韻

李行

解道行藏獨倚樓。草堂風韻儘悠悠。湖山終得容疎放，爭奈飄然雪滿頭。

次靈鷲樓韻

辛引孫

水清聊洗九衢塵。鑑古堪容五合陳。數畝薄田遺產在，東臯舒嘯憶前人。

嘆無子

李孟昫

自從人類起於寅。父子相傳到此身。我罪伊何天不弔，未爲人父鬢絲新。

癸亥元日會禮宴

黃喜

九九年來押百官。三元獻壽對天顏。日明堯殿春風裏，多少群臣各盡歡。

寄柳嘉山

李那

憶君回首白雲西。杳杳秋天逐望低。惆悵無緣能縮地，歸心日日過龍溪。

偶吟

秋夜冥冥雨滴階。旅魂鄉思共悽悽。曉來已決漁樵計，家在洛東江水西。

瀟湘八景圖有宋眞宗宸翰

姜碩德

茂陵宸翰照蒼旻。虎臥龍跳儘絕倫。自是當時聊遣興。那知睿獎異時新。
解衣盤礴問何人。意匠經營妙入神。試向晴窻時一展。恍然坐我洞庭濱。
青煙漠漠鎖噴岵。松檜陰森路屈盤。試問招提藏底處。一聲鍾落白雲端。

右煙寺暮鍾

清秋極浦迥連天。款乃一聲若箇邊。日落風輕蘋滿水。片帆飛過碧山前。

右遠浦歸帆

海門推上爛銀盤。鐵笛聲高萬頃寒。最是清光秋更好。凭欄須到夜深看。

右洞庭秋月

凍雲垂地暗坤倪。忽放春光滿水西。江路無人天欲暮。梅花開遍竹枝低。

右江天暮雪

斜月半輪明遠岫。昏鴉數點返寒林。漁人收網歸茅舍。穿入蘆花深復深。

右漁村落照

孤舟千里思悠悠。挑盡寒燈攬弊裘。奈此黃陵祠下泊。蒹葭風雨滿江秋。

右瀟湘夜雨

千里關山露未晞。槿籬茅店掩柴扉。輕嵐一抹橫如練。多少樓臺隱翠微。

右山市晴嵐

平沙如雪，負無垠。萬里衡陽欲暮春。不似玉關，嬾繖密。悠揚直下，莫紛綸。

右平沙落鴈

題首安寺澄公方丈

權 跂

古人猶着舊麻衣。曾笑龍門約已違。三聖山靈應自慶。四枝丹桂映朝暉。

次司諫院韵呈僚丈

李孟常

御爐煙盡鷓鴣班。白日臨軒覩聖顏。奏罷群臣霑錫宴。禁川橋上醉同還。

題驪興清心樓

崔 脩

璧寺鍾聲半夜鳴。廣陵歸客夢初驚。若教張繼曾過此。未必寒山獨擅名。

送金翰林係熙以親老休官歸金海

李永瑞

金榜玉堂早策勛。平看脚底起青雲。離親仕宦知多少。江上秋風獨送君。

薔薇

李 壇

香浮一院影沉沉。蝶舞蜂顛不自禁。我亦未堪幽興惱。苦吟終日坐花淫。

梨花

院落深深春晝清。梨花開遍正冥冥。鶯兒儘是無情思。掠過繁枝雪一庭。

三色桃

淺深紅白爛相交。誰假天機織得勞。未是春風無世態。貴家池館錦粧桃。

玉簪花

麻姑群玉山頭見。天女瑤臺月下遊。舞罷霓裳雲錦亂。歸來醉墮不曾收。

風雨夜用王荊公詩韻贈景醇

姜希顏

風雨無情晚更侵。耳邊清韻接庭陰。兒童不必煩驚恠。吹折簷簷碧玉心。

四友亭詠松

階前偃蓋一孤松。枝幹多年老作龍。歲暮風高揩病目。擬看千丈上青空。

宮詞

成俛

陰陰簾幕燕交飛。日射晴窓睡起遲。急喚小娃供頰水。海棠花下試春衣。
陰陰簾幕暑風輕。閑瀉銀漿滿玉餅。好箇黃鸝多事在。隔牆啼送兩三聲。
碧梧金井換新秋。斜倚薰籠一段愁。明月滿庭天似水。起來無語上簾鉤。
七寶房中別置春。羅巾斜帶辟寒珍。朝來試步梅花下。臉上胭脂懶未勻。

偶書

言辭出口屢觸諱。世事折肱曾飽更。黃昏風雨鬧北牖。夢作聖居山水聲。

次昌平東軒韻

權攀

王佐之才不是疎。孔明猶自臥茅廬。丈夫出處何容易。掩柩方知事乃除。

義州東軒用前韻

朴元亨

漂泊曾同一小舟。功名老去足封留。早將憂樂關天下。客裏情懷不用愁。

憶京家雜卉在義州作

我家群卉正逢春。想得如今雨露新。園裏雜花猶記憶。雜花叢畔幾多人。
病中示子安性

今日樽前酒數巡。汝年三十六青春。吾家寶物唯清白。要自傳傳無限人。

次大同江樓船韻

李克堪

江上雪消江水多。夜來聞唱竹枝歌。與君一別思何盡。千里春心送碧波。

淡淡亭

夕陽西下水東流。渺渺江山無限愁。天地有窮吾亦老。此身從付白鷗洲。

議政府蓮亭

滿地荷葉正田田。紅粉三行玳瑁筵。堪笑中書舊狂客。風情不減已華顛。

次三陟竹西樓臥水木橋

金壽寧

槎牙古木截前灘。步步寒心幾駭瀾。平地風波人不識。到橋猶作畏途看。

寄中書諸君

申叔舟

豆滿春江繞塞山。客來歸夢五雲間。中書醉後應無事。明月梨花不怕寒。

詠日本躑躅

我昔雲帆掛大洋。孤舟五月繫扶桑。當時暫寄須臾興。今日相看思渺茫。

六言

青嶂幽林圖

李淑琪

陸公青嶂幽林。置我瀟湘華陰。對此還思歸路。借吾第幾煙岑。

雨中登義城北樓

鄭夢周

聞韶郡樓佳處。避雨來登日斜。草色青連驛路。桃花爛覆人家。春愁正濃似酒。世味漸薄如紗。惆悵江南行客。蹇驢又向京華。

過楊州

經過楚地山川。像想隋家宮闕。往時興廢誰嗟。此日繁華可悅。仙花香杳難尋。官柳依依堪折。晚來偶泊蘭舟。二十四橋明月。

東文選卷之二十三

詔勅

定宗褒獎王式廉詔

無名氏

云云式廉三代元勳。一邦柱石。量吞海嶽。氣蘊風雲。昨者當先王疾篤之秋。是涇渭未分之際。懷忠秉義。表節歲寒。翊戴眇冲。嗣臨軍國。尋有姦臣暴逆。結構兇頑。忽自蕭牆。俄興變亂。卿玉入火而彌冷。松冒雪以轉青。按劔衝冠。忘生徇難。兇狂瓦解。逆黨伏誅。朝綱欲墜而復興。宗社將傾而再整。若非公之效死。予曷致於今辰。可謂板蕩識誠臣。疾風知勁草。昔聞斯語。今見其人。縱加萬石之封。並授九州之牧。豈足酬茲勳績。報彼功名。今賜匡國翊贊功臣號。加大丞崇資。將表予懷。以旌不朽。匪獨展君臣義分。唯望共生死同期。予不食言。有如皎日。

睿宗不允魏繼廷乞退詔

云云卿貪邪所忌。忠亮不回。先考尙賢。早授洪鈞之任。寡人受命。以爲同德之臣。自春以來。稱疾求免。雖嘉止足之義。未符倚注之心。知予至誠。無或遜避。前已曲諭。夫復何言。

仁宗賜富軾藥合詔

云云逆命滔天。憤妖人之作亂。登壇受鉞。嘉大將之請行。觸風霜之沍寒。憫士卒之辛苦。今者王師壓境。賊類摧鋒。傳首于茲。已協藁街之殉。戢兵在卽。實由蓮幕之謀。宜更勉六軍之心。卒以圖萬全之計。

仁宗賜崔思全甲第一區詔

云云朕聞疾風知勁草。板蕩識貞臣。歲丙午禍起蕭牆。宗社幾危。板蕩之勢已極矣。在朕左右忠義之士。尙未免於白刃。誰能出力以衛社稷。惟卿奮不顧身。與人好謀。辨論逆順。開諭禍福。雖俊京之悍黠。亦揮淚感激。知宗所尊。轉禍爲福。復安宗社。卿之功也。卿雖退居。在余褒獎之心。何敢少弛。

明宗遺趙位寵詔

云云朕因臣民推戴。奄登大寶。于今六年。賴文武臣隣協輔。獲守丕基。頃有賊臣。專擅國政。多行不義。害及中外。民怨兵起。至於無知小民。殺傷尤多。朕甚哀痛。其賊臣已從卿等表奏。舉義掃蕩。卿等又請降使宣諭。嘉乃忠誠。遣使宣諭。朕至意。更勵忠誠。

擬漢責降司隸校尉王尊詔

李穀

漢興將二百年。自世宗皇帝以降。禮文寢備。而紀綱陵遲。姦軌不勝。先皇帝又以寬仁御下。重於嚴斷。儉邪用事。顯尤顯權。罪盈釁積。今已服天誅。司隸校尉劾奏丞相御史不以時白奏。理或然矣。朕在儲位。猶側目憤不一言。丞相御史

其能之乎。司隸之言。是章先帝之過。而見朕之短也。可出尊爲高陵令。

擬漢楊震二子爲郎詔

蓋聞君子小人。迭爲消長。審之在人主。此治亂之機也。我高皇帝創業。世祖中興。其道無他。審於此耳。文景武宣。遵而勿失。元成以降。小人道長。馴致新莽之禍。中興之後。厥鑒不遠。永平建初之政。能繩祖武矣。迺者戚宦相扇。柄用危害。忠良朝野寒心。可謂君子道消邪。故大尉震少以儒行。名重關西。爲吏廉謹。在朝謇謇。有大臣之節。疾姦臣而不能誅。惡嬖女而不能禁。直言正色。無所回撓。而反見擯斥。卒以自覆。朕甚憫焉。甚慕焉。於戲崇德尙賢。先王之所重。茲用擢其嗣子某與某爲某官。賜錢百萬。用恤其家。以旌忠直。爾其勉卒父業。副朕意焉。

擬漢宣帝追尊悼園爲皇考詔

李詹

蓋聞爲人後者。謂其所後者爲父。法具禮書。不可移易。朕以旁支。入承大統。繇是先考未得與享廟。其於尊親義。或闕焉。若稽唐虞。未有成規。揆之人情。夫豈所宜。朕夙夜兢惕。處此是圖。且從權宜。置園奉祀。誠欲別立殊稱。以爲定禮。以傳後嗣。迺者有司奏。悼園宜稱尊號。曰皇考。今其指畫。允協朕意。於是立廟。置奉邑三百家。以奉祀事。然後天理人倫。庶得其正。嗚呼。追王之禮。雖替於武王。尊親之義。悉本於成周。惟爾多方。想宜知悉。

擬唐授山人李泌侍謀軍國天下元帥府行軍長史勅 李季旬

勅。朕聞古之賢王。值危難之際。收興復之功。必待豪傑之士。以運帷幄之謀。是以宣王賴方召而中興周室。光武資寇鄧而再造漢家。此歷代之共由。而今日之急務也。惟爾山人李泌。性資特達。識度恢弘。雅德英才。夙聞於天下。朕在東宮。以爲布衣之交。一朝超然歸臥泉林。每想清標。未嘗頃刻忘也。今茲胡羯起於范陽。竊窺神器。稱兵指闕。上皇播遷而人心擾攘。生民塗炭而國步將傾。禍亂之極。莫此爲甚。朕仰承付托。卽位草萊之中。慨念甘盤。共圖收復之功。纔勤物色之訪。已罷雲霞之夢。朕甚悅之。待以賓禮。當出當寢。聯轡對床。小事大事。悉皆咨之。當此艱難之際。不可相屈以官。然衣黃衣白。軍士指之。群情之疑。不可不絕。且元帥府。運籌決勝之地。苟非其人。成敗安危。未可知也。非敢爲臣。以濟危急耳。暫屈高尚之志。叅掌機密之務。掃除群兇。克復舊物。上慰祖宗之靈。下解黎元之苦。此朕今日之所望。罔俾方召寇鄧。專美周漢也。功成之後。任行高志。誰云不可。勉就乃職。毋替朕命。可授。

教書

賜王弟扶餘公生日禮物教書

林成概

教云。卿天潢宅粹。國葉聯榮。秤象敷謀。名芳於魏室。嗟麟播詠。美藹於周詩。爰從先考之朝。猥降寵褒之典。乃疏封於青社。恒竭節於紫宸。洎朕承襲丕圖。

統臨有衆。亦誠端於敦叙。仍務擅於挾維。載周迅矢之年。俄及懸弧之旦。睦鴈行而軫念。駢鴻品以頒恩。當體優弘。永符眷注。

賜常安公教書

柳伸

教云云。天地始判。陰陽之道。于以成人。倫既生。伉儷之義。於是定。由之尙矣。重莫甚焉。某。孝悌秉彝。溫慈迪哲。職居藩屏。勤傾忠赤之誠。禮厚賑膳。同受神明之祐。比涓良夕。幸會佳期。鳳凰于飛。已膺吉兆。琴瑟相應。雅有和聲。載帷宴爾之休。增軫友于之念。寔伸渙命。庸示新恩。當祇服於龍光。終不論於鯁節。今差某官某。內賜某物云云。

肅王遺教

金緣

教宰臣魏繼廷已下文。文武百寮僧俗者老。朕以涼薄之德。嗣守大業。永惟萬事之統。不遑一口之安。躬攬庶政。至于宵旰者十有餘載。思與中外之人。共躋仁壽之域。奈何憂勞成疾。遂至彌留。天命難謀。任適短長之分。邦基至重。敢忘顧囑之勤。王太子仁義孝友。本乎生知。溫慈惠和。副於民望。宜於柩前。便卽君位。凡軍國賞罰大事。一稟嗣君處分。方鎮州牧。只於本處舉哀。不得擅離理所。喪服之制。以日易月。山陵制度。務從儉約。嗚呼。知始終之期。逝者以之無憾。講久長之策。存者不可傷生。尙賴股肱大臣百辟卿士。同輸忠力。協輔王室。使我國祚垂于無窮。朕雖瞑目。心則足矣。布告國內。明知朕意。

及第放榜教書

金成概

教周道熾昌。大司徒論陞俊逸。漢成熙盛。公車府詔下賢良。須倚注於士樞。用
緝寧於王業。朕纂居大寶。思振先勞。虛襟抱以時思。闢燦場而歲課。昨命某官
李子淵。主張貢版。澄覈儒縫。果推稱物之心。光啓登才之路。覽所上大學進士
某等詩賦論辭。涵今古。理貫神明。孔翠羽毛。自成於華彩。珠璣光澤。奚假於淬
磨。諒多秀越之稱。合陟平衡之選。進士某某等。某某科明經某某等。機神雋郎。學識
精通。該經宗而管轄開明。談典實而笙簧振響。騰英旣夥。拾芥攸宜。某某等某某
科。今已選辰放榜訖。宜令所司。知委主者施行。

又

金富弼

門下夫百朋均錫。周家垂莪育之詩。千佛配名。唐室重桂科之勝。皆所以勸善
進賢之軌範。化民成俗之權輿。自古通規。于今急務。朕叨將涼德。謬踐丕基。自
從纘守之初。常念遺留之制。須資多士。得致昌期。咨四岳以明揚。仰遵高帝。關
四門而優納。祇稟都君。旁求而兼取。草萊類進。而若連茅茹。遂量能而授爵。俾
論道以經邦。爰命哲人。大開選席。知貢舉某官任懿。同知貢舉某官朴景綽等。
以貼經詩賦時務策問。選取所上國子進士韓卽由等。學優至穀。藝熟穿楊。隨
鄉賦以雲臻。觀國光而景慕。共趨試版。爭擅才華。抱璞家家。自來者六百餘士。
吹竽一一。主擇者二十七人。卽由等四人。可賜乙科及第。鄉貢進士李湜等八

人可賜丙科及第。良醞令同正甄惟綽等十五人。可賜同進士出身者。其或明經李揚發等。讀窮孔子之書。藏蘊孝先之腹。見聖人之奧。可以符學古入官。識君子之儒。可以合明經取士。李揚發可賜二科及第。崔慶雲可賜三科及第。其或進士安永祚林郗一宋開等三人。未獲綴行而出。退舍飲墨之羞。念十載之積功。賜一官而通仕。仍令釋褐。便許霑纓。可恩賜出身者。於戲將致非常之才。宜從不次之舉。敢採丘園之秀士。遂登冠冕之周行。凡爾奉職之流。知朕求賢之志。宜令所司知委者。

又

金富軾

朕聞書典所載帝王已來。惟理道之多端。以求賢而爲急。虞舜之納大麓。賓于四門。臯陶之矢厥謨。叙其九德。宗周多士。蓋由德行之興。炎漢得人。亦本賢良之舉。延及魏晉。迄于隋唐。或以策論觀其能。或以詩賦考其藝。設科之目。時有異同。選士之門。則無今古。肆予涼德。率舊明章。尙邦國之榮懷。須英雄之來輔。考槃在澗。焉知無窮處之碩人。有卷者阿。庶幾見來游之君子。命知貢舉某官同知貢舉某官。俾之試可。各以名聞。雖鑒照之間。妍蚩各辨。而簸揚之際。糠粃在前。明揚造庭。中命射策。傾山採玉。已登和氏之場。剖蚌得珠。皆擅隋侯之價。進士某。可乙科及第。進士某等。可丙科及第。進士某。可同進士出身。某進士等。崎嶇十載。脫落一名。憫爾功夫。垂成而敗。沛然渥澤。爲仕之階。可恩賜及第。明

經某等。勤過書姪。學幾傳癖。非但味古人之糟粕。得以聞夫子之文章。不有褒嘉。孰為勤勉。可本業某科及第。許之看榜。宜令所司知委者。

睿王遺教

教內外文武臣寮僧道軍民等。朕荷天地之景命。承祖宗之遺基。奄有三韓。十有八載。扶衰救弊。思與萬民而同休。旰食宵衣。未嘗一日而暫逸。而憂勞積慮。疾恙踰時。有加無瘳。遂至大漸。權國事。仁王諱濬哲之性。稟自天成。元良之資。鬱於人望。宜承末命。以卽王位。凡軍國大事。並取嗣君處分。喪服。以日易月。山陵制度。務從儉約。方鎮州牧。只於本處舉哀。不得擅離理所。成服三日而除。於戲。死生常道。人所難逃。始終得宜。朕亦何憾。尚賴廟社儲祉。臣隣協心。用輔嗣君。永康王室。使我國祚。垂于無窮。咨爾多方。體予至意。

仁王遺教

無名氏

教內外文武百僚等。朕荷皇天之眷命。承祖宗之遺休。撫有三韓。二十五載。今者憂勤積久。疾恙累旬。有加無瘳。遂至大漸。王太子。諱毅忠孝之美。天資夙成。德業之豐。人望攸屬。可卽王位。尊王妣為太后。喪服。以日易月。山陵制度。務從儉約。於戲。有生必死。聖智所同。文虎百僚。同心協德。輔我元子。永康王家。咨爾在庭。當體予意。王者施行。

尚書令雞林公吉禮教書

儲元賓

教汝閨庭愛子。藩邸重臣。星戶之戒期。告成嘉禮。念天源之發慶。特霽殊恩。庶承褒眷之優。永協和鳴之兆。今差使翰林學士朝散大夫司宰卿直門下省事知制誥兼東宮侍講學士盧旦。往彼宣賜某物等。具如別錄。

元帥金富軾平西獻捷教書

崔誠

教某等左軍兵馬判官前試閣門祗候魯洙。至省所上表。今年二月十九日味爽。潛師入侵。賊徒奔敗。不能拒。縛僞元帥崔永。收副元帥趙匡死尸。相率出降。尋入城。洒掃宮闕。安撫軍民事。悉朕以寡昧之資。託于士民之上。不能制理于未亂。保邦于未危。乃者蕞尔西都之人。謀爲大逆之事。詐稱制旨而發動軍馬。僞立年號而欺罔人神。勢固非常。罪難可赦。因在庭之僉望。遂命將以徂征。卿奮不顧身。慨然受鉞。誅佞臣於輦下。首除內應之姦。嚴師律於軍中。悉備合攻之計。然以欲殄殲其元惡。不將殺戮於脅從。先作巨堙。以摧沮賊謀。或投大石。以壞破城屋。然后俾衆卒銜枚而突入。卽群姦束手以出降。旣蕩滌於妖氛。仍慰安於父老。非特雪宵旰憂勞之念。抑亦消中外憤鬱之懷。自非卿察安危利害之機。知先後緩急之便。則何以不勞攻戰。盡服頑凶。從初用事者。雖是朞年。及其收功。則在於一旦。昔者高宗之伐叛國。周公之得罪人。皆三載而乃平。猶萬世而稱美。偉歟今日之事。足爲青史之光。朕嘗遣近臣。特加獎諭。今覽抗章之賀。備申歸美之誠。省閱之餘。歎嘉無已。故茲詔示。想宜知悉。春暄。卿等比

平安好遣。書指不多及。

王子開福日降使教書

教妃延德宮主任氏。朕觀古典籍之紀事。賢后妃之宜家。雖則多內助之功。而鮮有多男之慶。嘉尔克修於婦德。維時屬應於禘祠。復膺彌月之祥。乃見弄璋之慶。本支相依而滋茂。源派不竭而靈長。與國咸休。荷天之佑。宜豐寵賚。庸示眷懷。今差使某官某。往彼宣賜銀器匹段布縠鞍馬等物。具如別錄。

王女興慶宮公主嘉禮日降使教書

教夫陰陽之氣交而歲功以成。夫婦之禮備而人倫以正。尊卑一致。今古同規。汝稟性柔閑。凝姿婉淑。朕心所愛。早膺湯沐之封。姆教不煩。已諳圖史之訓。爰屬禮成於外館。敢忘賚及於多儀。臨遣邇臣。就宣至意。蓋敦國禮。豈特私恩。執婦道以罔違。益懷恭順。保家肥而有慶。茂對寵光。今差某官金正純。往彼宣賜衣帶金銀器匹段布貨諸物等。具如別錄。

賜安平伯璫教書

教璫夫易稱帝乙歸妹之義。詩有王姬下嫁之文。非特盛車服之儀。所以豐骨肉之愛。卿侯閔襲慶。宗室稱賢。忠孝存心。幼被義方之訓。詩書稽古。日新文雅之才。早膺疏爵之殊恩。已就及時之嘉禮。式優錫予。庸示寵靈。琴瑟相調。諒集閨門之樂。本支益茂。實爲邦國之光。宜當貴而不驕。篤謙冲而自守。永終偕老。

保有令名。今差某官金正純。往彼宣賜衣帶金銀器匹段布貨鞍馬諸物等。具如別錄。

知樞密院金富儀卒弔其孤教書

教宗道等。汝父金紫光祿大夫守司空尙書左僕射政堂文學判尙書禮部事。脩國史柱國金富儀。有奇偉絕異之才。而足以動人之耳目。有高明博大之學。而足以造道之淵源。吐出文章。赫赫凌雲之逸氣。發爲事業。堂堂輔國之嘉謨。況以洒落之高懷。不拘尋常之小節。睨嚮從潛邸之舊。深得爲人之賢。寢擢高華。至登樞要。方且咨謀於帷幄。圖延盛泰於邦家。忽聞訃音。良惻予意。嘗謂仁者必壽。奈何哲人其萎。至於行路者悲傷。豈止滿朝之痛惜。然以死生之理。賢聖所同。勉思盡孝以飭終。無敢過哀傷性。差試將作少監中公英。往彼弔慰。

獎諭征西都知兵馬金正純教書

教某。惟逆賊趙匡等。以幕鷲鼎魚之勢。且延晷刻之命。敢拒官軍。莽有餘月。師老財窮。爲害不小。侂來奏捷。實慰朕心。昔唐近臣守謙。以偏將從事於丞相。裴度幕下。助平淮蔡。事載于史。以今觀之。無愧前輩。不有嘉獎。何以勸人。今賜卿金腰帶一條。金花銀匣重肆拾兩。緋羅夾複。全宜祗領也。故茲詔示。想宜知悉。春暄。卿比平安好遣。書指不多及。

宣召元帥教書

教某。朕以止戈爲武。聖人之格言。已事則竣。臣子之所守。淮蔡平而裴相入。徐方定而召公還。於古有諸。在今何異。卿自有過人之才量。常期濟世之功名。屬西賊之擅興。摠元戎而薄伐。殊弗識孫吳之法。拙速以成。所庶幾堯舜之兵。不戰而屈。督將士以忠義。列城寨以屯營。策決萬全。動無一失。制群賊有折箠之易。措中原於奠枕之安。繫卿之功。惟朕以懌。詩不云乎。自天子所。謂我來矣。此朕所以召卿之意也。宜副仰成之重。以棘獻凱之旋。今差衛尉少卿。賜紫金魚袋。裴景誠。賫持詔書。往彼宣詔。故茲詔示。想宜知悉。春暄。卿比平安好遣。書指不多及。

降使金富軾賜第教書

崔惟清

教某。格于皇天。茲謂一德之輔。嘉乃丕績。實惟萬世之休。繫眷注之彌深。則龍光之宜異。卿以宏廓之量。蘊經綸之才。自先代經筵之臣。爲寡人法從之冠。歷險不易其所守。致身益效於嘉謀。果自樞庭。進當台鉉。屬西土之搆亂。摠中權而濯征。覆臯獍之巢。易種無所。拯塗炭之子。按堵不移。俾夷夏望若長城。增朝廷重於九鼎。出將入相。既已亮其天功。濟世安民。益交修於朕德。方巨業之甫定。豈大賚之可稽。爰推賜第之恩。特降馳軺之渥。雖闕彤弓之錫。未稱有功。其于命服之皇。蓋旌厥德。當體至意。益勵乃心。

獎諭征西元帥金富軾教書

鄭沆

教某省所上狀擒捉逆賊定疊京城事具悉。朕惟逆雛趙匡。以瑣瑣小醜。據險陸梁。逋誅既久。非不知乘將卒欲戰之心。併力剪除。俾無遺種。乃緣西都是始祖肇興王業之地。又念生齒之衆多。皆吾赤子。不忍一切屠滅之。故詔命開諭。至于再三。庶幾匡等易心歸順。以體朝廷矜恤之典。此卿之所具知也。自從元惡妙清等見殲於帳下之後。岳嶺失策。賊情一變。則戡定之功。似不可以一二日期也。卿以文武之才。都將相之任。寬得士心。沈機妙物。凡所臨賊制禦之術。不煩諮問。已熟於胷中。始而排築城寨。以休養士卒。終起土山。以壓賊壘。大軍突入。巢穴皆空。卒使逆類望風自潰。束手出降。已而不頓一戈。下全城於反掌。決不踰時。收萬世之偉績。非卿持明果毅萬全之策。不能至此。而以副寡人委付之意也。嘉獎之深。不能自己。今差使文林郎樞密院右承宣尙書吏部侍郎知制誥賜紫金魚袋李之氏。副使徵事郎殿中少監知尙書兵部事賜紫金魚袋林儀等。賫持詔書。往彼宣諭。并賜例物。具如別錄。至可領也。應五軍員將士卒。顯著功績。逐便件析聞奏。當行爵賞。故茲詔示。想宜知悉。春暄。卿比安好。遺書指不多及。

故門下侍中魏繼廷配享睿宗教書

郭東珣

王者之孝爲能饗其親。人臣之榮在不掩爾善。茲奉先之罔極。乃錫寵之惟新。三重大匡檢校太師守太保開府儀同三司門下侍中判吏部事上柱國某。清

儉鎮於一時。儀刑重於百辟。實斯民先覺。惟顧命大臣。屬英陵晏駕之時。方睿考飛龍之日。親傳玉璽。方贊鴻基。至今搢紳之間。想昔風節者衆。配享于廟。有闕禮官之文。追錄其功。在予寡人之命。適修大禘。用賚明恩。舉茲從祀之儀。加以易名之典。俾先王迪高后。賢業益彰。雖死日猶生年。忠魂已格。加贈忠烈公。故叅知政事鄭克温配享神宗教書

李奎報

君畢喪而祔神主。是國家不易之規。臣有功則配廟廷。實今古相沿之制。卿昂躔毓粹。嵩嶽降精。氣雄韓信之登壇。早紆將印。略邁張良之借筭。密轉軍籌。當寧考之承圖。掌中樞而佐命。暨叅大政。逮事寡人。故及見爾之平生。真可謂古之遺直。朕曩遭憂釁。深軫哀傷。地隔九天。雖未還於仙馭。禮終三載。將奉入於宗祊。顧侑位之難處。與群寮而迺議。當代之佐未必乏其人焉。衆論所歸。顧無易於卿者。爰舉追崇之典。俾躋與享之聯。於戲不以生死而有異者。君之寵恩。無以幽明而有間者。臣之忠義。朕將嘉乃丕績。誓萬世之不忘。卿亦相我先君。佑三韓之永固。

仁王罪己教書

門下罪己勃興。魯史嘉大禹之德。改過不吝。商書載成湯之明。今率前修。以成其美。朕以後侗之眇。繼先緒之豐。長於深宮之中。暗諸經國之務。憂勤夙夜。雖增若涉之懷。制馭姦雄。尙乏先幾之見。屬崇德之跋扈。更丙午之擾攘。鑿輿播

遷宮室焚蕩。上辱祖宗之委寄。每辜基業之延洪。適有陰陽之人。出從鎬邑。加之左右之薦。待以大賢。朕誠不明。遂惑其說。乃泐大華之新闕。以期祖業之重興。不思一己之勞。屢訪西巡之駕。而吉祥之應。蓋寡。災異之生。寢多。訖無明徵。空速衆謗。無成乃已。朕方戒於聽從。彼昏不知。日有懷於怨望。擅興軍馬。囚械官員。以天開表其年元。以忠義號爲軍額。公然徵集兵卒。意欲凌犯上都。變出不圖。勢將莫遏。自古大逆之罪。孰與西都之人。呂刑三千。論罪莫先於無上。舜功二十。知人實本於去凶。是用先誅內應之姦。遂有元戎之遣。然且約無掩擊。待以歸降。何逆命之至深。乃嬰城而固拒。久勞於外。士卒經時而未還。不已于行。餽餉屬途。而弗絕。衆庶勞止。遠近騷然。況今慮已農妨。久稽月捷。興言念此。莫知所然。履霜堅冰。過本馴致。痛心疾首。罪實在予。所冀在庭之臣。勤王之卒。奮其旅力。殲厥群凶。上慰寡人之心。次釋三韓之憤。然后共輔不逮。有望於將來。永言自新。庶無於貳過。所有悔過自責之詔。布告中外。咸使聞知。故茲詔示。想宜知悉。

王太子嘉禮日降使教書

教王太子。諱夫婦若兩儀之常。莫斯爲重。帝王垂萬世之統。亦於是關。故婚姻謂之大倫。蓋古今所以親迎。爾生鍾岐嶷。夙賦聰明。既加元服。以成人。當得賢妃而作匹。眷言淑媛。挺自深閨。內則千年享國之王孫。外焉兩代定策之勳閥。

壺則既可尙。婦儀又無虧。合將偃月之姿。升儷少陽之位。雖以尊勢而選之多矣。若此嘉耦者。得亦難焉。適生此時。來配乃體。是謂天合。夫豈人爲。禮甫成。銅禁之中。喜已洽。縣區之內。宜宣密命。曲諭欣悰。故於第三日。特遣使某官等。備禮問評。兼賜例物。具如別錄。

大孫誕生三日賜太子教書

云云。朕以祖宗積累之德。膺受丕圖。撫有三韓久矣。嘗自以爲朕雖不逮。苟得有嗣續之良。克昌厥後。則足以無負於祖宗。無愧於社稷矣。果得爾爲子。冊以儲副。方慶之之未暇也。爾復以岐嶷之資。得配淑媛。猶未及朞年。而又得元子。則爾之於祖宗。亦可謂不負矣。然後知朕與爾之能不墜先王。無疆大曆。服永永傳于萬世明矣。夫復何憂哉。况婦人之免身。難莫難焉。爾子之生。易於反手。不拆不副。無菑無害。則是豈偶然耶。必天所保佑然也。宜勉加鞠養之慈。俾克遂元良之德。今於開福日。特遣使某官某等。備禮獎諭。以示予悽悽之意耳。所賜物件。具如別錄。至可領也。云云。

中書令晉康公圖形後功臣齋唱讀教書

云云。自先哲后。獎大功臣。賜書券以傳家。雖使世蒙餘慶。至丹青之畫壁。又焉人寫其容。但特待奇偉不世如卿者耳。卿負經天緯地之才。有汰世澄時之意。一劔掃乾坤之氣翳。九霄開日月之光明。奉寧考而踐至尊。可謂定策國老。輔

寡人而篡丕統。實惟佐命大臣。享上之誠。則罄輸心腑。故主不疑。董衆之制。則一出條例。而人莫犯。作君元鑑。爲國大山。加又頃當虜騎之侵疆。剛斷廟謀。而破的。邦基之再造也。繫卿是賴。王業之中興也。惟爾之庸。以身當國者。二十四年。以功膺號者。一千餘字。自商周已來。寡有譬。雖伊且復生。何敢當。旱作雨。川作舟。民到于今。受其賜。山如礪。河如帶。予嘉乃德。曰不忘。託彩繪以圖形。期典刑之森眼。霞旌鶴駕。漠爾雖遐。河日龜文。宛然如在。每紀春秋之序。伴張香火之筵。緬惟烈烈之魂。諒我區區之懇。於戲翼亮之志。死生靡殊。相列后之在天。佑三韓於永世云云。

王太子加元服教書

崔洪胤

教王太子。諱立儲必先賢。主器莫若長。眷予副貳。爲國本根。日就月將。早勵元良之德。川冲玉裕。合膺監務之權。矧當志學之年。盍賜成人之服。茲加縉禮。用示殊恩。庶勤夙夜之心。紹復祖宗之業。今遣攝太尉兼賓佐理同德功臣特進開府儀同三司金紫光祿大夫守太師門下侍郎同中書門下平章事修文殿大學士監脩國史判尙書禮部事太子大傅任瀋攝司徒兼冠具官李抗等。賫持教書。往彼宣諭。故茲教示。

勸勉農桑教書

寡人聞國以人爲本。人以食爲天。若欲懷萬姓之心。故不奪三農之務。由是素

王對問先陳足食之方。大禹矢謨首獻養民之政。然則戴經曰無作大事以防農。又何論曰使民以時。古來若此。予欲勉旃。今十二牧諸州鎮使等。雖無容易。別有指揮。卿等奉國情深。忘家志切。入則獻九疇之策。出則興五袴之謠。力贍匡時。謀深濟世。然儻或諸司迫促。庶事忿忙。或日限有期。或年輸未滿。凡諸軍器物色。雜造作事等。恐因人役。尙破農功。更須出紿之言。明示代工之吏。自從今月。直至初秋。宜停雜役。專勸農時。家無懸磬之虛。田有栖糧之畝。待西成於百穀。降中使於九闈。欲令細檢田疇。探知種植。辨桑農之熟不熟。分牧宰之勤不勤。記在書帷。以爲褒貶。咸令知委。王者施行。

勸誡諸寺院三剛司存教書

漢明帝始營馬寺。梁蕭皇多起缺廬。厥後西來之像。教恢弘。東漸之釋。風滋盛。所以國家開蓮宇。安置柔門。欲使探玄護戒之鄉僧。居而穩便。向化賓王之法侶。住以安排。乃令量給田莊。各充奴僕。人力饒多於指使。資糧豐贍於供須。物或有餘。事無不備。近聞諸寺院司存等。俱無遠慮。不務至公。視其碩德名公。譬若懸疣附贅。只要自身之得便。却防與客以同居。輒生猜忌之情。不借溫存之色。役梵宮之僕隸。無異家奴。謂觀寺之貲。祿有同私物。必恐供佛養僧之事務。目凌月替。以隳疎。可謂多行既往之尤違。不念將來之罪福。辜負本師之戒律。污傷國典之條章。豈是佛弟子之行乎。正念此端。足可爲弊。眷言誨礪。諭示丁

寧。凡諸寺院司存等。宜稟朝綱。咸懷舊忘。俱懷正直。各把精勤。祇敬福田。勉修佛事。競効奉公之懇。無營利己之謀。儻有功績可褒。寵光何吝。若其不避覆車之轍。遵行斜徑之蹤。乖却規儀。苟求財貨。只見一身之利潤。不憂三寶之虛荒。則國有常刑。懲無所救。古所謂用命則賞。違命則誅。信哉斯言。胡不勉旃。宜令所司。咸使知委。

卒知門下省事洪鈞吊書

河千旦

君臣義同休戚。父子情均死生。名分雖殊。恩愛則一。爾父云云。稟性謇直。處心公平。自從仕宦已來。備歷清華之秩。盡忠匡國。皆云傑出於朝端。受命忘家。幾度賢勞於王事。昨聞兵革欲犯封疆。因咨此土之統臨。咸指乃父而謂曰。若分重寄。當今捨我其誰。况有遺恩。彼人安於公也。雖虜臣本無例於公者。伊時勢不得已而遣之。其邊民如父母之重逢。抑強敵畏威名而遠遁。予嘉乃德。俾登諭道之司。豈不爾思。竚待迴轅之口。猶恐又有乎不測。故難其代而且留。今也卽亡。無由復見。久而不召。雖悔可追。平生所履者純。將死其言也善。厚葬無益。向國固辭。禮典雖乖於率常。忠魂可惜而宜允。賢有于木。謂言侵魏者蔑如。天殲武侯。其不愛劉者明矣。爲國計者。何慟如之。然存歿之大期。實古今之難道。矧爾惟一子。亦時有偏親。宜折哀情。以全大孝。

賜贊成事潘卜海教書

李穡

蓋聞遇急遽倉卒之難。然後知出衆之真才。立光明雋偉之功。然後受稀世之至寵。此振古以來聖帝明王賢臣碩輔。所以富貴不離其身。而聲名流於萬世者也。咨爾卜海。乃祖阜。奉使節而通日本。提文衡而取英材。代有聞人。立于朝著。詩書之澤。禮義之風。浸漬發揚。久而大振。其在卜海乎。卜海氣總剛柔。材兼文武。而其立志堅如金石。移孝爲忠。主耳忘身。宜其赴寡人之急難也。丙寅西狩。封豕奔來我前。左右色變。不知所爲。我之安危在於呼吸之頃。卜海躍馬而來。一箭洞其腹。應絃而斃。是卜海逆續我命于天也。此雖宗社山川之靈。默誘卜海之衷。然非卜海所蘊之忠。所稟之勇。予末小子。何由奉宗社山川於今日乎。若稽典故。錫汝王姓爲義子。陞汝贊成事。所以異其恩數也。所以勸其忠勇也。拜父侍中。所以勸其忠義也。漢誓功臣之辭曰。泰山如礪。黃河如帶。國以永存。爰及苗裔。肆今寡人述而誓之曰。鯁岑砥平。鯀海塵生。汝孫吾姓。爲國干城。咨爾卜海。往服訓命。懋敬無替。

罪三元帥教書

宣旨。國家不幸。遭罹寇難。播遷南土。惟予小子。否德所召。亦惟將帥用軍無律。不克禦侮。故也。方懷嘗膽之憂。始寢敗軍之罰。乃命門下平章事商議會議都監事。鷹揚軍上將軍鄭世雲。爲摠兵官。賜之節鉞。代予行事。繼降勅書。宣示所以委任之意。大將小將。並聽約束。俾無敢違。果賴祖宗之靈。啓迪於上。忠志之

士奔走於下。四面合攻。盡殲其衆。方竢凱旋。疇賞報功。不期祐等恃功驕恣。構釁世雲。不畏大法。以快一朝之憤。搃兵官代予行事。而居下者。敢擅殺之。是不有我也。凌上千犯罪。孰大焉。顧惟祐等爲國爪牙。血戰數年。頗著勞効。而一念之謬。前功盡棄。予實悼焉。雖然。破敵之功。一時之所或有。無君之罪。萬世之所不容。輕重灼然。有不相掩者。釋此不誅。何以示後。故命有司。將都元帥。都僉議。贊成事。安祐。元帥。都僉議。贊成事。得培。都僉議。贊成事。芳實。同知密直。閔。換。密直。副使。金琳等。明正典刑。尙念舊勞。罪不及孥。所管大小官吏。具令有司。量功叙用。其偷惡背公。手害世雲。郎將鄭贊。在逃不宥。外其餘知情不首者。悉皆原免。布告中外。咸使聞知。惟爾士衆。務盡乃心。無越爾職。以保終始。故茲教示。想宜知悉。

左侍中沈德符教書

李 詹

有德者尊之。以官。有功者勸之。以賞。若稽古典。自有成規。某秉心忠勤。飭躬廉簡。行危而風規。醞籍辭寡。而處事精詳。用捨隨時。安危注意。適時通變。善應兵機。人用樂從。惟其所令。乃能諭羣帥於危疑之際。回大軍於險阻之中。而使權奸摧沮。狂謀中國。復修舊好。誠動天地。力濟艱難。於洪武二十二年十月間。門下評理尹承順等。回自京師。敬奉聖旨。責本國以君位絕嗣。雖假王氏以異姓。爲之。亦非三韓世守之良謀。是年十一月十五日。守門下侍中某。與卿共謀。相

與徇義忘身。坐定大議。天命所在。人心亦隨。朝市不驚。兵革不用。異姓之禍。不日而除。邦國之基。既傾而再平。王氏之祀。已絕而復續。在昔平勃之安。劉漢。狄張之復。李唐。雖時異而勢殊。諒志同而氣合。功在社稷。澤及生民。余惟仰成。嘉乃丕績。位上卿而極績。備恩數。告祖廟而指誓山河。立閣圖形。鐫碑頌德。崇加三代祖考。宥及永世子孫。錫之土田。副以臧獲。仍賜卿以某物。至可領也。卿其永肩乃心。以輔余治。故茲教示。想宜知悉。

門下評理李某教書

儲副所以端國本。婚姻所以正人倫。斯爲風化之原。亦係宗祊之重。觀古今治亂之道。在配匹賢否之殊。其重若茲。厥選宜謹。粵有世子。年既踰於加冠。宜得賢妃。儀用講於納采。載稽龜筮。兼訪臣僚。惟卿以禮義之家。生窈窕之女。既凝姿其偃月。可作儷於少陽。茲涓吉辰。定厥祥而作合。尙服休命。率以禮而來嬪。今賜卿以廐馬綵帛。具如別錄。至可領也。故茲教示。想宜知悉。

知門下朴某教書

以非常之材。當可爲之際。樹立功業。鎮定邦家者。求諸古人而未幾。況在今時。而益寡。某官某。以寬弘之度。豁達之資。逢展才。委身鞅掌。而其處事之敏。衛上之忠。玄陵稱之。再受守令之符。兼摠藩宣之務。始則自鐵移金。終焉宰晉與慶。乃牧乃尹。克剛克柔。吏畏其威。民懷其惠。賊不犯境。蔚有政聲。三鎮南藩。群

士嬰慕。轉籌決勝。計出萬全。才超耿賈之儔。勇在關張之右。曾無破骨出鏃之患。屢獲斬將。擐旗之功。城于州而金湯之利。始驗。劔其船而海道之警。悉除。時惟鷹揚。往探虎穴。載惟對馬之役。有光辛巳之征。捷聞再馳。讜聲四達。以卿爲長城於一國。使民得高枕而無虞。制禦功勛。輝煥方策。於洪武二十二年十月間。門下評理尹承順等。回自京師。敬奉 聖旨。責本國以君位絕嗣。雖假王氏以異姓爲之。亦非三韓世守之良謀。是年十一月十五日。守門下侍中某。首唱大義。而卿贊佐。宣 天子命。奉 大妃言。以安宗社之基。以定君臣之分。雪十六年同天之恥。開千萬世繼體之傳。嘉乃功而口篤不忘。裕乃後而以永終譽。追崇祖考之號。仍加世宥之恩。錫之土田。副以臧獲。仍賜卿以某物。卿其膺此異數。益厲忠誠。故茲教示。想宜知悉。

求言教書

王若曰。弭災之道。莫若修德。爲政之要。惟在求言。昔宋景一言之善。致熒惑三舍之退。天人之際。感應斯速。余以眇躬。荷 祖宗之靈。託臣民之上。憂勤夙夜。期底隆平。而智能不逮。學問不明。其於政教。動味施爲。若涉大川。罔知攸濟。今者日官上言。乾文示儆。客星孛于紫薇。火曜入于輿鬼。異甚鉅。殆不虛生。未燭厥理。兢惕益深。將涼德未修而未孚於帝心。歟。政令有闕而未協於輿望。歟。刑賞之道有戾於正。歟。任用之人或徇於私。歟。下情未盡達而冤抑有所未伸。歟。

民弊未盡除而財力有所費歟。茂異之才未舉者誰歟。讒佞之徒未斥者誰歟。如斯之弊。豈予一人所能徧察。肆開讜直之言。以消壅蔽之風。芻蕘之中。言亦可採。矧卿大夫百執事之臣。共天位。食天祿。茲欲共新於治化。庶以仰答於天心。於戲。賞罰明而禮樂興。陰陽和風雨時。吏稱其職。民樂其生。其要安在。知而不言。不可謂之仁。而不盡。不可謂之直。維臣僚自宰相以至士庶人。並上實封。言寡躬之過。暨時政得失。民間利病。悉心以陳。毋有所諱。其言可用。余則有賞。言而失中。亦不加罪。

教特進輔國崇政大夫韓山君李穡

王若曰。君道必資於老成。人情莫親於舊故。此古今之一致。豈終始之或渝。惟卿氣稟清明。經術博雅。縉紳之師表。國家之著龜。余在曩時。與於同列。從遊之久。而誠意交孚。切磋之益。而恩義彌篤。故其休戚之所同。期於夷險而不變。中罹多故。以致分離。曾契闊之幾何。尙戀懷之常切。及余開國。思與共政。爰封爵邑。以長朝班。非惟舊故之情。尙賴老成之德。使坐鎮於雅俗。抑竚聞其嘉謀。今月初一日。乃來。請往于驪江。余乃莅事。不得親見。請暫時之前別。當不日而復來。何期訃音。忽尔來聞。追思前日。益感余衷。天不慤遺。莫相于余。殄瘁之悲。曷可云渝。英靈如在。豈不悉知。今命內臣某。往奠于殯次。於戲。修短之期。固不疑於天命。哀榮之禮。宜備舉於邦經云云。

東文選卷之二十三終

東文選二十三

東文選卷之二十四

教書

敬孝大王祔廟配享功臣教書

權近

王若曰。喪既畢於三年。神主升祔於宗祐。功可傳於萬世。人臣與享於廟庭。禮遵古今之相沿。恩豈幽明之有間。鷄林府院大君王熙。風猷凝峻。器度宏深。初寵遇於德陵。視猶子而賜姓。後登庸於穆廟。命作相而不名。秩同親戚。而並豐榮。匪他人之可擬。矧觀平日之行事。無愧前賢之所爲。事君能致其身。心專翊戴。理國如指諸掌。業茂經綸。乃望兼并之徒。將申整理之法。方致奸兇之膽落。遽爲黎庶之涕零。興言及茲。深用爲感。鷄林府院君李齊賢。德兼爵齒。學貫天人。負純於宣祖之西巡。備嘗艱險。秉鈞於敬考之南面。克著庸勞。忠勤歷事於六朝。終始不渝於一節。四登相府。而躬恭讓之美。再掌禮闈。而號選掄之公。理思亂安。思危恒存。憂國之念。高不驕滿。不溢。慎守保身之機。英華發爲文章。經術措諸事業。利涉允資於舟楫。稽疑有賴於著龜。惠澤洽于東民。休聲振於中國。遺風未殄。永世難忘。夏城府院君曹益清。立志純誠。持身謹慎。力扶十年之潛德。式至今休。位副萬民之具瞻。恪遵前憲。赫赫邦家之碩輔。堂堂社稷之重臣。永誓著於丹書。豐烈褒於青史。益山府院君李公遂。方嚴信厚。博大寬明。貴

極皇儲之展親。心愈下而能儉。變遭孽孽之伺釁。志彌堅而莫回。忠言切於格。非義色形於率下。有爲有守之學問。可畏可象之威儀。瑞興君柳淑。志節清高。學問贍富。早守中闈之付託。久勞外邸之艱難。委質無貳於一心。盡忠殆踰於三紀。昵侍帷幄。從容借筭之謀。說稱詩書。密勿陳謨之戒。特荷腹心之寄。崇居喉舌之司。故能言聽而計行。以至功成而名遂。既歷本兵之府。而升出政之堂。子房願從於神仙。予嘉智之足尙。冶長雖在於縷綫。皆曰罪之爲非。盍旌厥庸。以雪其憤。念以孱質。托于丕基。方懷在疚之嬛嬛。惟識小心之翼翼。恐難任列祖之付畀。思得如諸卿而共圖。爰躋從祀之班。式示有功之報。於戲記功宗而秩祀。庶幾周誥之共貞。迪高后而降祥。罔俾殷盤之專美。卿等受命篤弼。予其垂拱仰成。故茲教示。想宜知悉。

教判厚德府事韓脩

王若曰。死生之理。通乎陰陽。是人物之常道。君臣之義。篤於終始。爲國家之恒規。矧所事之師儒。宜特加於恩禮。故輸忠贊。化功臣匡靖。大夫判厚德府事右文館大提學知春秋館事上護軍韓某。學傳濂洛。筆繼鍾王。早承先考之知。反荷代言之職。入告于后。必陳經世之謨。慎簡乃僚。俾受傳予之命。茲以幼冲之日。獲聞教誨之言。何期天不弔。以降災予。靡堪於多難。中罹變故。雖廢斥以投閑。終謂登庸。必都俞而致理。胡不幸而短命。乃莫相於我家。興言及茲。痛悼無

已。今遣密直司知中事右文館提學知製教充春秋館修撰官知典理司事廉廷秀。賜酒往奠。嗚呼。氣有聚散。卿隨物化而不疑。人無老成。予念邦瘁而有感。尙期貞魄。膺此寵章。故茲教示。想宜知悉。

教判三司事鄭道傳

省所上高麗國史三十七卷事具悉。蓋聞王者代德而有國。必命文臣修史以成書。非惟備一代之典章。抑亦垂萬世之勸戒。若稽王氏之世。襲稱高麗之名。能合三韓。以爲一統。歷歲之久。將五百年。傳世之多。踰三十代。興衰治亂之迹。善惡得失之端。記錄悉繁。殘缺亦甚。苟非付於良史。焉得成其全書。惟卿學窮經史之文。識貫古今之變。議論之正。皆本乎聖賢之言。臧否之明。必辨其忠邪之趣。佐我開國。有厥成功。嘉猷可以補政教之施。雄筆可以托制作之任。溫溫儒者之氣像。嶷嶷大臣之風儀。肆予當卽位之初。知卿有適用之學。俾居輔相之列。又兼國史之官。果能於變理之餘。得遂其編摩之效。表年以首其事。因略以致其詳。有變有常。去取悉關於大體。或褒或貶。是非不繆於曩賢。事該其本末。而不至於繁。文貴乎簡質。而不至於俚。不待游夏之贊。蔚有班馬之風。披閱以還。嘉嘆無已。宜致匪頒之寵。以旌撰錄之勤。於戲。虞史作堯典之文。旣以施其直筆。殷鑑在夏后之世。所當戒於前車。今賜卿某某等物。至可領也。故茲教示。想宜知悉。

教藝文春秋館大學士鄭摠

省所上高麗國史三十七卷事具悉。前世興衰之迹。必待後人而成書。後王勸戒之端。具載前史而可鑑。粵惟王氏。奄有高麗。合三韓而爲一家。自五季而事中國。世代既久。記錄甚繁。且因喪亂之屢更。頗有殘缺而未備。況記者非一手。疎密詳略之不同。或言之亦多端。曲直邪正之難辨。如欲成一代之實錄。必須得三長之全村。惟卿氣醇以清。學邃而富。言辭簡質而必信。文章典雅而可傳。皮裏春秋能謹嚴而有守。胸中權度自精切而不差。當予開國之時。賴卿協謀之力。爰升出政之府。俾兼秉筆之官。既致力於贊襄。亦專心於撰述。以公羊三世之事。法司馬編年之規。勒成全書。垂示來世。議論無愧於唐鑑。鄙吝不生於漢書。有變有常。筆削之情著矣。可法可戒。善惡之效昭然。予心曰嘉。賞典是厚。於戲。雖華不繁。雖質不俚。可謂有良史之才。與治必興。與亂必亡。盍亦觀前代之事。今賜卿某某等物。至可領也。故茲教示。想宜知悉。

答領司平府事河崙進樂章教書

王若曰。蓋聞君臣之間。貴於進戒。聲樂之道在乎象成。故九叙之歌。禹既戒之。賡載之歌。皐陶亦陳之。此虞廷君臣交相警戒。以興至治者也。迨乎成周。其道寢備。雅頌之作。洋洋至今。惟卿天資明敏。學術精微。所見之正。卓爾甚高。所守之堅。確乎不拔。入而陳謨。必盡其規益。出而施政。必極其精詳。嘗戮力以定社。

又殫誠而佐命。嘉乃丕績。再與同盟。俾長庶寮。以輔予治。今觀所進。覲天廷受明命。樂章二篇。匪直詠歌。切於陳戒。惟予之入覲也。臣子職分之當然。其受命也。天子恩數之幸及。其在否德。皆無可歌。卿乃作爲詩歌。以寓勸勉規戒之意。蓋欲永思其艱。以保其成於無窮也。忠義之誠。藹然可嘉。矧其辭義之雅。聲氣之和。可以追配古之作者。亦可以傳於後世也。觀覽之際。良深感愧。已令有司。被之管絃。以爲宴享之樂。不忘規戒之辭。於戲七德舞歌。雖可愧事功之不逮。五言出納。宜益在治忽。而罔愆遺書。指不多及。故茲教示。想宜知悉。

因災異求言教書

王若曰。予以涼德。托於一國。臣民之上。仰思太上創業之不易。俯念小民持守之惟艱。夙夜祇懼。敬天勤民。尙慮下情未獲上達。置中聞鼓。以伸寃抑。迺緣寡昧。不明于德。莅祚以來。災異荐至。再降教旨。求聞讜言。要皆可用。而未盡舉行。以致失信之多。邇者大風拔木。久雨害穀。山岳崩頽。廬舍漂溺。陰沴之災。未有憐於今日。傷和致異。咎實在予。痛自刻責。若隕于淵。已德有虧。何以修之。國政有失。何以改之。施爲何以合天。享祀何以感神。典禮豈盡叙秩。紀度豈盡修明。用捨豈盡得宜。請謁豈盡不行。銓選若何而有壅。詞訟若何而久滯。風俗若何而不美。賦役若何而不均。豪強豈無其撓法。姦猾豈無其肆暴。刑罰豈無其寃屈。法令豈無其紛更。怨咎隱於無形。而未著歟。禍患藏於所忽。而未覺歟。興言

及茲深用物厲。致災之故何由。弭災之術安在。咨爾大小臣寮。時散六品已上。如有欲言者。上自寡昧之闕失。下至生民之利病。毋嫌訐直。毋憚權貴。指陳所懷。悉言無諱。予其採納。以裨治道。雖有不中。亦且優容。於戲。惟失德所以致災。故當罪已而修省。蓋求言將欲改過。敢不虛懷而聽從。各盡乃心。以輔予治。故茲教示。想宜知悉。

征對馬島教書

魚變甲

王若曰。窮兵黷武。固聖賢之所戒。討罪興師。非帝王之獲已。昔成湯舍檣事而正有夏。宣王以六月而伐玁狁。其事雖有大小之殊。然其皆爲討罪之舉。則一而已矣。對馬爲島。本是我國之地。但以阻僻隘陋。聽爲倭奴所據。乃懷狗盜鼠竊之計。歲自庚寅。始肆跳梁於邊徼。虔劉軍民。俘虜父兄。火其室屋。孤兒寡婦。哭望海島。無歲無之。志士仁人。扼腕嘆息。思食其肉而寢其皮。蓋有年矣。惟我太祖康獻大王。龍飛應運。威德光被。撫綏相信。然其凶狠貪婪之習。囂然未已。歲丙子。攘奪東萊兵船二十餘隻。殺害軍民。予承大統。卽位以後。歲丙戌。於全羅道。歲戊子。於忠清道。或奪漕運。或燒兵船。至殺萬戶。其暴極矣。再入濟州。殺傷亦衆。蓋其好人怒獸。包藏姦狡之念。神人所共憤也。予尙包荒含垢。不與之校。賑其飢饉。通其商賈。凡厥需索。無不稱副。期于並生。不意今又窺覘虛實。潛入庇仁之浦。殺掠人民。幾三百餘。燒焚船隻。戕害將士。浮于黃海。以至平安。

擾亂吾赤子。將犯上國之境。其忘恩背義悖亂天常。豈不甚哉。以予好生之心。苟有一夫之失所。猶恐獲戾于上下。矧今倭寇肆行貪毒。賊殺群黎。自速天禍。尙且容忍。不克往正。猶爲國有人乎。今當農月。命將出師。以正其罪。蓋亦不得已焉耳矣。於戲欲掃姦凶。拯生靈於水火。斯陳利害。諭予志于臣民云云。

諭對馬州書

卞季良

宣旨若曰。天之生斯民也。氣以成形。理亦賦焉。而作善則降之百祥。作不善則降之百殃。古昔帝王。奉若天道。教民稼穡。樹藝五穀。以養其形。因其固有之義。理而開導之。以淑其心。若有強梗不率。殺越人于貨。愍不畏死者。小則刑戮。大則征伐。堯舜三王。君人之道如是而已。對馬爲島。隸於慶尙道之鷄林。本是我國之境。載在文籍。昭然可考。第以其地甚小。又在海中。阻於往來。民不居焉。於是倭奴之黜於其國。而無所歸者。咸來投集。以爲窟穴。或乘時竊發。劫掠平民。攘奪錢穀。因肆賊殺。孤寡人妻子。焚蕩人室廬。窮凶極惡。積有年紀。惟我太祖康獻大王。以至仁神武。應天革命。肇造邦家。市肆不易。而大業已定。此雖湯武之盛。何以加哉。國勢大張。兵力崛起。穿徹海嶽。騰擲天地。隆隆殷殷。凡有血氣者。莫不懼伏。于斯時也。命一裨將。殄殲對馬之小醜。有如泰山之壓鷄卵。賁育之搏嬰兒。我太祖乃敷文德。載戢武威。示以恩信。懷綏之道。予紹大統。蒞國以來。克承先志。益申撫恤。雖或間有草竊不恭之事。尙念都都能瓦之父貞。

茂慕義輸誠。犯而不校。每接信使。館焉以留。仍命禮曹厚加勞慰。又念其生理之艱。許通興利商船。慶尙道之米粟。運于馬島者。歲率數萬餘石。庶幾養其形體。以免飢餓。充其良心。恥爲草竊。並生於天地之間也。予之用心。蓋亦勤矣。不意近者。忘恩悖義。自作禍胎。以取覆亡。然其平日投化。及以興利通信而來者。與今望風而降者。則並皆不殺。分置諸州。仍給衣食。以遂其生。又命邊將率領兵船。進圍其島。以待卷土而降。今其島人。尙且執迷不悟。予甚憫焉。島中之人。計不下數千。思其生理。良用惻然。島中之地。類皆石山。未有肥衍之土。稼穡樹藝。無所施功。將欲乘隙竊發。盜人財穀。蓋其平昔所在。罪惡貫盈。幽則天地山川之神。默降殃禍。明則良馬大船利兵精卒水陸之備甚嚴。焉往而不遭誅戮之患哉。只有捕魚採藿買賣之事。乃爲生理所資。而今已背恩負義。自絕之矣。非予先有絕之之心也。失此三者。不免飢餓。坐待死亡而已。於此爲計。其亦難矣。若能幡然悔悟。卷土來降。則其都都熊瓦錫之好爵。頒以厚祿。其代官等如平道全例。其餘群小。亦皆優給衣糧。處之沃饒之地。咸獲耕稼之利。齒於吾民。一視同仁。俾皆知盜賊之可恥。義理之可悅。此其自新之路。生理之所在也。計不出此。則卷土率衆。歸于本國。其亦可矣。若乃不歸本國。不降于我。尙懷草竊之計。仍留于島。則當大備兵船。厚載糧餉。環島而攻之。歷時既久。必將自斃。若又精選勇士十萬餘人。面面入攻。則囊中之物。進退無據。其必孩稚婦女。靡有

子遺而陸爲烏鳶之食。水充魚鼈之腹也無疑矣。嗚呼豈不深可哀憐也哉。此其禍福所在。章章明甚。非茫昧不可究詰之事也。古人有言曰。禍福無不自己求者。又曰。十室之邑。必有忠信。今對馬一島之人。亦皆有降衷秉彝之性矣。豈無知時識勢。通曉義理者哉。兵曹其移文馬島。諭予至懷。開其自新之路。俾免滅亡之禍。以副予仁愛生民之志。

再諭對馬島書

宣旨若曰。降衷秉彝。有生所同得。好善惡惡。人心所同然。五方之人。其言語習尚。雖或不同。降衷秉彝之性。好善惡惡之心。則未始有異也。今對馬倭人等。投集小島。以爲窟穴。肆爲盜賊。屢被死亡。無所忌憚者。非天之降才爾殊也。特以小島類皆石山。土性磽薄。不宜稼穡。阻於海中。懋遷魚鼈。勢難相繼。率以海菜草根爲食。未免飢餓所迫。喪其良心。而至此耳。予甚憫焉。都都熊瓦之父宗貞茂。爲人沉深有智。慕義輸誠。凡有所需。靡不申請。嘗請珍島南海等島。欲與其衆遷居。其爲子孫萬世慮。豈淺淺哉。予甚嘉之。方欲聽其所請。而貞茂捐世。嗚呼悲夫。都都能瓦。若能體予仁愛之心。念父慮後之計。曉諭其衆。卷土來降。則當錫以大爵。授以印信。頒以厚祿。賜之田宅。俾世享富貴之樂。其代官人等。皆以次授爵頒祿。待以厚禮。自餘群小。亦皆隨所願欲。處之沃饒之地。各給爲農之備。使獲耕稼之利。以免飢餓。充其良心。皆知善之當爲。惡之當去。一洗舊染。

之污。變爲禮義之俗。共享福利於無窮。顧不偉歟。然農事不可緩也。若委心聽順。欲爲農業。則須當十二月。先遣島中管事者以來。聽予指揮。其農糧。鋤器與穀等事。預爲之備。至時方無欠缺。若違此時。則後不必強爲之說。所請向來分置倭人等。並令諸道官給衣糧。以遂其生。待汝來降之日。卽令完聚。俾無離散之憂。其父兄弟。若有欲速見之者。則先來管事者。將帶出來。庶爲便益。嗚呼。敷文德以懷綏四方者。自古帝王之本心也。奮武威以殄殲不率者。豈所欲哉。不獲已也。下令禮曹書付。回諭予至懷。使開其自新之路。永遂生生之望。以副予一視同仁之意。

教卒誠寧大君某書

王若曰。壽夭之不齊。稟之天命而不可易。父子之至情。本乎天性而不容已。此乃人心之所固有。而氣數之前定者也。惟汝之生。歲在乙酉。迨今十有四年矣。未嘗一日離於吾之左右。予欲進膳。汝必先嘗。予欲觀射。汝必隨行。凡有起居。必與汝俱。今其已矣。何以爲心。嗚呼。慟哉。姿相端潔。無有闕虧。聰明溫雅。孝悌是行。讀書時。習學射。屢中。俾之有室。又封大君。謂將成人。慰我衰老。嗚呼。已矣。曷其乃何。汝始病矣。謂爲童稚之常事。病旣篤矣。雖悔何及。禱祀之闕歟。醫療之誤歟。皎皎汝面。尙在目前。琅琅汝言。尙在耳傍。嗚呼。慟哉。予與中宮。哭汝之哀。亦已焉哉。以汝孝誠。臨絕思親。飲恨泉下。其可旣耶。汝爲吾子。旣孝且才。無

慊子職脩短之數。實出於天。非汝之罪。汝其奚憾。我爲汝父。歛不得視衣衾。殯既不得撫其棺。窆又不得臨其壙。以千乘之主。反不如匹夫之愛子。非我忘情。勢使然爾。予之爲恨。其又何極。嗚呼慟哉。爰命攸司。崇汝之秩。贈汝以諡。恩數之隆。異於常例。今遣近臣。津寬之寺。修設水陸。以資冥福。且致薄奠。辭以侑之。嗚呼。言有盡而情不可終。汝其知也耶。其不知也耶。

征建州野人後播告教書

尹淮

王若曰。自我太祖康獻大王。應運開國。內修外攘。撫寧東土。北邊野人。畏威懷德。搖尾乞憐。由是塞門之內。烟火相望。人畜布野。無鷄鳴犬吠之警。太宗恭定大王。繼統遵業。以包容徧覆。擾服異類。烏夷山戎。罔不率俾。予以否德。仰承祖宗謨訓。畜待野人。特加矜恤。時濟其飢乏。近有婆猪江等處。龍住李滿住。交結上國。叛賊楊木答兀。其所係縲。遼東開原地面人物。以爲奴婢者。不勝毒痛。逃命來投。絡繹不絕。予以事大之誠。悉送上國。豈期野人。輒生怨憤。窺伺我疆。積有歲年。至宣德七年十一月間。乘虛突入江界。閭延口子。殺害軍民。劫掠人畜財產。背施負恩。窮凶極惡。罪不容誅。顧乃詐道。忽刺温。遠來作賊。已返奪下。搶去人口頭匹。留住欺妄。朝廷已具賊情。馳奏闕下。今年四月。命將問罪。分道並進。擣賊窟穴。尙軫止戈之武。永懷不殺之仁。深戒諸將。彼如束手。卽便受降。特以示威。使知悔懼。毋庸報復。戮及無辜。彼戾性不移。獸心自若。蜂屯蟻

聚敢行抗拒。我乃薄伐。所至克捷。斬級擒生。總五百餘口。其脫死遊魂。皆奔潰竄伏。賊徒以平。予惟兵戎。雖救亂誅暴之器。冬夏非勞。民動衆之時。然周宣六月之征。爲玃狁孔熾之故。事迫於危急。人不以爲暴。蠢爾犬戎。憑恃險阻。違天逆理。噬我邊氓。禍實彼之自求。怒豈予之得已。兵出有名。師直爲壯。賴祖宗威靈之如在。致士卒勇銳以啓行。敵愾奏功。全軍入境。於戲窮廬震蕩。正群醜畢燼之秋。疆域肅清。收一勞久安之效。布告中外。咸使聞知。

廢世子嬪金氏教書

王若曰。蓋聞配匹之際。生民之始。運祚之脩短。國家之盛衰。係焉。昔周文王之爲世子。得聖女妣氏。以爲之配。以和鳴窈窕之德。推摻屈逮下之仁。致麟趾之應。貽燕翼之謀。吁美矣哉。降及後世。淳風漸薄。女訓不傳。后妃嬪御。間有不念室家之宜。競希宴私之寵。甚至挾媚道行。厭勝以速廢黜。稽諸經籍。雖中冓之言。率多曖昧。若乃情迹敗露。不可掩覆者。斯其自取之者。又誰咎哉。惟我祖宗家法。甚正。動得內助。予於往歲。册封世子。以金氏乃累葉名家。擇以爲嬪。不期金氏媚道厭勝。事發有端。寡人聞而震驚。卽遣宮人審問。金氏對曰。云云。詞證明白。非前世曖昧疑似之比。噫。眞有是事矣。嗚呼。定國儲而擇配。固將以承宗祀作母儀。衍萬世之洪祚也。今金氏爲世子配。會未數年。而其運謀敢爲妖邪。已至如是。尙何望其無妬忌之心。著肅雍之德。成鷄鳴至三之告。召螽斯則

百之祥乎。此實 祖宗所不歆。宮壺所不容。理合廢黜。予豈得已。已於宣德四年七月二十日。告于 宗廟。廢金氏爲庶人。收奪冊印。黜還私第。終不使薄行之人。污我家法。其逢迎從諛。使陷罪辜。侍女胡椒。付諸攸司。明正典刑。惟是異常之事實。實有駭於國人之見聞。尙慮大小臣僚。未能究知本末。故茲教諭。想宜知悉。

恤刑教書

無名氏

刑者。輔治之具。雖古之盛世。固不得而廢也。舜爲天子。惟刑之恤。臯陶爲士。明五刑以弼五教。克底雍熙之治。吁盛矣哉。降至于秦始皇。尙殘暴而趙高之徒。務刻酷急。法無仁恩。二世而亡。可不戒歟。蓋獄者。人之死生係焉。苟不眞得其情。而求諸箠楚之下。使有罪者幸而免。無罪者陷于辜。則刑罰不中。以致含冤負屈。終莫得伸。足以傷天地之和。召水旱之災。此古今之通患也。予甚軫慮。歷觀前代刑獄之變。姑舉其尤著者。晉時臨淄縣。有寡婦養姑甚謹。姑以其年小。勸令改適。婦守節不移。姑愍之。密自殺。親黨告婦殺姑。官爲考鞫。寡婦不勝苦楚。乃自誣獄。當決。適曹攄爲縣令。知其冤。更加辨究。具得情實。時稱其明。唐時淮西吳元濟叛。帝悉以兵事委丞相武元衡討之。成德王承宗遣人詣中書。爲元濟遊說。辭指不遜。元衡叱出之。承宗又上書。詆元衡。及元衡死。王士則告承宗。遣卒張宴所爲。捕得鞫之。宴等具服。乃誅之。厥後平盧李師道。拒命伏誅。搜

其文籍。有賞殺元衡者。始知殺元衡者非承宗。乃師道也。宋時錢若水爲同州推官。有富民家小女奴逃亡。不知所之。女奴父母訟於州。命錄事鞠之。錄事嘗貸錢於富民不獲。乃劾富民父子數人。共殺女奴。棄屍水中。遂失其屍。富民不勝榜楚。自誣服。州官審覆無異。若水獨疑之。留其獄數日不決。錄事詬若水曰。若受富民錢。欲出死罪耶。若水笑謝曰。今數人當死。豈不少留熟視其獄詞耶。留之旬日。知州屢趣之不能得。上下皆恠之。若水一朝詣知州。屏人言曰。若水所以留其獄者。密使人訪求女奴。今得之矣。因密使人送女奴於知州所。知州乃垂簾。引女奴父母問曰。汝今見汝女識之乎。曰。安有不識也。因從簾中推出示之。父母泣曰。是也。乃引富民父子悉縱之。其人泣曰。微使君某滅族矣。知州曰。推官之賜也。太宗聞之。驟加褒擢。又湖北市有一家止夫婦二人者。婦美不愜其夫。偶有卜者寄宿。婦慕其俊雅。遂殺其夫。以情告。願與偕往。卜者忿其不義。佯視其夫。就取其刃。併婦殺而去。及朝。有常在其家。工役者至。見二屍相枕。流血盈地。恐累己。卽逃。須臾鄰里方覺。執工役者聞之。官不復自明。卽誣服焉。卜者去。後日卜於市。自若也。聞工役者將正典刑。自首其故。憲司以卜者殺婦。可償夫命。而又自首義之。與工役者俱釋焉。又有臨江王三郎。瞰江樓居。其妻凭欄食果。偶核墮舟中。少年之巾。少年舉首。意婦人挑之。及暮行入其家。聞無人聲。隨復登舟。覺濕其履。置竈焙乾。其夜王三郎歸。見其妻殺死。血流盈地。朝

集鄰里見血蹤直至舟中遂執少年赴官少年不復自明認服焉但不見婦人履及刃獄吏指近江亭牌子似有物視之履與刃也款成獄級陳青疑之請假歸早行江上王之鄰婦問之陳答云已將舟中少年正刑矣鄰嫗啞然曰寃哉正犯者某獄吏也陳密以告司理喚獄吏推問具得其情少年遂得釋獄吏處死元時袁州萍鄉有高嶺嶺北張姓娶嶺南周氏女歸寧張遣其弟候之至嶺中妻倦少坐弟先抱其孩歸久而妻不歸張與其弟同至坐處無有也復至周宅又無有同周復登嶺尋訪則妻死於叢林中且無首矣周紐其弟赴官疑弟欲濫之不從殺之以滅口弟遂誣服官勒都官索頭與刃都官解頭與刃將弟處死踰年張之二鄰人遇其妻於建康旅邸相視駭愕鄰告以故妻泣曰寃哉其時坐嶺上時有一髻客擔若籠上山四顧無人拔刀脇取我衣服與鞋喚出籠中一婦人衣之斷其頭致籠中推其屍於林令我入籠中負擔以行凡半月餘日到此未幾髻客歸二鄰人紐之聞官卽承準無詞申刑部取旨髻客處死以款司償其弟命州縣吏各黥籍邑宰郡司理檢覆官皆降罷先都官迫於官司盜開他人棺取婦人頭巾解亦處死又京師小木局木工與其長爭長曲不下工遂絕不往來衆工謂口語非大嫌釀酒肉強工造長居和解之暮醉散去工婦淫素與所私者謀戕良人不得問是日以其醉於讎而返也殺之倉卒藏屍無所迺啓室中土榻輒置屍空中復輒故所明日婦往長家哭曰吾夫昨不

歸必而殺之。訟諸警巡院。院以長仇也。逮至榜掠。不勝毒自誣服。院詰長屍處。曰棄壕中。責件作二人索之。壕弗得。刑部御史京尹交促具獄甚急。期十日。七日五日。三日。至四。被笞終不得。而期益近。二人因謀別殺人應命。暮坐水傍。一翁騎驢渡橋。擠水中。縱驢去。懼狀不類。不敢輒出。又數受笞。涉旬餘。度翁爛不可識。舉以聞院。召婦審視。婦撫而大號曰是矣。取夫衣招魂。壕上脫筭。理具棺槨。葬之。獄遂成。院當長死案上。未報可。騎驢翁之族。物色翁不得。一人負驢皮道中過。宛然其所畜。執愬於邑。亦以鞫訊。憮酷自誣。劫翁而殺之。屍藏某地。求之不見。輒更曰某地。辭數更卒不見。負皮者瘦死獄中。歲餘前長奏下。衆工憤其冤而不能爲之明。長竟斬。衆工愈哀嘆。徧訪其事無所得。乃哀交鈔百定。處置衢路。有得某工死狀者。酬以是。一日有故偷將盜他人家。尙早不可。乃閤中依木工婦垣屋。以須迫鍾時。忽醉者踉蹌而入。酗而怒婦。詈之拳之。且蹴之。婦不敢出聲。醉者睡。婦微評燭下曰。緣而殺吾夫。體骸異處。土榻下二歲餘矣。榻旣不可火。又不敢踰治。吾夫尙不知腐盡以否。今乃虐我。歎息飲泣。偷立牖外。悉得之。默自賀曰。奚偷爲。明發入局中。號於衆。吾已得某工死狀。速付我錢。偷且俾衆遙隨。我往入婦舍。去土榻席板。輒則屍見矣。衆工突入。反接婦送官。婦吐實。醉者則所私也。官復窮壕中死人何從來。件作欺擠何物。騎驢翁墮水。件作誅婦。泊所私者磔于市。先主長死。吏皆廢終身。官知水中翁卽鄉瘦死者。

事。然以發之。則吏又有得罪者數人。遂寢。負皮者寃竟不自工之死。當坐者婦與所私者止耳。乃牽連殺四五人。此事變之轆轤而不可知者也。讀史至此。良用惻然。又以我國近來之事言之。壬寅歲。本宮婢元莊。與其子介五彌。告船軍林成富。至吾家發不道語。宣川郡守卽攝成富鞫之。及杖訊三次。然後乃承。司憲府審覆杖訊二次。尙不得情。且介吾彌見下龍。傳說成富所言。則與告宣川官者相同。及與卜山傳說。則未嘗言成富有此等語。皆是違端而不爲推明。使言辭歸一。但意成富實有是語。不肯引服。遂不復詳究。誤入成富於死罪。予使政府六曹大臣會議。亦以爲當死。予尙有疑。移其獄於義禁府。俾問成富發言之由。元莊乃服。與成富有隙。謀陷之罪。欲見其受笞杖耳。成富初無是言。於是成富得免。元莊等反坐。苟不覆案。未得其實。則成富之就戮無疑矣。己酉年。暮夜有賊。邀殺倭通事李春發于路上。棄其杖木而去。春發女壻告云。有女巫住連及其子獅子。素怨婦翁。今婦翁死於獅子家前。驅奴扣獅子門叫號。而不肯出視。情迹可疑。義禁府捕鞫之。獅子弟象伊供稱。家兄與隣人金小古彌。金每邑同等。積憤于春發。常欲擊殺。今乃并力下手。獄官又收其杖。至子獅家。則獅子家籬長木。適拔其一。以杖植于拔出之穴。與之相合。其長短亦齊。獄官痛拷住連獅子小告彌每邑同。加以壓膝猶不服。然象伊所供無可疑者。且有杖可驗。獄將成矣。予以重賞。購得告殺春發者。會邊相告洪成富金生彥等。與春發

有舊嫌。殺春發者疑是此輩。乃逮二人鞫問。二人果服。及鞫生彥共謀者。生彥
匿真犯者。乃妄引倭奴普守及婢夫干冲。二人不忍訊杖。皆自誣服云。從生彥
下手殺死。其干冲供稱狙伺之地下手之勢。春發遭擊頭足撲地之狀尤悉。獄
官引之死處叅驗。良以爲是。及捕下手正賊李得究問。方知普守元不叅謀。乃
與獅子等皆免。干冲元不知情。但以聽生彥之言。呼出春發于路耳。終不與殺。
亦得減死。論成富等三人處死。向非邊相之告。獅子等當受極刑。豈不冤哉。又
永興府官庫被盜。有人爲匿名書告官奴延萬加叱同內隱達等人所爲。府使
信之。逮繫拷問。不得其情而釋之。未幾軍器庫失火。監司令推放火者。竟莫知
何人。及延萬內隱達在逃。府使遂疑火軍器庫者此等奴也。捕加叱同酷刑以
鞫。不堪其苦。乃自誣服云。與延萬內隱達共議火之。府使乃令府吏更鞫。吏杖
訊尤刻。監司別遣差使員覈實。亦皆勒取供招。及延萬等二人自歸就獄。求欲
辨明。府使鞫之。下府吏又鞫之。差使員又鞫之。皆濫刑取辭。以實加叱同之言。
內隱達被杖數百而死。及監司更使他差使員推之。延萬加叱同等冀得自伸。
懇告實無放火之事。顧乃不肯平反。杖訊愈急。繼以壓膝者三次。構成獄辭。監
司刑曹政府以次審覆。亦不上讞。至于大辟。予以事發無跡。曖昧難明。疑於處
決。乃使刑官往核。移其獄於義禁府。使之詳究。果無其實。乃論刑曹以下官吏
之罪。卽釋加叱同延萬等。載閱獄案。加叱同之受杖一千三百餘下。延萬之受

杖幾乎四百。箠楚之下。何求不得者。此之謂矣。及至今夏。水口門外草幕住僧。爲明火賊所殺。其脫死僧海田。認洞裏伐石者所爲。義禁府乃捕鞠之。有金經婢夫莫山。供稱四月初九日侵夜。與徐重朴延豆之夫存。余伊等五人。出水口門外伐兒峴草幕北窺伺。夜二鼓末。夫存敲石火。以蒿至草幕。迎見一僧出外便旋。朴延持小杖擊之。仆地如死。夫存將蒿火投于法堂裏。却有僧擲其蒿火于外。夫存又抽草幕蓋茨。以置法堂中。亂投石礫。恐喝僧徒。且曰。爾等若不以所貯財物盡數給我。我當殺汝輩無遺。僧徒於是呼哀乞命。悉出財物以給。俄有二僧逃出。我輩逐得捕一僧於乾川。朴延以杖擊之。僧又仆。朴延與儕輩以沙石擊其頭面。又捕一僧於施食臺下。并力拴縛亂箠之。乃退入田間散臥。待門開偕入城內。莫山又供劫偷贓物。埋於主家砧側。妻小斤及爾伊妻。薔薇見知。杖薔薇而訊。則供稱初十日。余伊將贓物。裹以袱。隱藏於爐治踏板下空中。婢問此是何物。余伊道汝所不知。且潛潛休說。至其日晚食後。余伊却將偷物出去。薔薇又供稱前妄言。初十日。余伊將贓物出去。其實十一日。獄官到主家搜檢去後。婢愈生疑惑。便將余伊所藏贓物。盡燒於竈間。獄官悉捕草幕近地伐石者十二人。羅列庭下。使海田指出賊人。海田目金經家奴夫存。朴延徐重豆之等四人曰。吾所見之賊也。明日又列別人二十于庭。使夫存等易服雜處其間。海田又指四人。且目朴延曰。就中此人。劫打尤甚。

者也。於是朴延色動。愧懼異於衆。海田又告賊徒劫我之時。我偶得石塊打賊。足上應有傷處。又於賊徒去後。得所遺皮紐繩鞋。獄官遍召一千人等視之。則夫存足上適有傷處。又問繩鞋之主。則皆言卽是夫存所常着者也。獄官益無所疑。獄幾成矣。四月十九日。正賊朴萬亡。吾之等見獲於延曙驛。輸于義禁府。具吐情實。兇徒甚衆。且出正賊。然後乃知莫山等之招皆妄也。遂釋莫山等。莫山等之妄招。非其實情。冀免箠楚耳。儻使不得朴萬等。則莫山等當服重誅矣。由斯以觀。斷獄得情。其實難矣。追惟往事。安知或有類此者乎。每一念之。益切寒心。予觀中外折獄之官。最初推鞠文案。苟成。後之覆案者。率皆因循。文致其辭。未有叅驗詳究。以求事情者也。且如象伊莫山等之獄。近在都下。法司臺諫同委官代言。會于義禁府訊問。尙或如此。況其他乎。噫。死者不可復生。刑者不可復續。苟或一失。悔將何及。此予之夙夜矜恤。未嘗頃刻而忘于懷者也。繼自今爲吾執法中外官吏。尙其鑑古戒今。精白虛心。無拘於一己之見。無主於先入之辭。毋雷同而效轍。毋苟且以因循。勿喜囚人之易服。勿要獄辭之速成。多方以詰之。反覆以求之。使死者不含冤於九泉。生者無抱恨於方寸。群情胥悅。致囹圄之一空。協氣旁流。臻雨暘之咸若。惟爾刑曹。體此至懷。曉諭中外。

誠酒教書

柳義孫

蓋聞古者酒醴之設。非以崇飲。所以奉神明。享賓客。養高年者也。是以因祭而

飲以獻酬爲節。因射而飲。以揖讓爲禮。鄉飲之禮。所以教親睦也。養老之禮。所以尙齒德也。然猶曰賓主百拜而酒三行。又曰終日飲酒而不得醉。則先王所以制酒禮而備酒禍者。至矣盡矣。降及後世。俗習不古。惟荒腆是務。故禁酒之法雖嚴。而終不能救其禍。可勝嘆哉。夫酒之爲禍甚大。豈特糜穀費財而已哉。內亂心志。外喪威儀。或廢父母之養。或亂男女之別。大則喪國敗家。小則伐性喪生。其所以瀆亂綱常。敗毀風俗者。難以枚舉。姑指其一二可戒可法者言之。商辛周厲。以此而亡其國。東晉之裕。以此而亡人之國。鄭大夫伯有窟室夜飲。卒爲子哲所焚。前漢校尉陳遵。每大飲賓。輒關門投轄。使于匈奴。醉而遇害。後漢司隸校尉丁冲。數過諸將飲酒。爛腸而死。晉尙書右僕射周顛。能飲酒一石。偶有舊對來。欣然共飲大醉。及醒使視。客已腐脇而死。後魏夏侯史。性好酒。居喪不減。醇醪不離於口。弟妹不免飢寒。於是昏酣而死。此誠可戒者也。周武王作酒誥之書。以訓商民。衛武公作賓筵之詩。以自警責。晉元帝頗以酒廢事。王導深以爲言。帝命引觴覆之。遂絕。元太宗日與大臣酣飲。耶律楚材乃持酒槽金口進曰。此鐵爲酒所蝕。尙致如此。况人之五臟有不損耶。帝悟。仍勅左右日進酒三鍾而止。晉陶侃。每飲酒有定限。或勸更少進。侃悽愴良久曰。年少曾有酒失。亡親見約。故不敢踰。庾袞父在常戒袞以酒。後每醉輒自責曰。予廢先人之訓。何以訓人。乃於墓前。自杖二十。此誠可法者也。且以我國之事言之。昔新

羅之敗於鮑石亭。百濟之滅於落花巖。靡不由此。而高麗之季。上下相師。沉湎自恣。竟底於亡。此亦殷鑑之不遠也。可不戒哉。惟我太祖肇造丕基。太宗繼述。修明政教。垂憲萬世。群飲之禁。著在令甲。以革舊染之俗。以致惟新之化。予以否德。叨承丕緒。夙夜祗懼。以圖治安。鑑往昔之覆轍。遵祖宗之成憲。示之以禮。糾之以法。予之用心。非不至也。而惟爾臣民。以酒失德者。比比有之。是前朝衰微之風。猶未殄絕。予甚憫焉。嗚呼。酒之釀禍。若是之慘。而尙不覺悟。亦何心哉。縱不能以國家爲念。獨不顧一身之性命乎。朝臣有識者。尙且如此。閭巷小民。何所不至。獄訟之興。多出於此。始之不謹。則末流之弊。誠可畏也。此予之所以考古證今。反覆告戒者也。咨爾中外大小臣民。其體予至懷。視前人之得失。爲今日之勸戒。毋好飲以廢事。勿過飲以成疾。各敬爾儀。式遵無彝之訓。剛制于酒。庶臻於變之風。惟爾禮曹體此至意。曉諭中外。

勸農教書

河緯地

予惟國以民爲本。民以食爲天。農者衣食之源。而王政所先也。惟其關生民之大命。是以服天下之至勞。不有上之人誠心迪率。安能使民勤力趨本。以遂其生生之樂耶。若古神農。始爲耒耜。以利天下。少昊命九扈。以掌農事。此聖神所以繼天建極。而爲億兆立命者也。堯命羲和。敬受人時。舜咨十二牧。食哉惟時。夏后氏盡力乎溝洫。商宗知小人之依。至于周家。以農事開國。豳風之詩。無逸

之作。無非眷眷於稼穡之艱難。以成長治久安之業。其盛矣哉。漢文帝數下詔書。歲勤種樹。減租賜農。海內致豐。唐高祖詔牧宰。務從簡靜。使不失時。太宗每謂群臣曰。營衣食以不失時爲本。其致斗米三錢之效。豈無所由。宋制置勸農司。歲終賞罰。又令州縣。每春載酒出郊。迎見父老。諭以竭力耕田之意。蓋亦有見於此歟。洪惟我太祖。應運開基。首整田制。拯民塗炭。俾享耕鑿之利。其勸課之條。俱在令甲。太宗繼述。益勤播穫之功。特慮愚民。昧於樹藝之宜。命儒臣。以方言譯農書。廣布中外。以傳于後。寡予承緒。夙夜兢惕。仰惟前代時若。惟祖宗是憲。顧以農務。當責近民之官。是用慎簡。親加勉諭。且令逮訪州縣。因地已試之驗。輯農事直說。務使田野之民。曉然易知。倘可以利於農者。靡不悉心究舉。期於人盡其力。地無遺利。而民無蓄積之餘。歲一不登。輒有飢色。是吏奉吾教不力。而從事焉尙寡也。予甚慮焉。嘗觀古之賢守。能興利一方。而民受實惠者。莫不以勤恤而成。龔遂爲渤海。務勸農桑。民有帶持刀劍者。使買牛犢。春勸趨田。冬課收斂。民皆富實。召信臣爲南陽。好爲民興利。躬勸耕農。出入阡陌。稀有安居。行視水泉。開通溝瀆。以廣溉灌。民得其利。莫不力田。任延爲九真。其俗以射獵爲業。不知牛耕。每致困乏。乃令鑄作田器。教之懇闢。歲歲開廣。百姓充給。辛纂爲河內。督勸農桑。親自檢視。勤者資以帛物。惰者加罪。朱文公之爲南康也。印榜勸民。自犁翻糞。種芟草之節。以至種麻豆脩陂塘之事。莫不開

具諄諄曉諭。時親巡野。罰不如教。凡此豈無自而好爲煩擾哉。蓋常人之情。率之則自力。縱之則惰窳耳。先哲有言。一介之士。苟存心於愛物。於人必有所濟。矧今任監司守令之責者。皆操可致之柄。一方休戚。係予一身。若心誠撫恤。何占人之不可及哉。大抵田家之事。趨時早者所得亦早。用力多者所收亦多。故農政所重。惟在不違其時。不奪其力而已。百穀種蒔。各有其時。時苟一違。終歲莫追。民旣一身。力不可分。奪之在官。豈可責之力田。苟人事旣盡。則雖天運之不齊。亦可禦也。若伊尹之區田。趙過之代田。是已。以近日所驗言之。歲丁巳。於後苑試治田。極人力。果遇旱。不能爲災。禾頗稔熟。是則偶忝天災。其以人力而可救也。審矣。傳曰。民生在勤。勤則不匱。書曰。惰農自安。不昏作勞。不服田畝。越其罔有黍稷。乃知寧過於勤勞。不可失之怠惰也。第民雖欲勤。勸課不時。則無所施其力矣。且云芒種者。人力不贍。雖不能皆早。若及此時。則猶有秋成之望。故特限節候。以示與其晚而失業。不若及此時之爲愈也。非謂必待此以爲播種之期也。農書亦云。大率欲早。今之守令。狃於故常。雖當播種之時。自謂芒種猶遠。凡千土田。訴訟未卽。處決穀種。口糧賑貸等事。常不汲汲。每失稽緩。雖或汲汲。守令申報。監司。監司移牒戶曹。以報政府。政府具由以啓。轉相往復之際。芒種已過。或不識耕稼之宜。徒務勸課之名。督種太早。苗不得生。反以害農者有之。或未能真知節氣之早晚。自計疎虞。以失事機者。亦有之。豈分憂字民之

義乎。凡與我共理者。其體予委任之意。遵祖宗厚民之典。視前賢課農之規。廣詢風土所宜。叅以農書所載。預期措置。毋太早。毋太晚。尤不可與務以奪其時。各盡乃心。導民務本。服田力穡。仰事俯育。以壽我民命。以固我邦本。庶幾家給人足。蔚興禮讓之風。時和歲登。共享熙皞之樂。惟爾戶曹。體予至懷。曉諭中外。

首陽大君功臣教書

柳誠源

王若曰。天爲社稷而生賢。蓋有關於氣數。君以爵土而錫命。寔用表乎勳庸。載稽彝章。昭示賞典。叔父鍾秀光嶽。勵節風霜。器局峻整而宏深。志概堅確而嚴正。孝友本乎天性。忠義出於至誠。豪傑之才。聖賢之學。氣蓋一世。勇冠三軍。德望崇重於宗親。風彩表儀乎朝著。爲善最樂。富貴聲色無足搖其中。事君以忠。夷險終始曷嘗貳其操。屹若維城之國。確乎大節之臨。粵予冲人。遭家不造。思弘濟乎艱大。委機務於臣鄰。方期佛時。以圖隆泰。于時塔居至親之地。畜無上之心。謂寡人幼不能君。而大位姦或可伺。厚施於國。干譽于人。群小爭歸。私門作黨。稔成不軌。覬覦萬端。而姦臣皇甫仁。金宗瑞。李讓。閔仙。趙克寬等。不思寵任之恩。潛懷兇禍之計。陰爲黨援。翕然附趨。蔑我幼冲。竊我威福。專權擅勢。挾私市恩。官爵濫施於親姻。賄賂公行於中外。賦役煩而公私困。土木興而財力窮。蔽塞聰明。壅遏德澤。公道晦蝕。私意橫流。天怒於上。而予不知。民怨於下。而

予不悟。叔父嘗憤其故。抗疏以言。予亦尋常而不之察也。蓋其黨附於瑑者若彼。故乃濁亂乎朝者如斯。及其兇謀益深。每夜私聚。內通近侍宦官。察伺動靜。外誘方鎮將帥。陰約日期。徒旣定。繁勢以日熾。大姦根據而莫去。寡躬孤立而何爲。宗社國家。安危呼吸。叔父明炳幾先。切齒腐心。天地不容。可忍群兇之惡逆。社稷爲悅。肯顧一身之死生。雄斷英規。奮發義勇。率茲忠義之士。殲彼兇穢之徒。曾不移時。一舉迅掃。朝廷相慶。道路爭譟。邦本幾搖而復安。神器將傾而復定。此蓋爲猷之壯。秉心之淵。誠感乎鬼神。忠貫乎日月。用能剪羣兇於俄頃。不崇朝而清明。功烈燁然。古今卓爾。不有叔父。予焉及茲。苟非天地祖宗之靈。默佑陰騭。假手叔父。俾靖禍亂。而其生也。關乎氣數者。寧若是乎。乃眷忠誠兼權將相。予披心腹。以委任。卿竭股肱。而盡忠。勸布帝王之仁恩。悉革權姦之弊政。不動聲色。措國家於盤石之安。不以兵戈。奠生靈於康莊之樂。身柱國而人倚以重。功蓋天而自卑。以謙。真可謂托孤寄命。社稷之重臣矣。昔周公誅管蔡。以安王家。大義昭昭。萬古炳炳。推今較古。異世同符。肆策勳爲靖難一等功臣。賜奮忠仗義匡國輔祚定策靖難之號。食邑一千戶。食實封五百戶。歲別俸六百石。奴婢六百口。田五百結。黃金二十五兩。白銀一百兩。鞍具馬四匹。表裏十段。紗羅各五匹。衣一襲。犀帶一腰。紗帽笠靴等物。卿功之多。予賞之少。於卿何有。在予則嫌。冀體至懷。尙可領也。於戲。卿有周公之才之美。而且兼周公之

大勳。予尙成王之年之幼。而又見成王之多難。旣以成王責周公者。責叔父。當以周公輔成王者。輔寡躬。上下交修。何憂不濟。瞻爾忠烈。實深倚毗。故茲教示。想宜知悉。

東文選卷之二十四

終

東文選卷之二十五

制誥

新羅王金傅加尙父都省令官誥教書

王融

教。姬周啓聖之初。先封呂望。劉漢興王之始。首册蕭何。自此大定寰區。廣開基業。立龍圖三十代。躡麟趾四百年。日月重明。乾坤交泰。雖自無爲之主。亦關致理之臣。觀光順化。衛國功臣。上柱國樂浪王政丞食邑三千戶金傅。世處雞林。官分王爵。英烈振凌雲之氣。文章騰擲地之才。富有春秋。貴居茅土。六韜三略。拘入胸襟。七縱五申。撮歸指掌。我太祖。頃載接睦隣之好。早認餘風。尋時頒駙馬之姻。內酬大節。家國旣歸於一統。君臣宛合於三韓。顯播令名。光崇懿範。可加號尙父都省令。仍賜推忠順義崇德守節功臣號。勳封如故。食邑通前爲一萬戶。有司擇日備禮册命。王者施行。

賜李子淵中樞使右常侍

金顯

教某卿。天球異寶。日角英姿。霍子孟之匡漢家。唯持謹慎。庾元規之居晋室。非獨風流。令名克副於朝。僉奇畫密。伸於晝接。官加命數。用示旌酬。今賜卿告身一通。到可領也。

賜金富軾加授同德贊化功臣守太保餘並如故

崔誠

教富軾。卿以先覺之才。居具瞻之地。雲從龍。風從虎。道與時行。爵有德官。有功事稽古制。加之名位之峻。示以禮貌之尊。尙體眷懷。往膺休渥。今賜卿同德贊化功臣守大保。餘如故。告身一通。至可領也。

除金富軾守太保餘並如故

門下。朕以任賢使能者有國之先務。尊德樂道者爲君之令猷。茲圖任於舊人。相與成其政理。眷我典刑之老。魁然社稷之臣。惟功業至大而無前。故恩命有加而不已。載揚休命。敷告外庭。輸忠靖難。功臣檢校太師守太尉門下侍中判尙書吏部事集賢殿太學士太子太師監脩國史上柱國金富軾。柱石三韓。表儀百辟。其敬主也以孟軻之仁義。其告后也以君陳之謀猷。早登侍從之班。居多啓沃。及踐鈞衡之地。大奮經綸。而况杖鐵鉞於外。而賊亂以消。調鹽梅於內。而陰陽以序。年彌高而氣彌壯。位愈尊而志愈謙。國有疑則決於元龜。民所望也。重於九鼎。是用加四字功臣之號。進三師寵秩之崇。實允僉言。顧非私議。於戲於漢則魏丙之輔宣帝。在唐則房杜之相太宗。當時安榮。後世稱頌。雖朕無二君之德。而卿有四賢之才。罔俾古人。專美前史。可特授同德贊化功臣守太保。餘並如故。

金富份罷相判秘書省事

崔惟清

門下。當軸處中。是爲克左右厥辟之任。均勞就逸。蓋其示體貌大臣之宜。雖進

退時或不同。而眷注亦無有異。其官金富份。文章足以藻飾萬物。學術足以貫通三才。有經濟之方。足以惠此中國。有弼亮之業。足以格于皇天。適予求助之時。首被登庸之選。旋從樞府。擢預宰司。秉一節而不同。應百爲而益辨。嘉謀嘉猷。則入告。旣多夙夜之勤。朕心朕德。惟乃知。允協精神之會。方流赫赫之譽。坐竢巍巍之功。奈緣嬰疾之私。遂有辭榮之意。封章屢上。瀝懇愈堅。視貴勢。其若探湯。棄繁機。其猶避羿。因念先朝之法從。或與時遷。歷觀一德之名臣。莫有卿比。誠閱撥煩而撓動。庶幾省事以養願。霈以特恩。賁之異數。統之以武官之節制。領之以秘書之圖書。仍加開府之儀。增崇柱國之號。位兼將相。秩視公師。實爲稀闕之殊私。用副者明之雅量。於戲富貴。惟以道而可處。功名亦因時而有成。優游廟堂。可以鎮定四極。出入臺閣。可以儀刑百僚。往迪厥官。永綏遐福。可特授開府儀同三司守大尉判秘書省事上柱國。

賜金富份守大尉判秘書事

教卿任天下之重。爲學者之師。而退託於微痾。以祈解其繁務。爰擇秩崇而事簡。就易清資。其惟心靜則氣平。行膺異渥。

大寧侯倬除守大保餘並如故

李逢原

門下藩屏國家。實資宗室之勢。封立親戚。厥有古今之儀。眷此賢侯。曰予寵弟。肅考所以加愛。朕心豈敢遺忘。爰據邦彛。宜優禮數。具官倬。天資英儁。器識森

沉。居常祇畏以執心。加以儉勤而克己。處富貴而不溺其習。就學問而不煩其師。復禮爲仁。得大君子之體。好善忘勢。有古賢王之風。自作長於侯藩。已增華於王室。風聲肅於中外。名望重於朝廷。位之高者禮遇之必殊。親之近者恩榮之爲異。惟茲太保之職。所謂三公之官。嘉爾有河間東平之令名。授爾以伊尹召公之舊貫。是霈光華之命。式彰敦睦之仁。於戲念在君親。忠信孝悌之是懋。心存社稷。淫邪佚欲之不爲。尙體至懷。永膺休寵。可特授守大保。餘並如故。

賜任元厚授門下侍郎同中書門下平章事

郭東珣

天官天爵。天下之公器。可以與賢者共之。不可私於人也。卿寬厚有長者之風。而動靜得大臣之體。自作而行事之時。至坐而論道之日。厥有成績。卓爲宗工。予其中錫異恩。以觀來效。茲所以採摛紳中外之公論。非朕私於卿也。

除任元厚門下平章崔湊中書平章李之氏政堂文學

門下。今古相望。難逢千一之會。上下利見。適在二五之期。眷予共政之臣。早協濟時之望。渙其大號。揚于王庭。守司徒中書侍郎平章事判尙書兵部事修國史上柱國任元厚。眞王佐之才。出名臣之後。學窮性命而措諸事業。行在繩墨而道於中庸。自言語侍從之官。至出納論思之任。仁言義色。退補進忠。况中壺得賢。實自閨門之訓。篤而星儲主器。莫非家世之慶。餘以身繫其安危。與國同其休感。俾贊謀於帷幄。累進秩於鈞衡。敷五典以擾兆民。司徒之職可考。統六

師以平邦國。夏官之政乃均。德予曰篤不忘。誠有加而無已。是用金印紫綬。領太尉而贊萬機。鳳閣鸞臺。兼兩省而長百辟。以鎮潭潭之府。以增赫赫之瞻。可特授守太尉門下侍郎同中書門下平章事。餘如故。

守司空尙書左僕射叅知政事判尙書刑部事兼太子少保崔湊。謹慎自持。柔嘉維則。世講八元之美。家傳萬石之風。凡事兩朝。能完一節。雖早登九卿之貴列。而久滯東閣之從聯。國人皆曰賢。朕亦知之有素。外物不可必。道之行也有時。屬西土之興師。掌後軍而決勝。遂擢木兵之地。仍叅論道之司。判秋官之士師。掌文昌之天府。動多績用。可謂老成。所以正宰席於黃扉。作師垣於青禁。堪以柱國。期以格天。可特授中書侍郎平章事兼太子少師柱國。餘並如故。

同知樞密院事禮部尙書翰林學士承旨李之氏。識造幾微。器含方丈。經術得聖人之粹。文章爲儒者之宗。早歷諫曹。再持臺憲。達國體之大者。抗正論以確然。嚮以干戈多事之時。置諸喉舌納言之職。風雲之會。曾不崇朝。寤寐之求。固非一夕。載頒鳳綵。首冠銀臺。視草北門。無媿唐之內相。典朕三禮。何讓舜之秩宗。用之勿疑。待以不次。太子天下之本。非保傅無以成元良。中書政事之堂。惟文學所以明道揆。兼是兩者。得非重歟。可特授金紫光祿大夫堂政文學兼太子少保。餘並如故。於戲。用汝作鹽梅。由是致和羹之美。視臣如手足。可以資元首之明。克紹辟于先王。終有辭于永世。惟朕以懌。其爾之休。

尹彥植可工部尙書

教疇若予工。乃眷在庭之列。汝有積德。果膺仄席之求。敷渙號以惟行。示至誠之樂與。判閣門知三司事。尹彥植。器涵夷遠。行本循良。藉門蔭以出身。在妙年而筮仕。以其出將相名臣之後。凜然有揖讓君子之風。美譽早騰於中闈。華姻早結於戚里。方明懿以母后而敦九族。而裕陵以孝理而待外家。歷踐高華。久更任用。黃門給事。咫尺不違。樞幄納言。夙夜惟允。其勤累代。可謂舊臣。惟乃先正口闢之功。佐我寧王。丕承之烈。威振殊俗。至今無東顧之憂。世選爾勞。肆朕有一門之賞。凡歲遷而月轉。皆俸厚以官清。東閣侍從之班。堂堂束帶之風。采三司鹽鐵之任。一一算心之精微。將多前功。厥有成績。擢冬官而帥屬。聯八座以綴班。惟五材九軌之成。爾所職也。若大旱巨川之用。子何惜焉。於戲。君以祿馭賢。臣以身許國。上下交相利見。茲爲不世之逢。功名非有甚難。當展無窮之聞。無替厥命。永孚于休。可工部尙書。餘如故。

延興宮大妃祖母金氏追封和義郡夫人

閔忠紹

教叙舊勳而錫爵。是自古今。舉懿族以疏封。勿論存歿。行之久矣。續莫厚焉。延興宮大妃祖母金氏。積慶居多。傳芳不歇。曾修峻德。及後嗣以克明。果有令孫。輔先君而益盛。可謂源深而流遠。豈無自葉以霑根。宜覃出綍之恩。用示漏泉之澤。今追封和義郡夫人。

除李之氏金正純並叅知政事

李公升

門下。知人能官者。帝王之明。論道經邦者。宰臣之任。朕雖不明於德。思得圖任其人。乃眷股肱之良。宜峻鈞衡之秩。誕揚渙號。敷告露朝。特進守司空政堂文學。尙書左僕射判尙書禮部事。脩國史兼太子少傅李之氏。慶鍾積善之餘。學致多聞之富。被遇先代。首捷賢科。逮朕紹服之初。克篤事君之義。效見眞儒之用。魯率先多士之寧。周備歷諫垣。久居密地。議論足以藥石。時病才華。足以斧藻王猷。况其尊主庇民之心。加以嫉惡好善之意。鴻樞典命。敷奏不爲之面從。烏府提綱。姦回於是乎瞻落。再掌春闈。而取士式符朕意。之求賢。載歎忠嘉。架深眷注。而自本兵之府。旋叅當軸之司。昔者唐明皇之用嘉貞。蓋因閱其表疏。宋章帝之相文缺。偶自見其詩聯。朕之識卿。非若此比。爰舉疇庸之典。以旌寵待之殊。可特授叅知政事。餘如故。

特進守司空知門下省事。兵部尙書判刑部事。兼太子少保金正純。識度寬弘。智謀深遠。生而有食牛之量。壯乃奮投筆之心。頃屬先朝。征東蕃而問罪。及乎近歲。討西邑以興師。屢收大功。輒露忠膽。其嫉惡也。猶鷹鷂之逐爵。其見險也。如舟楫之濟川。塞塞匪躬。允協義經之義。多多益辦。卽同漢將之謀。可謂文武兼才。朝廷元老。以此論功而議德。固宜授爵以懋官。曾不數年之間。置諸眞宰之列。人無異論。民具爾瞻。可特授叅知政事。餘如故。於戲君義臣行。予違汝弼。

予其克邁。乃訓庶幾。高宗之無愆。汝則自周有終。罔俾阿衡而專美。往踐厥位。永孚于休。

琴儀爲銀青光祿大夫簽書樞密院事左散騎常侍翰林學士承旨官誥

李仁老

教不賞善無以勸善。宜敦善善之風。皆曰賢然後用賢。是實賢賢之教。肆煥其號。必待其人。具官琴儀。純粹鍾於中。如璞玉渾金也。見者知其珍奇。英華發於外。若白虹赤電也。望之無不驚聳。東禁早陪於歌鵠。南州暫屈於割雞。指日上雲霄。卽預金闈之精。曲肱有甲乙。獨專桂嶺之遊。舉足愈高。不膠而固。在選部而銓叙允當。則賜金背鏡。賞其清鑑。侍銅扉而誘掖。彌勤。則去邪蒿化。達其直誠。筆判五花。冠峩一角。誨人於泮宮也。驚七十子之束肖。取士於春官也。豈三十人之得仙。再叅策立之謀。益著誓請之節。入踐龍喉之近署。猶恨隔爐。親宣鳳尾之天書。其出如綉。人物之利害兮。入告于內。軍國之安危兮。敢陳於前。知無不爲。重以自任。謂有此賢勞之效。宜當加特異之稱。大夫丞相之亞秩也。許帶三大夫。學士神仙之美職也。尙兼兩學士。凡威聲之所及。在草木以亦知。肆垂芝檢。以示恩俾。步樞庭而作輔。謀安漢室。默揮在幄之籌。詩壓謝公。幾詠騶階之藥。尙兼承旨。用冠儒臣。可授銀青光祿大夫簽書樞密院事。在散騎常侍翰林學士承旨。於戲房杜之爲相也。或謀或斷。而卿則並致其才。衰盾之爲賢。

也。有畏有愛而卿則並修其美。往踐乃職。永孚于休。

封晉陽侯教書

李奎報

云云。朕觀自古異姓而侯者。非若宗室之例封也。必命世傑出功。豐望重者。然後册之也。是故世亦希有矣。然則有國已來。其豐功重望之如卿者。能復有幾人。而朕獨不使卿得享茅土之封耶。故嘗有疏封之命。以卿確讓。遂寢不行。然一國非可戶曉。安知不有人以予爲祠印者乎。不唯朕意之未安。殆必衆情之猶鬱。且卿之所以擁立予一人。定策佐命。是則朕之帶礪不忘之功也。當獷俗之往來也。料敵制變。知幾如神。尋率民遷都。完保我社稷。至於剪滅叛逆。復振朝綱。是則三韓之功也。天下所同苦者。韃靼統軍撒里打也。由卿奇算所及。斃於一箭。使萬國同悅。是則天下之功也。噫。於朕於三韓於天下。有此奇偉不常之功烈。求之古今。無有儔匹。而朕若重違卿志。持而不斷。則非特三韓也。天下其謂朕何。况早襲父爵。於理大可。然讓而不受。廉也。及己之所自樹立。充滿物意。然後受之。則以德不以世。與夫斟酌取捨。無不允迪。流爲千載美談。不曰嘉哉。賞難久稽。時不可失。宜講登崇之典。少孚中外之心。今遣使金紫光祿大夫守大尉中書侍郎平章事工部尙書崔宗峻。副使銀青光祿大夫知樞密院事兵部尙書上將軍金叔龍等。持節備禮册爾爲晉陽侯。鋪張德業而粲載筠編。增華家藏。署置員寮。而盛開蓮府。連耀賓簪。兼所頒物段。具如別錄。至可領也。

冬寒云云。

李延壽爲守大尉門下侍郎同中書門下平章事判吏部事金義元爲中書侍郎平章事判兵部事崔瑀爲金紫光祿大夫叅知政事吏部尙書判御史臺事史洪紀爲金紫光祿大夫知門下省事吏部尙書判工部事

敎書

云云。夫宰相者。人主之所仰成。百官之所取平。而天下之理亂。未嘗不係於宰相。宰相維其賢。則人主逸。百官正。夫然後天下不足理也。古之人君。孰不欲任賢。使能。垂拱無爲。以享大平。極理之休哉。其所以未爾者。蓋得人之難。得而用之之難。用而致之。宰輔以賴。匡濟之力。斯亦尤難。故爾。今朕得卿之賢。猶恐用之之遲。而卓授經綸之寄。責以來效。則家國之理安。儻可佇而俟矣。今授卿云。

麻制

門下。樂得賢立邦基。大平無憂不致。有奮庸熙帝載。好爵吾與爾縻。况宰衡論道之司。是朝野注意之地。宜登偉器。誕告明廷。

某官李某。幹局沉深。風神峻邁。直諒之性。居暗室而無欺。清廉之心。酌貪泉而不易。立朝嚴毅。則凜凜然難犯。臨事剖決。則恢恢乎有餘。累提攬轡之權。貪吏落膽。而莫敢喘。出播褰帷之化。疲民抃手而無不歌。至若地肅憲臺。資華選部。

凡曰重人之高選，悉皆莅職而允當。朕自昔年素聞英譽，及委納言之寄，益詳行己之全，尋擢置於鴻樞，便登庸於鳳閣。帝賚予弼，夙彰爰立之徵。民具爾瞻，果合是維之望。宜示眷恩之命，用酬光輔之功。是用升鱸服之上司，轉鸞臺之峻級。仍委品題之職，佇推奇偉之人。可特授云云。

某官金某，軀膽曾曾，襟靈浩浩，挺鷲領虎頭之表，從鶚冠魚服之行。方在偏裨，倜儻有奇志，歷勤宿衛，純謹無他腸。登上將之班資，常作寡人之扞禦。時方討虜，諸將迭出而戰征，卿獨侍君，累稔不離於左右，略不形於懈色。真可謂之賢勞，觀其有經遠之才，規欲始秉鈞之漸。故先試樞機之要，而旋除輔相之聯。叔向在朝，古之遺直，子產爲政，人不忍欺。合加甄獎之恩，用答忠勤之効。肆轉中書之秩，仍兼司馬之官。可特授云云。

某官崔某，蓋代功名，軒天量宇，橫一柱而撐拄王室，翳朕倚以爲安。闢大爐而陶冶生民，舉國無不受賜。比來世習之奢靡，莫有禁條之防閑，編戶齊民，或飾牙條而緣履，富商大賈，有將文繡以被墻，及卿弼亮之初，憫世因循之弊，斟酌折衷，而以禮爲界，沿革有度，而以法爲隄。雖至飲酺之間，一從簡約之制，不待叅辰之改次，易俗移風，復分涇渭之混流，揚清激濁，家藏金穴者，摺抑而不用，節礪冰壺者，拔擢而特褒。開東閣而迎賢，杜西園之成市，公道所啓，人才易求。邊民之板蕩也，侮嫚百狀，而爾實沮懲，隣使之往來也，徵詰萬端，而乃能扼制。

國有所急。卿輒敢當。抑又失火生於宮闕之傍。嚴城蕩爲煨燼之末。國之防也。縱難暫曠。役莫巨也。猶重改營。卿乃竭私帑而充其費焉。驅門客而任其勞也。咄嗟而就。宏壯則加。顧功烈非言可宣。雖以重賞而難報。然爵位唯朕所有。豈因自歎而不頒。肆霈優恩。俾叅大政。天官是九流所關也。使之摠柄。夏部是七兵所出也。亦以委權。更加風憲之威。申以階資之峻。茲循物議。非出予私。可特授云云。

某官吏某。生自相門。夙陪禁仗。除拜不拘於常調。翱翔蹀躞於通衢。恂恂似不言。常袖濟時之手段。綽綽然有裕。廓揮料物之心機。領千夫而往討東都也。俘獲甚多。叅七人而入直西掖也。論議有據。雖被富貴之迫。逐於己。常以恭謹而抑損其心。命或中屯。未免流離之患。道不終否。適承徵召之私。仍舊榮班。統予禁衛。蹇蹇有大臣體。溫溫真君子人。必須處以論思。然後副爾器度。旅陟本兵之重地。將階當軸之劇權。或問樹而不言。果能慎密。汝作舟之是命。堪託輔毗。是升東寺以預謀。亦判九工而掌繕。兼以銓衡之柄。更崇金紫之階。可特授云云。嗚戲君臣如魚水之歡。貴同一德。宰相是龜鑑所係。摠訓百寮。未有君臣都俞。而民不和。豈聞宰相約敕。而人不化。勉膺朕命。恪守爾司云云。

改封壽春侯沈爲桂城侯教書

云云。夫骨肉親愛。情之所鍾。故自古據人君之勢。封弟立子。則至於乳齒髫年。

猶使之腰垂斗印，例奉朝請者，理之然也。況者年舊德齡，爲宗室之賢，華組光圭，曾躡侯藩之秩，盍更封於美邑，示特異之優恩云云。

官誥

云云，懿親重德，當以名藩處之。徙食改封，載諸前史多矣。宜循舊典，用獎宗英。且官某量宇泓深，神姿溫裕，弘雅樂善，蹈東平之蹤，嚴矜有威，得沛憲之體。身雖生於紈綺，手不捨於縑緇，制作叅造化之機，學識洞天人之際。象船構思，難窺智略之淵源。馳鈕定封，夙峙邦家之屏翰。頃者忽值風波之駭，暫侵嵐瘴之熏，金經鍊而愈佳，祇益貴耳。月遇虧而旋滿，庸何傷乎。召復已還，眷懷彌渥。更峙苴茅之典，期爲固蒂之圖。大尉三公之魁，漢省司馬然後置。柱國四等之極，楚與令尹而乃同。如匪其人，曷堪是任。可特授守大尉上柱國桂城侯。鳴戲卿本是恂恂長者，朕不必諄諄訓之。然勞謙有終，是君子之德也。斯須不可離，制節謹度，迺諸侯之孝也。朝夕慎所履，飭躬不怠，流裕無窮云云。

崔愈恭爲正議大夫興威衛上將軍判大府事官誥

云云，掌機務而納言，尙書謂之喉吻。董軍師而謹衛，上將譬則爪牙。雖支體之用，惟均。顧防捍之備，尤急。須選百夫之特，益崇萬乘之威。具官某，嚙鐵剛腸，凌雲壯志。學子房書一卷，素自秘於心機。彎顏高弓六鈞，未嘗露其手段。仁必有勇也。故剛柔相濟，才堪經遠也。故文武兼資，受自先朝。昵陪密仗，及尹千人而

軍政肅。坐令霸上爲兒。出師百里而仁化行。復見南陽有父。方憇召公之樹。入登韓信之壇。乃者當頑胡蹈境之時。受陪邑統兵之寄。築城百雉而不日能辦。則賊難思犯。提卒千羆而倍道兼進。則虜輒見俘。茲西土之完固也。惟爾之功。抑東鄙之守禦也。繫卿是賴。載嘉顯烈。擢置峻班。俾兼錢府之權。佇瞻國泉之用。可特授云云。鳴戲。怙寵不戒。則若捨轡馭駿而欲行于遠。居位能卑。則如計級升梯而徑登於高。宜勗乃心。無替予訓。

丁公壽爲神虎衛上將軍官誥

云云。由霸以降。用武之邦。董千軍之勇也。不若選賢將而任焉。責萬人之効也。孰與賞元庸之最者。具官某。早懷康濟國家之志。動有扇揚中外之名。出百里而芟召棠。民蒙膏潤。按一方而攬范轡。吏挾霜寒。屬金國部分之時。當朔郵守禦之寄。疾游兵之行掠。則盡俘而汎掃。哀窮將之來投。則親信而賑賙。彼旣生還。德爾大惠。凡有事則輒報。其爲利者亦多。名爲他國之防。實吠我家之盜。是汝之權時。講好致然也。肆擢置千人之尹。職帶烏臺。未幾除三品之資。權兼鳳省。尋提節鉞。復鎮邊關。邊關籌油幕而坐。折姦萌。或馳檄旣廬而捕還通俗。是實奇功之卓爾。豈將常調以答之。故越諸先進而超授官階。欲肅爾庶寮而申以風憲。果騰茂實。克副精掄。茲降命於中宸。俾卽眞於上將。可特授云云。鳴戲。爵爲砥而礪世者。朕之柄。忠貫日而事君者。臣之心。勉服寵榮。益堅操守云云。

崔正華爲銀青光祿大夫樞密使戶部尙書致仕教書

云云。大抵大夫以從心之年。據經乞退。是雖禮之常也。其若才足以幹國體。智足以贊政經。以左右予一人者。則其在人主貪賢之意。固挽而留之。於理不爲不可。若卿者是已。然卿以齒邁。不任從事爲辭。其志確然有不可奪者如是。而猶強焉。斯又理之不可也。且臣以禮進退。則君以禮待之義也。其所以優其禮者。唯是區區增秩進爵之一段事耳。朕可剗印耶。此之授也。豈其意歟云云。

官誥

云云。龜德元臣。非重官則莫符群望。鴻樞繫列。作軍使者能有幾人。汰而授焉。受亦榮矣。某官某。生由慶閥。夙涉要津。備更中外器使之官。動適方圓幹局之用。嘗掌天臺。則百揆允叙。再司廷尉。則五聽無淹。鎬邑臨民。褰賈裳而宣化。參墟按吏。攬范轡以馳威。頃復以虜兵之寇邊。迺出知戎政而却敵。况爾之外祖某。規模宏大。斟酌詳當。特因赴塞之戍軍。不堪暴露。肇立寓屯之公館。以備幘幪。積善所鍾。有孫惟肖。擬欲置宰衡之地。先擢升機密之司。朕既用之不疑。仰成滋切。卿以老而爲解。乞退甚勤。如不獲已而領之。期有以寵其情耳。肆卽本官而增秩。俾成逸境之願神。於戲上之厚下也。不以遠近移恩。臣之忠國也。不以進退易調。祇膺予命。益勉後圖云云。

盧之正金吾衛上將軍官誥

云云。京邑爲衆大之居，不可無備。金吾掌徼巡之職，以禦非常。統茲驍勇之兵，選必英豪之士。某官某，剛腸嚼鐵，清節礪冰。疾惡面折，則張目敢言。見善心服，則扼腕絕倒。歷位多矣，雖已作巨官豐祿之身。居室淡如，常自爲逸士高人之行。曩奉一麾之命，出專百里之城。摘發如神，吏莫能測。公廉守法，人不忍欺。及還宿衛之班，累荷輒升之寵。凡事上之忠謹，孰與汝之勤勞。非朕獨嘉，乃能抑其推轂者衆。考績亦常例轉，又可刻印之爲，肆登上將之班。蓋徇輿人之意，可特授云云。嗚戲，朕不以城池爲固，而保於良將。爾亦期金石其心，而輔予冲人。惟命之承，其祿不旣云云。

崔傅銀青光祿大夫簽書樞密院事右散騎常侍官誥

云云。位亞黃扉，地親紫禁。凡所圖機密之政，惟一二臣得與聞。雖以予器使之賢，復千萬選然後授。某官某，德爲人範，世襲儒門。幹局識度之皆兼，得大臣體文學德行之無缺。有乃祖風，曩提南國廉按之權。迺奮昔日澄清之志，有劇賊敢圖非望。漸至枝繁，若當時不早爲謀，幾成根固。由爾策先折其銳，故官軍得以易擒。卿實有力，而覆爲他功。賞則未聞，而反遭橫議。有識所嘆，惟朕亦知。故頃者拔白亞卿之聯，直除三品之秩。西掖獻替，屢陳藥石之言。南臺糾彈，肅振風霜之憲。宣威蓮幕，則犬羊莫近我境。典選棘圍，則鸞鳳舉集。爾門真卓，爾非常之才。宜待以不次之遇，是用擢置本兵之地。中兼陪乘之榮，躡衆遷升。是亦

似乎超授較卿才望猶未足以相當。可特授云云。鳴戲朕自比金。以卿爲之良匠。汝惟作楫。俾予濟于巨川。勉服訓詞。往膺寵命云云。

朴文備上將軍兼戶部尙書官誥

云云。位登上將。威摠禁軍。非唯作朕之爪牙。申嚴警備。抑亦爲邦之藩蔽。直折遐衝。苟非其人。曷勝茲任。某官某。虹盤豪膽。鷹騰雄姿。自始涉於仕途。未嘗離於內仗。早自蓄經綸之志。豈專爲武勇之臣。往出守耽羅之舊邦。無奈復黃霸之理最。以爾有當時之遺愛。復令諭茲邑之逆徒。龍節始臨。鶡音旋革。及得補將軍之任。痛欲成蓋代之功。督戍兵而鎮邊。頑戎不敢窺塞。從帥府而征虜。勅敵無與抗衡。跨歷二年。辛勤百戰。俄拜登壇之命。累提杖鉞之權。或迎勞達旦。而俾過復其居。或交好東眞而使一依所教。南宮司會。恢若有餘。東閣節儀。粲然可覩。朕方柄用。理豈反擠。何忽因無妄之災。久勞于外。是必以登庸之漸。先苦其身。凡再更江郡之喧卑。輒能掃島夷之侵寇。雖居左宦。尙竭孤忠。天命豈宜久屯。人望不可終棄。故徵以羽林之峻級。復兼茲板藉之巍司。可特授云云。鳴戲金礪愈精。玉琢更美。由備嘗於險阻。又深得其老成。凡百處心。苟益操於謙柄。在一舉足。卽便躡於台階。祇若予言。同底于道。

東文選卷之二十五

終

東文選第一輯終

